




9

4-8

24



9.-4.e.24





HISTORIA ECCLESIASTICA

VARIIS COLLOQUIIS DIGESTA

U B I

PRO THEOLOGIAE CANDIDATIS

*Res præcipuæ, non solum ad Historiam, sed etiam ad
Dogmata, Criticam, Chronologiam, & Ecclesiæ
Disciplinam pertinentes, per breves Interroga-
tiones, & Responsiones perstringuntur,
& in præclaro ordine collocantur.*

TOMUS SECUNDUS

Complectens duo Ecclesiæ sæcula
Quintum & Sextum.

A U C T O R E

FR. IGNATIO HIACYNTHO

AMAT DE GRAVESON

Sacræ Facultatis Parisiensis Doctore, & Collegii
Casanatensis Theologo, Ord. Fratrum Præd.



ROMÆ MDCCXVII.

Apud Franciscum Gonzagam.

SUPERIORUM PERMISSO.





PRÆFATIO

HISTORIÆ ECCLESIASTICÆ

Studioſo Lectori neceſſaria.

HISTORIAM duorum Eccleſiæ ſæculorum, quinti videlicet & ſexti, deſcribendam adgredimur, unius quidem Tomi anguſtiis comprehenſam, nullo tamen rerum magnitudinis detrimento, nullâ veritatis factâ injuriâ. Lectoris curioſi & Hiſtoriæ Eccleſiaſticae ſtudioſi votis pro viribus facere ſatis ſtuduimus. Delectabit ſiquidem curioſi Lectoris animum inſolentia eventuum, qui ſæculo quinto contigerunt, nimirum Occidentis Imperii extinctio, varia Regnorum exordia *Turcelingorum* ſub Odoacro, & *Oſtrogothorum* ſub Theodorico in Italia; *Francorum* & *Burgundionum* in Galliis, *Wiſigothorum* in Hiſpaniis, *Anglorum* in Britanniae Inſula; *Vandalorum* in Africa. Ad has Occi-

P R Æ F A T I O.

dentalis Imperii, Regnorumque permuta-
 tiones accedunt diuturna bella, quæ duo
 perfidi & ambitiosi homines, *Rufinus* Tu-
 tor *Arcadii* Imperatoris Orientis, & *Sti-
 lico* Tutor *Honorii* Imperatoris Occiden-
 tis concitarunt adversus duos illos Impe-
 ratores, quos adhuc pupillos eorum fidei
 ac curæ *Theodosius* Imperator propediem
 moriturus commiserat. Tot funesta bella
 excipiunt variæ turbæ in Ecclesia excitatæ
 ab Imperatoribus Orientis *Zenone*, &
Anastasio, quorum primus promulgato
 suo Edicto, quod *Henoticon* appellatur,
 universam perturbavit Ecclesiam; Alter
 verò Eutychianæ Hæresis fautor inter præ-
 cipuos Ecclesiæ hostes jure optimo annu-
 meratur. Hinc multæ manarunt perse-
 cutiones, quibus sub finem quinti, & ini-
 tium sexti sæculi afflicta fuit Ecclesia,
 maximè, cum id temporis nulli in toto
 orbe Principes essent, excepto *Clodoveo*
 Galliarum Rege, qui Catholicam Fidem
 profiterentur. *Anastasius* quippè Orien-
 tis

tis

P R E F A T I O.

tis Imperator Eutychianæ Hæresi, ut mox diximus, aperte favebat; *Theodoricus* Italiæ Rex, necnon *Alaricus* Wisigothorum Rex, qui Hispaniæ & parti Galliæ dominabatur; Rex quoque Burgundionum, & Rex Vandalorum in Africa inluto Arianæ Hæreseos hærebant, cæterarum verò Orbis gentium Reges densissimis Idololatriæ tenebris erant immerfi.

Verùm, quemadmodum tot variorum eventuum narratio curiosi Lectoris animum oblectabit, ità non minorem, ut spero, voluptatem percipiet Historiæ Ecclesiasticæ studiosus Lector, dùm percurreret Historiam Hæresum Nestorianorum, Eutychianorum, Pelagianorum & Semipelagianorum, quæ in quinto sæculo emerferunt, diùque Ecclesiam infestarunt; dùm perlustrabit Concilia, in quibus aut prædictæ Hæreses proscriptæ sunt, aut collapsa Ecclesiæ Disciplina fuit instaurata; dùm insuper expendet famosam illam ac celebrem controversiam *de tribus Ca-*

P R Æ F A T I O.

pitulis, quæ in sexto sæculo multas in Ecclesia excitavit tragœdias, & quâ nulla ab ipso Christiani nominis exordio fideles inter sese concertatio tenuit aut partium dissidentium ardore pertinacior, aut controversæ quæstionis sublimitate dignior, aut eventuum varietate feracior; dum postremò originem dissensionis, quæ occasione doctrinæ Origenis exitit S. Joannem Chrysostomum inter & S. Epiphanium, S. Hieronymum, & Joannem Antistitem Hierosolymitanum perspectam habebit, scietque genuina Opera accurato Criterio discernere à dubiis & spuriiis Sanctorum Patrum, qui in quinto & sexto Ecclesiæ sæculis floruerunt, quique in rei Orthodoxæ tutelam vigilantissimè excubantes contra insurgentium Hæreticorum impetus impavidi steterunt, & serpentes eorum errores doctissimis suis lucubrationibus confutarunt. Hos inter Sanctos Patres præfulget potissimùm S. *Augustinus*, qui post prostratos Arianos, Manichæos
& Do-

P R Æ F A T I O.

& Donatistas, Pelagianorum & Semipelagianorum Hæresim per viginti annorum spatium herculeo labore & adamantino pectore oppugnavit, eamque tandem tot annorum diuturnitate roboratam, tot instar hydræ redivivam cladibus, tot superbam exitiis, tot locis longè latèquè diffusam debellavit, vicit, profligavit, atque ad medicinalis Christi Servatoris nostri ad singulos pietatis actus necessitatem defendendam invicta arma posteris suppeditavit, sicut testatur S. *Fulgentius lib. 2. de verit. Prædest. & Gratiæ* his verbis: *Turris fortitudinis ipsam gratiam tenens, & exinde cunctas hostium machinationes telorum cœlestis juvaminis virtute confringens* (Augustinus) *non solum ipse de hoste victoriam referens triumphavit, quin etiam posteris certandi & vincendi ordinem, si quando victa pravitas recidivo ausu infandum caput erigere niteretur, ostendit.* In his, inquam, & aliis id genus perdiscendis, sicut & in le-

276



9.-4.e.24







HISTORIA ECCLESIASTICA VARIIS COLLOQUIIS DIGESTA

U B I

PRO THEOLOGIAE CANDIDATIS

*Res præcipuæ, non solum ad Historiam, sed etiam ad
Dogmata, Criticam, Chronologiam, & Ecclesiæ
Disciplinam pertinentes, per breves Interroga-
tiones, & Responsiones perstringuntur,
& in præclaro ordine collocantur.*



TOMUS SECUNDUS

Complectens duo Ecclesiæ sæcula
Quintum & Sextum.

A U C T O R E

FR. IGNATIO HIACYNTHO

AMAT DE GRAVESON

Sacræ Facultatis Parisiensis Doctore, & Collegii
Casanatenfis Theologo, Ord. Fratrum Præd.



ROMÆ MDCCXVII.

Apud Franciscum Gonzagam.

SUPERIORUM PERMISSU.





PRÆFATIO

HISTORIÆ ECCLESIASTICÆ

Studioſo Lectori neceſſaria.

HISTORIAM duorum Eccleſiæ ſæculorum, quinti videlicet & ſexti, deſcribendam adgredimur, unius quidem Tomi anguſtiis comprehenſam, nullo tamen rerum magnitudinis detrimento, nullâ veritatis factâ injuriâ. Lectoris curioſi & Hiſtoriæ Eccleſiaſticæ ſtudioſi votis pro viribus facere ſatis ſtuduimus. Delectabit ſiquidem curioſi Lectoris animum inſolentia eventuum, qui ſæculo quinto contigerunt, nimirum Occidentis Imperii extinctio, varia Regnorum exordia *Turcèlingorum* ſub Odoacro, & *Oſtrogothorum* ſub Theodorico in Italia; *Francorum* & *Burgundionum* in Galliis, *Wiſigothorum* in Hiſpaniis, *Anglorum* in Britannię Inſula; *Vandalorum* in Africa. Ad hæc Occi-

2 2

den-

P R Æ F A T I O.

dentalis Imperii, Regnorumque permuta-
 tiones accedunt diuturna bella, quæ duo
 perfidi & ambitiosi homines, *Rufinus* Tu-
 tor *Arcadii* Imperatoris Orientis, & *Sti-
 lico* Tutor *Honorii* Imperatoris Occiden-
 tis concitarunt adversus duos illos Impe-
 ratores, quos adhuc pupillos eorum fidei
 ac curæ *Theodosius* Imperator propediem
 moriturus commiserat. Tot funesta bella
 excipiunt variæ turbæ in Ecclesia excitatæ
 ab Imperatoribus Orientis *Zenone*, &
Anastasio, quorum primus promulgato
 suo Edicto, quod *Henoticon* appellatur,
 universam perturbavit Ecclesiam; Alter
 verò Eutychanæ Hæresis fautor inter præ-
 cipuos Ecclesiæ hostes jure optimo annu-
 meratur. Hinc multæ manarunt perse-
 cutiones, quibus sub finem quinti, & ini-
 tium sexti sæculi afflictæ fuit Ecclesia,
 maximè, cum id temporis nulli in toto
 orbe Principes essent, excepto *Clodoveo*
 Galliarum Rege, qui Catholicam Fidem
 profiterentur. *Anastasius* quippè Orien-
 tis

P R E F A T I O.

tis Imperator Eutychianæ Hæresi, ut mox diximus, apertè favebat; *Theodoricus* Italiæ Rex, necnon *Alaricus* Wisigothorum Rex, qui Hispaniæ & parti Galliæ dominabatur; Rex quoque Burgundionum, & Rex Vandalorum in Africa inluto Arianæ Hæreseos hærebant, cæterarum verò Orbis gentium Reges densissimis Idololatriæ tenebris erant immerfi.

Verùm, quemadmodum tot variorum eventuum narratio curiosi Lectoris animum oblectabit, ità non minorem, ut spero, voluptatem percipiet Historiæ Ecclesiasticæ studiosus Lector, dùm percurreret Historiam Hæresum Nestorianorum, Eutychianorum, Pelagianorum & Semipelagianorum, quæ in quinto sæculo emerferunt, diùque Ecclesiam infestarunt; dùm perlustrabit Concilia, in quibus aut prædictæ Hæreses proscriptæ sunt, aut collapsa Ecclesiæ Disciplina fuit instaurata; dùm insuper expendet famosam illam ac celebrem controversiam *de tribus Ca-*

P R Æ F A T I O.

pitulis, quæ in sexto sæculo multas in Ecclesia excitavit tragœdias, & quâ nulla ab ipso Christiani nominis exordio fideles inter sese concertatio tenuit aut partium diffidentium ardore pertinacior, aut controversæ quæstionis sublimitate dignior, aut eventuum varietate feracior; dum postremò originem dissensionis, quæ occasione doctrinæ Origenis extitit S. Joannem Chrysostomum inter & S. Epiphanium, S. Hieronymum, & Joannem Antistitem Hierosolymitanum perspectam habebit, scietque genuina Opera accurato Criterio discernere à dubiis & spuriiis Sanctorum Patrum, qui in quinto & sexto Ecclesiæ sæculis floruerunt, quique in rei Orthodoxæ tutelam vigilantissimè excubantes contra insurgentium Hæreticorum impetus impavidi steterunt, & serpentes eorum errores doctissimis suis lucubrationibus confutarunt. Hos inter Sanctos Patres præfulget potissimùm S. *Augustinus*, qui post prostratos Arianos, Manichæos
& Do-

P R Æ F A T I O.

& Donatistas, Pelagianorum & Semipelagianorum Hæresim per viginti annorum spatium herculeo labore & adamantino pectore oppugnavit, eamque tandem tot annorum diuturnitate roboratam, tot instar hydræ redivivam cladibus, tot superbam exitiis, tot locis longè latèquè diffusam debellavit, vicit, profligavit, atque ad medicinalis Christi Servatoris nostri ad singulos pietatis actus necessitatem defendendam invicta arma posteris suppeditavit, sicut testatur S. Fulgentius lib. 2. de verit. Prædest. & Gratiæ his verbis: *Turris fortitudinis ipsam gratiam tenens, & exinde cunctas hostium machinationes telorum cœlestis juvaminis virtute confringens* (Augustinus) *non solum ipse de hoste victoriam referens triumphavit, quin etiam posteris certandi & vincendi ordinem, si quando victa pravitas recidivo ausu infandum caput erigere niteretur, ostendit.* In his, inquam, & aliis id genus perdiscendis, sicut & in le-

P R Æ F A T I O.

Citandis gestis Summorum Pontificum ,
 qui sæculis quinto & sexto Ecclesiam fan-
 ctissimè rexerunt , atque demùm in com-
 paranda notitia Doctrinæ , Disciplinæ &
 Moralis Christianæ , quæ in istis duobus
 sæculis viguerunt , non parùm voluptatis
 à Lectore Historiæ Ecclesiasticæ studio
 perceptum iri certissimè confido . Qua-
 propter necessum non est , ut ei jam spon-
 te currenti calcaria addam , sed solùm ve-
 lim ut duo hîc breviter observet , quorum
 notitia ad uberiores dilucidationem re-
 rum , quas deinceps dicturi sumus appri-
 mè necessaria est .

In primis , cùm in Historia quinti
 & sexti Ecclesiæ sæculorum sæpè de *Di-
 ptychis Ecclesiasticis* mentio occurrat , præ-
 fertim occasione *Acacii* Patriarchæ Con-
 stantinopolitani Hæresi Eutychianæ clàm
 addicti , cujus nomen Romani Pontifices
 è *Diptychis Ecclesiasticis* eraserunt , nec
 pacem Ecclesiæ Orientali concesserunt ,
 nisi postquam ipsamet tandem consensis-
set ,

P R Æ F A T I O.

set, ut *Acacii* cæterorumque ejus sequacium infauſta nomina ex Græcarum Eccleſiarum Diptychis obliterarentur; præſtat ut in antecellum paucis hîc exponamus, quid Diptychorum Eccleſiaſticorum nomine intelligendum veniat, & quis eorum in ſacris uſus fuerit?

Diptycha itaque Eccleſiaſtica nihil aliud erant, quàm membranacei, ſeu chartacei Codices, in quibus nomina Episcoporum, & aliorum Catholicæ Eccleſiæ Fidelium erant inſcripta, & in hoc diſtinguebantur à prophanis Diptychis, quibus novi Conſulis nomen aureis characteribus ſingulis annis ſcribebatur, quod Diptycha prophana, ſeu conſularia, eſſent Tabulæ non membranaceæ, ſed eburneæ, ut colligitur ex Codice Theodoſiano, ubi extat Reſcriptum ab Imperatoribus *Valentiniano*, & *Theodoſio* datum anno CCCLXXXIV. his verbis conceptum: *Illud etiam Conſtitutione ſolidamus, ut, exceptis Conſulibus ordinariis, nulli prorsus*

P R Æ F A T I O .

sùs alteri auream sportulam, Diptycha ex ebore edendi facultas sit. Cùm publica celebrantur officia, sit sportulis nummus argenteus, alia materia Diptychis. Hæc prophana, seu consularia Diptycha non uno loco inter antiquissima Cimelia inventa publicavit Alexander Witbelmius, eaque perdocto Commentario illustravit. Porro, ex his prophanis, seu consularibus Diptychis, ut optimè observat Card. Norisius in Dissertatione Historica de Synodo V. capite quinto, Catalogi, in quibus Episcoporum, aliorumque fidelium erant inscripta nomina, Diptychorum nomen deinceps mutuari cæperunt, & consularia Diptycha postea sacra & Ecclesiastica evaserunt, quæ licèt, ut mox diximus, eburnea non essent, sed tantùm membranæ quædam, has tamen membranas coopertoriis, seu operculis eboreis, vel alterius pretiosæ materiæ tegumentis inclusas fuisse indicat Fortunatus lib. 10. carm. 7. de Natalitio die S. Martini Turonen-

P R E F A T I O .

sis ad *Ckildebertum* Galliarum Regem
ubi ait:

*Nomina vestra legant Patriarchis
atque Prophetis*

*Cui bodie in templo Diptychus edic-
ebur .*

Ecclesiastica Diptycha alia erant *Viven-
tium*, alia *Mortuorum*; nam diversis li-
bris eorum nomina scribebantur . Id li-
quidò patet ex litteris *Attici* Patriarchæ
Constantinopolitani ad *Cyrrillum* Patriar-
cham Alexandrinum de restituto Dipty-
chis Ecclesiasticis Sancti Chrysostomi no-
mine, ubi hæc scribit: *Mentio namque
ejus (seu Chrysostomi) fit cum Defunctis
non solùm Episcopis, sed & Presbyteris,
Diaconis, & Laicis ipsis, mulieribus-
que, &c. Magna est enim inter Defun-
ctos & superstites differentia, ut etiam
libri propter differentiam eorum, quorum
memoria conservatur, statum, discreti
sint . Ex quibus verbis duo comperta ha-
bemus . Primum est, quod alia essent Ec-
cle-*

P R A E F A T I O.

clesiastica Diptycha Viventium, alia Mortuorum. Alterum est, quod ejusmodi Diptycha tam sacrorum Ministrorum, quàm Laicorum, immò & mulierum nomina complecterentur. Inde tamen colligi haud debet, omnia nomina promiscuè & indiscriminatim in hisce Diptychis fuisse inscripta, sed in una pagina Episcopi, in alia Presbyteri, in altera Diaconi, atque ita diversis etiam Laici ac foeminæ Diptychis consignabantur. Doctissimus Card. Bona lib. 2. *Rerum Liturgicarum* cap. xii. ait, tria fuisse genera Diptychorum, sive Tabularum, quibus nomina in singulis Ecclesiis inscribebantur. Primum erat peculiare *Episcoporum*, eorum præsertim, qui illam Ecclesiam rexerant, dummodò probitate suâ ac sanctis moribus claruissent. Alterum erat *Vivorum*, in quibus eorum nomina descripta erant, qui adhuc viventes dignitate aliquâ, vel beneficiis illi Ecclesiæ collatis, vel alio titulo benè meriti erant. In his secundi

P R Æ F A T I O.

generis Diptychis primo loco Romanus Pontifex, tum alii Patriarchæ, & proprius Antistes, ac reliqui Clero adscripti recensentur: postea Imperator, Principes, Magistratus & Populus fidelis. Tertium genus Diptychorum erat *Mortuorum*, qui in Catholica communione decesserant, & vel Principatu temporali, vel dignitate Episcopali, vel aliis in Ecclesiam meritis ac beneficiis spectabiles fuerant dum essent in vivis. Præter hæc tria Diptychorum genera, alia, teste eodem Cardinali *Bona*, erant Diptycha, seu Tabulæ, quibus inscripta erant nomina eorum, qui ad Baptismum accedebant.

In summa veneratione apud Fideles erant Diptycha Ecclesiastica, quippè quæ in sacro-sancto Mysterio exponebantur, & postquam Diaconus, ut legitur in liturgiis Sanctorum Basilii & Chrysostomi, ea thure suffierat, altâ voce in Ambone illa recitabat, non tamen omnia Fidelium, tam vivorum, quàm mortuorum in Dipty-

pty-

P R Æ F A T I O.

ptychis inscripta legebat, (ut quibusdam Scriptoribus perperam visum est. Ad eam siquidem tot nominum recitationem, potissimum post fidem jam propagatam, & extirpatam Idololatriam, nec menses, nec anni suffecissent, maximè in Civitatibus, quæ innumerabilem populi multitudinem continebant) sed delectus habebatur, & in Diptychis tam viventium, quàm in Domino dormientium, quæ publicè à Diacono in ambone legébantur, eorum tantum nomina recitabantur, qui inter cæteros aliquâ speciali notâ præminebant, facta de reliquis generali commemoratione. Hæc praxis legendi inter sacram Synaxim Diptycha Ecclesiastica apertè colligitur ex Actis Synodi Constantinopolitanæ anno dxxviii. celebratæ. In his enim legitur, quod cum populus conclamasset : *Diptycha amboni. Qui non loquitur, Manichæus est. Diptycha amboni*, Joannes Patriarcha populo satisfecit : *Post lectionem sancti*
Evan-

P R Æ F A T I O.

Evangelii ex more sacrâ Missâ finita & januis clausis (Missa videlicet Catechumenorum, quibus post Evangelii recitationem extra Ecclesiam dimissis januæ claudebantur) lectione juxta consuetudinem facta, tempore Diptychorum concurret omnis multitudo cum magno silentio circum circa altare & audiebat. Et cum solum lecta fuissent à Diacono prædictarum quatuor Synodorum, & sanctæ memoriæ Archiepiscoporum Euphemii, Macedonii, & Leonis nomina, voce magna universi clamaverunt: Gloria tibi Domine. S. Leonis Papæ, necnon Euphemii, ac Macedonii urbis Constantinopolitanæ Antistitum nomina Anastasius Hæreticus Imperator è sacris tabulis eraserat, sed eo mortuo die nonâ mensis Julii anni dxxviii. è vestigio eorundem. Præsulum nomina sacris Tabulis, seu Diptychis Ecclesiasticis restituta sunt. Eandem praxim recitandi inter Missæ Sacrificium nomina in Diptychis, inscripta ob-
fer-

P R Æ F A T I O.

servandam præcipit Concilium Emeritenſe Canone 19. his verbis: *Proinde ſalubri deliberatione cenſemus, ut pro ſingulis quibuſque Eccleſiis, in quibus Presbyter juſſus fuerit per ſui Epiſcopi ordinationem præeſſe, pro ſingulis diebus Dominicis Sacrificium Deo procuret offerre, & eorum nomina, à quibus Eccleſias conſtat eſſe conſtructas, vel qui aliquid his ſanctis Eccleſiis videtur, aut viſi ſunt contuliſſe, ſi viuentes in corpore ſint, ante altare recitentur tempore Miſſæ. Quod ſi ab hac luce diſceſſerint, nomina eorum cum fidelibus recitentur ſuo in ordine. Denique, cavit ſemper Catholica Eccleſia, ne Sanctorum, & in communione Catholicæ Eccleſiæ defunctorum Epiſcoporum nomina è Diptychis Eccleſiaſticis expungerentur. Hæc namque expunctio pœna erat illis ſolis inflicta, qui vel à Fide Catholica defecerant, vel ob aliquod crimen à communione fidelium fuerant ſeparati. Hinc, ut oſtendemus in ſerie.*

Hi-

P R Æ F A T I O .

Historiæ Ecclesiæ sæculorum quinti & sexti, postquam *S. Chrysostomus* Patriarcha Constantinopolitanus factione *Eudoxiæ Augustæ*, & *Theophili* Patriarchæ Alexandrini in Conciliabulo ad *Quercum* coacto injustè damnatus & Episcopatu fuisset dejectus, ejusque nomen è Diptychis Ecclesiasticis expunctum; Innocentius I. Pontifex Maximus Sancti illius Episcopi susceptâ discussâque causâ, injustum hujus Conciliabuli Decretum abrogavit, atque in exilio defuncti Chrysostomi memoriam honorificè restitui curavit, nec aliter pax inter Orientis & Occidentis Ecclesias studiis hac in re divisas iniri potuit, nisi priùs restituto in Ecclesiasticis Diptychis Chrysostomi nomine. Sed, versâ vice, postquam *Acacius* Patriarcha Constantinopolitanus Eutychianę Hæresis fautor, sese in quinto sæculo ab Ecclesia Romana, factò Schismate, separasset, omni studio connixi sunt Romani Pontifices *Gelasius*, *Anastasius*, & *Symmachus*

P R Æ F A T I O.

ut perfidi *Acacii* jam demortui nomen ex Græcarum Ecclesiarum Diptychis omnino deleteretur, idque tandem obtinuit *Hormisdas* Summus Pontifex à *Justino* religiosissimo Imperatore, sub quo sublatum fuit diuturnum Schisma, & pax Orientalem inter & Occidentalem Ecclesiam felicissimè restituta est, damnatâ duorum præcedentium Hæreticorum Imperatorum, *Zenonis*, & *Anastasii* memoriâ, expunctisque sacris ex tabulis eorum simul & *Acacii*, cæterorumque ipsis adhærentium nominibus. Sed de materia, usu, & recitatione Diptychorum Ecclesiasticorum hæc indicasse sufficiat.

Alterum, quod in hac Præfatione Lector Historiæ Ecclesiasticæ studiosus accuratè velim observet, spectat quintam Synodum generalem in sexto sæculo, seu anno DLIII. celebratam, in qua non solum damnata sunt *tria famosa Capitula*, videlicet scripta & persona *Theodori Mopsuesteni* Episcopi, scripta *Theodoreti Cy-*
ri

PRÆFATIO.

ri Antistitis contra XII. Anathematismos
S. Cyrilli Alexandrini, & Epistola *Iba*
Edeffeni Præfulis ad *Marim* Persam; sed
etiam confixus est *Origenes*. Plura qui-
dem de hac quinta Synodo generali dice-
mus in Historia sexti Ecclesiæ sæculi, hic
tamen Lectorem necessario præmunien-
dum esse duxi contra duos errores, in quos
impegit *Petrus Halloixius* Leodienfis
Scriptor in Apologia, quam edidit pro
Origene. Enim verò, ut *Origenem* ab
errore vindicaret ille Scriptor, ausus est
asserere, quintam Synodum à Sede Apo-
stolica non fuisse approbatam, *sed magis*
ab Ecclesia Catholica toleratam esse ac per-
missam, quàm grato animo admissam &
receptam. Addit etiam, hanc quintam
Synodum nulla esse veneratione dignam:
Quomodo, inquit, Justiniani Concilia-
bulum instigante Diabolo concitatum &
confectum, potest ulla veneratione esse
dignum? Secundò, pertendit idem Scri-
ptor, *Origenem* non fuisse dampnatum in

P R Æ F A T I O.

quinta Synodo. Hos duos *Halloixii* errores, velut inaudita hæctenus paradoxa lato & perdocto calamo confutavit Card. *Norifius* in sua Dissertatione Historica de quinta Synodo. Quocircà, abundè hîc sufficiet duo contra *Halloixium* breviter probare, quæ absque temeritate negari, aut in dubium revocari haud possunt, videlicet quintam Synodum à Sede Apostolica fuisse approbatam, & tamquam Oecumenicam ab universa Ecclesia receptam. Secundò, *Origenem* in quinta Synodo fuisse reverà damnatum.

Et primò quidem mirari vehementer subit, quâ fronte potuerit *Halloixius* asserere, quintam Synodum à Sede Apostolica non fuisse confirmatam, cùm innumera penè extent antiquitatis monumenta, quæ ejus temeritas facili negotio revinci possit. Extat siquidem *Vigilii* Papæ ad *Eutychium Patriarcham Constantinopolitanum* & ad præjacentem Synodum Epistola, quàm Illustrissimus *Petrus*

P R Æ F A T I O.

trus de Marca Archipræsul Parisiensis è veteri Codice MS. Bibliothecæ Regiæ eruit, in qua *Vigilius* Papa disertè rescindit *Constitutum*; & alia, quæ pro trium Capitulorum defensione olim scripserat, vel gesserat. Eruditus etiam *Baluzius* in nova Collectione Conc. pag. 1551. invenit in veteri Codice MS. Bibliothecæ Colbertinæ *Constitutum* Vigilii Papæ pro damnatione trium Capitulorum, in quo Summus ille Pontifex fusè, doctèque tria Capitula explicat, refellit & damnat, tandemque concludit his verbis: *Quæcumque verò sive meo nomine, sive quorumlibet pro defensione memoratorum trium Capitulorum prolata fuerint, vel ubicumque reperta, præsentis nostri plenissimè constituti auctoritate evacuamus.* Nec solum *Vigilius* Papa, abjectâ priori sententiâ, tria Capitula proscripsit, & quintam Synodum approbavit, sed etiam eandem Synodum, tamquàm Oecumenicam ab omnibus Fidelibus suscipiendam

P R Æ F A T I O.

esse constanter profitentur *Vigilii* Papæ
 successores. *Pelagius I.* in Epistola v. ad
Narsem Romani exercitus Ducem quin-
 tam Synodum adversus *tria Capitula* ce-
 lebratam appellat *universalem Synodum*,
 & Venetiarum, Istriæque Episcopos, sed
 præsertim *Paulinum* Aquilejensem Caput
 factionis Schismaticorum, qui tria Capi-
 tula acriter defendebant, & quintam Sy-
 nodum repudiabant, invocato sæcularium
 Potestatum auxilio coerceri & in ordinem
 redigi debere affirmat. *Pelagius II.* quin-
 tam Synodum Pontificiâ auctoritate iti-
 dem approbavit, ut videre est in ejus Epi-
 stola ad *Eliam* Aquilejensem, & Istriæ
 Episcopos ab Ecclesia Romana ob trium
 Capitulorum defensionem divulsos. *San-*
ctus Gregorius Magnus Synodum quin-
 tam, ceu Oecumenicam veneratus est,
 ut constat ex ejus Epistola ad *Joannem*
 Patriarcham Constantinopolitanum, ubi
 postquam Sanctissimus ille Pontifex pro-
 fessus est, se sicut Evangelii quatuor li-
 bros,

P R A E F A T I O.

broſ, ſic quatuor Concilia, videlicet Ni-
cænum, Conſtantinopolitanum I. Ephe-
ſinum, & Chalcedonenſe ſuſcipere ac ve-
nerari, conſeſtim ſubdit: *Quintum Con-
cilium pariter veneror, in quo Episto-
la, quæ Iba dicitur, erroris plena reproba-
tur: & Theodorus perſonam Mediatoris
Dei & hominum in duabus ſubſiſten-
tiis ſeparans, ad impietatis perſidiam ce-
cidiffe convincitur: ſcripta quoque Theo-
doreti, per quæ B. Cyrilli fides repreben-
ditur, auſu dementiæ prolata refutantur.*
Martinus V. Pontifex Maximus in Conci-
lio Lateranenſi adverſus Monotheliſas Se-
cretario IV. legi juſſit Concilii V. defini-
tionem cum hac Epigraphe: *Definitio
ſanctæ quintæ Synodi.* Sed quid neceſſe
eſt plures hanc in rem adducere Pontifi-
ces, cum ex libro Diurno Romanorum
Pontificum manifeſtò pateat, in profes-
ſione fidei, quam recens electus Pontifex
emittebat, quintam Synodum cum aliis
quatuor Oecumenicis connumeratam &

P R Æ F A T I O.

receptam fuisse : *Sancta quoque universalia Concilia , Nicænum , Constantinopolitanum , Ephesinum , Calcedonense & secundum Constantinopolitanum , quod Justiniani piæ memoriæ Principis temporibus celebratum sit , usque ad unum apicem immutilata servare .* His momentis , quæ Conciliorum definitionibus & omnium fidelium consensu roborantur , sole clariùs evincitur , quintam Synodum contraria Capitula convocatam , auctoritate Romanorum Pontificum fuisse approbatam , & tamquam Oecumenicam consensione universæ Ecclesiæ receptam , adeoque à temeritatis nota , ne quid graviùs dicam , nullo pacto excusari posse *Halloixium* , qui in contrariam abiit sententiam , & quintam Synodum non erubuit appellare *Justiniani Conciliabulum instigante Diabolo confectum .*

Verùm , ne quid hac in re dissimulare videar , ultrò quidem ac libens fateor , Hispaniarum Ecclesiæ Episcopos quintam

Sy-

P R A E F A T I O .

Synodum statim non recepisse, eosque tamen communione semper conjunctos fuisse cum Romanis Pontificibus, aliisque Episcopis, qui eidem Synodo adhærebant. Sed contendo tamen, indè cum *Halloixio* colligi minimè debere, quintam Synodum nec Oecumenicam esse, nec à Sede Apostolica approbatam, aut eam salvâ & inculpatâ fide rejicere vel repudiare unicuique integrum fuisse. Ratio est, quia hunc Hispanorum dissensum Romani Pontifices prudenti quadam Oeconomîâ ad tempus diffimularunt, & tolerarunt, donèc Hispani errorem facti dedocerentur, quo sibi falsò persuaserant, quintam Synodum esse Chalcedonensi contrariam. Eâ de causâ ergâ Catholicos & pacis Ecclesiasticæ amantes Antistites Hispanos silentio & dispensatione aliquandiu utendum Romani Pontifices existimarunt, maximè, cùm in quinta Synodo generali non de fide, sed de personis tantummodò actum esset, & aliundè reverentia, quàm
Sedi

P R Æ F A T I O .

Sedi Apostolicæ deferebant Hispaniarum Episcopi, spem Ecclesiæ faceret maximam, fore ut, errore facti propediem deposito, ad sententiam universæ Ecclesiæ accederent, & quintam Synodum amplecterentur. Hinc *Sanctus Gregorius Magnus* in Epistola ad *Constantium* Episcopum Mediolanensem, qui conabatur *Theodelindam* Longobardorum Reginam piissimam à defensoribus trium Capitulorum seductam ad Communionem Ecclesiæ reducere, prudenter sic respondit : *Quod scripsistis quia Epistolam meam Regine Theodelinde minimè transmittere voluistis, pro eo quod quinta Synodus in ea nominabatur ; si eam exinde scandalizari posse credidistis, rectè factum est, ut minimè transmitteretur. Undè nunc ità facimus, sicut vobis placuit, ut quatuor Synodos solummodò laudaremus, & quintæ Synodi nullam mentionem faceremus. Eâ Oeconomiam, & prudenti dispensatione usus Sanctissimus*

mus

P R Æ F A T I O .

mus ille Pontifex Reginam *Theodelindam*, & alios quàm plures Schismaticos, qui Synodum quintam esse contrariam Concilio Chalcedonensi perperam autumabant, evulso eo dubio, quod eorum animis altè infidebat, ad Ecclesiæ communionem feliciter revocavit.

Exploso primo errore *Petri Halloixii*, asserentis quintam Synodum nec à Romanis Pontificibus approbatam, nec universæ Ecclesiæ consensu fuisse receptam; superest, ut paucis nunc refellam alium errorem, in quem lapsus est idem Scriptor in Apologia, quam pro *Origene* adornavit, ubi vanis & futilibus conjecturis capite decimo probandum suscipit, Origenem non fuisse damnatum in quinta Synodo, quia, inquit, in Actis quintæ Synodi nulla extat Origenis damnatio, nullum de hac Origenis damnatione apud Victorem Tunonensem, vel Facundum Hermianensem Scriptores horumce temporum æquales & re-

rum

P R Æ F A T I O .

rum gestarum testes apparet vestigium . Arriserat olim eadem sententia Illustrissimo *Danieli Huetio* Episcopo Abrincensi , sed re accuratiùs pensitatâ , ut ipsemet ait *libro 2. Origenianorum* cap. 4. Sect. 3. num. 14. mutavit sententiam , & actam in quinta Synodo Origenis causam , ipsumque cum Asseclis damnatum & Anathemate confossum fuisse invictè probat multis argumentis , quorum præcipua hîc perstringere sufficiet . Primum petitur ex testimonio *Evagrii* , qui lib. 4. Historiæ Ecclesiasticæ cap. 37. totius rei summam , & ipsa verba Anathematis in quinta Synodo in Origenem prolati refert , ipsumque sequitur totum Græcorum agmen , videlicet Auctor Chronici Alexandrini , Georgius Syncellus , Theophanes , Photius in libello de Synodis , Nilus Rhodius , & Anonymi duo , qui de Synodis quoque scripserunt , quosque in canonici juris antiqui Bibliothecam contulit *Henricus Justellus* vir clarissimus .

His

P R Æ F A T I O.

His etiam suffragantur Zonaras, Glycas, maximè verò Cedrenus, qui & Justiniani Imperatoris Epistolam repræsentat, in qua flagitat à Patribus quintæ Synodi, ut Origenem, Origenisque Gregales damnent, & Nicephorus, qui Anathematismos in quinta Synodo in Origenem vibratos recitat lib. 17. Hist. Eccles. cap. 28. Præterea, Cyrillus Monachus, qui Justiniani Imperatoris ævo claruit, & res in quinta Synodo gestas ignorare haud potuit, perspicuè docet, Origenem in eadem damnatum fuisse, ut videre est in Vita, quam descripsit S. *Euthymii* cap. 105. & in Vita *Sancti Sabæ* cap. ultimo. Denique Origenem confixum fuisse in quinta Synodo generali testantur Patres Synodi sextæ generalis, Act. 17. & 18. Leo II. Romanus Pontifex in Epistola ad Constantinum Pogonatum Imperatorem, & ipse Constantinus Pogonatus in Edicto ad populum occiduas partes incolentes; quæ duæ Scriptiones inter Acta Concilii
sexti

P R Æ F A T I O .

sexti generalis habentur , quibus addi possunt Synodus quinti-sexta Can. I. Synodicae litteræ *Theodori* Hierosolymitani , quæ recitatae sunt Actione tertiâ Synodi septimæ , Epistola *Tarasii* Patriarchæ Constantinopolitani , totiusque adeò Synodi septimæ generalis , quæ extat Actione septimâ ejusdem Synodi , & Anastasius Bibliothecarius ad annum Justiniani Imperatoris vigesimum sextum . Certè tot luculenta testimonia Conciliorum , & clarissimorum Scriptorum , qui disertis verbis asserunt , Origenem in quinta Synodo generali fuisse damnatum , rem extra omnem dubitationis aleam ponere debent , ita ut nemo prudens & sapiens Theologus contrà excipere , vel prescribere possit . Undè , justâ de causâ Eminentissimus Annalium Parens *Baronius* ad annum Christi CCLVI. invehitur in eos , qui pro Origene jam ab Ecclesia damnato Apologias concinnare præsumunt : *Miratus sum*, inquit, *post damnationem ejus*

P R Æ F A T I O.

ab Anastasio Papa Pontificiâ auctoritate inflictam, post ejusdem reprobationem in quinta Synodo pronunciatam, post tot antiquorum Patrum in ipsum conspirantes sententiam, adhuc recentiores quosdam ausos esse novas edere Apologias, & auctoritate Ecclesiæ Catholicæ judicatas sæpius controversas denuò temerè agitare. Quid, amabo, dixisset doctissimus ille Cardinalis de Petro Halloixio acerrimo Origenis Vindice, qui non solum ipsius vitam, virtutes & documenta libris quatuor fusissimè complexus est, ejusque doctrinam ab omni erroris labe totis ingenii sui viribus purgare ac vindicare studuit; sed, quod gravius est, ut faciliùs persuadere posset, Origenem in quinta Synodo non fuisse damnatum, non dubitavit asserere, Patres Conciliorum generalium sexti, & septimi, necnon antiquos Scriptores, qui Origenem in quinta Synodo proscriptum fuisse testantur, omnes ad unum errasse, eos-
que

P R Æ F A T I O.

que incidisse in Acta Synodi quintæ corrupta & adulterata? Hac in re sanè modestiam & reverentiam Sanctis Patribus debitam in *Halloixio* desiderare cogor, quam penitus exuisse videtur.

At, inquit *Halloixius*, nulla in Actis quintæ Synodi Origenis extat damnatio, nec ullum de hac Origenis damnatione in v. Synodo factâ apud Victorē Tunonensem, vel Facundum Herimianensem, Scriptores coævos, apparet vestigium. Falsò itaque asseritur, Origenem in quinta Synodo fuisse damnatum. Hoc est potissimum *Halloixii* argumentum, quod certè utroque pede claudicat. Nam, præterquàmquod merè negativum est, ac subindè, juxta Critices disciplinæ regulas, ad infirmenda locupletissima, quæ mox in medium produximus, testimonia, sat virium habere non potest, falsò præterea supponit, nullam in Actis quintæ Synodi extare damnationem Origenis. Quid enim, fodes, sibi

P R Æ F A T I O .

volunt hæc verba, quibus *Theodorus* Cappadox Origenis Patronus probaturus, *Theodorum Mopsuestenum*, licet jam vitâ functum, posse jure ac meritò damnari, sic Collatione v. Patres Synodi quintæ allocutus est: *Et multos quidem etiam alios invenimus post mortem anathematizatos, necnon etiam Origenem* quod nunc & in ipso fecit & vestra sanctitas, & *Vigilius Papa religiosissimus antiquioris Romæ*. Fatente igitur *Theodoro Cappadoce Origenistarum Principe* à Synodo quinta & *Vigilio Papa* Origenes fuit damnatus. Quid etiam sibi vult Anathematismus undecimus in Collatione octava quintæ Synodi his verbis conceptus: *Si quis non anathematizat Arium, Eunomium, Macedonium, Apollinarium, Nestorium, Eutychem, Origenem, cum impiis eorum scriptis talis Anathema sit*. Extat itaque in Actis quintæ Synodi, velit nolit *Halloixius*, expressa Origenis damnatio. Sed, ut

c

dem

P R Æ F A T I O.

dem *Halloixio* nullam in Actis quintæ Synodi extare Origenis damnationem, indè tantum sequitur, Acta quintæ Synodi ob suppressam illam Origenis damnationem fuisse truncata & mutilata, sive id Origenistarum fraude factum sit, ut non immeritò suspicatur Baronijs, sive id contigerit proptet nimiam festinationem eorum, qui latinam interpretationem Actorum quintæ Synodi ad usum Vigiliij Papæ & Occidentalium curarunt. Cum enim illi interpretes totam Orientales inter & Occidentales controversiam in trium Capitulorum negotio versari animadverterent, parum curarunt de Origenis damnatione, quæ tùm temporis unanimi consensu ab utraque Ecclesia facta & recepta fuerat, sed maxima festinatione Acta quintæ Synodi exscripserunt dumtaxat quantum ad ea, quæ trium Capitulorum proscriptionem spectabant, ut ea ad *Vigilium* Papam citò transmittere possent. Hinc Summi Pontifices *Pelagius I. Pelagius II.*

& Gre-

P R Æ F A T I O.

& *Gregorius Magnus*, dùm referunt Decreta quintæ Synodi generalis, meminêre duntaxât damnationis trium Capitulorum, nullâ de Origenis in ea Synodo damnatione factâ mentione, quia Acta quintæ Synodi, quæ initio in Occidentem delata fuerunt latinè cum magna festinatione, ut diximus, exscripta, aliud omninò non continebant, quàm trium Capitulorum damnationem.

Plura non addam ad confutandam *Petri Halloixii*, qui à viris eruditis *Huetio*, *Norifio*, & *Alexandro* jure merito vapulat, singularem sententiam, quâ semel confutatâ, nullo negotio etiam refellitur alia opinio *Joannis Garnerii*, qui in *Dissertatione*, quam edidit, de *quintæ Synodo*, contendit nullam in ea habitam fuisse de doctrina Origenis cognitionem, sed tantùm in quadam alia Synodo Constantinopoli sub *Menna* hujus Civitatis Episcopo habita, quæ à veteribus *quintæ Synodi* nomine etiam appellata est, quæ-

P R Æ F A T I O.

quæ quintam Synodum universalem aliquot annis præcessit . Hæc, inquam, *Garnerii* sententia non solum ex his, quæ contra *Halloixium* adduximus, locupletissimis testimoniis confutata manet, sed etiam validè refelli potest ex verbis, quæ leguntur in secunda Professione fidei, quæ habetur in libro diurno Romanorum Pontificum, ubi, postquam actum est de quatuor prioribus Synodis Oecumenicis, subnectitur : *Hæc igitur Sancta atque universalia quatuor Concilia, etiam sanctum quintum Concilium venerandum affecutum est, & sub piæ memoriæ Justiniano Principe apud Constantinopolitanam Urbem est congregatum, cujus saluari consultu, unus esse de Sancta Trinitate Dominus Noster Jesus Christus veraciter prædicatus est &c. in hoc Origenes cum impiis discipulis & sequacibus, Didymo, & Evagrio, & qui Creatorem omnium Deum, & omnem rationalem ejus creaturam Gentilibus fabulis profecuti sunt*

P R Æ F A T I O .

sunt æternæ sunt condemnationi submissi. In eo Theodorus Mopsuestenus Auctor Nestorii, pariterque Diodorus &c. Cum his & Epistola, quæ Iba dicitur ad Marim Persam, & scripta Theodoretæ adversus Beatissimum Cyrillum, cum condemnatione projecta sunt &c. inter hæc veneranda universalia quinque Concilia, etiam sanctum sextum Concilium universale prædicamus. Quibus ex verbis manifestò patet, Origenem, ejusque Sectatores, Justiniano Imperatore, non tantum in aliquo privato Concilio, ut contendit Garnerius, sed in quinta universalî Synodo Constantinopoli celebratâ fuisse damnatos.

Hæc te, erudite Lector, in hac Præfatione præmonere necessarium esse duxi; quò videlicet inter legendum ea, quæ in Historia quinti, & sexti Ecclesiæ sæculorum *de Diptychis, & de quinta Synodo* dicenda occurrent, actutum intelligere posses. Nunc duo à te vicissim reposco.

P R Æ F A T I O.

Primum est, ut pro me, qui Historiæ Ecclesiasticæ literarium mare immensum ac procellosum ingressus sum, Deum Opt. Max. roges ut me in tam morosa & diuturna peregrinatione omnipotenti gratiâ suâ illuminet, dirigat, atque ad optatum portum feliciter tandem perducatur. Alterum est, ut huncce secundum Historiæ Ecclesiasticæ Tomum, in quo eandem, quam in priori, methodum teneo, attento lubentique animo lectitare haud graveris. Et sanè, si te veteris Romæ Ruderum, Templorum, jamque vetustate exesarum statuarum adspectus magnoperè delectat, quanto majori voluptate te afficere debent retroactorum sæculorum Ecclesiæ memoria, Sanctorum Martyrum trophæa, Summorum Pontificum, & Imperatorum Christianorum gesta, Episcoporum successiones, Hæresum Historia, Conciliorum Decreta, Sanctorum Patrum Doctrina, & antiquæ Ecclesiæ politia, morumque disciplina; *Hæ sunt*, inquit egregie

P R Æ F A T I O.

giè *Tertullianus* in libro de Spectaculis,
voluptates, hæc spectacula Christianorum
Sancta, perpetua & gratuita. In his
tibi ludos Circenses interpretare, cursus
seculi intueri, tempora labentia dinume-
ra, metas consummationis expecta, socie-
tates Ecclesiarum defende, ad signum Dei
suscitare, ad tubam Angeli erigere, ad
Martyrii palmas gloriare.

NOS FR. ANTONINUS C L O C H E

Sacrae Theologiae Professor, ac totius Ordinis
Fratrum Prædicatorum humilis Magi-
ster Generalis & servus salutem .

Tenore præsentium nostrique auctoritate Officii li-
centiam facimus Reverendo admodum Patri Fra-
tri *Ignatio Hiacynto Amat de Graveson* in Sacra Fa-
cultate Parisiensi Doctori ac in Collegio Casanatenfi
Conventus Sanctæ Mariæ super Minervam de Urbe
Theologo, Provinciæ nostræ Provinciæ Alumno ty-
pis edendi Opus in plures Tomos distributum, cui ti-
tulus est: *Historia Ecclesiastica variis Colloquiis dige-
sta, &c.* dummodò prius approbatum fuerit à duobus
Ordinis nostri in Theologia Magistris, & aliis servatis
de jure servandis. In quorum fidem &c. Datum Ro-
mæ in Conventu nostro Sanctæ Mariæ super Miner-
vam die 8 Martii 1717.

Fr. Antoninus Cloche
Magister Ordinis.

Loco ✕ Sigilli.

*Fr. Bernardus d'Arcet Magister,
& Socius.*

Registr. fol. 79.

To-

Tomum istum alterum quinti & sexti Ecclesiae
seculorum complectentem Historiam, à Viro
peritissimo & in sacris studiis summè exercitato
Ignatio Hyacintho Amat de Gravelon sacrae
Facultatis Parisiensis Doctore, & Collegii Casana-
tensis Theologo, Ordinis Prædicatorum compositum,
authoritate ac imperio Reverendissimi Patris Anto-
nini Cloche totius Ordinis Fratrum Prædicatorum
Magistri Generalis sedulò perlegi summa cum animi
voluptate, magnoque ipsum rerum sacrarum studio-
sis adjumento esse posse censeo: nec dubito quotquot
seposito partium studio pii & eruditi hoc Opus le-
gerint, quin mihi assentiantur, multòque plura &
majora hac mea testificatione sint bona hac in Hi-
storia Ecclesiastica reperturi: in ea quippè nemo non
jure demirabitur stili candorem omnis fuci exper-
tem, brevitatem cum rerum ubertate conjunctam,
eruditionem reconditam, mirabilem gestorum colli-
gationem, methodum facilem ac perspicuam qua
suo quæque ordine paucis perstringuntur, ne longio-
ris studii spatium & decursu, vel nodis quæstionum
alienarum intricatissimis, & vix aliud quàm tem-
poris jacturam allaturis, juvenes Theologiæ candi-
dati ab Historiæ Ecclesiasticæ cultu deterreantur.
Cum igitur Tomus ipse alter ab omni nœvo contra
Fidem, aut bonos mores erroris alienissimus sit, di-
gnum illum censeo, qui publica luce donetur, &
omnium teratur manibus. Datum Romæ in Conven-
tu Minervitano Fratrum Prædicatorum die 25. Apri-
lis anni æræ Christianæ 1717.

Fr. Antonius Bardon, Sac. Facult. Parisiensis
Doct. Theol. & Catechr. Casanat. Ord. Præd.

Jussu

Jossu Reverendissimi Patris Antonini Cloche Ordinis
 Prædicatorum Magistri Generalis, Tomum secundum
 Historiæ Ecclesiasticæ variis Colloquiis digestæ,
 ab admodum Reverendo Patre Fratre Ignatio Hyacintho Aniat de Gravelson sacra Facultatis Parisiensis Doctore, & Collegii Casanatensis Theologo elaboratum accurate, ac diligenter perlustravi: de quo idem omnino, quod de primo ejusdem Operis Tomo, candidum judicium, ut lubens feram, me extimulant tum orthodoxa doctrina, uberiorque rerum Ecclesiasticarum perities: cum tersum dicendi genus, methodusque sibi constans, qua hic ubique resplendere, ubique micare comperio. Quamobrem, cum primum doctissimi Auctoris de Historia Ecclesiastica volumen summo cum applausu ab Viris literatis, & Historiæ Ecclesiasticæ studiosis exceptum sit, nullus dubito, quin hoc secundum, quod quintum & sextum Ecclesiæ seculum complectitur, partem præstantissimo concinnatori famam apud æquos rerum aestimatores conciliet. Datum Romæ in Conventu Sanctæ Mariæ super Minervam die 24. Maii anno 1717.

Fr. Patricius Plonket Sacra Facultatis
 Parisiensis Doctor, & Collegii Casanatensis Theologus, Ord. Prædic.

IMPRIMATUR,

Si videbitur Reverendissimo Patri Magistro
Sacri Palatii Apostolici.

N. Card. Caracciolus Pro-Vic.



APPROBATIO

Illustrissimi, & Reverendissimi Domini

JUSTI FONTANINI

A cubiculo honorario Sanctissimi D.N.

CLEMENTIS XI.

JUbente Reverendissimo Patre Fr. Gregorio Selleri Magistro Sacri Palatii Apostolici, perlectus est liber inscriptus: *Historia Ecclesiastica variis Colloquiis digesta, &c.* nec in eo quicquam offendi, quod ejus editionem remorari posse videatur. Quare typis dignum cenfeo, tanquam opus tironibus perutile, quorum institutioni optimus & clarissimus auctor,
pro

pro singulari modestia sua , ab se elaboratum fuisse significat . Dabam Romæ die 13. Decembris anno Domini 1716.

Justus Fontaninus Abbas Sextensis .



IMPRIMATUR,

Fr. Gregorius Selleri Ordinis Prædicatorum
Sacri Palatii Apostolici Magister .

IN-

INDEX COLLOQUIORUM

Quæ continentur in hoc secundo Tomo.

COLLOQUIA

In Historiam Ecclesiasticam
V. sæculi.

COLLOQUIUM I.

DE statu Ecclesiæ in quinto sæculo sub
Imperatoribus Christianis . . . pag. 2

COLLOQUIUM II.

*De Hæresibus, quæ Ecclesiam in quinto sæ-
culo infestarunt, ejusque sinum lacera-
runt.* 29

COLLOQUIUM III.

*In quo exhibetur series Episcoporum, qui in
quinto Ecclesiæ sæculo præcipuas Sedes oc-
cuparunt.* 61

COL-

I N D E X

COLLOQUIUM IV.

De Conciliis, quæ in quinto Ecclesiæ sæculo fuerunt celebrata, & de variis Factionibus, in quas distracti sunt Episcopi Catholici. 93

COLLOQUIUM V.

De Viris illustribus, qui eruditione & pietate Ecclesiæ in quinto sæculo multum splendoris contulerunt. 127

COLLOQUIUM VI.

De Doctrina, Disciplina, & Morali quinti Ecclesiæ sæculi. 167

COLLOQUIORUM.
COLLOQUIA

In Historiam Ecclesiasticam
VI. sæculi.

COLLOQUIUM I.

D*Estatu Ecclesiæ in sexto sæculo sub Imperatoribus & Regibus Christianis. 197*

COLLOQUIUM II.

De Controversiis, Hæresibus, & de causâ trium Capitulorum, quæ in sexto sæculo affixit Ecclesiæ. 222

COLLOQUIUM III.

De Conciliis in sexto Ecclesiæ sæculo celebratis, & de rebus quæ in his gestæ sunt. 250

COLLOQUIUM IV.

De successione Episcoporum, qui sexto sæculo præcipuas Ecclesiæ Sedes Romanam videlicet, Alexandrinam, Antiochenam, Hierosoly-

INDEX COLLOQUIORUM:
*solymitanam, & Constantinopolitanam oc-
cuparunt.* 277

COLLOQUIUM V.

*De Viris illustribus, qui sexto Ecclesie secu-
lo doctrina, & pietate claruerunt.* 305

COLLOQUIUM VI.

*De Doctrina, Disciplina, & Morali Chri-
stiana sexti Ecclesie seculi.* 331

HISTORIA ECCLESIASTICA

V. Ecclesiæ sæculi.

Variis Colloquiis digesta.



Istoriā, & Disciplinā quinti
Ecclesiæ sæculi sex Colloquiis
explanabimus. Primum erit
de statu Ecclesiæ sub Impera-
toribus Christianis. Alterum,
de Hæresibus, quæ quinto sæ-
culo emerferunt & Ecclesiæ si-
num lacerarunt. Tertium exhi-
bebit seriem Episcoporum, qui

præcipuas Ecclesiæ Sedes eodem sæculo tenuerunt.
Quartum erit de Conciliis, quæ ad extirpandas Hæ-
reses variis in locis fuerunt celebrata, & de nonnul-
lis Factionibus, in quas distracti fuere quidam Ca-
tholici Episcopi. Quintum erit de Viris Illustribus,
qui perdoctis Operibus quintum Ecclesiæ sæculum
illustrarunt. Postremum explicabit Doctrinā, Mo-
ralem, & Disciplinā, quæ eodem sæculo quinto
fuit observata.



COLLOQUIUM PRIMUM.

De statu Ecclesiæ in quinto sæculo sub Imperatoribus Christianis.

DISCIP. **E**cclesiam sub optimo, & religiosissimo Imperatore Theodosio Magno summâ pace potitam, planèque Idololatriam fuisse extinctam, memini te dixisse sub finem Colloquii primi in Historiam quarti Ecclesiæ sæculi, nunc qualis fuerit status Ecclesiæ sub aliis Imperatoribus, qui, post Theodosium Magnum, Imperium cum Orientis, tum Occidentis rexerunt scire desidero.

MAGIST. Mortuo Imperatore Theodosio sub Consulatu Olybrii, & Proбини, hoc est, anno Christi cccxcv. ante diem vi. Kalendas Februarias, filii ejus Arcadius, & Honorius Romani Imperii administrationem suscepere, & Arcadius quidem Orientis, Honorius verò Occidentis Principatum obtinuit. Arcadii, & Honorii juvenili, & inexpertæ ætati, simulque & Imperio prospiciens Theodosius Magnus, duos, antequàm moreretur, selegerat Duces prudentiâ & auctoritate conspicuos, quorum ductu, & consiliis utrumque regeretur Imperium, Rufinum, qui rebus Orientis, & Stiliconem, qui Occidentis rebus præset. Sed inter Rufinum, hominem in Aquitania humili genere natum, & Stiliconem genere Vandalum utriusque Imperii administrum gravis exarsit invidia, magnaue fuit dissensio, quæ, ut mox dicemus, gravissimorum malorum

rum tam in Oriente, quam in Occidente causa, & origo fuit. *Arcadius* statim post obitum *Theodosii* patris sui *Eudoxiam* duxit uxorem, conciliante has nuptias *Eutropio* Eunuchō in odium *Rufini* æmuli sui, qui filiam suam *Arcadio* destinabat, ut Imperio, cui inhiabat, sublato Genero, potiretur. Varias leges sanctissimas adversus tumultuantes Hæreticos emisit *Arcadius*, fuitque Optimus Princeps, mansuetus, pacis, & religionis amans, sed infelix. Tutor si quidem *Rufinus* Principi, pupilloque infidus *Alaricum* Gothorum Ducem adivit, ut arma verteret in *Arcadium*, ejusque Imperium laceraret. Sed ut occultum fœdus, pravumque, quod animo volebat, consilium ad optatum exitum facilius perducere posset *Rufinus*, Græciæ Proconsulem sibi fidum designavit, & *Thermopylarum* angustias custodiendas viro itidem sibi addicto tradidit, ut eas ambo Barbaris advenientibus cederent. His fretus *Alaricus*, quasi jam victoriæ securus, è Thracia discessit, & in Macedoniam, Thessaliamque progressus est interjectis omnibus exilio datis, ut scribit *Zosimus* lib. 5. ubi etiam narrat mala, quæ egit *Alaricus* in Bæotia, Attica, Megaride, Peloponeso, & in reliqua Græcia. Verùm spe suâ delusus est *Alaricus*, quippè qui à *Gaio* homine bellicoso, quem *Stilico* Honorii fratris *Arcadii* Tutor cum valido Exercitu in Orientem misit, repulsus, victus, ac debellatus est, statimque à militibus, juxta mandatum *Stiliconis*, *Rufinus* trucidatus dignas admisis facinoribus pœnas luit. Ejus corpus ad ludibrium membratim discerptum est, Caput præfixum pilo, manus ita composita, ut pecuniam laxatis, aut contractis nervis recipere videretur. *Zosimus* citatus as-

ferit, *Eutropium* Eunuchum Stiliconi addictissimum, qui post Rufini cædem maximâ apud Arcadium auctoritate pollebat, bonorum Rufini potissimam partem sibi vindicasse. Sed cum *Eutropius* Consulatu simul, & Patritiatu ornatus, immensâ, præcipitique ambitione Imperium aucuparetur, omnibus dignitatibus exutus fuit die xii. Kalend. Febr. anni cccxcix. & è fastis, ac monumentis publicis abrasâ ejus memoriâ, in Cyprum Insulam ipse relegatus, & non multò post indè abductus, capite multatus est, ut testes sunt *Philostorgius* lib. 11. cap. 6. *Zosimus* lib. 5. aliique Scriptores. Supplicio quoque affecti sunt *Gildo*, qui sibi Africam usurpaverat, & *Gainas*, quem Imperium affectantem, & Arcadio Imperatori struentem insidias *Fravita* Gothus quidem, sed fidei præstitæ Arcadio observantissimus conferto prælio prostravit. Quâ victoriâ meruit *Fravita* Consulatum anno cccci. Obiit Arcadius Imperator Byzantii anno ccccviii. ætatis suæ 30. Imperii post patrem 13. Reliquit moriens filium, suum Theodosium juniorem annos octo natum Imperii hæredem, illiusque Tutorem testamento instituit *Isdigerdem* Persarum Regem, cum enixè rogans, ut ad Imperium Theodosio asserendum potentiam suam omnem, providentiamque conferret, quod reverà magnanimo animo executus est *Isdigerdes* mittens *Antiochum* virum moribus egregium, & eximie eruditionis, qui pueri Principis curam haberet, ipseque, quamdiu vixit, Romanos pace beavit altissimâ, & Imperium Theodosio juniori conservavit.

D. Fuit ne tranquillius Occidentis Imperium sub *Honorio* fratre Arcadii?

M. Res

M. Res Occidentis pessimo loco erant, atque foedissima Imperii facies sub *Honorio* Principe negligente, ignavo, & à re bellica prorsus alieno, eandemque infaustam sortem nactus est *Honorius* in Occidente, quæ *Arcadio* ejus fratri contigit in Oriente. Nam sicut perfidus *Rufinus* Tutor *Arcadii* excitavit *Alaricum* Gothorum Regem, ut arma in *Arcadium* verteret; ita ambitiosus *Stilico* Tutor *Honorii*, & cui duas filias *Mariam*, & *Thermantiam*, quas è *Serena* uxore sua susceperat, in matrimonium dederat; eundem *Alaricum*, quem anno ccccii. ad *Pollentiam*, quæ Civitas est in Liguria, devicerat; stimulavit ad pugnandum contra *Honorium*. Sed *Alaricus* perfidiam detestatus ingenti prælio Romanas acies profligavit, totam ferè devastavit Italiam, & Urbem Romam anno ccccix. ut multis argumentis evincit Cl. *Pagius* in sua Critica ad annum ccccx. armis cepit, in prædam dedit, omnia penè ædificia incendit, & quasi torrens violentus solo æquavit, exceptis tamen Ecclesiis, quibus ille barbarus pepercit. *Attalum* Urbis Romæ Præfectum creavit Imperatorem, quem mox purpurâ, & Imperio exuit. Post captam Romam *Alaricus* in Siciliam transire volens, navibus tempestate disjectis, morbo periit, eique successit *Athaulphus* qui Romam regressus, eam miserum in modum depopulatus est, indeque *Gallam Placidiam* *Honorii* Imperatoris sororem abductam ad Forum *Cornelii*, seu *Imolam*, duxit uxorem. Re ad *Honorium* pro veritate delatâ, jussit è vestigio Imperator, Proditorem *Stiliconem*, ejusque filium *Euclerium* Paganum, & apertum Christianæ Religionis hostem, unâ cum

Serena hujus matre, & *Stiliconis* conjuge occidi. Eodem anno, quo *Roma* ab *Alarico* capta, ac direpta est, *Alani*, *Vandali*, & *Suevi* *Hispanias* occuparunt, qui jam anno cccv. eodem promovente *Stilicone*, in *Gallias* irruentes, funestis cladibus eas cruentarant, quas *S. Hieronymus* *Epist. xi. ad Ageruchiam* viduam expressit his verbis: Innumera-
 biles, & ferocissimæ nationes universas *Gallias* occuparunt. Quidquid inter *Alpes*, & *Pirenaorum* est, quod *Oceano*, & *Rheno* includitur, *Quadus*, *Vandalus*, *Sarmata*, *Alani*, *Gepides*, *Heruli*, *Saxones*, *Burgundiones*, *Alemanni*, & à lugenda *Republica*, hostes *Pannonii* vastaverunt. Etenim *Assur* venit cum illis. *Maguntiacum* nobilis quondam *Civitas* capta, atque subversa est, & in *Ecclesia* multa hominum milia trucidata. *Vangiones* longa obsidione deleti. *Rhemorum* *Urbs* præpotens, *Ambiani*, *Atrebatæ*, extremique hominum *Morini*, *Tornaces*, *Nemetæ*, *Argentoratus*, translati in *Germaniam*. *Aquitania*, *Novemque Populorum*, *Lugdunensis*, & *Narbonensis* *Provincia*, præter paucas *Urbes*, populata sunt cuncta. Idem *S. Doctor* in *Epistola* ad *Heliodorum* de ejusmodi *Barbarorum* in *Gallias* incurfionibus loquens, *Matronas* nobiles, & *Virgines* *Dei* ludibrio habitas, *Episcopos* captos, *Presbyteros*, & *Clericos* interfectos, *Ecclesias* everfas, *Equos* ad *Altaria* stabulatos, *Martyrum* effossas reliquias, & alia similia commemorat, quibus *Romanus Orbis* ante *Urbis Romæ* excidium fuerat obrutus. Easdem calamitates, quibus id temporis afflicta est *Gallia*, *Salvianus* *Presbyter Massiliensis*, qui & ipse rebus præsentibus aderat, eleganter describit in lib. 6. de *Gubernatione Dei*. Si nomina eorum, qui
 in hac

in hac Barbarorum in Gallias irruptione Martyrium passi sunt , scire aveas , lege Commentarium Historicum de Persecutionis Vandalicæ ortu , progressu , & fine , quem doctissimus P. *Theodoricus Ruinart* Monachus Benedictinus attexuit ad Historiam persecutionis Vandalicæ quinque libris descriptam à *Victore Vitenfi* . Gothi etiam anno 412. Rege *Athaulpho* Alarici successore , in Gallias irruerunt , ac multas calamitates in eas intulerunt , quas Cardinalis Baronius ex Prospero in Prologo libri de Providentia , & ex Paulino in Carmine Eucharistico accuratè refert , & explicat . Verùm , *Athaulphus* Gothorum Rex à Patricio *Constantio* viro strenuo pressus , ut , relicta Narbona quam occupabat , Hispanias peteret , per quemdam Gothum apud Barcinonam inter familiares fabulas jugulatus fuit , sicut ait *Idacius* in Chronico . *Athaulpho* successit *Wallia* , qui pacem cum Romanis pepigit , *Attalum* , quem Alaricus Imperatorem creaverat , Honorio Imperatori tradidit , eidem Galliam Placidiam ejus sororem ab *Athaulpho* Gothorum Rege sibi connubio junctam reddidit , & , ut cum Romanis firmitus percuteret fœdus , suscepit bellum adversus Alanos in Lusitania , & Vandalos Silingos in Bætica , pollicitus Romanæ securitati periculum suum contrà omnes Barbaros , qui Hispaniam invaserant , ut sibi pugnaret , Romanis vinceret . Honorius Imperator , pace inita cum Gothis , *Attalum* , quem Alaricus , captâ Româ , Imperatorem instituerat , in triumphum , revinctis post terga manibus , tractum , dexterâque abscisâ , Liparam relegavit ; Placidiam verò sororem suam *Constantio* matrimonio copulavit anno ccccxvi. Hic

ille *Constantius* est, qui Athaulphum Gothorum Regem Narbonâ, ut jam diximus, expulit, qui tyrannos *Gratianum* in Britannia, & *Constantinum* in Gallia profligavit, quique ob res præclare gestas consors Imperii factus est anno ccccxxi. Sed *Constantius* Imperium dumtaxat degustavit, mortuus quippè est eodem anno, & imperavit menses circiter septem. Constantino tyranno in Galliis oppresso, ut jam dixi, à Constantio, tyrannidem arripuit *Constans* filius Constantini. Sed non melior fuit Constantis conditio. Hunc enim *Gerontius* Viennæ in Galliis interemit, in cuius locum substitutus est *Maximus*: at, cum paulò post *Gerontius* fuisset quoque à militibus occisus, purpurâ exutus *Maximus*, & ab Exercitu desertus in Hispaniam se recepit, ibique exulans obiit. Præter illos devictos tyrannos, *Jovinus* in Galliis, ejusque frater *Sebastianus*, qui Imperatores fuerant acclamati, confestim deleri sunt. Sublatus pariter est à *Marino* Duce Honorii *Heraclianus* Africæ Tyrannus, qui cum innumera classe ex Provincia solverat versùs Italiam, ut eam omninò devastaret. Hic ille est *Heraclianus*, qui Stiliconem Ravennæ ad Ecclesiam confugientem ex Honorii Imperatoris mandato occidit, & eo facto Africam Provinciam cum comitiva promeritus fuerat, ut scribit *Zosimus*. His tandem superatis Tyrannis *Honorius* curru triumphali vectus Romam ingressus est, pacemque Italiæ reddidit. Sed paulò post Gothis Galliam iterùm infestantibus concessere Romani, ut habitarent loca, quæ à Tolosa ad Oceanum usque interjacent. Mortuus est Honorius Ravennæ aquæ intercutis morbo anno ccccxliii. ætatis suæ 39. Imperii 28. de Catholica

lica Religione benè meritus est, & Hæreticos, præcipuè Manichæos, Donatistas, & Pelagianos sanctissimis, ac severissimis coercuit legibus. Sed furorem suam Placidiam, ex quo Constantius maritus ejus vita decesserat, perditè nimis amando Honorius, & os ejus assidue deosculando, turpis apud multos consuetudinis suspensionem non effugit. Hic tamen amor in tantum brevi versus est odium, frequentibus jurgiis obfirmatum, ut Honorius Placidiam cum filiis suis in Orientem ablegaverit paulò antequàm moreretur.

D. Recense, quæso, eadem serie Imperatores, qui in quinto Ecclesiæ sæculo post Arcadium summâ rerum in Oriente potiti sunt, & deindè progrediemur ad Imperatores Occidentis, ut nomina, & gesta illorum Imperatorum faciliùs memoriæ mandare possim.

M. *Theodosius junior*, seu II. Arcadii, & Eudoxiæ filius, à patre jam creatus Augustus imperavit in Oriente, vivente adhuc Honorio patruo suo Imperatore Occidentis. Sed mortuo Honorio anno ccccxxiii. solus totum Imperium Romanum obtinuit. Acceperat à patre suo Arcadio, ut jam diximus, in tutorem Isdigerdem Persarum Regem; Imperium tamen consiliis *Anthemii* Præfecti Prætorio viri id temporis prudentissimi administravit. A *Pulcheria* sorore sua, quæ virginitatem Deo consecraverat, à tenera ætate institutus, tantum in virtute, ac pietate profecit, ut brevi tempore evaserit religiosissimus Princeps, mansuetus, orationi, & sacrorum librorum lectioni addictus, laborumque patientissimus. Anno ætatis suæ vigesimo Theodosius *Athenaidem* Leontii Athenientis Philosophi filiam

filiam de consilio sororis suæ Pulcheriæ uxorem duxit, quam ab Attico Episcopo Constantinopolitano Baptismo initiatam nuncupavit *Eudoxiam*, quæ fœmina fuit eleganti corporis specie prædita, & in omni doctrinæ, & eloquentiæ genere exercitata. Ex ea Theodosius suscepit filiam dictam *Eudoxiam*, quæ postea Valentiniano III. Imperatori Occidentis nupsit. Leges sanctissimas tulit Theodosius contra Gentiles, Judæos, & Hæreticos. Concilium Generale Ephesinum, annuente Cælestino I. Romano Pontifice, convocavit. Rem literariam promovit. Viros eruditos fovit. Episcopos, & Sacerdotes summoperè coluit. Diem Dominicam, Festosque dies Natalis Domini, Epiphaniæ, Paschatis, Pentecostes, & Apostolorum fœdari, ac violari vetuit. Spectaculorum voluptate, aliasque saluberrimas leges promulgavit, quæ continentur in Codice, cujus editionem Clarissimis Juris-consultis demandavit, quique ejus nomine *Codex Theodosianus* etiamnum appellatur. *Valentinianum* consobrinum suum Cæsarem & Augustum elegit, atque Occidentis partibus præfecit. Adversus *Joannem*, qui, mortuo Honorio Occidentis Imperatore, tyrannidem arripuerat, misit *Ardaburium*, qui tempestate actus Ravennam pulsus est, & in Tyranni manus pervenit. Sed *Aspar* filius *Ardaburii*, per insigne Dei miraculum introductis Ravennam copiis, Tyrannum oppressit, ac patrem liberavit. Bellum contra Persas per *Ardaburium* feliciter gessit Theodosius, sed ab *Attila* Hunnorum Rege Thraciam, & Illyricum vastante innumeris damnis affectus annuo tributo pacem emere coactus est. Tandem obiit Theodosius junior Constantinopoli, sive ex mor-

morbo , five ex lapſu ab Equo , die vigefimâ octavâ menſis Julii anni ccccl. ætatis ſuæ 48. Imperii ab obitu Honorii 27.

D. Quis in Imperio Orientis ſucceſſit Theodoſio juniore , quem filiam dumtaxat ex Eudoxia , conjuge ſua ſuſcepiffe narraſti ?

M. Mortuo Theodoſio juniore, *Pulcheria* ejus foror , & Imperatoris *Arcadii* filia , conjugium ſuum , Imperiumque *Flavio Valerio Marciano* humili loco in *Thracia* nato , ſed militiâ clariffimo obtulit , eâ tamen lege ut pudicitie ejus vim non inferret , ſed caſtam vivere pateretur . Annuir *Marcianus* , & Orientis Imperator ſalutatus eſt anno ccccl. Pacem & juſtitiam impenſè coluit , Chriſtianis favit . Hæreticos acerrimè infectatus eſt , deditque operam , ut ad proſcribendam graſſantem *Euty- chianorum* Hæreſim Concilium Chalcedonenſe celebraretur . Tandem , cùm ad bellum adverſus *Vandalos* ſeſe præpararet , obiit *Constantinopoli* die ſeptima menſis *Februarii* anni cccclvi. anno ætatis ſuæ 65. Imperii circiter 7.

Post mortem Marciani ad Imperium evectus eſt *Leo* *Thrax* genere anno cccclvii. Princeps clementiâ , liberalitate , ac pietate inclytus , cui à *Deipara* fertur promiſſum Imperium ob charitatis officium , quod præſtitit erga cæcum , cui viſum , etiam illius miniſterio reſtituit *B. Virgo* , ſicut teſtatur *Nicephorus* lib. 19. Hiſt. Eccleſ. cap. 15. Uxorem duxit *Leo* *Augustus* *Berina* , ſeu *Verina* ſororem *Baſiliſci* *Patritii* *Constantinopolitani* ; ex qua ſuſcepit *Ariadnam* , & *Leontiam* . *Genſericum* *Vandalorum* Regem per *Marcellinum* , & *Heraclium* , Duces ſuos non ſemel fudit , Barbarosque *Sardiniâ* expu-

expulit. Numerosissimam, potentissimamque classem adversus Vandalos Africam infestantes anno cccclxviii. instruxit, cui Basiliscum Verinæ Augustæ fratrem præfecit. Sed *Basiliscus* à Genferico, ut creditum est, pretio corruptus, turpissimè navalì prælio victus est, totamque ferè classem amisit: anno tamen sequenti Leo Augustus, ut tantum dedecus Romano nomini inustum dilueret, cum Vandalis iterum conflixit, eosque ita gloriøsè devicit, ut Genfericus illorum Rex cum Romanis pacem inire coactus fuerit. Multas sacras Ædes, & inter alias Ecclesiam Dei-paræ ad *Fontem* dictam construxit Leo Augustus. Fidem, & Synodum Chalcedonensem contra Hæreticos Eutychianos acerrimè ruitus est, Catholicos Episcopos coluit, & leges suâ pietate dignas tulit. Demùm anno cccclxxiv. morbo correptus Byzantii vitâ discessit anno Imperiî sui decimo septimo, & *Leonem* filium Zenonis & Ariadnæ, quem obitui proximus Cæsarem renunciavit, Imperatorem reliquit. Sed *Leo* junior ægrâ valetudine vexatus decem tantùm menses cum Zenone patre suo Imperium obtinuit, & anno ætatis suæ 17. extinctus est, patrique suo Zenoni Imperium reliquit.

Zeno itaque cognomento *Isauricus*, quod ex Isauris Ciliciæ ignobili genere oriundus esset, à filio suo Leone juniore Imperator factus regnare cœpit in Oriente anno cccclxxiv. homo turpis facie, sed moribus turpior. Ab ipso Imperiî sui exordio illecebris cupiditatum ita sese totum dedit, ut nihil esset tam turpe & illicitum, quod impetum ejus cohiberet, ut ait Evagrius lib. 3. cap. 1. quod Theophanes, & Zonaras confirmant, adduntque,

que, eo imperante, subditos gravissima mala esse perpeſſos. *Baſiliſcus* Patricius Conſtantinopolitanus à *Verina* ſorore ſua Leonis ſenioris Auguſti vidua, inſtigatus, pulſo Zenone, Imperium ſibi uſurpavit, ſed cum Baſiliſcus nihilo meliorem Zenone ſe gereret, & Hæreticis Eutyſchianis apertè patrocinaretur, ab iiſdem, à quibus fuerat acclamatus, Zeno revocatus eſt, & Tyrannum Baſiliſcum devicit. Zeno reſtitutus Imperio promulgavit anno cccclxxxii. *Henoticon*, ſeu unitivum Ediſtum, quo ſub ſpecioſo obtentu conciliandæ unitatis, Eutyſchianos citrà ſuorum errorum ejurationem in Catholicam Eccleſiam ſuſcipiendos eſſe præcepit. Denique, poſtquàm imperaſſet annos 17. menſes tres, obiit Byzantii anno cccxcj. ex fraude *Ariadne* uxoris ſuæ, quæ, cùm vidiſſet Zenonem maritum ſuum ex immodica crapula prolapſum, juſſit in ſepulchrum deportari, ubi cùm Zeno edormiſſet crapulam, excitatus quidem eſt, & clamores edidit, ſed *Ariadne* vetuit de induſtria reſerari ſepulchrum; quare ibidem Zeno devoratis ſibi lacertis, & caligis miſerè periit.

D. Necdum planè intelligo quid ſibi velit iſtud *Henoticon* Zenonis Imperatoris?

M. *Henoticon* Zenonis nihil aliud eſt, quàm unitivum Ediſtum, quod ille Imperator, ſuadente, vel dictante *Acacio* Conſtantinopolitano Epiſcopo, promulgavit & ad *Ægyptiacæ* Diœceſeos Antiſtites, Monachos, Plebemque Chriſtianam direxit animo conciliandæ pacis, & procurandæ Eccleſiarum unitatis. In hoc Ediſto non aliud Symbolum admittendum decernit Zeno, quàm Nicænum. Approbat duodecim S. Cyrilli Capitula, ſeu Anathematifmos, Neſtorium, & Eutychetem damnat

Ana-

Anathemate , sed de Dioscoro flet , ne Alexandri-
nos offenderet . Synodum Chalcedonensem , & Fi-
dei defensionem in hac Synodo editam , necnon
Epistolam S. Leonis Papæ ad Flavianum alto silen-
tio premit, imò damnare audet hanc Sanctam Syno-
dum , si expositæ in suo Edicto fidei contraria sit .
Hujusmodi Zenonis Edictum, cum fidei causæ haud
parum noceret, & Eutychianis animos adderet, fuit
ab omnibus Catholicis rejectum; tum quia non spe-
ctat ad Principes laicos quidquam decernere de
fide , tum quia etiam Imperator Zeno definitionem
fidei factam à Synodo Generali Chalcedonensi , &
Epistolam S. Leonis ad Flavianum summo totius
Synodi consensu receptam silentio premendo , in-
tempestivâ œconomiâ plus æquo favebat Eutychia-
nis , qui illas execrabantur . Quocircâ , sicut *Elle-
sim* Imperatoris Heraclii , ut dicemus in Colloquiis
septimi sæculi , & *Typum* Constantis Imperatoris
optimo jure rejecit Ecclesia ob suppressas *duarum
operationum* voces , quibus Monothelitarum Hære-
sis jugulabatur, ita & *Henoticon* Zenonis Imp. explo-
sit Ecclesia ob suppressam Concilii Generalis Chal-
cedonensis, & Epistolæ S. Leonis memoriam, obru-
tasque istas silentio voces *ex duabus , & in duabus
naturis* , quibus prostrata jacebat Eutychiana Hæ-
resis . Hinc, licet Ecclesia pacis semper amans qua-
dam œconomiâ usa sit erga Zenonem Imperatorem,
quamdiu vixit , nec ejus Edictum disertè damnavit
rit , ne ipsius animum exacerbaret , & graviora in-
dè mala , & Schismata orirentur , quæ sanare , ac
compscere difficile admodum fuisset, attamen, post-
quam mortuus est Zeno Imperator , & pax Orien-
talem Ecclesiam inter & Latinam inita est sub Hor-
misdæ

misſæ Pontificatu , & Imperio Juſtini ſenioris , nomen Zenonis Imperatoris ſummo rotius Eccleſiæ conſenſu ex ſacris Diptychis expunctum eſt .

D. Quem ſucceſſorem in Imperio Orientis habuit Zeno ?

M. Zeno ſucceſſorem habuit ſibi omninò ſimilem , *Flavium Valerium Anaſtaſium* è Macedoniæ Urbe *Dyrrachio* ortum , qui ope *Ariadnæ* viduæ Zenonis Imperatoris , cùm adhuc in Silentiariorum ſchola militaret , Imperator factus eſt , & *Ariadnam* duxit uxorem . Zenonis deceſſoris ſui *Henoticon* , prorsùs ſecutus eſt *Anaſtaſius* Imp. nihilque contrà illud Ediſtum innovari voluit . Ex Regia Conſtan- tinopolitana Urbe eiecit *Euphemium* , deindè *Macedonium* Episcopos Catholicos , *Flavianum* etiam Orthodoxum Anſiſtitem Antiochiâ expulit , & impium *Severum* Antiochenæ Eccleſiæ præfecit . Ad obitum uſque ſuum Eutyſchianam Hæreſim fovit & Eccleſias innumeris perturbationibus afflixit , quas Evagrius luculenter deſcribit lib. 3. Hiſt. Eccleſ. cap. 30. Quapropter , *Anaſtaſius* Reipublicæ commodior fuit , quàm Eccleſiæ . *Longinum* fratrem Zenonis Imperatoris tumultuantem vicit , & occidit . Adverſùs Iſaurorum gentem bellum feliciter confecit . Saracenos & Perſas Romani Imperii Provincias depopulantes coegit , ut pacem cum Romanis inirent . *Vitalianum* Thracem Præfectum Provinciarum Septentrionalium nova molientem in ordinem redegit . Bulgaros , & Getas in Macedonia , cùm ferro vincere nequiret , donis , auroque reputavit . Demùm *Anaſtaſius* , poſtquàm in Oriente imperaſſet annis 27. duobus menſibus , & diebus viginti novem , inventus eſt in Cœnaculo mortuus anno

anno *DXVIII.* crediturque ictu fulminis interemptus. Ejus memoria toti Ecclesiæ execrabilis fuit, undè illum inter præcipuos Ecclesiæ hostes *Nicolaus I.* Summus Pontifex in Epistola ad Michaelē Imperatorem numerat: *Cogitate, inquit, quid Imperatores, qui persecuti sunt Ecclesiam Dei, & maxime Ecclesiam Romanam, idest Nero, Diocletianus, Constantius, Anastasius, & cæteri moris eorum pertulerunt, & ubi modò sint, attendite diligenter, & quantum sit in Ecclesia Dei execrabilis fama eorum, & nomen detestabile, sapienter advertite.* Sed de Imperatoribus Orientis, qui in quinto Ecclesiæ sæculo summā rerum potiti sunt, satis hæcenus dictum sit.

D. Quinam fuit status Imperii Occidentis in quinto Ecclesiæ sæculo?

M. Post Honorium Arcadii fratrem, qui, ut jam diximus, mortuo ejus patre Theodosio seniore, imperavit in Occidente annis 27. deploratissimus fuit status Imperii Occidentalis, illudque omninò concidit in quinto Ecclesiæ sæculo. *Valentinianus* quippè III. Constantii Augusti, & Placidie sororis Honorii & Arcadii filius, qui anno *ccccxv.* habenas Imperii Occidentis moderari cæpit, Princeps fuit omnibus ferè vitiis, crudelitate præsertim, ac libidine inquinatus. Eo imperante, Vandali Africam, Genserico Duce, occuparunt. *Attila* Hungarum Rex in Gallias irrupit anno *cccll.* quem tamen *Valentinianus*, ductu *Ætii* Romani Exercitus Ducis, & cum copiis Burgundionum, Francorum, Alemannorum, & Gothorum, in Campis Catalaunicis, Gallicè, *Chalons sur Marne*, devicit. Sed paulò post, *Attila* vires, animosque resumens in Ita-

in Italiam irruit, quam fœdissimè devastavit. Aquilejam, Ticinum, Mediolanum, aliaque Æmiliæ, & Liguriæ oppida diripuit, donec ipsi ad Mincium amnem occurrente *S. Leone* Romano Pontifice, non tantum Romæ, sed & universæ Provinciæ pepercit, & ad suas Pannonias reversus est anno CCCCLII. Interim *Valentinianus* Occidentis Imperator, post obitum matris suæ *Placidie* eximiæ pietatis fœminæ, in libidines effusus *Maximi* Senatoris uxorem constupravit, ob quam injuriam percitus irâ ille Senator, eamque ulcisci volens, occultè *Valentiniano* Imperatori persuasit; ut *Ætium* Romani Exercitus Ducem rerum gestarum gloriâ clarissimum per Sicariorum insidias interficeret. Plus æquo credulus *Valentinianus*, nec fraudem subodoratus, vanis suspicionibus fidem adhibens, nefarium istud consilium executioni mandavit, & *Ætium* Imperii sui columnen & protectorem manu sua in palatio interemit inconsultissimus Imperator. Tunc *Ætii* milites sui Ducis, quem impensè amabant, necem ulciscuntur morte ipsius *Valentiniani* Imperatoris non sine dolo ejusdem *Maximi* Senatoris, qui protinus Imperium Occidentis occupavit, nuptiisque potitus est *Eudoxie* Augustæ *Valentiniani* Imperatoris viduæ. At non diu *Maximus* suæ proditionis crimen impunè tulit. *Eudoxia* siquidem, quam sibi uxorem duxerat, certa postmodum, *Valentinianum* maritum suum insidiis & operâ *Maximi* fuisse occisum, cum esset magni animi fœmina, mortem *Valentiniani* ulcisci statuit. Undè *Genfericum* Vandalorum Regem in Africa regnantem in Italiam advocat. *Eudoxie* consiliis facilè aurem accomodavit *Genfericus*, oblatamque Italiæ, ac Urbis ipsius diripiendæ

occasionem, ambabus, ut ajunt, manibus arripiens, properè venit in Italiam, quæ ejus inexpectato adventu consternata est. *Maximus* verò terrore perculsus, & fugam meditatus laniatur à suis, atque in Tyberim demergitur, anno Imperii sui circiter secundo. *Genfericus*, Urbe captâ, Leonis Pontificis oratione mitigatus, incendio, cædibus, & libidinibus abstinit, sed omnes res sacras, profanasque Urbis, quæ immensæ erant, quatuordecim dierum direptione abstulit, multa captivorum millia in Africam abduxit, unâ cum *Eudoxia Augusta*, & ambabus ejus filiabus, quarum unam, videlicet *Eudoxiam* Hunerico filio suo conjugem dedit. Alteram verò, seu *Placidiam*, aliquantò post simul cum matre sua *Eudoxia Augusta* Constantinopolim misit. Hæc Romana clades à Vandalis illata contigit anno cccclv. tuncque defecit Imperii majestas in Occidente. Quamvis enim Imperatoris nomine per aliquot deinceps annos nonnulli in Occidente præfuerint, isti tamen, pro illegitimis à plerisque recensentur. Et sanè supra Imperii insignia & magni nominis umbram, nihil aliud ferè obtinuerunt.

D. Breviter expone, quo pacto majestas Imperii defecerit in Occidente, eosque recense, qui ad finem usque quinti Ecclesiæ sæculi Occidenti præfuerunt?

M. Ab anno cccclv. quo, ut jam diximus, *Maximus* occisus est, & in Tyberim projectus, usque ad annum cccclxxv. hi, qui Occidenti præfuerunt, vacuum Imperatoris nomen adhuc retinuerunt. Sed anno cccclxxv. mortuo *Augustulo*, Imperii quoque nomen penitus in Occidente extinctum est. *Odoacer* siquidem Turcilingorum Rex Romanâ

mâ potitus anno cccclxxvi. Italiz Regnum instituit: Ut autem plenam status Imperii Occidentalis notitiam habere possis, eos hic recensebo, qui ab anno cccclv. usque ad finem quinti Ecclesiæ sæculi Occidenti præfuerunt.

Sublato è vivis *Maximo* anno cccclv. *Flavius Mecilius Avitus* Arvernus patriâ, Senator tamen Romanus, & Galliarum Prætorio præfectus, à Senatu, & Populo Imperator Occidentis electus est, dum Legatum ageret apud Theodoricum Gothorum Regem anno cccclv. sed à *Ricimero* Barbarorum ductore propè Placentiam captus, privatam deinceps vitam agere coactus est, postquam imperasset menses decem, & dies octo.

Avito successit *Flavius Julius Majorianus*, qui à Leone Orientis Imperatore Magister militum creatus, & ad Occidentis Imperium occupandum missus, propè Ravennam Imperator acclamatus est anno cccclvi. Imperavit quatuor annis cum dimidio & occisus est anno cccclxi. propè Dertonam, quæ nunc *Tortona* dicitur in Liguria à *Ricimero* militiæ Duce, qui pro suo arbitrio Imperatores creabat, vel deponebat.

Interfecto Majoriano, *Libius Severus*, seu *Severianus* è Lucania oriundus invasit Occidentis Imperium anno cccclxi. sed sublatus est Romæ per venenum à *Ricimero* anno cccclxiv. Imperii sui quarto.

Post Interregnum à morte *Severi* duorum annorum, per quod tempus *Ricimerus* universa pro suo nutu in Occidente administrabat, *Anthemius* à Leone Imperatore Orientis Romam missus est, factusque Imperator, consentiente *Ricimero* an-

no cccclxvii. *Anthemius* Imperator, ut arctius sibi devinciret *Ricimerum*, filiam suam conjugem ei dedit. Sed non multò post ingratus *Ricimerus* insidias Socero suo struxit, eundemque obsessum Romæ cepit, & occidit anno cccclxxii. cum annos quinque, & menses aliquot imperasset.

Post cædem *Anthemii* *Flavius Anicius Olybrius* à *Ricimero* Imperator renunciatus est anno cccclxxii. & eodem anno obiit Romæ, dubium proprio ne fato, an violento, Imperii sui mense septimo, aut octavo.

Post *Olybrium*, *Glycerius* Senator Romanus Occidentis Imperator propè Ravennam factus est anno cccclxxiii. sed postquàm imperasset uno anno, & quatuor circiter mensibus, à *Julio Nepote* solio dejectus Salonas pulsus est, ibidem dicitur fuisse consecratus Episcopus.

Julius Nepos Nepotiani filius, pulso, ut mox dixi, *Glycerio*, Purpuram assumpsit anno cccclxxiv. sed ab *Oreste* Gotho, cui Exercitus Præfecturam, ipse demandaverat, exautoratus est anno Imperii sui secundo ineunte.

Flavius Momylus Augustulus *Orestis* filius, ex patris auctoritate suffragiis militaribus Ravennæ factus est Imperator anno cccclxxv. Verùm, à *Nepotis* factione *Odoacer* Turcilingorum Rex in Italiam vocatus, ingentibus Barbarorum copiis *Orestem* Ticini obsedit, cepit, & coràm Exercitu ipsum, ejusque fratrem *Paulum* interfecit. *Augustulum* verò filium *Orestis* Imperio cedere coactum, in Castrum Lucullanum Campaniæ relegavit, anno primo Imperii necdum expleto. In hoc *Augustulo* Imperii nomen fuit in Occidente prorsus abolitum
anno

anno CCCCLXXVI. *Coss. Fl. Basilisco It. & Armato*, utroque in Oriente creato . Sic enim habet Marcellinus in Chronico sub hujus anni Consulibus . *Hesperium Romanæ Gentis Imperium, quod septingentesimo Urbis conditæ anno primus Augustorum Octavianus Augustus tenere capit , cum hoc Augustulo pertit .*

D. Jam observasti, Odoacrum Turcilingorum Regem Româ potitum , Italiæ Regnum instituisse, anno CCCCLXXVI. sed nondum exposuisti, quomodo, & quandiu in Italia regnaverit Odoacer :

M. Odoacer , Italiâ subjugatâ , typho superbiæ non intumuit ; sed potius summâ , quâ pollebat , potestate modestissimè usus , titulum Imperatoris suscipere detrectavit , nec alio ; quàm Regis nomine donari voluit . Regnum *Rugorum* in Germania penitus extinxit , & quamvis Arianus esset ; nihil tamen in Religione innovavit . Regnavit septemdecim annis , sed anno Regni ipsius decimo quarto seu anno Christi CCCCLXXXIX. *Theodoricus Gothorum Rex*, hortatu *Zenonis* Imperatoris Orientis , Italiam ingressus Odoacrum triplici conflictu superatum Ravennam fugere compulit , & post triennii obsidionem fraudulentâ pactione delusum , ut scilicet ambo communi auctoritate Italiam regerent , illum specie pacis ad convivium adhibitum Theodoricus interfecit anno CCCXCIII. quo iniit Ostrogothorum in Italiâ Regnum , fixâ Ravennæ Regiâ Sede .

Theodoricus itaque Gothorum Rex , occiso Odoacro, solus in Italia regnavit , & quamvis Ariana Hæresi addictus esset , Ecclesiæ tamen Jura sancta conservavit . Schisma in electione Symmachi Romani Pontificis ortum auctoritate suâ compescuit .

scuit. Juris, & æqui fuit observantissimus, cumque multis laudibus efferunt Cassiodorus, & Ennodius Ticinensis. At Theodoricus præclara Regni sui initia turpiter fœdavit non solum morte Boëtii, & Symmachi integerrimorum Senatorum, quos gladio sustulit, sed morte Joannis Romani Pontificis, quem in carcerem detrusit, ubi pædore, & fame interiit. Regnavit Theodoricus solus in Italia ab anno cccxciii. usque ad annum dxxvi. Et hæc sunt, quæ pertinent ad statum Imperii cum Orientis, tum Occidentis in quinto Ecclesiæ sæculo, in quo permultæ factæ sunt Regnorum permutationes, & exordia, Francorum videlicet, & Burgundionum in Galliis; Visigothorum in Hispaniis, Ostrogothorum in Italia, Anglorum in Britanniz Insula, Vandalorum in Africa.

D. In variis istis Regnorum permutationibus, & exordiis, fuitne tranquillus Ecclesiæ status, vel persecutionibus exagitatus?

M. Nullis generalibus, sed privatis dumtaxat persecutionibus Ecclesia in quinto sæculo exagitata fuit. Isdigerdes Persarum Rex, quem, ut diximus, Arcadius Imperator moriens filii sui Theodosii junioris tutorem instituerat, anno decimo quarto Regni sui, hoc est, anno ccccxiv. adversus Christianos Regni sui persecutionem movit. Persecutionis porro ab eo suscitata, sicut scribit Agathias lib. 4. causam dedit Abdias Regiz Persidis Episcopus, qui divino quidem zelo motus, at non ex rationis normâ usus Templum Igni consecratum succendit. Eo cognito, Rex erectas per totam Persidis Regionem Ecclesias everti jussit, Abdiam autem diversis afflixit tormentis. In qua persecutio-

ne,

ne, quæ ad quintum usque annum propagata est, plures, immo innumeri Martyres declarati sunt. Latentes siquidem Christianos per Urbes, & vicos Magi venatorum more insequiebantur. Hæc Isdigerdis persecutio adversus Christianos mota in ipsius morte, quæ contigit anno ccccxx. non cessavit, sed mortuo Isdigerde Persarum Rege, *Vararanes* ejus filius persecutionem in Christianos continuavit. Martyrum in hac persecutione Persica, quæ ab anno ccccxiv. usque ad annum ccccxliv. arsit, Acta non extant; eorum tamen in Auctoribus, qui hoc sæculo scripserunt, quædam supersunt vestigia. De hac persecutione legendi sunt Socrates lib. 7. Hist. Eccl. cap. 18. & Theodoretus lib. 5. Hist. Eccles. cap. 39.

Alia, sed atrociori persecutione *Genfericus* Arianus Vandalorum Rex Ecclesiam in Africa vexavit anno ccccxxxvii. ut fusè Baronius prosequitur ex Prospero in Chronico & ex Epistola Antonini Constantinæ Civitatis Episcopi ad Arcadium, quemdam à Genferico in exilium missum, quam integram refert doctissimus *P. Ruinart* in Historia de persecutione Vandalica. Susplicatus est Baronius hanc Epistolam Antonini Constantinienſis Episcopi diversam esse ab Epistola, quæ à Gennadio tribuitur *Honorato* Constantinienſi Episcopo. Sed *Honoratum*, & *Antoninum* Constantinienſem Episcopum, unum & eundem fuisse, qui *Antoninus Honoratus* appellabatur, consentiunt Clarissimi Scriptores *Ruinart*, & *Pagius*, aliique viri eruditi. In hac Genferici persecutione Arianæ Basilicas in Africa sibi vindicarunt, Ecclesiarum opes diripuerunt, tantoque furore in Catholicos debacchati sunt, ut *Vi-*

ctor Episcopus Vitenfis cap. 13. lib. 1. de *Persecutione Vandalica* testetur, illos Hæreticos irruisse in Catholicos, dum Paschalem solemnitatem peragebant, eosdemque incendiisse, alios evaginatibus ensibus in Ecclesiam introiisse, alios tecta occupasse, & per fenestras Ecclesiæ sagittas emisisse, quarum unâ *Le-ctor*, dum in pulpito *Alleluja* cantaret, in gutture transfixus est. *S. Isidorus* in *Historia Vandalorum* de *Genferico* eorum Rege sic loquitur: *Siciliam depredatus Panormum obsedit, Arianam pestilentiam per totam Africam intromittit, Sacerdotes Ecclesiæ pellit, Martyres plurimos efficit, & juxta Prophetiam Danielis, demutatis mysteriis Sanctorum Ecclesias Christi hostibus tradidit, nec jam divini cultus loca, sed sumum esse habitacula jussit. Quin, & tredecim Provincias recenset Victor Vitenfis cap. 17. libri* mox à me laudati, quas *Genfericus* in hac persecutione afflixit. *Quæ* verò, inquit, in *Hispania, in Italia, Dalmatia, Campania, Calabria, Apulia, Sicilia, Sardinia, Brutiis, Venetia, Lucania, Epiræ veteri, vel Hellada* gesserit, melius ibi ipsi, qui passi sunt, miserabiliter lugendo narrabunt. Hujus *Vandalicæ* persecutionis, quæ sub *Genferico* Rege sæviit in *Africa*, barbariem *Possidius* in vita *S. Augustini* cap. 28. describit his verbis: *Omni sæviens crudelitate, & atrocitate, cuncta quæ potuit, expoliatione, cædibus, aliisque innumerabilibus, & infandis malis depopulata est, nulli sexui, nulli parcens ætati, nec ipsis Dei Sacerdotibus, & Ministris, nec ipsis Ecclesiarum ornamentis, vel ædificiis, Ecclesias Sacerdotibus, ac Ministris destitutas, Virginesque sacras, & quosque continentes ubique dissipatos, & in his alios defecisse tormentis, alios in captivitate partita animi, & corporis*

paris integritate , ac fidei , malo more & duro hosti-
bus deservire . Hymnos, & laudes de Ecclesiis deperiis-
se, & ædificia Ecclesiarum quàm plurimis in locis igni-
bus concremata esse : Solemnia quoque, quæ Deo debentur
de propriis locis defecisse : Sacrificia ac Sacramen-
ta divina , vel non quari , vel quarenti , qui tradat ,
non facile reperiri : Ipsosque Ecclesiarum Præpositos, &
Clericos , qui fortè Dei beneficio , vel in eos non incur-
rerant , vel incurrentes evaserant , rebus omnibus ex-
poliatis , atque nudatos , egentissimos mendicare , nec
eis omnibus ad omnia, quibus fulciendi essent, subveniri
posse &c. Gensericus regnavit in Africa annos 37.
obiitque anno cccclxxvii. Ei successit filius ejus
Hunnericus Arianâ itidem Hæresi infectus , qui ta-
men , ut scribit sæpè citatus Victor Vitenſis lib. 2.
mitiùs & moderatiùs exordio Regni sui egit in Ca-
tholicos. Verùm, postquàm per quinque priores Re-
gni sui annos in Manichæos , & in suos Arianos sæ-
viisset, tandem sub finem anni sexti Regni sui suum
in Catholicos convertit furorem. Duo quippè fe-
ralia Edicta adversùs ipsos promulgavit , quibus
Catholicam Religionem opprimere , & suam Aria-
nâ sectam latius propagare molitus est . Tunc
enim impius ille Rex Hunnericus , sicut scribit sæ-
pè citatus Victor Vitenſis , qui quinque edidit li-
bros , in quibus lugubrem Africanæ Ecclesiæ illis
temporibus faciem adumbravit , omnes Catholi-
corum conventus interdixit, eorum Ecclesias occlu-
di jussit , opes eorum omnes partim sub fisco , par-
tim Episcoporum Arianorum , eorumque Ecclesiis
addixit , Orthodoxis ad summam rerum omnium
penuriam redactis , Hospitium, Cibaria, atque ve-
stimenta sub gravibus pœnis suppeditari prohibuit ;
adeò

adeo ut innumeri sub dio, aut in desertis, fame, siti, & frigore interierint. Hac in persecutione diris cruciatibus, & cædibus in omnes Catholicos crudeliter sævitum est. Episcoporum supra ducentorum triginta dejectiones, proscriptiones, exilia, mortes. Venerabiles Christi Sacerdotes, ac Ministri, & Monachi, omnis denique ætatis, sexus, & conditionis homines vexati, torti, mutilati, carceribus non tam inclusi, quam catervatim congesti, & ipsis in sordibus quasi sepulti misabilia trahentes non tam corpora, quam cadavera. Refert etiam *Procopius* lib. 1. de *Bello Vandalico* cap. 8. complures Catholicos linguis hac in persecutione radicitus excisis; perfecte, distinctèque fuisse locutos: *Christianos Africa*, inquit, tam crudeliter, tamque injustè nemo vexavit, quàm *Hunnericus*. Cum enim illos ad *Sectam Arianam* compelleret, quoscumque parum ad hoc sequendum promptos deprehendebat, igne, aliisque suppliciis excruciatos necabat. Multis linguam faucium tenus abscidit, qui etiam nostra atate superstites *Byzantii* explanatè loquebantur, nullum capientes sensum illius pœna. Ex his duo rem habere ausi cum *Meretricibus* sermonis usum amiserunt. Denique, postquam hæc persecutio duobus annis integris, videlicet toto anno septimo cum parte sexti & octavi anni Regni *Hunnerici* perdurasset, mortuus tandem est impius ille Rex anno Regni sui octavo nondum expleto, seu anno cccclxxxiv. eique successit *Guntabundus*, quem anno tertio Regni sui Catholicis favisse colligitur ex Auctore fragmenti *Augustani* ab *Henrico Canisio* publicati, qui de *Guntabundo* *Vandalorum* Rege hæc narrat: *Guntabundus* tertio anno Regni *Cameterium* Sancti Martyris *Agilei* apud *Carthaginem* Catholicis dari

*dari præcepit, Eugenio Carthaginensi Episcopo jam de exilio revocato. Decimo autem anno Regni sui Ecclesias Catholicorum aperuit, & omnes Dei Sacerdotes, petente Eugenio Carthaginensi Episcopo de exilio revocati sunt. Ex quo fragmento liquet, Guntabundum tertio saltem Regni sui anno Catholicis favisse, immò & ipsum Eugenium Carthaginensem Episcopum ei fuisse acceptissimum, ex eo colligitur, quod ipsum longè ante cæteros Catholicos Episcopos ab exilio revocaverit, ac postmodum ipsius precibus cæteris quoque Orthodoxis Episcopis, post restitutas illis Ecclesias, redire permiserit in suas Sedes. Hinc tamen, ut optimè observat doctissimus P. Ruinart, inferre non licet, prioribus Guntabundi Regni annis persecutionem in Africa cessasse, quam jam inchoatam Guntabundum saltem permisisse multo veri similis est. Quæ licentia Arianis furentibus ad multa audendum sufficiebat. Immo, cum Ecclesiæ Catholicorum non fuerint apertæ ante annum decimum Regni Guntabundi, ut ex laudato fragmento ostendimus, credibile est, toto hoc temporis intervallo Catholicos ab Arianis pessimè habitos fuisse, ac multa, graviaque ab illis pertulisse incommoda, maximè cum Victor Vitenfis lib. 5. de Persecutione Vandalica num. xi. testetur, Arianos crudeli Rege Hunnerico crudeliores fuisse: *Crudelius, inquit, Arianorum Episcopi, Presbyteri, & Clerici, quàm Rex, & Vandali sæviebant.**

D. Ecclesia his persecutionibus vexata, & in tot Regnorum permutationibus, quæ quinto sæculo contigerunt, suscepit ne aliquod incrementum?

M. Haud parvum incrementum suscepit Ecclesia in quinto sæculo per conversionem *Clodovei Gal-*

Galliarum Regis , qui post victoriam , quam retulit de Alemannis anno ccccxcvi. baptizatus fuit die Natali Domini ejusdem anni à S. Remigio Episcopo Remensi , ut testatur *Avitus* Episcopus Viennensis in Epistola ad eundem Clodoveum scripta , in qua hæc habet : *Gaudeat ergò quidem Gracia , habere se Principem legis nostræ , sed non jam , quæ tanto muneris dono sola mereatur illustrari . Siquidem & occiduis partibus in Rege non novo , novi jubaris lumen effulгурat , cujus splendore congruè Redemptoris nostri Nativitas inchoavit , ut consequenter eo die ad salutem regenerari ex unda vos pareat , quo natum Redemptionis suæ Cæli Dominum Mundus accepit .* Tria millia hominum de Exercitu Clodovei Galliarum Regis Baptismum suscepisse ait S. Gregorius Turonensis , sex verò millia *Fredegarius* in Epitome , quos *Hincmarus* in vita S. Remigii sic conciliat : *Baptizantur , inquit , de Exercitu Clodovei tria millia virorum , exceptis parvulis & mulieribus : Eadem die , quâ Clodoveus baptizatus est , Albosledis ejus soror baptizata est , conversa est etiam & alia soror ejus Lantechildis nomine , quæ in Hæresim Arianorum dilapsa fuerat , quæ confessa æqualem Filium Patri , & Spiritum Sanctum , Chrismata est .* Anastasius Papa , ubi accepit Clodoveum Francorum Regem sacro Baptismatis fonte fuisse regeneratum , statim gratulatorias ei litteras per *Eumerium* Presbyterum misit , quas *Dacherius* doctissimus Benedictinus in Spicilegio publicavit , in quibus Summus Pontifex sic ait : *Tuum , Gloriose Fili , in Christiana fide cum exordia nostro in Pontificatu contigisse gloriamur . Quippè Sedes Petri in tanta occasione non potest non latari , cum plenitudinem Gentium intuetur ad eam velocè gradit*
con-

concurrere, & per temporum spatia expleri sagemam, quam in altum iussus est mittere. idem Piscator hominum, & Cælestis Hierusalem beatus Claviger &c. Sed hæc sufficiant de statu Ecclesiæ in quinto sæculo.

COLLOQUIUM II.

De Hæresibus, quæ Ecclesiam in quinto sæculo infestarunt, ejusque sinum lacerarunt.

D. **Q**uamnam sunt Hæreses, quæ Ecclesiam in quinto sæculo exagitarunt?

M. Quatuor præcipuè Hæreses in quinto Ecclesiæ sæculo emerferunt, videlicet Pelagianorum, Semipelagianorum, Nestorianorum, & Eutychianorum. Auctor Pelagianorum Hæresis fuit *Pelagius* è Britannia oriundus, Monachus quidem, sed nullis sacris Ecclesiæ dignitatibus insignitus. Undè *Zosimus* Papa in Epistola ad *Aurelium* Primatem Carthaginensem, & Afros Episcopos, eum vocat *laicum*, quia Monachi id temporis ad Sacros Ordines non promoti inter laicos recensebantur. Pelagii Hæresi præluferunt *Origenes*, *Theodorus Mopsuestenus*, & *Rufinus* Aquilejensis Presbyter, qui postremus Romam sub Pontificatu Anastasii, hoc est, sub finem quarti sæculi veniens, Pelagio Romæ degenti suos errores affricuit. Constat liquidem Pelagium Romæ diu moratum esse, eumque, ante Rufini Aquilejensis Presbyteri in hanc Civitatem appulsum, Romæ integrum famæ, & purum suspicionis fuisse, immò Sanctum audiisse, & à viris pietate eximiis Hierony-

ronymo, Paulino Nolano aliisque dilectum tanquam virum non parvo profectu Christianum, ut inquit S. Augustinus de peccatorum meritis, & remissione cap. 1. & 3. At Rufinus, teste Mario Mercatore in præfatione libri subnotationum, Pelagium Roma decepit, eumque ad prædictam apprimè imbuit, atque instituit vanitatem. Pelagius errores, quos imbiberat, aliis instillare volens, edidit Romæ brevissimos in S. Pauli Epistolas Commentarios, quos ipsissimos illos esse, qui libris S. Hieronymi vulgò adjungi solent, egregiè probat Eminentissimus Norisus in sua Historia Pelagiana.

D. Quos errores disseminavit Pelagius?

M. Errores, quos disseminavit Pelagius ad tres classes revocari possunt. Primò, negabat peccatum originale, & parvulos decedentes sine Baptismo æternæ damnationi esse obnoxios. Secundò, assererat hominem sine ope gratiæ, per solam naturam, ingenitasque liberi arbitrii vires quodcumque bonum opus elicere posse, & gratiam dari intuitu meritorum. Tertiò, docebat, hominem solis liberi arbitrii viribus ad eum perfectionis statum assurgere posse, in quo impeccabilis esset, & haberet ~~eternitatem~~, seu passionum impassibilitatem, sicut olim ineptè fingeant Philosophi Stoici. Sunt nonnulli Theologi, qui Pelagii Hæresim in quatuor dividunt status. Primum vocant *Ethnicismum*, in quo solum naturam, & meras liberi arbitrii vires admittit Pelagius. Alterum appellant *Semiethnicismum*, in quo gratiæ nomen, naturæ & libero arbitrio tribuit Pelagius, quia ea à Deo beneficia accepimus. Tertium nuncupant *Judaismum*, in quo Pelagius gratiam in lege, & doctrina constituit. Quartum

tum denique statum appellant. *Semichristianismum*, in quo Pelagius gratiam voluntatis, & actionis falsus quidem est, sed non sine errore.

D. Habuitne Pelagius aliquos ad suam propagandam Hæresim Discipulos?

M. Pelagius vehementibus suis, atque ardentibus adhortationibus, ut ait S. Augustinus cap. 25. libri *de Gestis Pelagii*, multos, sed *Cælestium* in primis Auditorialem Scholasticum Romæ eo infecit errore, quem ipse à Rufino acceperat. *Hunc Pelagio adhæsit Cælestius* (inquit *Marius Mercator* in *Commonitorio* cap. 4.) *nobilis natu quidem, & illius temporis Auditorialis Scholasticus, sed naturæ vitio Eunuchus matris utero editus*. Ex quibus Marii Mercatoris verbis colligitur, *Cælestium* Pelagii discipulum, cujus patria parùm nota est, è nobili genere fuisse prognatum, *Auditorem Scholasticum*, idest, *Advocatum* publicarum causarum, *Ecclesiarum*, & *Civitatum*; eumque naturæ vitio Eunuchum fuisse. Cum hoc *Cælestio* Pelagius anno ccccviii. aut ccccx. Româ in Siciliam sese recepit, ubi suam sparsit Hæresim, dum Gothi Italiam depopularentur, Romamque semel, & iterum obsidione cingerent. Bienenium Syracusis in Sicilia, aut etiam triennium ferme posuerunt Pelagius & Cælestius. Deindè venerunt in Africam, ubi Pelagius relicto Cælestio, post brevem moram Carthagine solvit in Palæstinam. *Cælestius*, cum Carthagine esset, ad Presbyteratus ordinem promoveri tentavit, sed frustra. Ei quippè obstiterunt fideles Clerici, unusque omnium nomine *Paulinus* Ecclesiæ olim Mediolanensis Diaconus, qui libellum obtulit Aurelio Carthaginensi Episcopo, in quo *Cælestium* multorum errorum, infi-

insimulavit . Quare *Aurelius* totius *Africæ* primas Concilium Carthaginense anno ccccxi. convocavit, cui multi interfuere Episcopi, non tamen *S. Augustinus*, ut ipsemet testatur lib. 2. *Retractionum* cap. 35. Comparuit in hoc Concilio *Cælestius*, adversus quem stetit *Paulinus Diaconus*, qui septem erroris Capitula ei objecit . Primò, quòd diceret : *Adamum mortalem esse factum, qui sive peccaret, sive non peccaret, moriturus fuisset* . Secundò, quòd peccatum *Adæ* ipsum solum læsit, & non genus humanum . Tertiò, quod parvuli, qui nascuntur, in eo statu sunt, in quo *Adam* fuit ante prævaricationem . Quartò, quòd neque per mortem, vel prævaricationem *Adæ* omne genus hominum moriatur, neque per Resurrectionem *Christi* omne hominum genus resurgat . Quintò, quod lex sic mittit ad Regnum Cælorum, quomodo & Evangelium . Sextò, quod & ante adventum Domini fuerunt homines impeccabiles, idest, sine peccato . Septimò, quòd Infantes, etiamsi non baptizentur, habeant vitam æternam . Porro, *Cælestius* ad capitulum secundum, & ad tertium sic respondit, ut ea neque confiteri ausus sit, neque etiam inficias ire voluerit, sed ejusmodi quæstiones utramque in partem ventilari posse dixerit . Addidit tamen, se semper asseruisse infantes egere Baptismo . Patres Concilii Carthaginensis, ubi *Cælestium* audivissent, eum damnaverunt, & anathemate perculerunt . Ipse tamen ad Sedem Apostolicam appellavit, ut latam contra se sententiam declinaret, & ne, uti Hæreticus, palàm traduceretur . Verùm, cum suæ causæ diffideret *Cælestius*, appellatione neglectâ, Ephesum Asiæ Urbem mox contendit, ibique ausus est per obreptionem locum Presbyterii petere. Multos
Eph-

Epheſi ſuam edocuit Hæreſim , quorum ope vicinas Inſulas infecit , ſed *Rhodum* maximè , ſicut ſcribit S. Hieronymus lib. 4. in Hieremiam . Cùm igitur *Cæleſtius* Pelagianam Hæreſim latiffimè propagaret , hujus Sectæ homines dicti ſunt etiam *Cæleſtiani* . Interim Pelagius Palæſtinam , ut diximus , profectus , ſibi Hieroſolymæ , perindè ac in aliis Palæſtinæ locis Diſcipulos adſcivit , gratiamque aucupari cœpit *Joannis* Hieroſolymitani Epifcopi , qui illum benignè excepit , quòd adverſus S. Hieronymum , quo cum ſimultates gerebat , opportuno præſidio ſibi futurus videretur . *Cæleſtius* , conciliatâ ſibi *Joannis* Hieroſolymitani Epifcopi benevolentia , criſtas erexit , eòque temeritatis prorupit , ut Sanctum Hieronymum , cujus Commentarios in Epifto- lam S. Pauli ad Epheſios carpere auſus eſt , ad certamen provocarit . Sed ei malè ceſſit maris alea , nam S. Hieronymus , & S. Auguſtinus in illum calamum ſtrinxerunt , ejusque errores tam ſolidè confutarunt , ut victus , ac proſtratus fuerit Pelagius . Patrocinium quoque *Joannis* Epifcopi Hieroſolymitani , quo ille Hæreticus gloriabatur , inutile prorsus reddidit *Oroſius* inſignis Presbyter , qui ex Hiſpania , undè oriundus erat , in Africam , dein in Palæſtinam veniens anno ccccxv. declaravit , Cæleſtium à Concilio Carthaginienſi anno ccccxi. fuiſſe damnatum , & Pelagii errores ab Auguſtino , & Hieronymo proſtigatos eſſe . *Joannes* Epifcopus Hieroſolymitanus , ad cujus obſequia , ſalutationis cauſâ , acceſſerat *Oroſius* , Conventum habuit Presbyterorum , in quem non ſolùm introduxit Oroſium , ſed etiam Pelagium , quem licèt laicum , & in crimine Hæreſeos deprehenſum inter Presbyteros ſe-

dere iussit. *Orosius* Latine, *Joannes* Episcopus Hierosolymitanus Græcè loquebantur, sic ut uterque Interprete opus haberet, & neuter neutrum intelligeret. Institit tamen *Joannes* *Orosio*, ut ageret accusatorem, seq̃ue tunc Judicem acturum. At *Orosius* nolens, ut *Joannes*, qui *Pelagio* haud parum favebat, Judex & Arbiter in hac causa sederet, palàm professus est *Joannem* Judicem minus idoneum videri, *Pelagium* latinum esse, & se itidem latinum, ac subindè *Pelagii* Hæresim latinis partibus magis notam, ejusdemque linguæ Judicibus esse reservandam. Quibus permotus *Joannes* Episcopus Hierosolymitanus, sicut testatur ipsemet *Orosius* in sua Apologia, novissimam sententiam protulit, confirmans postulationem, intentionemque nostram, ut ad Beatum *Innocentium* Papam Romanum, Fratres, & Epistola mitterentur, universi quod ille decerneret, secuturi. Sed ut Hæreticus *Pelagius* imposito sibi eatenus silentio conticesceret, & ut nostri ab insultatione convicti *Joannis* confusique temperarent. Universi in hanc sententiam consensimus, gratiarum actione celebrata, pace facta, & consummata ad pacis testimonium oratione discessimus.

Non multò post hunc Conventum Hierosolymitanum *Pelagius* Hærescos nomine apud Palæstinos Antilitites denunciatus fuit. Ejus accusatores fuerunt *Heros* Arelatensis, & *Lazarus* Aquensis Episcopi, qui suis Sedibus pulsi in Palæstinam secesserant. Hi duo Episcopi errores ex *Pelagii* & *Cœlestii* libris collectos in libellum retulerunt, hisque adjece-
runt tum illos articulos, quorum causâ damnatus fuerat *Cœlestius* à Concilio Carthaginensi, tum etiam illos articulos, quos *Hilarinus* Syracusanus

laicus ad S. Augustinum miserat, ut legere est in Epistola ejusdem Hilarii 156. alias 88. & in Epistola Augustini ad Hilarium 157. alias 89. Scriptum, idiomate latino libellum obtulerunt hi duo Episcopi *Enlogio* Cæsariensi Episcopo totius Palæstinæ Metropolitano, sed hujus causæ judicium remissum est ad Synodum Diospolitanam, quæ mense Decembri ejusdem anni ccccxv. coacta fuit. Huic Synodo interfuerunt quatuordecim Episcopi, sed ab ea abfuerunt *Heros*, & *Lazarus* Episcopi, & *Orosius* Presbyter, ita ut nullus in hac Synodo adesset, qui partes Actoris obiret in Pelagium. Perlectus est libellus, in quo *Heros*, & *Lazarus* Episcopi sententias, seu potius virulenta Pelagii dogmata perscripserant, & Interpretis opera usi sunt Judices latinæ dictionis ignari. Ast Pelagius ad sibi objecta responsiones eloquio græco reddidit. Quasdam propositiones à se dictas exposuit, & ad sensum Catholicum inflectere studuit, alias propositiones à se nunquam fuisse assertas confidenter asseveravit. Quin, & ab Articulis in Concilio Carthaginensi proscriptis, & à quibusdam *Cælestii* sententiis se abhorrere professus est, sicque per crebra mendacia, & e mentiam fidei professionem Pelagius damnationis sententiam delinavit, & innocens ab hac Synodo declaratus est his verbis: *Nunc quoniam satisfactum est nobis prosecutionibus præsentis Pelagii Monachi, qui quidem piis doctrinis consentit, contraria verò Ecclesiæ fidei reprobatur, & anathematizatur, Communionis Ecclesiasticæ eum esse, & Catholicæ confitemur.* Hinc exultans Pelagius, missis in Provinciam Epistolis, sua dogmata approbata fuisse non paucis persuasit; sed perperam, nam S. Augustinus pluribus in locis asserit, tantum abesse,

ut in hac Synodo Diospolitana absolutus fuerit Pelagius, ut suo semet ore damnaverit. Certum tamen est, Pelagium mentalium restrictionum peritum, tantâ versutiâ accusantium, & judicantium diligentiam elusisse, ut Patribus Synodi Diospolitanae fucum fecerit, eisque accusatores suos calumniatores, se verò Catholicum persuaserit. Unde non mirum, si Patres Diospolitani, licet Pelagii Hæresim execrarentur, eum tamen Catholicum se fingentem decepti errore facti absolverint. Quâ de causâ S. Hieronymus in Epistola 202. alias 24. ad *Alypium*, & *Augustinum*, quæ inter Augustinianas legitur, appellat Synodum Diospolitana *miserabilem*, non quod errores Pelagii approbaverit, sed quod errore facti ipsum absolverit.

Orosius initio anni ccccxi. è Palæstina in Africam navigavit, & literas ab *Herote*, & *Lazaro* Episcopis Gallis scriptas, quæ gesta in Synodo Diospolitana declarabant, secum detulit, easque Africæ Proconsularis Episcopis, qui tùm temporis solemnem Synodum Carthagine agebant, exhibuit. Convenērunt ad hanc Synodum Carthaginensem Episcopi 68. qui lectis iis quæ contrâ Cœlestium anno ccccxi. in priori Synodo Carthaginensi statuta fuerant, & gestis in Synodo Diospolitana attentè etiam consideratis, Pelagii, & Cœlestii errores denuò anathemate confixerunt. Eodem anno Hæresim Pelagianam Synodus Episcoporum Numidix, quæ *Milevi* celebrata est, cuique interfuit S. Augustinus, damnavit. Utraque tamen Synodus, sive Carthaginensis, sive Milevitana secunda discussio negotio relationem misit ad Innocentium I. Summum Pontificem, ut ipse in quo residebat Sedis Apostolicæ Prin-

Principatus, suâ firmaret auctoritate quidquid Episcopi censuissent de damnando Pelagio, & Cœlestio, eorumque Hæresi. Quinque etiam Africani Præsules, scilicet *Aurelius, Alypius, Augustinus, Evodius, ac Possidius*, præter Synodicas Conciliorum Carthaginensis, & Milevitanæ secundæ literas, aliam communi nomine familiarem Epistolam eidem Innocentio Papæ scripserunt, quâ totam Pelagii causam, uberius apud illum exposuerunt. Ad literas Synodicas Conciliorum Carthaginensis, & Milevitanæ secundæ, sicut ad Epistolam familiarem quinque Episcoporum rescripsit Innocentius Papa die 27. mensis Januarii anni ccccxvi. ac primum quidem nefarium Pelagii dogma condemnavit ut Regulæ Fidei contrarium, & deinde, auctores Hæreseos Pelagium, & Cœlestium à Communione Ecclesiastica separavit, donec resipiscerent. Hinc S. Prosper in Carmine de *Ingratis* Romanæ Sedi primam Pelagianæ Hæreseos damnationem acceptam refert his versibus:

Pestem subeuntem prima recidis

Sedes Roma Petri, quæ Pastoralis honoris

Facta caput Mundi, quidquid non possidet armis

Religione tenet.

D. Concilium Carthaginense anno ccccxi. celebratum Hæresim Pelagianam, ut jam observasti, condemnavit. Idem factitarunt Concilia Carthaginense, & Milevitanum secundum habita anno ccccxi. Quare igitur S. Prosper scribit Innocentium I. Papam, qui solum anno ccccxvi. Hæresim Pelagianam proscripsit, & Pelagium, & Cœlestium à Communione Ecclesiæ separavit, fuisse primum, qui Pelagianam Hæresim condemnavit?

M. Hæc facili negotio conciliari possunt. Quamvis enim Concilium Carthaginense anno ccccxi. indictum à Presbyterio & Ecclesiæ Communione Cœlestium, ob errores quos spargebat, repulerit, hæc tamen privata tantum fuit in eum hominem, censura, quam Cœlestius appellatione ad Romanam Sedem sese elusisse putabat. Idem dicendum est de Episcopis Africanis in Conciliis Carthaginensi, & Milevitano secundo anno ccccxvi. congregatis. Hi si quidem Episcopi Africani ad Sedem Apostolicam, seu ad Innocentium I. Summum Pontificem referendum esse censuerunt quidquid de damnatione Pelagii, & Cœlestii sentiebant. Unde ab Innocentio Papa tamquam à Christi Vicario, & Supremo totius Ecclesiæ Capite ultimam illius causæ definitionem expectabant. Merito igitur S. Prosper Romanæ Sedi, seu Innocentio I. primam tribuit Pelagianæ Hæreseos damnationem.

D. Post definitionem Sedis Apostolicæ fuitne finita causa, & extincta Pelagianorum Hæresis?

M. Post sententiam latam ab Innocentio I. Romano Pontifice finita quidem fuit causa, sed non finitus error. *Cælestius* quippè vaserimus Syrophanta, qui anno ccccxi. in Concilio Carthaginensi damnatus, Ephesum se contulerat, & inde Constantinopolim venerat, ubi suam Hæresim disseminans ab *Attico* hujus Urbis Episcopo ejectus est, datis ad Episcopos Asiæ, Thessaloniciæ, & Carthaginensis adversus illum literis, Cœlestius, inquam, auditâ morte Innocentii Papæ, ex Oriente Romam protinus advolavit sub initium Pontificatus *Zosimi*. Huc cum pervenisset *Cælestius*, Zosimo Papæ Synodum in Basilica S. Clementis celebranti libel-

libellum porrexit, quo fidem suam testabatur. Ejus professio visa est Zosimo Catholica, non quòd Cœlestii dogmata in hac professione contenta approbaret Summus Pontifex, sed quod Apostolicæ Sedis judicium amplecti se paratissimum exhiberet. Non putavit tamen *Zosimus*, Cœlestium statim esse absolvendum, sed *interposito duorum mensium tempore*, donec rescriberetur ex *Africa*, resipiscendi ei locus sub quadam medicinalis sententiæ lenitate concessum est, inquit S. Augustinus lib. 2. de Peccato Originali cap. 7. suas quoque ad Zosimum literas, & professionem fidei misit Pelagius, quibus nimis facile assentiens Pontifex, eum ut Catholicum recepit, duasque hac de re scripsit Epistolas, unam ad Episcopos Africæ, alteram ad *Aurelium* Carthaginensem Episcopum, quibus Sanctos illos Præsules durius increpuit, dolens Pelagii, & Cœlestii vices, qui Catholicè cum saperent, Hæreseos damnati fuissent. Severè etiam perstrinxit *Zosimus* *Herotem* Arelatensem & *Lazarum* Episcopum Aquensem, eosque absentes, & Episcopatu, & communione privavit. Verùm, culpam suam, quam errore facti imprudens admiserat *Zosimus*, postea correxit, eumque excusat S. Augustinus lib. 2. de Peccato Originali cap. 6. his verbis: *Sed multum misericors memorata Sedis Antistes* (scilicet *Zosimus*) *ubi eum, Cœlestium, vidit ferri tanta præsumptione præcipitem, tanquam furentem, donec, si posset fieri, resipisceret, maluit eum sensim suis interrogationibus, & illius responsionibus colligere, quam districta feriendo sententia, in illud abruptum, quo jam propendere videbatur impellere.* Sanè, statim ac *Zosimus* à duabus Synodis Africanis accepisset rescripta, & gesta omnia,

quæ Pelagii, & Cœlestii causam, eorumque damnationem spectabant, & fraudes utriusque Hæretici detexisset, ad pleniorē audientiam Cœlestium vocavit. Sed Cœlestius malè sibi conscius, & artes suas patère, nullumque sibi superesse tergiversandi modum advertens, sese examini subduxit, & Romam excessit, evasit, erupit. Cognitâ illius fugâ, Zosimus absque ulla cunctatione tulit in eum, & in Pelagium decretoriam sententiam, universis Mundi Episcopis grandem illam scripsit Epistolam, quæ *Tractoria* appellatur, omnia Conciliorum Africanorum adversus Pelagium, & Cœlestium Decreta approbavit, & latam à Decessore suo Innocentio I. in Pelagium, & Cœlestium sententiam confirmavit, misitque *Tractoriam* suam Epistolam, & gesta Synodi Africanæ ad *Honorium* Imperatorem, Ravennæ agentem, in qua ab ipso petebat, ut Cœlestius, omnesque Pelagiani Urbe pellerentur, & toto Christiano Orbe tanquàm Hæretici haberentur, quod lubenti animo executus est Honorius, Edictum Imperiale emittens anno ccccxviii. quo jussit, Pelagium, & Cœlestium ex Urbe ejici, omnes istorum Hæresis convictos facultatibus spoliari, ac perpetuo multari exilio. Aliam adversus Pelagium, & Cœlestium Constitutionem edidit Imperator anno ccccxix. quâ non solum priorem renovavit, sed & insuper sanxit, ut Episcopi, qui *Tractoria* Zosimi Papæ Epistolæ subscribere renuerent, suis sedibus ejicerentur. Obtemperarunt universi Episcopi, exceptis tamen *Juliano* Pelagianæ Hæreseos Patrono (qui in Apulia natus, Episcopus fuit Urbis *Eclanensis*, quæ est inter Apuliam & Campaniam, Benevento distans viginti

ginti milliaribus, & *Frigentum* nunc vocatur) & aliis octodecim ejusdem Pelagianæ factionis Episcopis, qui Zosimi Papæ Epistolæ subscribere detrectantes, non solum Imperialibus legibus, sed & Sacerdotalibus statutis depositi, atque exautorati omni Italia deturbati sunt. *Julianus*, aliique ejus complices octodecim Episcopi suis Sedibus pulsi libellum fidei obtulerunt *Augustino* Primati Aquilejensi, & Epistolam scripserunt ad *Rufum* Thessalonicensem Episcopum Sedis Apostolicæ Vicarium, in qua postulabant audiri in Concilio Oecumenico, quod tamen eis concessum non est, utpotè ad proscrubendos illorum errores ubique terrarum jam damnatos minimè necessarium. Pelagiani non tantum Romæ, sed etiam Constantinopoli, & Epheso expulsi sunt. E Palæstina quoque, in quam se contulerant, à *Theodoto* Episcopo Antiocheno ejecti sunt. *Cælestius* tamen sub Pontificatu *Cælestini* Romanam reversus, in gratiam Summi illius Pontificis irrepere tentavit, sed frustra: Nam *Cælestinus* Papa Decessorum suorum vestigiis insistens, & avitæ de gratia doctrinæ, quam strenuè defenderat *Augustinus*, intrepidus assertor, non solum *Cælestium*, sed & *Julianum*, cæterosque Sectæ Pelagianæ homines totius Italiæ finibus jussit extrudi. *Julianus* in Ciliciam apud *Theodorum* Mopsuestenum navigavit, è qua etiam ejectus est post sententiam in Concilio habito in Cilicia, in quo *Cælestius* cum sua Hæresi damnatus est, ejusque damnationi *Theodorus* Mopsuestenus saltè verbo tenus consensit. E Cilicia ejectus *Julianus* nihil non egit, ut suæ Sedis restitueretur, sed cum ejus conatus ad nihilum reciderent, in Siciliam secessit, ubi mortuus est.

Deni-

Denique, Pelagiani, ut res suas afflictas utcumque erigerent, fœdus cum Nestorianis Hæreticis iniierunt. Sed unâ cum illis in Concilio Generali Ephesino anno ccccxxxi. damnati, ad summas angustias redacti sunt, paucique remanserunt per Occidentem hæc illac dispersi.

D. Quandonam, & quo pacto exorta est Semipelagianorum Hæresis?

M. Semipelagianorum Hæresis, quæ Pelagianæ appendix, & infans furculus est, initium dedit enatum dissidium in Monasterio Adrumetino in Africa occasione Epistolæ S. Augustini ad *Sixtum* Presbyterum, qui postea Romanus Pontifex creatus est. Hanc siquidem Epistolam S. Augustini, quam *Florus* hujus cœnobii Monachus *Adrumetum* transmisit, cùm legissent Monachi Adrumetini, in sensus à mente S. Augustini penitus alienos distracti sunt. Quod ubi S. Augustinus per *Felicem*, & *Cresconium* Monachos Adrumetinos compertum habuisset, scripsit, ad Monachos illos instruendos libros *de Gratia*, & *libero Arbitrio*, duasque misit Epistolas ad *Valentinum* cœnobii Adrumetini Præfectum. At librorum *de Gratia*, & *libero Arbitrio* lectio novo errori locum dedit. Cùm enim quidam Monachi Adrumetini legissent, omnia bona opera esse Dei dona, indè deduxerunt, neminem esse corripiendum, si præcepta Dei non faceret, sed tantummodò pro illo orandum Deum, ut ipso donante, faceret quod jubebatur. Id S. Augustino *Valentinus* per *Florum* Monachum significavit. Undè S. Augustinus, ut procul ab Adrumetinis omnem errorum caliginem dispelleret, librum *de Correctione*, & *Gratia* inscriptum elucubravìt. Sub idem tempus, quo in
Mo-

Monasterio Adrumetino jacta sunt Semipelagianæ Hæreseos femina, *Vitalis* Carthaginensis sese aperte Semipelagianum prodidit, asserendo non aliter posse liberum Arbitrium, & Dei justitiam servari, nisi dicatur, fidei initium non esse donum Dei, sed esse à nobis, idest, ex propria voluntate, itaut quisque pro eo, quod ex libertate naturali fecerit, præmium, vel supplicium sit recepturus. Ab hoc errore S. Augustinus volens revocare *Vitalem*, scripsit ad eum Epistolam 217. alias 107. in qua hunc errorem ex precibus Ecclesiæ confutat, & duodecim Regulas proponit ad fidem Ecclesiæ pertinentes circa quæstionem de Gratia Dei. Semipelagiana Hæresis ex Africa penetravit in Gallias, ubi latè propagata est, multosque nacta Patronos, præsertim *Vincentium Lirinensem*, *Faustum* Episcopum Rejensem, *Gennadium*, plures Presbyteros Massilienses, & *Cassianum*, qui non fuit natione Scythæ, ut plerisque visum est, sed in Provincia, & fortè Massiliis ortus, sicut post *Holstenium* fusè probat Cardinalis *Norisius* cap. 1. lib. 2. Historiæ Pelagianæ. Serpente itaque instar Cancris Semipelagianâ Hæresi in Galliis, *Prosper*, & *Hilarius* anno ccccxxviii. ad S. Augustinum scripserunt, ut enodaret ipsemet quæstiones à Massiliensibus propositas, ad quos S. Augustinus direxit libros de *Prædestinatione Sanctorum*, & de *Dono Perseverantiæ*. Verùm, cum in dies augetur Semipelagianorum factio, *Prosper* & *Hilarius*, qui Augustini doctrinam defendendam susceperant, Romam profecti à Cælestino Papa anno ccccxxxi. obtinuerunt Epistolam ad Galliæ Episcopos datam, in qua eos acrius increpuit, quod permetterent, doctrinam S. Augustini à qui-

quibusdam Presbyteris impugnari. Huic Epistolæ Cœlestini Papæ adjecta sunt Capitula, quæ S. Leoni Magno aliqui tribuunt. Anno cccxciv. *Gelasius* Papa in Synodo Romana libros *Cassiani*, ac *Fausti* damnavit, Sanctorum verò *Augustini*, ac *Prosperi* Opera commendavit. Ejusdem *Fausti* Episcopi *Rejensis* libros nullius in Ecclesia auctoritatis esse declaravit *Hormisdas* Papa in Epistola ad *Possessorem* Episcopum data anno dxx. Denique, Concilium Arausicanum anno dxxix. celebratum omnes Semipelagianorum errores confixit, ut fusiùs ostendemus in Colloquiis Sexti Ecclesiæ Sæculi.

D. Quinam fuerunt Semipelagianorum errores?

M. In primis, Semipelagiani existimabant, ad initium fidei, & bonorum operum necessariam non esse gratiam, sed satis superque sufficere vires liberi arbitrii. Sunt tamen gravissimi Theologi, qui asserunt, hunc errorem non fuisse omnibus Semipelagianis communem, multosque extitisse inter illos, præsertim *Cassianum*, *Faustum*, *Gennadium &c.* qui prævenientis gratiæ interioris etiam ad initium fidei, & bonorum operum necessitatem admiserunt, idque colligunt ex Epistola S. *Prosperi* ad S. *Augustinum*. Secundò, Semipelagiani docebant, Deum velle indiscriminatim omnium hominum salutem, si ipsi velint, cumque non magis velle Electorum, quàm Reprobatorum salutem. Tertiò, inficiabantur, prædestinationem fieri secundùm propositum Dei, & esse gratuitam, sed eam pendere volebant ex meritis, quæ Deus per scientiam conditionatorum explorabat, etiam in parvulis, qui statim moriuntur post susceptum baptismum.

ptissima. Quartò, gratias sufficientes, præter quas ad actu agendum aliæ ex parte Dei non requirebantur, & quæ quantum ad efficaciam subditæ erant libero hominis arbitrio, omnibus præstò adesse, pertendebant. Quintò, dicebant, perseverantiam non esse singulare Dei donum, sed esse in cujuslibet hominis potestate, itaut, *si velit*, perseveret. Denique, S. Augustini doctrinam rejiciebant tanquam novam, nimis duram, quæ sub ipso prædestinationis nomine fatalem necessitatem inducebat.

D. Præter Pelagianam, & Semipelagianam Hæreses, fuitne exorta in quinto Ecclesiæ sæculo alia Hæresis circa quæstionem de Gratia?

M. Multi moderni Auctores affirmant, erupisse in quinto Ecclesiæ sæculo *Hæresim Prædestinarianorum*, qui, sublato penitus libero arbitrio, omnia Gratiæ accepta referebant. At de illa Prædestinarianorum Hæresi antiqui Scriptores nullam prorsus mentionem fecerunt, ut multi contendunt. Immò Scriptores noni sæculi *Prudentius Tricassinus*, & *Remigius* Episcopus Lugdunensis contra *Scotum Erigenam* disputantes, negant unquam in rerum natura extitisse Prædestinarianorum Hæresim. Extat tamen Epistola *Fausti* in quinto sæculo Episcopi Rejenfis ad quemdam *Lucidum* Presbyterum hisce Prædestinarianorum erroribus infectum, & in duobus libris, quos *de Gratia*, & *libero Arbitrio* edidit idem *Faustus*, testatur, Prædestinarianorum Hæresim à Conciliis Arelatenfi, & Lugdunensi fuisse proscriptam, sibi que eam impugnandi provinciam ab utroque Concilio fuisse demandatam. Verùm, *Fausti* testimonium hac in re non magni ponderis esse videtur, cum certum sit, hunc Episcopum in-

tus

tus & in cute fuisse Semipelagianum, & sub prætextu confutandi Prædestinatianam Hæresim, duos de Gratia, & libero Arbitrio scripturisse libros, in quibus datâ operâ S. Augustini de gratuitâ Prædestinatione sententiam totis viribus impugnat, & Massiliensium, seu Semipelagianorum dogmata dudum à S. Augustino eversa restaurare satagit. Cum igitur *Fausto*, aliisque Semipelagianis solemne esset calumniari discipulos S. Augustini, eisque nova, & absurda perperam affingere dogmata; hinc multi viri eruditi adducuntur ut credant, hanc Prædestinatianam Hæresim imaginariam fuisse, & sub hoc Prædestinatianorum nomine discipulos S. Augustini à *Fausto*, aliisque Semipelagianis Hæreticis fuisse traductos. Utramque itidem Synodum Arelatensem, & Lugdunensem, itemque *Lucidi* Epistolam, quâ suum revocat errorem, fictitias esse, & subdolâ *Fausti* arte compositas, ut S. Augustini doctrinam, sub nomine Prædestinatianorum à Synodis Gallicanis Arelatensi & Lugdunensi damnatam vendicaret, sentiunt multi hujus temporis viri eruditi. At, cum difficile creditu sit, *Faustum* Rejemsem Episcopum potuisse universis Gallicanis Episcopis imponere, eisque falsas Epistolas, & fictitia obtrudere Concilia; magis mihi probatur sententia Cardinalis *Norisii*, qui cap. 15. lib. 2. Hist. Pelagianæ asserit, quosdam in quinto Ecclesiæ sæculo extitisse obscuros, & rudioris intelligentiæ viros, qui, sublato libero arbitrio, omnia Gratiæ tribuebant, & perversas de Prædestinatione, & de morte Christi pro salute hominum opiniones imbiberant, ideoque Prædestinatiani appellabantur; eos tamen paucos admodum fuisse, nec unquam in Sectam coalluif-

luisse. Certè, *Faustus* unum dumtaxat *Lucidum* Prædestinarianum appellat, ad quem Epistolam direxit, ut eum ab errore abduceret, & ad sanio rem mentem revocaret. Testatur etiam *Faustus*, hunc *Lucidum* resipuisse, suorumque errorum palinodiam cecinisse. Nulla ergò fuit in quinto Ecclesiæ sæculo conflata Prædestinarianorum Secta, de qua apud antiquos Scriptores ne vola quidem, ac ullum vestigium apparet.

D. Veniamus nunc ad Nestorianorum Hæresim, cujus ortum, progressum, atque interitum breviter exponas velim.

M. Nestorianorum Hæresis parentem habuit *Nestorium*, qui mortuo *Sisinnio* Episcopo Constantinopolitano sub finem anni ccccxxvii. in ejus locum subrogatus est anno ccccxxviii. Erat ille Germaniciâ oriundus Oppidulo Syriæ, & Monachus in *Laura* *S. Euprepîi* propè Antiochiam. Nestorius Magistrum habuit *Theodorum Mopsuestenum*, à quo suum hausit errorem de Incarnatione Verbi. Magnam sanctimoniz speciem affectabat, ob quam à *Theodosio Imp. Constantinopolim* vocatus, illuc venit cum *Anastasio Presbytero*, intimo omnium consiliorum suorum socio, statimque suam propalavit Hæresim. At enim non solum patienter tulit Nestorius, ut *Anastasius* ille Presbyter, quem secum duxerat, & *Dorotheus* Episcopus magna voce in Ecclesia inclament: *Si quis Mariam Dei-param esse dixerit, anathema sit*; sed etiam ipse in Ecclesia, in qua frequens erat Populus, sermonem habuit de Incarnatione Dominica, qui totum continet impietatis virus cum primùm ab ipso prolata. Ad tot Nestorii blasphemias cohorrere omnes Fideles, maximaque fuit Audi-

Auditorum indignatio, atque animorum commotio. Nestorius tamen paulò post priorem Sermone, alios ad Populum habuit, in quibus disertè negavit unionem Hypostaticam Verbi Divini, ac subindè Deum verè natum, crucifixum, ac mortuum esse. Præterea, asseruit, B. Virginem non esse Matrem Dei, sed tantum Matrem Christi, duosque in Christo distinxit Filios, quorum unus esset Filius Dei ab æterno genitus, & Consubstantialis Patri, alter verò ex Maria natus, solum gratiâ, & adoptionis Filius Dei esset. Sic in Christum furenti Nestorio, & totius Incarnationis Dominicæ œconomiam subvertenti plures magnis animis resisterunt. Primus tamen, & unus instar omnium Nestorium impiè pro Concione dicentem ausus est verbo palam arguere *Eusebius* simplex laicus, qui postea propter singularem doctrinam, & eximiam pietatem *Dorilai* Episcopus fuit consecratus. Is quippè constanti animo suæ fidei, & animosè in novam exortam Hæresium fortitudinis præclarum specimen dedit, obtestationem suam publicè in Nestoriū proponendo, quo laudabili facto omnium animos in fidei studio confirmavit, & adversus Episcopum *Pauli Samosatani* impia dogmata renovantem mirum in modum inflam-mavit. Dùm Constantinopoli cuncta sic odiis fervèrent, & omnes in prava dogmata inveherentur, *Nestorius* odium & indignationem Populī nihil moratus, atque ad pestem, quam invexerat, latius spargendam unicè intentus, misit per fidos homines in Provincias *Tractatum*, quem ediderat, de *Incarnatione*, cum aliquot Homiliis. His Nestorii scriptis in Ægyptum perlatis, eaque, ut fieri assolet, avidè ob novitatem legentibus Monachis, Cy-
rillus

rillus Alexandrinus Episcopus necessarium omninò duxit Epistolam scribere ad Ægypti Monachos, eosque præmunire, ne erroribus contentis in Nestorii scriptis, quæ in eorum manus venerant, per imperitam simplicitatem, vel credulam levitatem inficerentur. Scripsit etiam *Cyrillus* ad Nestorium, ut eum ad pœnitentiam, & ad Palinodiam provocaret. Quibus Cyrilli literis rescripsit quidem *Nestorius*, sed non sine gravi Cyrilli accusatione. Hinc contentionis origo, quæ inter illos duarum majorum Orientis Sedium Alexandrinæ & Constantinopolitanæ Antistites postea exarsit. *Nestorius* animum *Cælestini* Papæ, ad quem ipsius scripta delata fuerant, quique illorum lectione fuerat maximè offensus, occupare tentavit, & ad ipsum dedit Epistolam. *Cyrillus* etiam Alexandrinus Episcopus per *Possidonium* Diaconum literas ad *Cælestinum* Papam scripsit, ut illum de sparsis à Nestorio erroribus certior redderet, quibus acceptis, Synodum Romæ habuit Summus Pontifex anno ccccxxx. in qua primò damnatus est *Nestorius*, jussuque, ut depositionis pœnâ mulctaretur, si intra decimum à denunciatione diem non resipisceret, & Catholicæ Fidei confessioni non subscriberet. Secundò, restituti sunt in Ecclesiæ communionem hi, qui propter fidem à Nestorio ejecti fuerant. Tertiò, sententiæ contrà Nestorium exequendæ Cyrillo Alexandrino Episcopo munus demandatum est. Denique, septem à Summo Pontifice Cælestino scriptæ sunt Epistolæ, scilicet *Cyrillo* Episcopo Alexandrino ut Sedis Apostolicæ vice hoc in negotio fungeretur; *Nestorio*, ut, abjecto errore, ad pœnitentiam rediret, *Clero Constantinopolitano*, ut constans in avita

fide permaneret, *Joanni* Antiocheno, *Ruso* Thessalonicensi, *Juvenali* Hierosolymitano, *Flavio* Philippiensi, ut strenuè fidei causam agerent.

Cyrillus Alexandrinus Episcopus, receptis Cœlestini Papæ literis, Concilium Alexandriæ coëgit, & ad Nestorium misit Epistolam Synodicam, in qua tria continebantur: videlicet *Fidei expositio*, *denunciatio Sententiæ* à Cœlestino Papa latæ, & *duodecim Anathematismi*, quibus subscribere debebat Nestorius. Quatuor Episcopi à Synodo Alexandrina ad Nestorium missi Constantinopolim appulerunt, literasque Apostolicas *Cælestini*, & Synodicas *Cyrilli* ejus Vicarii dederunt *Nestorio*, quas, ubi legisset versipellis ille Hæresiarcha, confestim intellexit, quanta capiti suo impenderet procella, ad quam declinandam petiit à Theodosio juniore Imperatore ut convocaretur Concilium Generale. Quod reverà indictum fuit, & ex universis Diœcesibus Episcopos ad diem Pentecostes anni ccccxxxi. Imperator Theodosius Ephesum vocavit, missis ad majorum Sedium Antistites, *Cælestinum* Romanæ, *Cyrillum* Alexandrinæ, *Joannem* Antiochenæ, *Juvenalem* Hierosolymitanæ, *Rusum* Thessalonicensis, *Capreolum* Carthaginensis, literis. In hac Synodo Generali Ephesina damnatus est *Nestorius*, & suâ Sede dejectus. Sed de his, quæ gesta sunt in hac Synodo Generali Ephesina, sicut & de Conciliabulo, quod *Joannes* Antiochenus, qui Nestorii personæ, non tamen doctrinæ plus æquo favebat, unâ cum suis Episcopis habuit, pacemque universæ Ecclesiæ perturbavit, commodius differemus in quarto Colloquio, in quo de Conciliis, quæ in quinto Ecclesiæ sæculo fuerunt convocata, sermonem instituemus.

D. Quid

D. Quid continebant, & quibus verbis erant concepti duodecim illi Anathematismi, quos Cyrilus misit ad Nestorium ut eis subscriberet?

M. Anathematismus primus his erat verbis conceptus: *Si quis Emmanuelem Verbum Deum, & ob id Sacram Virginem Theotocon esse non confitetur (genuit enim illa incarnatum Dei Verbum secundum Carnem) anathema sit.*

Anathematismus secundus: *Si qui sunt, qui Dei Patris Verbum Carni secundum Hypostasim unitum, & unum tantum und cum sua Carne Christum esse, eundem nimirum Deum simul & hominem non consiteantur, anathema sit.*

Anathematismus tertius: *Si quis post unionem Hypostases in Christo distinguit, eaque dumtaxat conjunctione easdem inter se necit, quæ est secundum dignitatem, vel auctoritatem, vel potestatem, & non ea potius, quæ est secundum naturalem unionem, anathema sit.*

Anathematismus quartus: *Si quis duabus Personis, vel Hypostasibus eas voces attribuit, quæ in Evangelicis & Apostolicis Scripturis passim occurrunt, quæve à Sanctis de Christo, aut ab ipso Christo de se ipso dictæ sunt, & alias quidem homini seorsum à Dei Verbo considerato adscribit, alias verò tanquam in Divinam Majestatem convenientes soli Verbo, quod ex Deo Patre est, accommodat, anathema sit.*

Anathematismus quintus: *Si quis dicere audet, Christum non esse verum Deum, sed hominem tantum, Deiferum, ut potè unum naturalemque Filium, quatenus nimirum Verbum Caro factum, Carni & Sanguini perinde ac nos communicavit, anathema sit.*

Anathematismus sextus: *Si quis Dei Patris Verbum,*

bum, Christi Deum, vel Dominum esse dixerit, neque post Verbum secundum Scripturas incarnatum, unum eundemque Deum simul & Hominem esse confessus fuerit, anathema sit.

Anathematismus septimus: Si quis Jesum Christum, Hominem tantum, Divini Verbi vi actum esse dixerit, aut illustrem illam Unigeniti gloriam illi ipsi homini, veluti alteri cuiusdam ab ipso Verbo advenisse Commentus fuerit, anathema sit.

Anathematismus octavus: Si quis Hominem assumptum unà cum ipso Dei Verbo adorandum, unà cum illo glorificandum, unà cum illo tanquam alterum in altero existentem Deum appellandum esse, dicere ausus fuerit (hunc enim intellectum Particula, cum, adiecta perpetuò ac necessario afferre consuevit) & non una potius adoratione Emmanuelem honorat, unamque hactenus illi glorificationem attribuit, quatenus Verbum factum est Caro, anathema sit.

Anathematismus nonus: Si quis unum Dominum nostrum Jesum Christum à Spiritu Sancto tanquam à virtute ab se aliena glorificatum dixerit, efficaciamque, qua contra immundos Spiritus uteretur, & divina inter homines miracula operaretur, ab ipso eodem accepisse prædicaverit, & non proprium, naturalemque illius esse Spiritum, per quem divina signa edidit, anathema sit.

*Anathematismus decimus: Christum Jesum nostræ Confessionis Pontificem & Apostolum extitisse, eundemque semetipsum pro nobis in odorem suavitatis Deo Patri obtulisse, divina Scriptura commemorat. Si quis ergo dixerit, Pontificem & Apostolum nostrum non esse ipsum Dei Verbum postea quam Caro & homo nobis similis factum est; Sed hominem illum, qui ex muliere natus est, quasi alterum quempiam ab ipso diversum: aut
si quis*

Si quis Christum pro se ipso quoque, & non solum pro nobis Sacrificium obtulisse affirmaverit (neque enim is oblatione opus habebat, qui nullum peccatum commiserat) anathema sit.

Anathematismus undecimus: Si quis ipsam Domini Carnem vivificam, ipsiusque Verbi, quod ex patre est, propriam esse negaverit, sed alterius cujuspiam ipsi verbo secundum dignitatem tantum conjuncti, aut divinam tantum inhabitationem sortiti esse dixerit: neque verè rursum vivificam, ut modò meminimus, ed quod Verbi, quod omnia vivificat, facta sit propria, confessus fuerit, anathema sit.

Anathematismus duodecimus: Si quis inficiatur Dei Verbum secundum Carnem passum, secundum Carnem crucifixum, mortemque secundum Carnem gustasse, & primogenitum tandem ex mortuis factum esse, quatenus videlicet vita est, & vivificum, ut Deus, anathema sit.

Hi sunt Celeberrimi duodecim S. Cyrilli Anathematismi ab universa Catholica Ecclesia approbati, quibus tamen subscribere nunquam voluit Nestorius. Undè in pœnam suæ pervicaciæ coepit in hoc mundo æternum impiorum experiri supplicium. Nam Theodosii junioris Imperatoris ipsi olim nimium propitii Edicto in exilium fuit deportatus in Oasim, ubi, justo Dei judicio, exesâ vermis lingua, quâ in Christum, & in Deiparam, Virginem Mariam tam horrendas blasphemias evomuerat, ex hac vita ad æterna supplicia migravit. In Nestorii Hæresim fortius & animosius dimicans Eutyches Presbyter Archimandrita, seu Abbas cujusdam Monasterii Constantinopolitani in extremum deflexit errorem, novamque Hæ-

resim conflavit , cujus Sectarii dicti sunt *Euty-*
chiani .

D. Quem errorem docuit iste *Eutyches* , & quem exitum habuit inuenta ab illo Hæresis ?

M. *Eutyches* , qui , ut mox diximus , Nestoriana profligandæ Hæresi haud mediocrem operam navaverat , tandem anno ccccxlvi. in errorem è diametro oppositum impegit , & utramque naturam , *Divinam* scilicet , & *Humanam* in Christo post Incarnationem promiscuè confundens , unicam in Christo admisit naturam , seu *Divinam* , à qua dicebat fuisse absorptum quidquid in Christo apparebat humanum . Ex hoc Eutychetis errore consequebatur , vel naturam divinam esse in se ipsa mutationibus , doloribus , mortique obnoxiam ; vel ea , quæ Christus pro nobis passus est , phantastica fuisse , mera Commenta & ludibria . *Eusebius* Doriæ Episcopus Eutychetem sæpius de hoc abjiciendo errore admonuit , sed cum in eo retinendo obstinate perstaret Eutyches , eum apud *Flavianum* Constantinopolitanum Episcopum accusavit . Hanc accusationem ægrè admodum tulit *Eutyches* , & Sancto Leoni Pontifici Romano conquestus est , quod *Nestoriana Hæresis* quorundam rursus studiis pullularet . Laudavit ejus zelum S. Leo , ac benignè ad illum rescripsit anno ccccxlix. interim *Flavianus* Constantinopolitanus Episcopus , apud quem fuerat accusatus *Eutyches* anno ccccxlviii. Synodum Constantinopoli coëgit ad dirimendam controversiam ortam inter *Florentium* Sardinum Antistitem , *Lydiæ* Metropolitanum , & duos Provinciæ suæ Episcopos . Quâ finita controversiâ , actum est in hac Synodo de Eutychete , cui Synodus diem dixit ut
co-

coram se sisteret, suæque doctrinæ rationem redderet. Sed *Eutyches* diù tergiversatus venire ad Synodum, tandem comparuit, palàmque declaravit, se quidem in Christo ante Unionem, seu Incarnationem Verbi, duas agnoscere naturas, sed post unionem Verbi, unicam in Christo naturam, seu divinam admittere. Hunc à se propalatum errorem, jubentibus licèt Episcopis, cùm nollet abjicere *Eutyches*, nec anathema dicere his, qui post Incarnationem in Christo unicam adstruunt naturam, seu divinam, damnatus est, & Presbyteratu, atque Monasterii administratione dejectus. Ab hac Synodi sententia *Eutyches* ad Leonem Romanum Pontificem appellavit, dictitans, se ab Episcoporum cum Hæresiarcha Nestorio sentientium, factione fuisse damnatum, & libellum appellationis ad Sedem Apostolicam, quem obtulerat, non fuisse susceptum. At *Eutycheti* larvam detraxit *Flavianus* Episcopus Constantinopolitanus in Epistola ad *Leonem* Romanum Pontificem, in qua illum totius negotii veritatem edocet, omnesque artes & fraudes *Eutychetis* detegit. Quare *S. Leo* Papa ad profligandum *Eutychetis* errorem scripsit ad *Flavianum* illam celebratam adeò Epistolam, quæ postea in Concilio Chalcedonenſi tantoperè fuit laudata, à Patribus approbata, & ad fidem Ecclesiæ de Incarnatione Christi explicandam retenta, ut per eam, tanquàm per Lydium lapidem, sincera doctrina ab adulterina discerneret.

Dùm sic *S. Leo*, & *Flavianus* bono Ecclesiæ confulerent, *Eutyches* libellos supplices porrexerat Theodosio juniore Imperatori, in quibus conquerebatur, Acta Synodi Constantinopolitanæ anno cccclviii.

habitæ diminuta, falsataque fuisse. Lectis illis libellis, Theodosius Imperator *Chrysaphii* Eunuchi, quem de sacro fonte sulceperat Eutyches, sermonibus deceptus retractari Acta Concilii iussit, & expendere an quid in illis omissum, aut depravatum reperiretur. Anno itaque ccccxlix. juxta Edictum Theodosii, habita est secunda Synodus Constantinopolitana, in qua prioris Synodi Acta ad examen revocata sunt, nihilque depravatum, aut immutatum repertum est, sed potius omnia, uti gesta erant, ita scripta esse omnes Episcopi approbarunt. Sic spe suâ delusus Eutyches, imploravit patrociniū amici sui *Chrysaphii* cubicularii Imperatoris, eoque adnitente, obtinuit ut Concilium Oecumenicum Ephesi cogeretur, cui præset turpissimus *Dioscorus* Episcopus Alexandrinus, infensissimus *Flaviani* inimicus. Hæc Ephesina Synodus, quæ cœpit die viii. mensis Augusti anni ccccxlix. meritò appellatur *Synodus prædatoria*, seu *latrocinium Ephesinum*. In ea quippè tumultuaria Synodo *Eutyches* fuit innocens declaratus & ab excommunicationis vinculo solutus. Legati, quos ad illam Synodum miserat *S. Leo* Papa, pessimè habiti sunt. *Flavianus* Constantinopolitanus Episcopus Catholicæ Fidei vindex damnatus est cum *Eusebio* Dorilæi Episcopo, eandemque damnationis sententiam subierunt Episcopi *Ibas* Edessenus, *Theodoretus* Cyrensis, & *Domnus* Antiochenus. Quin, quod maximam sapit crudelitatem, *Flavianus*, ob appellationem interpositam ad Sedem Apostolicam, vinculis constrictus est, & plagis adeò contusus, ut animam exhalaret. Quæ omnia, ubi comperta habuisset *S. Leo* Papa, rescidit ac penitus damna-

damnavit in Synodo Romæ habita omnia quæ gesta fuerant in illo latrocinio Ephesino, petiitque à Theodosio Imperatore ut Concilium Generale in Italia celebraretur. Sed adduci haud potuit Theodosius, ut res semel adversus Flavianum judicatas refricari sineret; immò res gestas in latrocinio Ephesino lege latâ firmavit. At mortuo anno ccccl. Theodosio juniore Imperatore, *Marcianus*, qui ei in Imperii administratione successit, voluntati Summi Pontificis obsecundare volens, Concilium Generale Nicææ in Bythinia celebrandum convocavit. Sed quia *Attila* Hunnorum Rex anno ccccli. in Galliis victus Orientem versùs tendebat, *Marcianus* Imperator, ne Constantinopolim defereret, Concilium Nicæâ transtulit Chalcedonem, illucque omnes Episcopos suis literis accivit. Cæpta est hæc Synodus Generalis Chalcedonenfis anno ccccli. & in ea primò definitum est contra Eutychetem: Unum eundemque Christum, Filium, Dominum, Unigenitum ex duabus naturis inconfusè, immutabiliter, indivisè, inseparabiliter agnoscendum. Secundò, damnata est prædatoria Synodus Ephesina cum illius Præside Dioscoro Episcopo Alexandrino, qui etiam depositus est. Tertiò, *Theodoretus*, & *Ibas* Episcopi fuerunt absoluti. Sed hæc de latrocinio Ephesino, & de Synodo Chalcedonenfi obiter dicta sint, de his quippè copiosius dicturi sumus in quarto Colloquio, in quo datâ operamur de Conciliis, quæ habita sunt in quinto Ecclesiæ sæculo.

D. Hæ sunt igitur omnes Hæreses, quæ grassatæ sunt in quinto Ecclesiæ sæculo?

M. Præter illas, quas hætenùs recensuimus,
Hæ-

Hæreses, tres aliæ, videlicet *Helvidii*, *Joviniani*, & *Vigilantii*, quintum Ecclesiæ sæculum infestarunt, duæ tamen priores *Helvidii*, & *Joviniani* sub finem quarti sæculi pullulare cœperunt. In primis *Helvidius* Romæ infrunito ore asserere ausus est, Mariam Dei-param suæ post partum virginitatis jacturam fecisse, & filios ex carnali cum Josepho congressu procreasse. Insuper, virginitatem & continentiam averfabatur, & nuptias impensius extollebat. *Helvidium* moribus, ingenio; & natalibus abjectissimum fuisse testatur S. Hieronymus in libro, quem ad illius errores confutandos edidit, & in quo sic eum alloquitur: *Quis te, oro, ante hanc blasphemiam noverat? quis duppondii supputabat? consecutus es, quod volebas; nobilis factus es in scelere. Ego ipse, qui contra te scribo, cum in eadem tecum urbe consistam, albus, ut ajunt, aterve sis, nescio.*

Jovinianus Monachus virginitatem, & continentiam non secus ac *Helvidius* impugnavit, meritorum in hac vita, sicut & præmiorum, quæ Deus post hanc vitam justis retributurus est, inæqualitatem negavit; ad crapulam & libidinem homines excitavit his verbis, quæ S. Hieronymus refert in libris, quos contrà illum scripsit: *rarò jejunate, crebrius nubite; non enim potestis implere opera nuptiarum, nisi mulceum & carnes, & nucleum sumpseritis. Viribus opus est ad libidinem. Citò caro consumpta marcescit. Nolite timere fornicationem. Qui semel in Christo baptizatus est, cadere non potest; habet enim ad despumandas libidines solatia nuptiarum. Damnat*us est *Jovinianus* in Synodo Mediolanensi, & postea à *Siricio* Papa anno cccxc. S. Augustinus contrà illum edidit librum *de bono conjugali*, eumque
tan-

tanquàm barbarum, stupidum & in sermonibus suis confusum perstringit S. Hieronymus sic loquens lib. 1. adversùs Jovinianum : *quos cùm legissem, idest, Joviniani libros, & omninò non intelligerem, cæpi revolvere crebriùs non verba modò atque sententias, sed singulas penè syllabas discutere, volens priùs scire quid diceret, & sic vel probare, vel redarguere quod dixisset. Verùm, scriptorum tanta barbaries est, & tantis vitis spurcissimis sermo confusus, ut ne quid loquatur, nec quibus argumentis velit probare, quod loquitur, potuerim intelligere &c.* Denique, anno ccccxi. Honorius Imperator dedit Mediolani legem 53. Cod. Theod. de Hæreticis in Jovinianum, qui jam Mediolanensi Urbe anno cccxc. profugus ad Diccësim Romanæ Urbis se se receperat, ibidemque extra muros ejusdem Urbis conventus agebat; jussitque Imperator, Jovinianum Hæreticum in Insulam Boam in Dalmatia sitam, plumbatis priùs cæsum, deportari, omnesque illius ministros, ac erroris participes in alias pariter Insulas inter se diversos ablegari.

Vigilantius natione Gallus, ut *Petrus de Marca* in Opusculo posthumo, *Dissertatione de patria, Vigilantii* rectè demonstrat, non verò *Calaguritanus* in Hispania, ut visum est Cardinali Baronio, Hæresim suam, quam sub Sanctimonix larvâ diu occultaverat, cæpit evomere anno cccxvi. eamque latè sparsit per Galliam, quæ, teste S. Hieronymo in libro, quem contra *Vigilantium* lucubravit, errorum monstra hæcendis non habuerat: *Sola Gallia,* inquit S. Hieronymus, *monstra non habuit, sed viris semper fortissimis, & eloquentissimis abundavit. Exortus est subitò Vigilantius, seu veriùs Dormitan-*
tius,

tius, qui immundo spiritu pugnat contra Christi spiritum. Vigilantius multos profudit errores, quos nostri temporis Hæretici Calvinistæ, & Lutherani recoxerunt. Impugnavit quippè sacrarum Reliquiarum cultum, invocationem Sanctorum, eorumque miracula. Sugillavit vigilias, & pernoctationes in Basilicis Martyrum à fidelibus celebrari solitas. Jejunia, Clericorum cœlibatum, Virginitatem, & Monasticum Ordinem improbabat, & ad suos tutandos errores librum quartum Esdræ Apocryphum velut Canonicum laudabat. Hos Vigilantii errores invictissimis argumentis protrivit S. Hieronymus, eorumque auctorem *Vigilantium* appellat *Dormitantium*, *Dæmoniacum*, *Cauponem Calaguritanum*, *Mutum Quintianum*, *virum libidini fræna permittentem*, *Furiosum*, *Samaritanum & Judæum*, *Sacrilegum*, *Magistrum Cerebrosum*, *Infelicem hominem*, & *omni lacrymarum fonte plangendum*. Has tamen in speciem acriores objurcationes Sancto Hieronymo non ira expressit, sed zelus pro Dei gloria, & fidei integritate justissimè accensus. Undè ipsemet S. Doctor Epistola 53. ad *Riparium* Presbyterum ait: *Fatebor tibi dolorem meum, sacrilegium tantum Vigilantii patienter audire non possum. Non est crudelitas pro Deo pietas.*

D. Zelum S. Hieronymi in his refellendis Hæreticorum erroribus vehementissimè laudo, eo potissimum nomine, quod nobis validissima suppeditavit arma ad expugnandos nostri temporis Hæreticos, qui omnes *Vigilantii* blasphemias exceperunt, easque etiamnùm populis propinare, ac prædicare non desistunt.

COLLOQUIUM III.

*In quo exhibetur series Episcoporum ; qui
in quinto Ecclesiæ sæculo præcipuas
Sedes occuparunt.*

M. **P**Uto, te meminisse has esse præcipuas Ecclesiæ Sedes, Romanam, Alexandrinam, Antiochenam, Hierosolymitanam, & Constantinopolitanam. Cum igitur, nemine refragante, Sedes Romana cæteris tum dignitate, tum auctoritate & jurisdictione longè antecellat, necesse est, ut in primis exhibeamus seriem Episcoporum, qui in quinto Ecclesiæ sæculo Sedem Romanam tenuerunt.

Mortuo *Anastasio* Romano Pontifice die xiv. mensis Decembris anni cccci. vacavit Sedes Romana dies septem, & die vicesimâ primâ mensis Decembris ejusdem anni festo S. Thomæ Apostoli sacrâ, *Innocentius* I. natione *Albanensis* creatus est Pontifex Romanus, seditque annos quindecim, menses duos, dies viginti, ac subindè vitâ functus est die xix. mensis Martii anni ccccxvi. Sicut invictis momentis contra Baronium evincit Cl. *Pagius* ad annum ccccxvi. Sub Pontificatu Innocentii I. Concilia Carthaginense, & Milevitanum contra Pelagianos in Africa celebrata sunt. Damnavit etiam idem Summus Pontifex Pelagium & Cœlestium. Suscepit appellationem Sancti Chrysostomi Episcopi Constantinopolitani in Synodo ad *Quercum* iniquè damnati, & in ipsum malè gesta auctoritate
suâ

suâ rescidit . Multas Epistolas Decretales scripsit , quarum præcipuæ , & ad sanciendam Ecclesiæ disciplinam maximè necessariae diriguntur ad *Decentium Eugubinum* , ad *Vitricium* Rothomagensem , ad *Exuperium* Tolosanum , & ad *Felicem* Nucerianum . Nonnulli asserant , Innocentium I. anno ccccv. scripsisse Epistolam ad *Arcadium* Imperatorem , in qua anathemate perculit omnes persecutores S. Chrysostomi . At Epistolam illam supposititiam esse docent periti Critici , non solum quia hac in Epistola sermo fit de *Eudoxia* Augusta , quam tamen certissimè constat supremum diem obiisse anno ccciv. hoc est triennio ante datam illam Epistolam ; sed etiam , quia illius Epistolæ Innocentii I. ad *Arcadium* nec *Palladius* , nec *Socrates* , nec *Theodoretus* , nec *Sozomenus* , nec *Zonaras* auctores Græci , nec aliqui ex Latinis mentionem fecerunt , sed primus dumtaxat *Georgius* Alexandrinus , qui septimo sæculo vixit , ejus meminerit , ex quo postea *Nicephorus* & *Glycas* Scriptores Græci eam hauserunt . Idem judicium ferendum esse censent viri eruditi de binis ejusdem Imperatoris *Arcadii* ad *Innocentium* Papam Epistolis , quas refert *Glycas* , Scriptor nec antiquus , nec satis accuratus .

Post mortem *Innocentii* Papæ vacavit Sedes dies tantum vi. & *Zosimus* natione Græcus die xviii. mensis Martii anni cccxvi. ordinatus est Romanus Pontifex . Sedit annum unum , menses novem , & dies novem , migravitque ad Deum die xxvi. Decembris anni cccxvii. hic Summus Pontifex , ut in præcedenti Colloquio observavimus , errore facti deceptus *Pelagium* & *Cælestium* innocentes putavit , & pro ipsis scripsit ad Africanos Episcopos .

Ve-

Verùm re maturiùs consideratâ , & acceptâ Episcoporum Africanorum relatione , Cœlestium ad audientiam vocavit , eumque non comparentem unâ cum Pelagio damnavit . Epistolam suam *Traſtoriam* contra Pelagianos scriptam ad Orbis Episcopos direxit , & ab Honorio Imperatore Rescriptum obtinuit , quo Pelagianî Româ pellerentur . Denique , *Zosimus* Papa Ecclesiæ Arelatensi, in honorem S. Trophimi primi illius Antistitis , non solum Metropolitricam dignitatem in Viennensi Provincia , & jus Ordinationum confirmavit , sed etiam in Narbonensem utramque, potestatem ipsi concessit amplissimam , vetuitque *Proculo* Massiliensi Episcopo , & *Hilario* Narbonensi Antistiti , ne ordinationes Episcoporum , absque Arelatensis Episcopi assensu facere præsumerent . Sed de hac lite Viennensem inter & Arelatensem Episcopum , de jure Ordinationum exortâ , & in Synodo Taurinensi compositâ iterùm redibit sermo in sequenti Colloquio , in quo differemus de Conciliis in quinto Ecclesiæ sæculo celebratis .

Mortuo *Zosimo* , duo in Romanum Pontificem electi sunt , *Bonifacius* Presbyter , & *Eulalius* Archidiaconus . Et hoc fuit tertium Schisma , quod Ecclesiam Romanam afflixit . Primum si quidem , Schisma fuit *Novatiani* adversus *Cornelium* . Secundum , *Ursicini* contra *Damasum* . Tertium , *Eulalii* contra *Bonifacium* . In tertio isto Schismate Clerus penè omnis Bonifacio adhæsit . *Symmachus* Urbis Romæ Præfectus cum aliis perpauca *Eulalio* favit , *Honoriumque* Imperatorem falsis suis relationibus decepit . Sed supplici Cleri Romani libello de *Bonifacii* legitimâ electione certior factus Imperator ,
utrum-

utrumque electum Ravennam accersivit. Habita est in hanc rem Ravennæ Synodus anno ccccxiix. Sed re infectâ, alia apud Spoletum indicta est Synodus. Interim, utrumque electum Urbe Româ abstinere, jussit Imperator, & *Achilleum* Spoletinum Episcopum, qui Pontificis vices in sacris gereret Paschatis tempore, Romam direxit. Mandatis Imperatoris non obtemperavit *Eulalius*, sed moræ impatiens Romam ingressus seditioni faces subministravit. Quâ de causâ jussit Imperator, ut *Eulalius*, qui Pontificatum invaserat, Româ pelleretur, & ad Symmachum Urbis Præfectum scripsit, ut *Bonifacius* in urbem restitueretur, & tanquàm Pontifex legitime electus ab omnibus susciperetur. Statim ac *Bonifacius*, extincto Schismate pacificè sedit, auctor fuit Imperatori Honorio, ut illud emitteret Edictum. quò sancivit, quod si deinceps duo electi fuissent, nullus ex his Pontifex esset, sed solum ille in Sede Apostolica permaneret, quem ex numero Clericorum novâ ordinatione divinum judicium, & universitatis consensus elegisset. Narbonensis Ecclesiæ jura à *Zosimo* decessore suo in gratiam Ecclesiæ Arelatensis imminuta restituit *Bonifacius*. Sedit iste Pontifex annos tres, menses octo, dies sex. Fuit quippè ordinatus die vicesimâ nonâ mensis Decembris anni ccccxviii. & obiit die quartâ Septembris anni ccccxxi.

Post mortem *Bonifacii* vacavit Sedes dies sex, & *Cælestinus*, natione Campanus, die decimâ mensis Septembris anni ccccxxi. Pontifex consecratus est. Sedit annos novem, menses decem, dies novem, & mortuus est die xvi. Julii anni ccccxxxii. Pelagianos Italiâ expulit Cælestinus, Semipelagianos

nos compressit, *Nestorium* damnavit, præfuit per suos Legatos Synodo Generali Ephesinæ celebratæ anno ccccxxi. in qua Nestorii Hæresis proscripta fuit. *Novatianis* Ecclesias, quas Romæ habebant, ademit. Morientibus denegandam non esse pœnitentiam statuit. Denique, decessoris sui Bonifacii decretum circa Narbonensem, & Arelatensem Ecclesiam confirmavit.

Sixtus III. die xxiv. Julii anni ccccxxi. in locum *Cælestini* Papæ subrogatus est, & obiit die undecimâ mensis Augusti anni ccccxl. Hic est ille *Sixtus*, ad quem, dùm adhuc Ecclesiæ Romanæ Presbyter esset, scripsit *S. Augustinus* adversus Pelagianorum errores Epistolam centesimam quintam, secundum veterem ordinem. Sub *Sixti* Pontificatu pax sancita est Cyrillum Alexandrinum inter & Joannem Antiochenum, & alios Orientales Episcopos anno ccccxxi. de qua pace, & Nestorii Episcopi Constantinopolitani damnatione, Sanctus ille Pontifex gratulatorias ad ipsos misit Epistolas. Fertur, hunc Pontificem eodem anno fuisse ab *Anicio* Exconsule de stupro accusatum, seque ab hoc crimine, Clero, Senatu, & Imperatore præsentibus, in Synodo Romæ habitâ purgasse. Sed hæc *Sixti* Pontificis accusatio fabularum numero accenseri meritò debet. Acta enim, quæ circumferuntur, illius Synodi Romanæ de causâ & accusatione *Sixti* Pontificis falsâ Consulum notâ consignantur, & Anachronismis scatent. Nec ullum illi fabulæ robur accedit ex Epistola, quæ eidem *Sixto* Pontifici attribuitur, ad Episcopos Orientales; quia illa Epistola supposititia est, & mera farrago contexta ex sententiis Concilii Toletani octavi, *Feli-*

cis III. Gregorii M. Hadriani I. Codicis tam Theodosiani, quam Justiniani, Aniani Interpretis, & Sixti Pythagoræi. Ejusdem fuffuris sunt Acta de Synodali accusatione, & expurgatione Polychronii Episcopi Hierosolymitani, quæ sub Pontificatu Sixti III. Romæ dicuntur habita. Toto enim Sedis Sixti Papæ tempore, non Polychronius, sed Juvenalis præfuit Ecclesiæ Hierosolymitanæ. Obsessio etiam Hierosolymorum, quæ hac tempestate facta refertur in illis Actis, mera fabula est. Sub nomine Sixti III. Papæ prostant quædam Opuscula, nempe liber de Divitiis, alter de Castitate; & Epistola de malis Doctoribus, quæ ipsi à peritis Criticis jure ac meritò abjudicantur, & viri alicujus Pelagiani fœtus agnoscuntur.

Sixto III. post interpontificium xli. dierum, S. Leo, quem alii patriâ Romanum, alii Tusciæ natum dicunt, successit die vicesimâ secundâ mensis Septembris anni ccccxi. sedit annos viginti unum, mensem unum, & dies tredecim, migravitque ad Deum die quartâ mensis Novembris anni ccccxi. ut evincit ad hunc annum doctissimus Pagiùs in sua Critica Baronii. A variis consultis Episcopis S. Leo Papa, cognomento Magnus, rescripsit Epistolas sapientiâ, eruditione, & studio in disciplinam Ecclesiasticam conspicuas. Plebem sibi commissam non vitæ solum exemplo excitare, sed etiam piis & eloquentibus Homiliis erudire aggressus est. Manichæos insectatus est, sed præsertim Eutychiæ Hæresi acerrimum bellum indixit, ad quam penitus profligandam scripsit ad Flavianum Constantinopolitanum Episcopum Epistolam, quæ à Patribus Concilii Chalcedonensis maximopere laudata & approbata

bata est. Contentionem habuit sanctissimus ille Pontifex cum *Hilario* Arelatenſi Epifcopo occasione *Celidonii* Epifcopi ab *Hilario* depofiti, & hac de cauſa *S. Leo* Arelatenſem Eccleſiam ſuis exuit privilegiis, & jura Metropolis in Viennenfem tranſtulit Eccleſiam, ut plenius oſtendemus in ſequenti Colloquio. At mortuo *Hilario* Arelatenſi Epifcopo, placatus *S. Leo* litem prudenter compoſuit, concedendo Viennenſi Metropoli quatuor Eccleſias, *Valentiam*, *Tarentaſiam*, *Genevam*, & *Gratianopolim*: reliquas Arelatenſi ſubjecit Eccleſiæ. Demum, *S. ille* Pontifex non ſolum Eccleſiæ, ſed etiam Reipublicæ proſpiciens, ad *Attilam* Romæ imminentem perrexit, verbis demulſit ferocem animum, iram fregit eloquentiâ, pacem recipere perſuaſit, cumque Italiâ diſcedere, ac ſua relegere veſtigia compulſit, ſicut jam obſervavimus in primo Colloquio in Hiſtoriam hujus ſæculi.

Poſt mortem *S. Leonis* Papæ fuit interpontificium ſeptem dierum, & die duodecimâ menſis Novembris anni cccclxi. *Hilarus* natione Sardus Pontificatum inivit. Sedit annos ſex, menſes tres, dies x. & obiit die xxi. menſis Februarii anni cccclxviii. hic Summus Pontifex ardentiffimum adhibuit ſtudium, ac ſingularem vigilantiam in procuranda per univerſam Eccleſiam ſacrorum Canonum executione, ac eorundem tranſgreſſione vindicanda. *Mamertum* Viennenfem Epifcopum, qui Dienſi Eccleſiæ, quæ ad Arelatenſis Epifcopi Diœceſim pertinebat, Epifcopum ordinaverat, ſeverè redarguit, juſſitque ut ille, qui Dienſis Eccleſiæ fuerat à *Mamerto* Epifcopus conſecratus, *Leontii* Arelatenſis Epifcopi, à quo ritè conſecrari debuerat, arbitrio

confirmaretur. Præcepit idem Summus Pontifex, ut *Irenæus*, quem *Nundinarius* Barcinonensis Episcopus, consentientibus Provinciæ Tarraconensis Episcopis, successorem sibi designaverat, ab ea removeretur Ecclesia, aliusque è Barcinonensis Ecclesiæ Clero eligeretur, & ordinaretur Episcopus. Improbavit etiam Factum *Sylvani* Calaguræ in eadem Tarraconensi Provincia Episcopi, qui contra Canones alienum Presbyterum, proprio adhuc vivente Episcopo, in eadem Ecclesia ordinaverat. Denique, *Ingenuo* Episcopo Ebredunensi vindicavit ac confirmavit jus Metropoliticum in Provinciam Alpium Maritimarum.

Simplicius, patriâ Tiburtinus, post quatuor dierum à morte *Hilari* Papæ intervallum, Pontifex Romanus fuit inauguratus die xxv. mensis Februarii anni cccclxviii. præfuit Ecclesiæ Romanæ per annos quindecim & dies sex, obiitque die 1. mensis Martii anni cccclxxxiii. Sub Pontificatu *Simplicii* extinctum omninò fuit Imperium Occidentis in persona *Augustuli*, qui fuit ultimus Occidentis Imperator. *Odoacer* siquidem Herulorum Rex Arianus, captâ Româ, Regnum Italix instituit. *Zeno* Orientis Imperator, sedente *Simplicio* Papa, haud parùm turbavit Ecclesiam, non solum patrocinando pseudo-Episcopis Eutychianis, videlicet *Timotheo* *Æluro*, & *Petro Mongo* Alexandrinam infestantibus Ecclesiam, necnon *Petro Fulloni* Sedis Antiochenæ invasori, & *Acacio* Constantinopolitano, sed etiam promulgando novam fidei formulam ita callidè conceptam ut in eam Hæretici perindè ac Catholici consentire possent. Quam fidei formulam *Heno-ticon*, seu Conciliatorium, appellavit. Sed cum in

eo *Zenonis* Edicto tacita inesset abrogatio Concilii Chalcedonensis, in quo damnata fuerat Eutychiana Hæresis, ideò *Simplicius* Papa huic Edicto strenuè restitit, & *Timotheum Ælurum*, *Petrum Mongum*, & *Petrum Fullonein* damnavit, & ab Ecclesiæ communione rescidit.

Felix III. Papa, post quinque dierum interpontificium, successit *Simplicio* die vi. mensis Martii anni cccclxxxiii. seditque annos octo, menses undecim dies xviii. & ad Deum migravit vi. Kalendas Martii, seu die vicesimâ quartâ Februarii anni cccxcxi. damnavit hic Summus Pontifex *Henoticon* *Zenonis*, coëgitque Romæ Synodum anno cccclxxxiii. in quo missi sunt in Orientem legati *Vitalis* Troentinus Episcopus, & *Misennus* Cumanæ Ecclesiæ Antistes. Sed hæc legatio infeliciter cessit. Nam cum primùm hi legati *Abydum* venissent, in custodiam coniecti sunt, eosque Imperator quâ minis, quâ blanditiis compulit ut communionis societatem cum *Petro Mongo Alexandrino*, & *Acacio Constantinopolitano* inirent. Quibus gestis, legati Sedis Apostolicæ operti ignominia & dedecore Romam reversi sunt. At paulò post eorum ex Urbe Constantinopoli discessum, *Felix* Ecclesiæ Romanæ defensor, qui à *Felice* Papa ex latere suo legatus cum *Vitali*, & *Miseno* fuerat missus, cogente morbi necessitate tardiùs Constantinopolim veniens, ita contumeliosè exceptus est ab *Acacio* Episcopo Constantinopolitano, ut nec eum in conspectum suum admittere voluerit. Cum hæc omnia in Oriente, iniquè gesta ad aures *Felicis* Papæ pervenissent, collegit Summus Pontifex Romæ anno cccclxxxiv. Synodum lxxvii. Episcoporum in Basilica S. Petri, in

qua *Vitalis*, & *Misenus*, cùm legationis sibi mandata rationem reddere iussi, vanas rationes causarentur, *Felix* Papa utrumque legatum sacerdotio & communione privavit. Deinde, *Petrus Mongum Alexandrinum* Episcopum, & *Acacium Constantinopolitanum* à sacerdotali Collegio, & ab Ecclesiastica communione pronunciavit alienos. Postremo, idem Summus Pontifex anno sequenti, seu cccclxxxv. alteram habuit Synodum, in qua ad *Zenonem Imperatorem* scripsit Epistolam, eique nunciavit, *Petrum Fullonem* Episcopum Alexandrinum Synodali iudicio anathematis sententiâ damnatum, ex Antiochena Ecclesia, quam invaserat, expellendum esse, & ab ejus communione omninò abstinendum.

Post *Felici* III. mortem cessavit Pontificatus dies quinque, & *Gelasius* natione Afer die primâ mensis Martii anni cccxcxi. consecratus est Pontifex Romanus. Sedit annos quatuor, menses octo, dies octodecim, & è vivis excessit die decimâ nonâ mensis Novembris anni cccxcvi. noluit Summus ille Pontifex, vestigiis sui decessoris insistens, *Euphemium Constantinopolitanum* Episcopum, Catholicum licet, & alios Orientis Antistites Ecclesiasticâ communione donare, nisi antehac nomen, *Acacii* qui fuerat Episcopus Constantinopolitanus, & à *Felice* III. Papa damnatus, ex Diptychis expungerent. *Misenum* tamen Episcopum, qui, ut mox diximus, legatus Constantinopolim missus cum *Acacio* communicaverat, & ob id à *Felice* Papa sacerdotio, & communione fuerat privatus, Sedis Apostolicæ implorantem misericordiam absolvit, & in communionem recepit. Pelagianam Hæresim in

in Dalmatia , & in Piceno redivivam extinxit . *Lupercalium* superstitionem eâ , quæ Pontificem libertate decet , penitus sustulit . Epistolam Decretalem ad Episcopos per Lucaniam , Brutios , & Siciliam constitutos multa disciplinæ Ecclesiasticæ completentem capita scripsit . Denique, Sanctus ille Pontifex anno cccxciv. Concilium Romæ lxx. Episcoporum celebravit , in quo accurato Criterio libros Canonicos Scripturæ Sacræ , Oecumenica Concilia , & scripta Sanctorum Patrum excussit , & certa ab incertis , & genuina ab adulterinis secreta , Apostolico roboravit Decreto , magno Ecclesiæ Commodo , & legentium utilitati semper profuturo .

Mortuo *Gelasio* , cessavit Sedes Pontificia dies sex , & *Anastasius* II. patriâ Romanus die vicesimâ quartâ Novembris anni cccxcvi. Pontifex fuit ordinatus . Sedit annum unum , menses undecim , dies quatuor & viginti , abiitque è vivis die xvi. mensis Novembris anni cccxcviii. gratulatus est *Anastasius* per literas *Clodoveo* Francorum Regi de suscepto ab eo tum temporis Baptismo . Misit etiam legatos ad *Anastassium* Imperatorem ad reconciliandam Ecclesiam Orientalem cum Occidentali , eâ tamen lege , ut Orientales Episcopi consentirent , quod *Acacii* nomen inter Episcopos Constantinopolitanos omninò reticeretur .

Post obitum *Anastasio* II. vacavit Sedes quatuor diebus , & die vicesimâ secundâ mensis Novembris anni cccxcviii. *Symmachus* natione Sardinus Pontifex ordinatus est , non sine tumultu & schismate . *Festus* liquidem Senator Romanus , qui Imperatori Anastasio pollicitus fuerat , effecturum se ut Pontifex Romanus *Zenonis* Henoricon subscri-

beret, cūque hanc subscriptionem à Symmacho, qui à majori & saniori parte electus erat Pontifex, obtenturum se diffideret; *Calium Laurentium* Archipresbyterum S. Praxedis in Pontificem, seu potius in Antipapam effusis pecuniis eligendum curavit. Quocircā exortis hinc inde inter Populum, Clerum, ipsumque Senatum discordiis, ambæ partes non sine cæde & sanguine ad *Theodoricum* Regem Italiae Ravennam confugerunt. Rex, etsi Secta Arianus esset, litem adjudicavit *Symmacho*, qui prior fuerat electus. Symmachus itaque Pontificatu potitus Synodum habuit Romæ anno sequenti, seu anno ccccxix. in qua actum est de tollendo ambitu in comitiis Pontificiis, & de præcludenda schismatibus viâ. Aliam Romæ anno quingentesimo coëgit Synodum, in qua, ut *Calius Laurentius*, qui Antipapa fuerat creatus, Ecclesiam turbare desineret, Symmachus eum *Nuceriae* Episcopum renunciavit. At Schisma, quod videbatur sopitum, acrius recrudit anno quingentesimo tertio. Tunc enim aliqui ex Clero, & nonnulli ex Senatu, maxime *Festus*, & *Probinus* multorum criminum Symmachum Papam accusarunt, & occultè *Laurentium* Antipapam revocarunt, miseruntque ad Regem *Theodoricum* relationem, ut visitatorem daret. Rex eorum votis annuit, eisque concessit visitatorem *Petrum* Altinæ Civitatis Episcopum, qui in partes *Laurentii* Antipapæ inclinans turbavit omnia, ut testatur *Ennodius* Ticinensis in Apologia pro Symmacho, multosque in Urbe excitavit tumultus, ad quos compescendos *Theodoricus* Rex anno dlii. Concilium Romæ iussit convocari *Palmare* dictum à loco ubi celebratum est, in quo Concilio Symmachus

chus Papa fuit innocens declaratus, & à criminibus falsò ei impactis omninò purgatus. Sed de hoc *Pal-mari* Concilio, sicut & de aliis Synodis, quas Ro-mæ incunte sexto Ecclesiæ sæculo Symmachus Papa celebravit, commodiùs agemus in nostris Collo-quiis in Historiam sexti Ecclesiæ sæculi.

D. Seriem Pontificum, qui in quinto sæculo Romanæ præfuerunt Ecclesiæ, nunquam fuisse in-terruptam, nullumve in Sedem Petri Episcopum, Hæreticum irrepsisse planè video. Sed an præcipuæ aliæ Sedes, videlicet Alexandrina, Antiochena, Hie-rosolymitana, & Constantinopolitana eandem in quinto sæculo sortem obtinuerint, & Catholicos Episcopos continuâ successionem habuerint? nunc à te scire percipio.

M. Sedes Alexandrina, Antiochena, Hie-ro-solymitana, & Constantinopolitana multis factioni-bus fuerunt in quinto Ecclesiæ sæculo exagitatae, & in eas intrusi sunt aliquandò Episcopi Schismatici, & Hæretici, qui Episcoporum Catholicorum succes-sionem ad tempus interruperunt. Ut autem seriem Episcoporum, qui præcipuas illas Sedes in quinto Ecclesiæ sæculo tenuerunt, perspectam habere pos-sis, incipiam ab Episcopis Ecclesiæ Alexandrinæ, quæ post Romanam Sedem primas tenet.

In primis *Theophilus* ordinatus est Episcopus Alexandrinus die vicesimâ mensis Julii anni 385. sedit annos xxvii. menses duos, & dies xxvii. & mortuus est die xv. Octobris anni ccccii. Graves ac diuturnas contentiones habuit Theophilus Alexan-drinus cum S. Joanne Chrysoftomo Episcopo Con-stantinopolitano, quarum originem & progressum in sequenti Colloquio opportuniùs expendemus.

Ter-

Tertio die post Theophili obitum, seu die decimo octavo mensis Octobris anni ccccxi. *Cyrillus* nepos Theophili consecratus est Episcopus Alexandrinus. Sedit annos triginta duos, & obiit anno ccccxliv. Nestorianæ Hæreseos fuit acerrimus impugnator, præfuitque Concilio Oecumenico Ephesino contra Nestorium celebrato Cælestini I. Romani Pontificis nomine. Quidam nuperrimi Scriptores commenti sunt, S. Cyrillum Episcopum Alexandrinum in Carmelo Monachatum fuisse professum. Sed hanc fabulam meritò exsufflat Cardinalis Baronius, eamque refellit ex silentio coævorum Auctorum, qui de Monachis id ætatis in Palæstina degentibus amplissimam mentionem fecerunt, illius tamen præcusi Monachatus S. Cyrilli ne leviter quidem meminerunt.

Dioscorus anno ccccxliv. Sancto Cyrillo in Sede Alexandrina successit, sed, cum Hæresi Eutychianæ apertè faveret, à Synodo Chalcedonenſi anno ccccl. Episcopatu Alexandrino dejectus, jussu Imperatoris *Marciani* Gangram Asiæ minoris civitatem deportatus est, ubi interiit anno ccccliv. Fuit vir moribus turpissimus, Eutychianæ Hæresis fautor. Præfuit latrocinio Ephesino, in quo erga Flavianum Episcopum Constantinopolitanum, & Legatos S. Leonis Summi Pontificis crudelissimè se gessit. *Anatolium* in locum Flaviani Episcopum Constantinopolitanum suffecit, eoque tandem temeritatis protupit, ut à prædatoria Synodo Ephesina reversus Alexandriam, vocatis ad Synodum quibusdam sceleratis, ac sui similibus Episcopis, Sanctum Leonem Pontificem Maximum anathemate percellere ausus fuerit.

De-

Deposito *Dioscuro* in Concilio Chaleedonensi anno ccccli. *Proterius* post plures tergiversationes, populique tumultus, Patriarcha Alexandrinus fuit electus. Illius fides S. Leoni Summo Pontifici primò suspecta fuit eo potissimum nomine, quod *Proterius* olim charus fuisset *Dioscuro*, qui curam tutelamque Ecclesiæ Alexandrinæ illi commiserat, quando ad Pseudo-Synodum Ephesinam profectus est. Verùm, postquàm S. *Leo* literas accepisset *Marciani* Imperatoris, in quibus de *Proterio* Alexandrinorum Antistite magnificè loquebatur, eique ipsemet *Proterius* suæ fidei rationem per Epistolam reddidisset; actutum Summus Pontifex *Proterio* fidei integritatem gratulatus est Epistolâ 103. quam *Quessnellus* ex Codice Cardinalis *Grimani* unâ cum aliis ejusdem S. Leonis Pontificis Epistolis publici juris fecit.

Mortuo *Marciano* Imperatore die vii. mensis Februarii anni cccclvi. *Eutychiani* *Timotheum* cognomento *Ælurum* Patriarcham Alexandrinum, elegerunt, & in S. *Proterium* cum tanta rabie iruerunt, ut eum crudeliter trucidarint, laniarint, ejus viscera ferarum more vorarint, cineresque, sparserint in ventos. Leges *Henschenium*, qui multa habet de virtutibus S. *Proterii* Patriarchæ Alexandrini & Martyris ad diem xxvi. mensis Februarii, quo colitur à Græcis.

Leo Imperator, qui successit *Marciano*, Catholicorum Episcoporum, & Clericorum Alexandrinorum libellis supplicibus, precibus & rationibus permotus *Timotheum* *Ælurum* interfectorem S. *Proterii*, Episcopatu Alexandrino, quem invaserat, dejectum Chersonam exilio relegavit an-

no cccclx. & post elapſos quinque meſes in ejus locum *Timotheus Solophaciolus*, ideſt, *Albus*, Synodi Chalcedonenſis deſenſor, Eccleſiæ Alexandrinæ Episcopuſ fuit ordinatuſ, eamque pacificè adminiſtravit uſque ad annuſ cccclxxvi. quo anno *Baſiliſcuſ* Tyrannuſ, expulſo *Zenone* legitimo Imperatore in Iſauriam, occupavit Imperiuſ, Chalcedonenſem damnavit Synoduſ, & *Timotheuſ* *Æluruſ* ab exilio revocatuſ in Sedem Alexandrinam, reſtituit. Sed annuſ cccclxxvii. *Zeno* in Imperiuſ reſtitutuſ, & oppreſſo *Baſiliſco*, qui tyrannidem arripuerat, *Timotheuſ* Solophacioluſ Eccleſiæ Alexandrinæ reddidit. Eodem anno mortuſ eſt *Timotheuſ* *Æluruſ*, & in ejus locuſ Hæretici Alexandrini ſubrogarunt *Petrū* *Mogguſ*, ſeu *Monguſ*, antea Archidiaconuſ. Sed eo, juſſu Imperatoris Zenoniſ deſecto, *Solophaciolus* Eccleſiam Alexandrinam rexit uſque ad annuſ cccclxxxii. quo anno mortuo Solophaciolo, *Joanneſ* *Talaja*, quem Græci *Tabennioſitam* cognominant, eo quod eſſet è numero Tabennienſiuſ Monachoruſ, qui apud Canopuſ Monafteriuſ habitabant, à Catholicis ordinatuſ eſt Episcopuſ Alexandrinuſ, ſtatimque literaſ ex more miſit ad *Simpliciuſ* Papam, & ad *Calendionem* Episcopuſ Antiochiæ, ad *Acaciuſ* verò Conſtantinopolitanuſ Episcopuſ, cui jam pridem inſenſuſ erat, ſcribere neglexit. Ea reſ animuſ *Acacii*, qui ſe à *Joanne* deſpectuſ credidit, graviter commovit. Hinc *Acaciuſ* vindictæ cupiduſ Zenoniſ Imperatoris animuſ adverſuſ *Joanneſ* vehementer exaſperavit, inſinuans Zenoni, *Joanneſ* minus idoneuſ Episcopatu Alexandrino videri, quippè qui olim de Eccleſiâ exire voluiſſet,

& So-

& Solophaciolo suafisset, ut nomen *Dioscorig* sacris Diptychis infereret. Adhæc, Joannem perjurii reum esse affirmans, quia juraverat olim Imperatori, nunquam se Alexandrinam Sedem ambiturum. Adjecit denique *Acacius* Petrum Mongum Alexandrino Episcopatu magis idoneum esse, utpotè gratum & acceptum populo Alexandrino, ejusque operâ Ecclesias Urbis Alexandrinæ, ac totius Ægypti ad unitatem & concordiam revocari posse. His speciosis rationibus *Acacii* permotus *Zeno* scripsit ad *Simplicium* Summum Pontificem, ut *Petrus Mongus* in Sedem Alexandrinam restitueretur, *Joannes* verò, utpotè perjurii reus, ab ea omninò arceretur. Rescripsit Imperatori *Simplicius*, se, lectâ illius Epistolâ, suspendisse quidem *Joannis* ordinationis confirmationem, at se nec posse, nec debere in Sedem Alexandrinam restituere *Petrum Mongum*, cum esset Hæreticus, ab Hæreticis postulatus, judicio Apostolico damnatus, & in pristino suo errore adhuc pervicaciter hæreret. Interea, *Joannes Talaja* Sede Alexandrinâ pulsus Romam venit, & *Simplicio* Papæ, ad quem appellaverat, suavit, ut pro sua causa ad *Acacium* Constantinopolitanum Episcopum adversus *Petrum Mongum* scriberet. Quod quidem prompto ac lubenti animo fecit *Simplicius* Papa, frustra tamen; quia *Acacius* acceptis *Simplicii* literis, respondit, se minimè agnoscere *Joannem* Episcopum Alexandriæ, *Petrum* verò *Mongum* jussu *Zenonis* Imperatoris in communionem suscepisse. Sic Sedem Alexandrinam denuò occupavit *Petrus Mongus* vasserrimus Hæreticus, qui, licèt datis ad *Simplicium* Papam, & ad *Acacium* Constantinopolitanum literis simularit, se Synodum Chalcedonensem,

sem, & Epistolam S. Leonis Papæ contra Euthychianam Hæresim suscipere ac venerari, postea tamen utramque anathemate confixit, & tam Concilii Chalcedonenfis, quàm Epistolæ S. Leonis infensissimum hostem sese palam exhibuit. Mortuus est Petrus Mongus Alexandriæ anno ccccxc. & in ejus locum *Athanasius* ejusdem farinae homo, & Henotici Zenonis defensor promotus est die ix. mensis Februarii ejusdem anni Episcopus Alexandrinus. Sedit annos vii. & è vivis excessit anno ccccxcvii. Athanasio successit in Sede Alexandrina *Joannes Mela*, seu *Hemula* eadem Hæreseos & Schismatis fuligine maculatus. Sedit annos novem, & obiit anno quingentesimo sexto. Hæc est series Episcoporum, qui in quinto sæculo præfuerunt Ecclesiæ Alexandrinæ, cujus pacem perturbarunt Episcopi Schismatici & Hæretici, eamque in duas factiones diviserunt, aliis *Henoticon* Imperatoris Zenonis amplectentibus, sed Synodum Chalcedonensem damnantibus; aliis verò illud Zenonis concordiae Edictum suscipientibus, Synodum tamen Chalcedonensem non rejicientibus, indeque invicem inter se pugnantibus. Catholici autem Synodum Chalcedonensem admittebant, & Henoticon Zenonis respuebant.

D. Fuitne etiam interrupta series Episcoporum Catholicorum, qui in quinto sæculo Antiochenæ Ecclesiæ præfuerunt?

M. Ecclesiam Antiochenam variis factionibus in quinto sæculo ab Episcopis Schismaticis, & Hæreticis fuisse perturbatam ac contaminatam, facile percipies percurrendo seriem Episcoporum, qui illius Sedem tenuerunt. Mortuo *Flaviano* Antiocheno Episcopo anno cccciv. *Porphyrius* Ecclesiæ Antioche-

chenæ Episcopatum suscepit, & vitâ functus est anno ccccxi. Porphyrio successit *Alexander*, qui vitam protraxit usque ad annum ccccxx. & in ejus locum susceptus est *Theodorus*, qui Ecclesiam Antiochenam rexit usque ad annum ccccxxix. eodem anno *Joannes* consecratus est Episcopus Antiochenus, seditque annos tredecim, & obiit anno ccccxli.

Disputant inter se Historiæ Ecclesiasticæ periti, an iste *Joannes* Episcopus Antiochenus Nestorii Hæresi faverit, nec ne? Hi, qui Joannem Antiochenum non tantum Nestorii personæ, sed & Hæresi fuisse autumant, duobus fulciuntur momentis. Primum est, quod Synodus Oecumenica Ephesina passim asserit, *Joannem* Antiochenum cum Nestorio sentire. Alterum est, quod *Joannes* Antiochenus unâ cum aliis Episcopis Orientalibus duodecim Sancti Cyrilli Episcopi Alexandrini Anathematismos Nestorianis erroribus oppositos exploserit, atque impugnarit. Verum, alii probabilius docent, Joannem Antiochenum plus æquò quidem fuisse personæ Nestorii, eum tamen ab illius errore semper fuisse alienum. Id apertè satis colligi posse videtur ex illa Epistola, quam *Joannes* Antiochenus scripsit ad Nestorium, in qua ipsum ad erroris palinodiam vehementer adhortatur, eumque obnixè rogat, ut, abdicatis omnibus præjudiciis, Virginem Mariam, juxta SS. Patrum doctrinam, verè *Dei-param* esse agnoscat. Hinc Sixtus III. Summus Pontifex in Epistola ad Cyrillum Alexandrinum disertè asserit, Joannem Antiochenum dogmatibus Nestorii nunquam adhæsisse. Idemque testatur *Leontius* lib. de Sectis actione quartâ. Verum quidem est, Joannem Antiochenum rejecisse, & impugnasse xli. S. Cyrilli

rilli Alexandrini adversus Nestorium Anathematismos ; sed hoc non errore juris , ut ajunt , sed errore facti deceptus præstitit Joannes Antiochenus . Existimavit quippè , sed falsò , Cyrillum Alexandrinum in xi i. illis Anathematismis in extremum alium errorem , & Nestoriano errori è regione oppositum deflexisse , atque *Apollinaris* Hæretici venenum propinasse . In hoc errore facti adversus xii. S. Cyrilli Anathematismos , non solum *Joannes* Antiochenus , sed multi alii Episcopi Orientales versabantur , quamvis sanam & illibatam Ecclesiæ doctrinam contra Nestorium tuerentur . Cæterum negari non potest , *Joannem* Antiochenum , tum ex illo nimio studio impugnandi Sancti Cyrilli adversus Nestorium Anathematismos , tum etiam ex eo Orientalium Episcoporum conciliabulo , quod coëgit , nolens interesse Concilio Generali Ephesino contra Nestorium congregato ; tum denique ex vocibus quibusdam ambiguis atque suspectis , quibus fidem suam ante initam pacem exponebat , justam Patribus Ephesinis ansam præbuisse , existimandi , quod prava Nestorii dogmata propugnaret . Est rebus postea accuratiùs discussis innotuit Patribus Concilii Ephesini , *Joannem* Antiochenum , aliosque ipsi adhærentes Episcopos Orientales profanas Nestorianarum vocum novitates damnare , & constanter profiteri , Sanctam Virginem Mariam verè Dei Genitricem esse , ut videre est in Epistola S. Cyrilli ad *Valerianum* Iconii Episcopum , quæ refertur à *Liberto* in Breviario cap. 9. Quin & *Joannes* Antiochenus in Epistola ad *Theodosium* Imperatorem . Sic Nestorium damnavit , ut nullum de rectâ sua fide dubitandi locum reliquerit : & *depositum* , inquit ,

sive

sive damnatum habemus Nestorium Anathematismo subjicientes quæcumque ab eo alienæ ac peregrinæ dicta sunt contra Apostolicam doctrinam . Joannes igitur Antiochenus Hæresi Nestorii nunquam suffragatus est, quamvis illius personæ impensius, quam par fuisset, faverit .

Joanni Antiocheno Episcopo anno ccccxliv. vitæ functo successit in Sede Antiochena Domnus, Joannis ex sorore nepos, vir fuit dubiæ fidei, imprudentis consilii, variæque fortunæ . Theodorum Mopsuestiæ Episcopum Nestorianæ Hæreseos assertorem defendit, ob idque ab Episcopis Pseudo-Synodi Ephesinæ, Latrocinii nomine satis notæ, anno ccccxlix. depositus est . Misit quidem in irritum S. Leo Papa omnia illius prædicatoris Synodi Acta, & restituit Episcopos, quos illa è suis sedibus dejecerat ; Domnum tamen in Sedem Antiochenam non restituit, sed potius confirmavit ordinationem Maximi, qui ab Anatolio Episcopo Constantinopolitano jussu Imperatoris in locum Domni fuerat consecratus Episcopus Antiochenus . Domno autem Sede Antiochena dejecto annum ex Ecclesiæ Antiochenæ redditibus censum, annuente Concilio Chalcedonensi, concessit Maximus, ut constat ex actione, quæ de Domno Antiocheno inscribitur, & Actis Concilii Chalcedonensis post actionem decimam inserta est, quamque genuinam & sinceram esse contra Quesnellum Dissertatione nona in Opera S. Leonis, & P. Natalem Alexandrum Dissertatione decima septima in Historiam quinti Ecclesiæ sæculi evincunt Clarissimus Baluzius in nova Conciliorum collectione, præfatione in Acta Concilii Chalcedonensis, & doctissimus Pagnius in Critica Baronii ad annum ccccl. Dominus re-

xit Antiochenam Ecclesiam annis octo, juxta Nicephorum in Chronico, & Tabulas Theophanis.

Domno Sede Antiochenâ deposito anno 449. susceptus est, ut mox dixi, *Maximus*, qui ab Anatolio Episcopo Constantinopolitano ordinatus fuit Episcopus Antiochenus. Duo inter alia ordinationi *Maximi* inerant vitia. Unum, quod *Domnus* ab impia Synodo Ephesina damnatus est. Alterum, quod ordinatio *Maximi* suscepti in locum *Domni* adversus Nicænos Canones, Apostolicos, & Constantinopolitanos ab Anatolio Episcopo Constantinopolitano fuisset peracta. Utrumque tamen vitium, quod in ordinatione *Maximi* occurrebat, consulto ob pacis studium dissimulavit S. Leo Papa, ut ipsemet testatur in sua Epistola ad *Marcianum* Imperatorem datâ anno ccccli. Mortem *Maximi* Episcopi Antiocheni illigat Baronius anno cccclvi. eique successit *Basilius*, qui, sicut legitur in Chronico Nicephori, & in Tabulis Theophanis, annos duos sedit, & anno cccclviii. vitam cum morte mutavit.

Basilio Episcopo Antiocheno successit anno cccclix. *Martyrius*, qui sedit annos tredecim, hoc est, usque ad annum cccclxxi. quo anno cum *Petrus Fullo* Ecclesiæ Sanctæ Bassæ apud Chalcedonem, Presbyter, & Eutychianæ Hæresis fautor innumeros tumultus in Ecclesia Antiochena excitaret, *Martyrius* Episcopus Antiochenus ad illos comprimendos ad *Leonem* Imperatorem profectus est, & ab ipso obtinuit legem, quâ Imperator prohibebat Monachis ne à Monasteriis exirent, neque Antiochiam venirent, & quibus venire permetteretur, ne de Religione disceptarent. Antiochiam deinde reversus *Martyrius*, cum populi factiones varias,

cas-

easdemque tumultibus comperisset agitata, cessit in Ecclesiæ Conventu Episcopatu, verbis usus ejusmodi: *Clero inobedienti, populo contumaci, & Ecclesiæ sordibus infectæ nuncium remitto, solaque Sacerdotii dignitate mihi reservata, Episcopale munus depono.* Eo secedente, *Petrus Fullo* (sic dictus quod in Cœnobio Accœmetensium, ubi vitam Monasticam antehac professus fuerat, *Fullonis* artem exerceret) in Thronum Antiochenæ Ecclesiæ audacter insiliit. Quâ temeritate commotus *Leo* Imperator, Synodum Episcoporum fieri præcepit, in qua *Petrus Fullo* Sedis Antiochenæ invasor depositus ac damnatus est ob clausulam ab ipso additam Hymno S. Trisagio: *qui crucifixus es pro nobis.* Quâ additione *Theopaschitarum* Hæresim Deum in sua Deitate crucifixum esse asserentium instauravit.

Petro Fulloni Sede Antiochenâ justè deposito suffectus est *Julianus*, qui sex annis Antiochenam rexit Ecclesiam, ab anno videlicet cccclxxi. usque ad annum cccclxxvi. quo anno *Petrus Fullo* à *Basilisco* Tyranno ab exilio revocatus in Ecclesiam Antiochenam restitutus est. Sed *Zeno*, cæso *Basilisco* Tyranno, & recuperato Imperio anno cccclxxvi. rursus Petrum Fullonem Antiochiâ expulit, & in exilium ablegavit. In ejus locum ordinatus est *Joannes*, quem *Petrus Fullo* Episcopum Apamenum consecraverat. Sed hic *Joannes* post tres menses ex Antiochena Ecclesia etiam ejectus est. Joanne itaque Sede Antiochenâ deturbato, *Stephanus* senior anno cccclxxviii. ordinatus est Episcopus Antiochenus, seditque annos tres, ac subindè vitam produxit in annum cccclxxx. Cardinalis *Baronius* autumavit, hunc *Stephanum* Eutychianorum fidei per-

duellum gladio occubuisse. At Cl. *Pagius* ad annum Christi cccclxxxii. ex testimoniis *Nicephori*, & *Theophanis* luculenter ostendit, non hunc Stephanum seniore, sed ejus successorem Stephanum juniorem à fidei perduellibus in Sancti Martyris *Barlaam* Baptisterio acutis calamis perfossum & necatum in Orentem fluvium fuisse projectum. *Stephanus* autem ille junior, successit in Sede Antiochena *Stephano* seniori anno cccclxxxii. Mortem hujus *Stephani* junioris Episcopi Antiocheni ulcisci volens *Zeno* Imperator, præcepit *Acacio* Episcopo Constantinopolitano ut Antiochiæ crearet Episcopum, isque ordinavit *Calendionem* anno cccclxxxii. Verum, Antiochenſes hujus ordinationis ab *Acacio* factæ nescii, *Joannem* nomine *Codonatum* sibi præfererunt, quem postea *Calendio*, ab *Acacio* ordinatus Episcopus Antiochenus, in Tyri Sedem, quæ post Antiochiam prima est, transtulit. Sedit Antiochiæ *Calendio* quatuor annis, hoc est ab anno cccclxxxii. usque ad annum cccclxxxv. quo anno *Calendio* ab Imperatore *Zenone* *Oasim* in exilium relegatus est, & *Petrus Fullo* in Sedem Antiochenam denuò restitutus, in ea permansit usque ad annum cccclxxxviii. quo nefarius ille Hæreticus & Sedis Antiochenæ inuasor extinctus est, eique successit *Palladius*, qui, teste *Nicephoro* in *Chronico*, sedit annos decem, & obiit anno cccxcvi. *Palladio* successit *Flavianus*, quem nonnulli, secuti *Theophanem*, hostibus Concilii Chalcedonensis adhæsisse affirmant. Alii verò post *Evagrium* fidem *Flaviani* Catholicam & inculpatam fuisse probabilius censent, ut videre est apud Cl. *Pagium* ad annum Christi cccxcvi. *Flavianus* rexit Ecclesiam Antiochenam ab anno cccxcvi. usque

usque ad annum *DXII.* quo anno, teste *Marcellino* in *Chronico*, exul missus est ab *Anastasio* Imperatore, in Castellum, quod *Petra* dicitur, ubi *Confessor Christi in Domino requievit*. Eodem anno *Severus* in *Sedem Antiochenam* intrusus est, qui *Henoticon Zenonis* suscepit, Concilium *Chalcedonense* damnavit, & *Catholicos Episcopos* dirè exagitavit, sicut ostendemus in nostris Colloquiis in *Historiam sexri Ecclesiæ sæculi*.

D. Describe nunc seriem *Episcoporum*, qui in quinto sæculo *Ecclesiæ Hierosolymitanæ* præfuerunt?

M. Mortuo *S. Cyrillo* *Episcopo Hierosolymitano* anno *Christi ccclxxxvi.* suffectus est *Joannes*, qui, postquam sedisset annos triginta, migravit ex hac vita anno *ccccxvi.* ab hoc *Joanne* *Episcopo Hierosolymitano* habita est anno *ccccxv.* *Hierosolymæ Synodus Presbyterorum*, cui interfuit *Hæresiarcha Pelagius*, eique nimium favit *Joannes Hierosolymitanus*, ut jam in superiori Colloquio observavimus. Successorem habuit *Joannes* in *Sede Hierosolymitana Prælium*, qui hanc *Ecclesiam* rexit ab anno *ccccxvi.* usque ad annum *ccccxxiv.* quo anno mortuus est, eique successit *Juvenalis*, qui interfuit *Concilio Ephesino*, & postquam sedisset annos triginta quatuor, obiit anno *ccclvi i i.* eodem anno *Anastasius Hierosolymorum* *Sedem* iniit, sedit annos viginti, & ex hac vita discessit anno *ccclxxviii.* ut contra *Baronium*, & *Papebrochium* evincit *Clar. Pagius* ad annum *Christi ccclxxvi i.* Mortuo *Anastasio*, *Martyrius Hierosolymorum* *Episcopus* consecratus est, & teste *Evagrio lib. 3. Hist. Eccl. cap. 16.* ad *Petrum Mongum Alexandrinæ Ur-*

bis Episcopum Hæreticum, qui in locum Timothei Solophacioli subrogatus fuerat, literas suas Synodicas misit. Inde tamen *Martyrius* Eutychie Hæreseos, quâ *Petrus Mongus* infectus erat, insinulari haudquaquàm debet, quia *Petrus Mongus*, eo tempore quo *Martyrius* Episcopus Hierosolymitanus suam ad illum direxit Epistolam, simulabat se esse Catholicum, & ad *Simplicium* Papam, & ad *Aca- cium* Constantinopolitanum Episcopum scripserat, se communicare cum illis, & Chalcedonensem suscipere Synodum, quam tamen postea perfrictæ frontis audaciâ publicè anathematizare ausus est. Non mirum igitur si *Martyrius* Episcopus Hierosolymitanus ad *Petrum Mongum*, quem ipse Catholicum putabat, necdùm detectis ejus fraudibus ac malis artibus, suas Synodicas literas miserit. Mortuus est *Martyrius* anno cccclxxxvi. postquam sedisset annos octo. Successorem habuit *Salustium*, qui Ecclesiam Hierosolymitanam annis itidem octo gubernavit, & è vivis obiit anno cccxciv. *Nicephorus* in Chronico de *Salustio* Hierosolymorum Episcopo hæc scribit: *Salustius, à quo separatus est Episcopus Romanus propter Edictum concordie à Zenone editum.* At cum Zenonis Imp. Edictum turbaret quidem Ecclesiam, sed nullam Hæresim contineret, non ob id destitit *Salustius* esse Orthodoxus, ut post *Baronium* censet *Pagius* ad annum cccxcii. Denique, *Salustio* Episcopo Hierosolymitano successit *Elias*, qui Sedem Hierosolymitanam tenuit usque ad annum Christi dxiij. quo anno, instigante *Severo Antiocheno* Episcopo Hæretico, jussu Imperatoris *Anastasio* Patriarchatu Hierosolymitano dejectus est, ut plenius commonstrabimus in nostris Collo-

quiis

quius in Historiam sexti Ecclesiæ sæculi. Hic obiter observare sufficiat, hunc *Eliam* Hierosolymorum, Episcopum nunquam fuisse Eutychianæ Hæresi, sed potius propter Synodi Chalcedonensis defensionem, sustinuisse persecutionem, & Episcopalem dignitatem amisisse. Quia tamen *Elias* ad servandam pacem Ecclesiæ œconomia quadam, & moderatione usus est, communicando videlicet cum illis Episcopis, qui simul cum Synodo Chalcedonensi Henoticon Zenonis admittebāt, ejus moderatio nec Catholicis ardentioribus, nec Hæreticis placuit. Unde vitare haud potuit, quin ab aliquibus Scrip-
toribus Catholicis incautè deceptis tanquā Hæreticus Eutychianus infamaretur, & versā vice ab Hæreticis Eutychianis Nestorianismi perperam insimularetur. Sed illius Orthodoxiam egregiè vindicat doctissimus *Pagius* ad annum Christi cccxcj. & ad annum dxii.

D. Superest tandem ut texas seriem Episcoporum, qui in quinto Ecclesiæ sæculo Sedem Constantinopolitanam tenuerunt.

M. In locum *Nestarii* Episcopi Constantinopolitani, qui, ut jam observavimus in præcedentibus Colloquiis, obiit anno cccxcvi. ordinatus est S. Chrysostomus, qui non minus pietate, quā singulari doctrinā Ecclesiam Constantinopolitanam illustravit, usque ad annum cccxiv. quo anno Sanctus Chrysostomus in Synodo Constantinopolitana depositus in exilium ab Imperatore Theodosio juniore missus est, & ad Deum migravit. *Comanis* die xiv. Sept. anni ccccvii. teste Theodoro to lib. 5. Hist. Eccles. cap. 34. ubi narrato S. Chrysostomi exilio in Oppidum *Cucusum* hæc habet: *mox inde eductum*,

(Chrysoſtomum) Pytiuntem transportarunt; Oppidum eſt ſitum in extremis finibus Ponti & Imperii Romaniani, quod accolunt crudeliſſimi Barbari. Verum Clemens Dominus inviſum Athletam ad hanc uſque inſulam non permifit abduci, nam cum veniſſet Comana, ad vitam ſenii & doloris expertem eum tranſtulit. De cauſa & origine diſſidii S. Chryſoſtomi cum Theophilo Epifcopo Alexandrino; & S. Epiphania Salaminæ Antifite, de illius in Synodo ad Quercum, injuſta deſignatione, necnon de variis calamitatibus, quas in exilio paſſus eſt Sanctus ille Doctor, commodius agemus in ſequenti Colloquio.

Depoſito S. Chryſoſtomo & in exilium ablegato anno cccciv. Arſacius die xxv. menſis Junii ejuſdem anni conſecratus eſt Epifcopus Conſtantinopolitanus. Sedit annum unum, menſes quatuor, dies ſeptemdecim, & obiit die xi. menſis Novembris anni ccccv. Ei ſucceſſit Atticus, qui ſedit annos viginti, & mortuus eſt anno ccccxxv. zelo immo-derato Atticus adverſatus eſt S. Chryſoſtomo, eo-que adhuc vivente Sedem Conſtantinopolitanam occupavit. Et iſtud crimen poenitentia deinde, & recte factis expiavit. Nomen ſi quidem S. Chryſoſtomi in Diptycha Eccleſiæ retulit anno ccccxi i. & in repurgandis Hæreſibus, atque in Orthodoxa fide propugnanda ſummam adhibuit vigilantiam. Celeſtium Pelagii diſcipulum Conſtantinopoli ejecit anno ccccxvi i. & contra ipſum ad Epifcopos Aſiæ, Theſſalonicæ, & Carthaginiſ ſcripſit Epistolam. Meſſalianos itidem Hæreticos acriter infectatus eſt, ſcripſitque Epifcopis in Pamphylia exiſtentibus ut undique illos Hæreticos exturbarent. Denique, Atticus Conſtantinopolitanus Epifcopus in Menſis Gra-

Græcorum colitur die xiiii. Januarii, ejusque vita ex variis Auctoribus à Bollando in Actis Sanctorum ad eum diem collecta est.

Attico in Sede Constantinopolitana successit *Sisinnius*, qui juxta Chronicon Nicephori, & Tabulas Theophanis sedit duobus annis incompletis, & mortalitatem exiit anno ccccxxv. Is statim ac ad Thronum Constantinopolitanum erectus est, coëgit Constantinopoli Synodum adversus Hæreticos Meffalianos, quam *Petavius*, vir alioqui doctissimus, malè confudit cum altera Synodo *Lyde* in Pamphylia contra eosdem Hæreticos ad Amphilochio Iconii Episcopo celebrata.

Mortuo *Sisinnio*, inter agendum de successore varias in factiones divisus est Clerus Constantinopolitanus, quas ut comprimeret Imperator Theodosius, accersivit ex Antiochena Ecclesia *Nestorium*, qui Kalendis Aprilis anni ccccxxv. ordinatus est Episcopus Constantinopolitanus. Et cum *Nestorius* suam spargeret Hæresim jam à nobis in precedenti Colloquio expositam, Sede suâ fuit depositus in Concilio Generali Ephesino anno ccccxxx. convocato, & in suum Monasterium S. Euprepj ante portas Urbis Antiochiæ situm amandatus, ubi per quadriennii spatium postquam moratus esset, jussu ejusdem Imperatoris anno ccccxxxv. deportatus fuit in *Oasim*, quæ Marmaricæ Urbs est in confiniis Ægypti sita. A sua blasphemia nunquam destitit impius ille Hæresiarcha, ipsoque vitæ suæ exitu alter *Arius* declaratus est, inquit *Evagrius* lib. i. Hist. Eccles. cap. 7.

Nestorio Sede Constantinopolitana in Generali Synodo Ephesina anno ccccxxxi. abdicato,

Maxi-

Maximianus die xxv. mensis Octobris ejusdem anni ordinatus est Episcopus Constantinopolitanus, & obiit die xii. mensis Aprilis anni cccxxxiv. quâ die colitur à Græcis, ut videre est apud Bollandum in Actis Sanctorum. Maximiano successit *Proclus*, qui, postquàm Ecclesiam Constantinopolitanam per annos tredecim & aliquot menses sanctè rexisset, ad Dominum migravit die 27. Octobris anni cccxlvii. ad quam diem colitur apud Græcos, ut constat ex eorum Menologio. In locum *Procli* demortui subrogatus est *Flavianus*, qui, ut jam in superiori Colloquio observavimus, postquàm exortam Eutyche-
tis Hæresim damnasset, à *Dioscuro* Episcopo Alexandrino, & Præside Pseudo-Concilii, seu Latrocinii Ephesini anno cccxlix. Sede Constantinopoli-
tanâ dejectus est, & eodem anno Martyr obiit *Epi-
pa*, quæ civitas est Lydiæ, ad quam missus fuerat in exilium. Variæ sunt de illius Sancti Martyris mor-
te Scriptorum sententiæ. Aliqui tradunt, cum in ipso Pseudo-Concilii, seu Latrocinii Ephesini loco à *Barsuma* & suis Monachis fuisse interfectum. Alii scribunt, Flavianum ex acceptis in prædatoria Sy-
nodo Ephesina ab Hæreticis Eutychanis plagis, post triduum interiisse. Sedit *Flavianus* annum
unum, & menses decem. Ejus Elogium Histori-
cum exhibet *Henschenius* ad diem xvi. mensis Fe-
bruarii.

Flaviano trucidato nefario Eutychianorum sce-
lere substitutus est in Sedem Constantinopolitanam
Anatolius, & ab Episcopis ejusdem cum *Dioscuro* fa-
ctionis ordinatus. Qua de causa *S. Leo* Papa putans
Anatolium ab Episcopis Eutychanis ordinatum in
eodem erroris luto cum ipsis hærec, diu dandis ad
cum

eum Epistolis pacis sese abstinuit. Verum, postquam accepisset *S. Leo*, Anatolium fidei Formulæ subscripsisse, eumque ab Eutychniana Hæresi abhorrere, scripsit ad ipsam Epistolam, quæ est sexagesima inter Epistolas *S. Leonis*, quâ ei impensè gratulatur, quod Fidem Catholicam profiteretur, & ab Eutychneticis erroribus esset omninò alienus. Famam, & Orthodoxiam Anatolii plenissimè vindicavit *Andreas Chevillerius* in Dissertatione in Synodum Chalcedonensem de Formulis fidei subscribendis. Mortuus est Anatolius Episcopus Constantinopolitanus anno cccclviii. habuitque successorem, *Gennadium*, qui Ecclesiæ Constantinopolitane præfuit tredecim annis, & migravit ex hac vita anno cccclxxi. Gennadio successit *Acacius*, qui multas tragœdias in Ecclesia Orientali excitavit. Petrum siquidem Mongum, & Petrum Fullonem, quas prius velut Hæreticos meritò fuerat infectatus, in communionem suam recepit, & in Sedes Alexandrinam, & Antiochenam à Zenone Imperatore restitui curavit. Auctor quoque fuit eidem Zenoni Imperatori ut conderet & promulgaret decretum suum dictum *Henoticon*, quod diu afflixit Ecclesiam. *Simplicii*, & *Felicis* Romanorum Pontificum monita ludibrio habuit, & Legatos Sedis Apostolicæ hostili more detrusit in carcerem, & multis injuriis affecit, quodque gravius est, Romani Pontificis nomen è sacris Diptychis expunxit, & Schisma conflavit, quod non tam citò extinctum est. Ob tot graves excessus iustis de causis *Acacius* à Romanis Pontificibus damnatus est, ejusque nomen post mortem è tabulis Ecclesiæ deletum. Quam sententiam Summorum Pontificum adver-

adversus Acacium latam Ecclesia Orientalis æquifiniam esse agnovit, quippè quæ Acacium etiam damnavit post mortem, & illius nomen è Diptychis erasit. Quin etiam tempore *Hormisdæ Papæ*, sub quo inita est pax Orientalem inter & Occidentalem Ecclesiam, non prius Orientales Episcopi in Sedis Apostolicæ communionem suscepti sunt, quàm subscriberent libello non prava tantum dogmata, sed etiam personam & nomen Acacii damnant. Mortuus est *Acacius* anno cccclxxxvi. & in ejus locum ordinatus est *Flavianus*, quem alii *Flavitam*, alii *Phravitam*, alii *Phraitam* nominant, qui tantum tres menses & aliquot dies Sedem Constantinopolitanam tenuit. Hunc in Episcopatu Constantinopolitano excepit *Euphemius*, qui anno 496. ab Anastasio Imp. in exilium missus est, & in ejus locum subrogatus *Macedonius*, qui Ecclesiam Constantinopolitanam rexit usque ad annum dxv. quo mortuus est. Sunt nonnulli, qui *Euphemium*, & *Macedonium* mox laudatos Episcopos Constantinopolitanos inter Schismaticos & Hæreticos recensent; sed doctissimi Historiæ Ecclesiasticæ Scriptores *Natalis Alexander* Dissertatione vicesimâ in Hist. quinti sæculi, & *Antonius Pagius* in sua Critica ad annos cccxcv. & dxv. horumce duorum Episcoporum Orthodoxiam multis momentis asserunt ac vindicant. Immo *Henschenius* ad diem xxv. mensis Aprilis pluribus contra Baronium evincit, sacrum cultum à Græcis exhiberi *Macedonio* Episcopo Constantinopolitano. Sed hæc de serie Episcoporum, qui in quinto Ecclesiæ sæculo præcipuas Sedes tenuerunt, juxta accuratiorem Chronologiam, dixisse sufficiat.

COLLOQUIUM IV.

*De Conciliis, quæ in quinto Ecclesiæ sæculo
fuerunt celebrata, & de variis
Factionibus, in quas distracti
sunt Episcopi Catholici.*

D. CUM ad profligandas Hæreses, & ad faciendam Ecclesiæ Disciplinam Concilia celebrari soleant, scire in primis vellem, in quibusnam Conciliis tam Generalibus, quam Nationalibus damnatæ fuerint Hæreses Pelagianorum, Semi-Pelagianorum, Nestorianorum, & Eutychianorum, quæ in quinto Ecclesiæ sæculo grassatæ sunt, & deinde, quænam sint illa Concilia, quæ ad Disciplinam Ecclesiæ sartam tectam conservandam eodem sæculo fuerunt convocata, quotve Canones ediderint?

M. In Colloquio, quod jam instituimus de Hæresibus, quæ in quinto Ecclesiæ sæculo emerferunt, multa memini me laudasse Concilia, in quibus Hæreses id ætatis enatæ proscriptæ sunt. Nichilò secius, ut pleniorē assequaris notitiam Conciliorum, quæ in eo sæculo habita sunt, quatuor hic breviter, quoad ejus fieri poterit, præstabo. Primò, recensèbo juxta seriem Chronologicam omnia Concilia, quæ contra Pelagianos celebrata sunt. Secundò, texam Historiam Concilii Oecumenici Ephesini, in quo damnatus est Nestorius. Tertiò, summatim delibabo ea, quæ gesta sunt in Concilio Generali Chalcedonensi, in quo confixus est Eutychetis error, & iniqua scelera à Dioscoro Alexandri-

drino, & ab aliis Episcopis Eutychianis in latrocinio Ephesino commissâ. Quartò, referam Concilia, quæ Canones ediderunt, in quorum serie per plurium sæculorum cursum ad nos usque deductâ vivam veteris Disciplinæ Ecclesiasticæ imaginem possumus contemplari.

D. Recense primò Concilia, in quibus Pelagiani fuerunt damnati.

M. Primum Concilium, quod adversus Pelagianos convocatum est, fuit Concilium Carthaginense habitum anno ccccxi. in quo *Celestius* Pelagii discipulus, qui peccatum Originale, ejusque ad posteros propagationem inficiabatur, damnatus, & anathemate perculsus est. Alterum Concilium, seu *Hierosolymitanum*, in causâ Pelagii *Joannes* Hierosolymorum Episcopus unâ cum suis Presbyteris celebravit anno ccccxv. eique interfuit *Orosius* accusator Pelagii. At *Joannes* hujus Concilii Præses damnare noluit Pelagium, cujus fraudibus fuerat deceptus, sed solum statuit, ut hac de re litteræ ad Innocentium I. Summum Pontificem mitterentur, ejusque super hac controversia decretorium expectaretur judicium. Eodem anno, seu ccccxv. apud Diospolim Palæstinæ Urbem, *Lyddam* olim dictam, à quatuordecim Episcopis in causâ itidem Pelagii habita est Synodus Diospolitana, in qua *Orosius* libellum obtulit, qui nefaria Pelagii dogmata continebat. Verùm vasserimus Pelagius, qui præsens erat, errores sibi ab Orosio objectos perfrictâ fronte negando, vel Fidem Catholicam mentiendo, fucum fecit Patribus, & damnationis sententiam declinavit. Anno tamen sequenti, seu ccccxvi. *Pelagius*, & *Celestius*, licet à Patribus Diospolitans, qui-

quibus cum fraudulenter egerant, fuissent absoluti, in altero Concilio Carthaginensi, & in Synodo Milevitana II. ob Hæresim damnati sunt. Circà hanc Synodum Milevitanam secundam contra Pelagianos coactam obiter velim observes, in Collectione Conciliorum referri Acta Synodi Milevitanz secundæ cum præfatione, quæ incipit his verbis: *Gloriosissimis Imperatoribus Arcadio, & Honorio Augg. Viris clarissimis, Cos. VI. Kalend. Septembris &c.* Sed observant periti Critici, hanc Præfationem non esse Synodi Milevitanz secundæ, sed primæ, quæ anno ccccii. Sub illo Consulatu habita est. Sequuntur postea Canones xxvii. quorum plures adversus Pelagianos editi sunt, octo scilicet Priores. Sed Eminentissimus Cardinalis Norisius lib. i. Hist. Pelagianæ cap. 10. pluribus ostendit, octo illos Canones contra Pelagianos adscribi nequaquam posse Synodo Milevitanz secundæ. Quam Norisii sententiam omnes eruditiores viri ultrò, amplectuntur. Observat etiam meritò Baronius, farraginem illam xxvii. Canonum uni Synodo Milevitanz secundæ inscriptorum ad diversa Concilia Africana pertinere.

Sed ab hac brevi digressionem redeamus ad Concilia, in quibus confossus est Pelagianorum error. Putavit Baronius, Aurelium Carthaginensem Episcopum, & totius Africæ Primatem unam tantum Synodum ex omnibus Africæ Provinciis in Causa Pelagianorum Carthagine anno ccccxviii. Coëgisse. At convenit modò inter omnes viros eruditos, duas Africanas Synodos anno ccccxviii. ab Aurelio Carthaginensi Episcopo fuisse convocatas, quarum prima, ut docet Cl. Pagius, inchoata est medio mense Januario anni ccccxviii. & finita circa
me-

medium Februarium , huicque interfuerunt cccxv. Episcopi . Altera Synodus ab eodem Aurelio indicta est Kalendis mensis Maii ejusdem anni , & continuavit usque ad primum circiter diem mensis Julii ejusdem anni, ad eamque convenere cccxvii. Episcopi Africani . In priori Synodo Africana , quæ medio mense Januario anni ccccxviii. Sub Aurelio habita est , Episcopi maturâ deliberatione inquisierunt, quidnam factum opus esset , ut Pelagianorum artibus obviam iretur . Quocircâ , cùm Pelagius , & Cœlestius ementitâ fidæi professione Zosimum Papam decessissent, Patres illius Synodi per *Marcelinum* Subdiaconum transmiserunt ad Zosimum plurimas instructiones , gesta præcedentium Synodorum , & Decreta , seu octo , vel , ut alii volunt , novem Canones de Gratia , Scripturarum , & Sanctorum Patrum testimoniis probatos , quibus Pelagianam Hæresim planè jugulatum iri arbitrabantur . Dederunt etiam illius Synodi Africanæ Patres Epistolam Synodicam ad Zosimum, quæ temporum injuriâ periit , in qua graviter exposulabant , quod Romanus illè Pontifex , posthabito Africano Ecclesiæ , & Romanæ per Innocentium Summum Pontificem judicio , quo finita Cœlestii causa fuerat , ad novum examen eam revocasset , & obtestatorium libellum interposuerunt , quo suum sibi jus servari flagitabant, & ut nihil de sententia in Pelagium , & Cœlestium tam ab Africana Ecclesia , quàm Romana per Innocentium Pontificem jam prolata immutaretur , sed in eodem cuncta relinquerentur statu , saltem donec unum è suis Romam mitterent cum idoneis causæ instrumentis , quibus Hæreticorum artes, & versutia aperirentur, palàmque ostendere-

deretur, quàm legitimè, & canonicè damnati essent. *Zosimus*, acceptis Patrum Africanorum litteris, & instructionibus, in Cœlestium & Pelagium, quos antehac eorum fraudibus delusus innocentes crediderat, decretoriam tulit sententiam; Canonibus de gratia à Patribus Africanis contra Pelagianos constitutis & in eorum relatione ad ipsum missa contentis Apostolicæ Sedis adhibuit auctoritatem, scripsitque universis Orbis Episcopis prolixam illam Epistolam, quam *Traëtoriam* Marius Mercator appellat, & cujus aliqua tantum fragmenta nunc supersunt. Hæc Epistola Traëtoria *Zosimi* Papæ, quæ Pelagianorum proscribebatur Hæresis, lecta fuit in secundo Concilio Africano, quod, ut mox dixi, ab Aurelio Carthaginensi Episcopo indictum est Kalendis mensis Maii anni ccccxviii. & summâ omnium gratulatione excepta. Undè Patres istius Concilii Africani Epistolam ad *Zosimum* scripserunt, quâ ipsi de Pelagianorum Hæresis damnatione impensè sunt gratulati. Sunt quidam Viri eruditi, qui censent, præter istud Concilium totius Africæ plenarium Kalendis mensis Maii anni ccccxviii. habitum, aliud, seu tertium Concilium Africanum contra Pelagianos habitum fuisse mense Augusto ejusdem anni, in quo lecta, & recepta fuerit *Traëtoria* Epistola *Zosimi*. Verum, in hoc hallucinari viros illos eruditos luculenter ostendit Cl. *Pagius* ad annum Christi ccccxviii. ubi solidè probat in secundo Concilio Africano contra Pelagianos coactus Kalendis Maii anni ccccxviii. lectam, probatam, & publicatam fuisse Epistolam *Traëtoriam* *Zosimi*, & post illud Concilium secundum Africanum, nullum aliud Concilium in causa Pelagii hoc anno ccccxviii. fuisse convocatum. His

in Conciliis Africanis, & à Summis Pontificibus *Innocentio I. & Zofimo* damnati Pelagiani, atque ad exiguum numerum redacti, ut suam prostratam Sectam utcumque erigere, ac fulcire possent, Societatem inierunt cum Hæreticis Nestorianis, cum quibus tam in Synodo Romana sub Cœlestino Papa anno ccccxix. celebratâ, quàm in Concilio Generali Ephesino anno sequenti habito fuerunt eadem sententiâ perculsi. Hæc sunt Concilia, quæ Pelagianorum errores in quinto Ecclesiæ sæculo damnarunt.

D. Fueruntne in quinto Ecclesiæ sæculo aliqua convocata Concilia ad damnandam Hæresim Semipelagianorum, qui initium fidei, & bonorum operum ex solis arbitrii viribus proficere autumabant?

M. Semipelagiani toto quinto Ecclesiæ sæculo, immò usque ad Synodum Arausicanam secundam, quæ anno dxxix. sub *Felice IV. Papa* indicta, & à Bonifacio II. confirmata est, habiti non sunt ut Hæretici, nec ullum in quinto sæculo cōactum fuit Concilium, quod eorum sententiæ notam Hæreseos inußerit. Quapropter, sicut Sanctus Cyprianus, & alii Africani Antitites à tempore Agrippini Carthaginensis Episcopi usque ad damnatum ab Ecclesia rebaptizantium errorem suam opinionem de rebaptizandis Hæreticis licetè & inculpate tenuerunt; sic Semipelagianorum sententia per annos centum liberè, & citrà fidei crimen à Presbyteris Massiliensibus, immò, & à multis Galliarum Episcopis propugnata fuit, ut latè probat Cardinalis Norisius in Dissert. 3. *De Anonymi scrupulis circa veteres Semipelagianorum Sectatores evulsis, ac eradicatis.* Undè licet

licet *Cassianus* Semipelagianus fuerit, quia tamen hæc opinio necdum hoc tempore ab Ecclesia erat damnata, cum opinione sanctitatis *Massiliæ* obiit, ubi etiamnum colitur ad diem *xxiii. Julii*, & antè ejus sepulchrum diu noctuque lucerna ardet. Similiter Ecclesia *Rejensis*, seu *Regiensis*, de *Fausto* etsi Semipelagiano, qui illius Ecclesiæ Episcopus fuit, proprium de eo Officium celebrat, cumque ut Sanctum veneratur, quia è vivis excessit antè Concilium secundum *Arausicanum*, in quo ceu hæretica proscripta est Semipelagianorum sententia. In Synodo tamen à *Gelasio* Summo Pontifice anno *ccccxciv.* celebrata inter damnatos libros, *Cassiani* ac *Fausti* *Rejensis* Episcopi numerata sunt Opera, quia ab eo tempore alterutrius opiniones tueri tutum non fuit. Cum igitur Semipelagianorum Doctrina in Conciliis *Arausicano* secundo & *Valentino* in sexto sæculo celebratis fuerit damnata, ideò de illis Conciliis differendi opportunior sese dabit occasio in Colloquiis nostris Ecclesiasticis in Historiam sexti Ecclesiæ sæculi.

D. Veniamus nunc ad Historiam Concilii *Ephesini*, quod contra *Nestorium* convocatum est, ejus tempus, Patrum numerum, & Præsides, rogo te ut mihi indicare non graveris.

M. Concilium *Ephesinum*, quod ordine tertium Oecumenicum est, anno *ccccxxxi.* indictum est ad diem *Pentecostes*, seu ad diem *vii. mensis Junii*, in quam hoc anno *Pentecostes* incidit. Istud tamen Concilium non nisi die vicesimâ secunda, ejusdem mensis in magna *Ephesi* Ecclesia, *S. Mariæ Dei-paræ* nuncupatâ, inchoatum est. De numero Patrum, qui huic Concilio interfuerunt, veteres Scri-

ptores non consentiunt . Eorum tamen opinio, teste doctissimo *Baluzio* in notis ad Marium Mercatorem , videtur verior, quæ ducentos circiter Episcopos huic Synodo adfuisse docet . Hæresiarcha *Nestorius* ad Concilium veniens adduxit secum decem Episcopos de suis, & duos Comites, *Candidianum* scilicet ab Imperatore Theodosio missum, ut ordinem in Synodo servandum curaret, & *Irenæum* privatum amicum suum . *Cyrillus* verò Patriarcha Alexandrinus longè plures secum adduxit Episcopos, Ephesumque pervenit quatuor, aut quinque diebus antè Pentecosten, seu antè diem septimum Junii. *Juvenalis* Episcopus Hierosolymitanus Ephesum adventavit cum Episcopis Palæstinis . At *Joannes* Patriarcha Antiochenus, qui Nestorio impensius favebat, de industria per viam trahens moram cum Antistitibus Orientalibus, scripsit Cyrillo per Episcopos duos, cum abesset tantum itinere quinque aut sex dierum, cumque sic datâ operâ adventum suum procrastinaret, appulerunt Ephesum decimo sexto post Pentecosten die *Alexander* Apameensis secundæ Syriæ, & *Alexander* Hieropolitanus Episcopus Provinciæ Euphratensiæ Metropolitæ, qui Synodo de nimia Joannis Antiocheni eorum Patriarchæ mora querenti dixerunt: *mandavit nobis, Joannes Antiochenus, ut pietati vestræ indicemus, ne Synodum prorogetis, si ipsum amplius tardare contigerit, sed potius, quod opus est factum, id fiat, sicut legitur in parte 2. Concilii Ephesini* Actione V. quibus auditis, abjecta omni cunctatione Patres Synodum inchoarunt, primamque Sessionem habuerunt die xxii. mensis Junii. *Cælestinus* Summus Pontifex ad Ephesinum Concilium Legatos misit *Arca-*
dium,

dium, & *Proiectum* Episcopos, & *Philippum* Presbyterum, qui nomine suo ei præessent. *Cyrillus* etiam Patriarcha Alexandrinus, cui antehac Cœlestinus Papa auctoritatem Sedis Apostolicæ delegaverat ad executionem sententiæ contra Nestorium in Synodo Romana latæ anno ccccxxx. præfuit Concilio Ephesino tanquàm Vicarius Cœlestini Papæ. Quo titulo in Actis illius Concilii ubique exornatur etiam post adventum Legatorum Sedis Romanæ, ut patet ex Actione iv. ubi Legati *Arcadius*, *Proiectus*, & *Philippus* statim post *Cyrillum* antè reliquos Episcopos nominantur. Immò *Cyrillum* Concilio Ephesino antè trium Legatorum Sedis Apostolicæ adventum non solum ex prærogativa Sedis suæ Alexandrinæ, sed etiam vice Cœlestini Papæ præfuisse, apertè colligitur ex Actione I. illius Concilii, ubi expressè legitur, *Cyrillum* Sanctissimi, Sacratissimi-que Romanæ Ecclesiæ Archiepiscopi locum obtinuisse. Procùl igitur abludunt à vero, qui negant *Cyrillum* tanquàm Vicarium Cœlestini Papæ præfuisse Concilio Ephesino.

D. Fuitne aliquid statutum in Concilio Ephesino ante adventum Joannis Antiocheni, & aliorum Episcoporum Orientalium?

M. Comes *Candidianus*, ac plures Episcopi rogarunt *Cyrillum*, aliosque Patres Ephesinos, ut expectarent Joannem Antiochenum, ipsosque contestati sunt, ne ante ejus adventum aliquid prorsus agerent. Ast *Cyrillus*, alique Episcopi, qui per quindecim dies ob absentiam Joannis Antiocheni Concilium distulerant, diuturnio rem moram intempestivam fore rati, Actionem, seu Sessionem primam die xxi. Junii actutùm celebrarunt, in qua-

lecta est Imperatoris Theodosii de congreganda Synodo Epistola, dein, Symbolum Nicænum, & Cyrilli ad Nestorium literæ, earumque cum fide Nicæna consensus ab omnibus Episcopis approbata. Recitata est etiam Nestorii ad Cyrillum Epistola, quæ unanimi Patrum calculo explosa est. Lectæ itidem Cœlestini Papæ, Synodique Alexandrinæ ad Nestorium litteræ, & postremo examinata Nestorii Scripta, ex quibus omnibus compertum, atque exploratum fuit, Nestorium negasse Beatam Virginem, Mariam esse *Dei-param*, duasque in Christo admisisse Personas, divinam scilicet, & humanam. Quapropter Nestorius ad causam in Synodo dicendam tunc vocatus, sed sistere sese omnino recusans, omnium patrum sententia damnatus, ac depositus est. Hæc Concilii sententiâ postridiè significata est Nestorio, & missæ ad Cœlestinum Papam, ad Imperatorem, & ad Clerum Constantinopolitanum relationes, quibus denunciabatur Nestorii e Sede Constantinopolitana depositio.

D. Hac igitur unicâ Actione, seu Sessione, Concilii Ephesini res tota confecta fuit, & Nestorii penitus jugulata Hæresis?

M. Minimè gentium. *Candidianus* quippè Comes retulit ad Theodosium Imperatorem ea, quæ gesta erant in Concilio Ephesino, retulit etiam & *Nestorius*, sed ambo ita subdolè & mendaciter, ut animum Theodosii Imperatoris jam in Nestorium nimis prouum, & Cyrillo auersum, in totam Synodum commoverint. Ad hæc, quintâ die, à latâ in Nestorium sententiâ, Ephesum venit *Joannes Antiochenus*, qui ægrè ferens, quod ejus præsentiam Patres diutius non expectassent, Conciliabulum cum suis

fuis Orientalibus Episcopis egit , in quo in *Cyrillum* Patriarcham Alexandrinum , & in *Memnonem* Episcopum Ephesinum , tanquàm omnium malorum architectos , damnationis & depositionis sententia lata est . Cæteri etiam Patres Ephesini , ni resipiscerent , & XII. Sancti Cyrilli contra Nestorium Anathematismos quàm primùm rejicerent , Anathemati subiecti fuerunt . Relationem gestorum in hoc Conciliabulo ad Imperatorem misit *Joannes* Antiochenus , eumque de omnibus certiores fecit .

D. Post acceptas illas relationes , quo pacto se gessit Theodosius Imperator ?

M. Relatione Comitum *Candidiani* Constanti-
nopolitani , Theodosius continuò rescripsit per *Palladium* Magistrum , jussitque omnia in Actione , seu Sessione prima Concilii Ephesini gesta penitus rescindi , tanquàm vitio facta ; & communi sententiâ examinari Dogmata , ut cuncta conspirantibus omnium suffragiis definirentur . Ut autem Episcopis rei maturandæ necessitatem imponeret Imperator , districtè vetuit , ne quis Episcopus exiret Epheso sive in Patriam , sive in Comitatum , priusquàm omnia ritè absoluta essent . Interim , hinc & inde tam à Concilio Ephesino , quàm à Conciliabulo Joannis Antiocheni Epistolæ , & Legati ad Imperatoris Aulam mittebantur .

D. Necdum exposuisti , cum tua bonâ veniâ , quid in his excitatis turbis Consilii ceperint , quamve in partem inclinarint Legati missi à Cœlestino Summo Pontifice ?

M. *Arcadius* , & *Proiectus* Episcopi , & *Philippus* Presbyter Legati à Cœlestino Summo Pontifice missi non interfuerunt Actioni , seu Sessioni pri-

mæ Concilii Ephesini, quia Ephesum dumtaxat ad-
 venerunt die decimâ mensis Julii, quâ die habita-
 est Actio, seu Sessio secunda, & postridiè Actio, seu
 Sessio tertia, in qua lecta sunt, quæ antea gesta fue-
 rant in damnatione, & depositione Nestorii, & di-
 cta singillatim à tribus Sedis Apostolicæ Legatis in
 Nestorium sententia, ac postea relatum à Synodo
 ad Imperatorem de Legatorum adventu, atque po-
 stulata discedendi facultas, cum omnia in negotio
 Nestorii jam essent omnino peracta. Finitâ itaque
 Causâ Nestorii, *Cyrillus* Alexandrinus, & *Memnon*
 Ephesinus Episcopi obtulerunt in Actione, seu Ses-
 sione quarta, quæ habita est die xvi. mensis Julii,
 libellum, quo apud Sanctam Synodum exposu-
 runt de injuria sibi ab Orientalibus Episcopis factâ,
 petieruntque ut citaretur *Joannes* Antiochenus, qui
 comparere cum nollet, pronunciarunt Patres irrita
 esse omnia, quæ Joannis Antiocheni Pseudo-Syno-
 dus adversus Cyrillum, & Memnonem fecisset,
 simulque decreverunt ut hac de re scriberetur Im-
 peratori, ac tertio citaretur Joannes Antiochenus,
 antequàm jure in ipsum ageretur. Die itaque xvii.
 mensis Julii peracta est Actio, seu Sessio quinta, &
 Joannes Antiochenus tertio vocatus est, qui se siste-
 re cum renuisset, Sacra Synodus tulit in ipsum, & in
 alios Orientales Episcopos ei adhærentes excom-
 municationis sententiam, & denuò statuit irrita
 planè esse, quæ adversus Cyrillum, Memnonem,
 aliosque Episcopos in suo Conciliabulo egerat Jo-
 annes Antiochenus. Celebrata est die xxii. mensis
 Julii sexta Synodi Ephesinæ Actio, seu Sessio, in qua
 lecta & approbata est Nicænæ fidei Formula, edi-
 tumque Synodale Decretum, quo cavebatur, ne quis
 alte-

alteram fidei Formulam , præter Nicænam , con-
scriberet, vel componeret. Demùm, ultima die men-
sis Julii habita est septima Concilii Ephesini Actio ,
seu Sessio , in qua Patres sanxerunt , jus Ordinatio-
num Episcoporum Insulæ Cypri non pertinere ad
Episcopum Antiochenum, sed Cypriis Episcopis ju-
xtà Canones, & veterem consuetudinem servari de-
bere . In eadem Sessione septima & ultima fuit
approbata Hæreticorum *Messalianorum* damnatio
facta à *Sisinnio* Episcopo Constantinopolitano, com-
positæ quoque sunt quædam Episcoporum lites , &
sex conditi Canones contra Pelagianos, nequon ad-
versus Nestorium, illiusque fautores .

D. Rata ne habuit Imperator Theodosius
omnia, quæ gesta sunt in Concilio Ephesino ?

M. Patres Concilii Ephesini selectos ad Im-
peratorem miserunt Episcopos, qui rerum gestarum
ordinem, & rationem ei exponerent, sed *Irenæus* Co-
mes , Nestorii amicus , quem Joannes Antiochenus
ad Imperatorem miserat , Constantinopolim ve-
niens, malis artibus effecit, ut Concilii Ephesini Le-
gati nihil promovere potuerint . Cùm igitur in Au-
la Imperatoris hæc causa fuisset agitata , nec una
esset omnium sententia , placuit tandem Imperatori
consilium à nonnullis ei suggestum de mittendo
Ephesum *Joanne* sacrarum largitionum comite, qui
nomine Imperatoris tres esse depositos juberet , vi-
delicet *Cyrillum* , *Memnonem* , & *Nestorium* , omnes-
que in unam Synodum cogeret, & res pacificè agen-
das curaret . *Joannes* itaque sacrarum largitionum
Comes Ephesum adveniens partium concordiam
tentavit , sed frustra : undè in his rerum angustiis
jussit Imperator, Nestorium recedere à Concilio, &

ex

ex utraque parte Legatos ad Urbem Regiam venire. Suos Legatos elegit Sacra Synodus, suos itidem Orientalis factio misit. Imperator Orientalium Legatos, qui à partibus Joannis Antiocheni stabant, in Villa Rufiniana quinquies audivit, eosque tam benevolè in speciem excepit, ut certissimam sibi victoriam pollicerentur. At præter ipsorum expectationem, paucos post dies jussit Imperator Legatis Concilii Ephesini sese Constantinopolim comitari, ut Episcopum in locum depositi Nestorii ordinarerent, Orientalibus Legatis interim Chalcedone relictis, quibus ad suas redeundi Ecclesias facultas concessa est. Episcoporum Orientalium fraudes cum perspectas habuisset Imperator ex litteris, quas ad ipsum scripserunt Patres Ephesini, & quæ, ne interciperentur, arundine inclusæ ad *Dalmatium* Sanctissimum Archimandritam à quodam mendico delatæ sunt, confestim Nestorium in Monasterium, Sancti Euprepî Antiochiæ in exilium misit, in cujus locum *Maximianus* consecratus est Episcopus Constantinopolitanus; Sanctum Cyrillum Alexandrinum, & Memnonem Ephesinum Episcopos, quos per *Joannem* sacrarum largitionum Comitem deponi jusserat, suis Sedibus restituit, & omnia, quæ Synodus Ephesina contra Nestorium, Joannem Antiochenum, & alios Episcopos Orientales sanxerat, rata haberi voluit. Quin, & soluto Concilio Ephesino, *Theodosius* junior paci Ecclesiæ totus intentus litteras scripsit ad Joannem Antiochenum, ut similitates cum Cyrillo deponeret, & Nestorium damnaveret. Obtemperavit *Joannes*, & assensus est damnationi Nestorii, & Ordinationi *Maximiani*, utque cum Cyrillo pacem iniret, duos è suis Diaconis unum cum

cum *Aristolao* Tribuno , & *Paulo* Emisseno Episcopo ad ipsum misit , eique significavit , se Doctrinæ Nestorii Anathema dicere , illius depositionem ratam habere , & *Maximiani* in locum Nestorii Ordinationem approbare . Subscripsit etiam *Joannes* Antiochenus professioni fidei , in qua ultrò agnovit unicam in Christo Personam , & Beatam Virginem Mariam esse verè Dei-param , damnavitque prava Nestorii Dogmata , & peregrinas explosit voces , quas ille Hæresiarcha invexerat . Hanc Fidei professionem à Joanne Antiocheno , aliisque Episcopis Orientalibus subscriptam Sanctus Cyrillus tanquàm omninò Catholicam inseruit in suis litteris , quas dedit ad Joannem Antiochenum , quarum initium : *Latentur Cali, & Terra* . Sic pax inter Cyrillum Alexandrinum , & Joannem Antiochenum , aliosque Orientales Antistites summo omnium Fidelium plausu & gaudio composita est sub finem anni cccxxxvii. Verùm, vix pax nunciata fuerat, cùm in variis Orientis partibus tumultuatum est . *Andreas* quippè Samosatenus Episcopus, *Meletius* Episcopus Mopsuestenus , *Alexander* Hieropolitanus , *Halladius* Tarsensis, *Eutherius* Thyansenis Metropolitæ , *Theodoretus* Cyrensis Episcopus , alique non pauci Orientales Episcopi ab inita pace abhorruerunt , nolentes damnare Nestorium , nec communionem habere cum Cyrillo Alexandrino , & Joanne Antiocheno . Ad hanc Episcoporum discordiam sedandam , ex qua gravissima mala in Ecclesiam redundabant , Imperator omnem suam operam contulit , & ad Joannis Antiocheni postulationem Sacram dedit , quâ iussit ut omnes Orientales Episcopi cum Joanne Antiocheno communicarent , aut à
suis

suis Ecclesiis ejicerentur. Hac Sacra Imperatoris haud parum conturbati Theodoretus Cyrensis Episcopus, & alii Isauriæ & Ciliciæ Antistites, qui hætenus ad nullas pacis condiciones accedere volebant, tandem aliquandò inite paci consenserunt. Multi tamen Episcopi obstinati, & in suscepto proposito perseverantes Sedibus suis fuerunt pulsati, quos inter numerantur *Meletius* Episcopus Mopsuestenus, & *Alexander* Hieropolitanus. Complures etiam fuerunt Episcopi, quorum Catalogum texit *Irenæus* Tyrriorum Episcopus capite cxc. Synodici, qui aut fugere, & Ecclesias suas deserere maluerunt, quàm Nestorii depositioni consentire, vel cum Cyrillo Alexandrino, & Joanne Antiocheno communicare. Denique, anno ccccxxxv. Nestorius funestæ illius tragædiæ auctor è Monasterio Sancti Euprepîi, in quo per quadriennium jam exul permanerat, in Oasim Edicto Theodosii Imperatoris altero exilio amandatus est, & libri ab ipso conscripti ultricibus flammis fuerunt additi.

D. Hæc Imperialis Lex reddidit ne Ecclesiæ pacem?

M. Episcopi Ægypti cum Orientalibus perpetua aluerunt discordiæ semina. Alii siquidem Anatematismos xii. Sancti Cyrilli contra Nestorium tanquàm Hæreseos Apollinariî labe infectos penitus repudiabant. Alii, versâ vice, illos ut Orthodoxos propugnabant. Alii communicabant quidem cum Joanne Antiocheno, sed Nestorium anathematizare nolebant. Alii Nestorio Anathema dicebant, sed non ejus doctrinæ. Alii denique, Nestorii libris Lege Imperiali prohibitis, cœperunt *Diodori* Tarsensis, & *Theodori* Mopsuesteni circumferre,

ferre volumina, dictitantes, Nestorium nova non sapuisse, sed antiquorum Patrum protulisse doctrinam, eademque volumina in Syrorum Linguam, & Armenorum, atque Persarum transtulerunt. Quod statim ac agnoverunt *Acacius* Melitinenfis, & *Rabulas* Edessenus Episcopi, scripserunt Armeniæ Episcopis, ne Theodori Mopsuesteni, utpotè Hæretici, & Auctoris Nestoriani Dogmatis, libros susciperent. Contrà verò Episcopi Ciliciæ accusarunt *Rabulam*, & *Acacium*, quod hoc non ex charitate, sed ex æmulatione, atque contentione fecissent. Episcopi Armeni in unum congregati miserunt duos Presbyteros *Leontium*, & *Aberium* ad Proclum Constantinopolitanum Episcopum, ut scirent ab eo, cui doctrinæ standum esset. *Proclus* itaque annuens eorum votis *tomum* scripsit, in quo doctrinam Theodori Mopsuesteni Episcopi tanquam Hæreticam reprobavit, eumque misit ad Joannem Antiochenum, qui coactò Concilio subscripsit prædicto *Procli* tomo unà cum Episcopis cum ipso congregatis. Porro, quamvis Joannes Antiochenus subscripserit tomo *Procli*, de Theodoro tamen Mopsuesteno, cujus magnum erat per totum Orientem nomen, consultò tacuit, ut faciliùs excitati tumultus in optatam diù tranquillitatem verti possent, quam Joannis Antiocheni dispensationem, utpotè ad revocandam, vel conservandam Ecclesiæ pacem prorsùs necessariam probavit ipsemet *Cyrillus* in Epistola, quam scripsit ad Proclum his verbis: *Dispensatio verò in his est res optima ac sapiens. Si enim adhuc in vivis esset (Theodorus Mopsuestenus) & Nestorii blasphemiarum factor esse, aut suffragari vellet iis, quæ scripsit ipse, Anathema etiam in propria persona subjisset, quoniam*

niam verò ad Deum, abiit, sufficit, ut ego puto, ea quæ absurdè ab eo scripta sunt, reiici ab iis, qui rectè sentiunt &c.

D. Fueruntne tandem per hanc Oeconomiam compressi omnes tumultus?

M. Nequaquàm. Quidam enim Episcopi Orientales Nestorianæ Hæreseos fautores, hanc Oeconomiam suscipere renuerunt, & Theodori Mopsuesteni blasphemias tanquàm consonas doctrinæ SS. Patrum præfractè defendere ausi sunt. Quamobrem Cyrillus Alexandrinus coactus est libros conscribere adversus Theodorum Mopsuestenum, eumque etiam post mortem tanquàm Hæreticum, & impium anathematizare. Inde tamen finita non est Theodori Mopsuesteni causa, ex qua originem postea duxerunt gravissimi tumultus, qui usque ad Synodum Chalcedonensem, immò usque ad quintam Synodum Generalem sub Vigilio Papa, & Justiniano Imperatore in sexto Ecclesiæ Sæculo celebratam perdurarunt, ut expendemus in nostris Colloquiis in sextum Ecclesiæ sæculum.

Dum sic in Oriente occultè adhuc serperet Nestoriana lues, contigit ut *Eutyches* Presbyter, & Archimandrita cujusdam Monasterii Constantinopolitani, qui in Concilio Ephesino contra Nestorium strenuè decertaverat, in contrarium planè errorem delapsus fuerit, asserens duas in Christo naturas antè unionem fuisse, sed post unionem, sive post Incarnationem, unicam tantummodò naturam, seu divinam, permanuisse, ac subindè Carnem Christi nobis non esse consubstantialem. Hæc malè sana Eutychetis dogmata, quæ, ut jam diximus in Colloquio de Hæresibus, quæ in quinto Ecclesiæ sæculo emer-

emerferunt, à *Flaviano* Constantinopolitano, Episcopo in Concilio, quod Constantinopoli celebravit, fuerunt proscripta, nihilofeciùs in Conciliabulo Ephesino, vulgò *latrociniali* dicto, à Theodosio juniore Imperatore anno ccccxlx. indicto approbata sunt, Eutyches absolutus, Legati Sancti Leonis Summi Pontificis injuriis affecti, Flavianus Episcopus Constantinopolitanus, qui Eutychem damnaverat, & *Eusebius Dorilæus* Antistes damnati, ac depositi sunt, atque Anatolius in locum *Flaviani* Episcopus Constantinopolitanus consecratus est, omnia denique à Dioscoro Episcopo Alexandrino hujus Conciliabuli Præsidente, militari Satellitio stipato, per vim & fraudem ad stabiliendam Eutychianam Hæresim peracta sunt. Vivente Theodosio juniore Imperatore, nullum remedium tot gliscentibus malis adhibere potuit S. Leo Papa, nec ab ipso impetrare unquam potuit, ut Generale convocaretur Concilium, in quo latrocinii Ephesini Acta rescinderentur. At mortuo Theodosio in partes Eutychetis inclinato, Summus Pontifex facilè à *Marciano* Theodosii successore, cui *Pulcheria* Augusta suum conjugium unà cum Sceptro detulerat, obtinuit convocationem Concilii Chalcedonensis, in quo omnia latrocinii Ephesini Acta fuerunt rescissa, & Eutychiana Hæresis, quæ jam multorum pervaserat animos, fuit omnino profligata.

D. Quando nam celebratum est Concilium Chalcedonense, & quid in eo gestum est?

M. Concilium Generale Chalcedonense inchoatum est in Ecclesia Sanctæ Euphemie Martyris VIII. Idus Octobris anni ccccli. & Kalendis mensis Novembris ejusdem anni absolutum est, Huic

Huic Concilio interfuerunt sexcenti, & triginta Episcopi, quamvis minori numero subscripti reperiuntur. Præfuerunt Legati Summi Pontificis Leonis *Pasehasius* Lilibæi in Sicilia Episcopus, *Lucentius* Asculanus Episcopus, *Bonifacius*, & *Basilus* Presbyteri, quibus *Julianus* Coënsis Episcopus adjunctus est. Aderant etiam amplissimus Senatus, & Palatii Proceres, Judices, & Moderatores ab Imperatore Marciano constituti. Septemdecim Actiones, seu Sessiones in hoc Concilio habitas fuisse asserit Baronius, sed secundum illius Concilii Acta, quæ nunc habemus, fuerunt tantum sexdecim. In prima Actione, lectis Actis latrocinii Ephesini, *Dioscorus* Alexandrinus, *Juvenalis* Hierosolymitanus, *Thalassius* Cæsareæ Cappadociæ, *Eusebius* Ancyranus, *Eustathius* Berytensis, & *Basilus* Seleuciensis Episcopi, & Conciliabuli Ephesini Principes suis Sedibus fuerunt dejecti. In secunda Actione lecta fuit celeberrima S. Leonis Papæ ad Flavianum de Incarnatione Verbi Divini contra Hæresim Eutychetis Epistola, & unanimi Patrum consensu approbata est. In tertia Actione ventilata est Causa *Dioscori* Alexandrini, qui ad Synodum ter vocatus, & comparere detrectans, depositus est, omnisque ei adempta spes suam Sedem recuperandi. In quarta Actione, *Juvenalis* Hierosolymitanus, *Thalassius* Cæsariensis, *Eusebius* Ancyranus, *Eustathius* Berytensis, & *Basilus* Seleuciensis, qui à Synodo depositi fuerant, dolentes, quod iudicio contra Flavianum subscripserant, & damnantes Eutychem & Dioscorum, ad suas Sedes admissi sunt. In eadem Actione agitata est Causa *Photium* Tyrriorum Episcopum inter & *Eustathium* Beryti Antistitem, qui jus Me-

tro-

ropoliticum sibi arrogabat ; contrà quem statuit Sancta Synodus , jus Metropoliticum Episcopo Tyrriorum servandum esse , etiamsi Imperator Civitatem Beryti in Metropolim nuper erexisset. In quinta Aetione conscripta & recepta fuit fidei definitio , quâ declaratur, unum, eundemque Christum, Filium, Dominum , Unigenitum , in duabus naturis inconfusè , immutabiliter , indivisè & inseparabiliter esse agnoscendum . In sexta Aetione, (cui *Marcianus* Imperator interfuit , sed non *Pulcheria* Augusta , sicut quidam perperam asserunt) relecta est definitio Fidei , & omnium Episcoporum consensione comprobata . In septima Aetione , lis , quæ *Maximum* Antiochiæ inter & *Juvenalem* Hierosolymorum Antistites circa suarum Diœceseon limites oborta fuerat , mutuo consensu dirempta est ; nempe ut Antiochenus Episcopus duas Phœnicias & Arabiam , Hierosolymitanus verò Antistes tres Palæstinas sua sub potestate & jurisdictione haberet , quod & totius Synodi judicio firmatum est . In octava Aetione, *Theodoretus* Cyrensis Episcopus, postquam jussu Concilii Nestorio & omnibus idem cum eo sentientibus Anathema dixisset , Synodali judicio mox in Ecclesiam , ex qua latrocinii Ephesini decreto fuerat expulsus , restitutus est & Catholicus judicatus . In nona , & decima Aetionibus discussa est causa *Ibæ* Edesseni Episcopi , qui , dicto pariter in Nestorium, & Eutychem Anathemate , à Synodo Chalcedonensi receptus , ac suæ Sedi restitutus est . In Aetionibus undecima & duodecima plenissimè tractata est Causa *Bassiani* , & *Stephani* , qui post mortem Basilii de Episcopatu Ephesino certatim contendebant. Decrevit autem Sancta Synodus ut neq-

ter federet, sed tertius ordinaretur Episcopus Ephesinus, ita tamen ut Bassianus, & Stephanus alerentur sumptibus ex ærario Ecclesiæ Ephesinæ, solidis videlicet ducentis aureis quovis anno persolvendis. Ex quo profluxit origo Pensionum Ecclesiasticarum, de quibus antehac in monumentis Ecclesiasticis nulla prorsus habetur mentio. In Actione decima tertia composita est contentio orta inter *Eunomium* Nicomediensem, & *Anastasium* Nicænum Episcopos. Conquestus erat *Eunomius* Episcopus Nicomediensis, jura sua Metropolitana ab Anastasio Antistite Nicæno fuisse invasa. Hanc controversiam diremit Sancta Synodus juxta Canonem sextum Concilii Nicæni, nempe, Nicænum Episcopum, servato ei Metropolitanæ honorario titulo, Nicomediensi Episcopo tanquam Metropolitanæ subijci debere. In Actione decima quarta statutum est, *Sabinianum* rectè ordinatum fuisse Perrhenorum Episcopum, & amovendum esse *Athanasium*, quem Perrhenorum Antistitem Dioscorus ordinaverat. In Actione decimâ quintâ Patres Concilii Chalcedonenſis plures Canones, absentibus Legatis Summi Pontificis, condiderunt. Græci Codices habent xxx. Canones, Latini, tantum viginti octo. Ex quibus ultimus, seu vigesimus octavus confirmat Patriarchicæ Privilegia, quæ Concilium primum, Generale Constantinopolitanum anno cccclxxx. celebratum concesserat Episcopo Constantinopolitano, ut scilicet post Episcopum Romanum Primatus honore frueretur, jusque ac potestatem haberet in Thraciæ, Ponti, & Asiæ Dioceses, earumque Metropolitæ, & insuper Episcopos Barbarorum ordinaret.

D. Con-

D. Consenseruntne Legati Summi Pontificis huic Canoni vicesimo octavo, quo post Romanum Pontificem Primatus honoris, & jura Patriarchica adjudicantur Episcopo Constantinopolitano?

M. Immò potius reclamarunt Legati Summi Pontificis in Actione decima sexta, & ultima illius Concilii, quæ Kalendis Novembris habita est. In ea quippè postularunt Legati, ut relegeretur Canon ille de Sede Constantinopolitana se ipsis absentibus conditus. Relectus itaque est hic Canon cum omnium firmè Patrum subscriptionibus, cui palàm intercesserunt Legati; Patres tamen eundem Canonem, non obstante Legatorum reclamatione, suâ auctoritate firmarunt, acclamantes: *Hæc justa sententia. Hæc omnes dicimus.* Verùm, hic Canon vicesimus octavus Concilii Chalcedonensis à S. Leone Papa fuit reprobatus, & ab ipsismet Græcis expunctus è numero Canonum. Cæteros autem ejusdem Concilii Canones approbavit tacito saltem consensu Sanctissimus ille Pontifex, eosque universa recepit Ecclesia.

D. Hæc sunt igitur Concilia, quæ in quinto Ecclesiæ sæculo ad proscribendas Hæreses fuerunt celebrata?

M. Præter hæc Concilia, quæ hætenùs recensuimus, aliæ Synodi contrà errores Origenistarum anno cccci. fuerunt celebratæ, videlicet *Cypria* à Sancto Epiphanio Salaminæ Episcopo, & *Alexandrina*, in qua Theophilus Patriarcha Alexandrinus *Dioscorum, Ammonium, & Euthymum* Ægypti Monachos, qui *Fratres longi* cognominabantur, damnavit, quod nollent subscribere damnationi Origenis. At isti Anachoretæ gravissimis à Theophilo

calamitatibus vexati, & è suis Monasteriis extorres vivere coacti, Constantinopolim anno ccccii. venerunt, & ad pedes Sancti Joannis Chrysostomi hujus Civitatis Episcopi sese abjecerunt, ejus præsidium implorantes: *Joannes* pietate motus, hos Monachos vitæ austeritate confectos, ætate provectos, canitie venerabiles, benignè exceptos fovit hospitio, illos tamen, inconsulto Theophilo, ad communionem Ecclesiasticam admittere noluit. *Arcadius* Imperator de justis querelis horumce Monachorum, & de eorum accusationibus adversus Theophilum per libellum supplicem certior factus, jussit Theophilum, etiam invitum, Constantinopolim adduci. Ea res Theophilum vehementer commovit in Joannem Chrysostomum, eumque per dendum inivit Consilium, quamvis Joannes ipsi per litteras contestatus fuisset, se omni conatu his Anachoretarum accusationibus penitus abstinuisse. Theophilo in hac causa Joannem Chrysostomum criminanti sese adjunxerunt *S. Epiphanius* Salaminæ in Cypro Episcopus, & *S. Hieronymus*, qui ægrè ferebant, quod *Joannes* his Anachoretis faveret, quos Theophilus tanquam Origenistas damnaverat. Quin, & ipse Epiphanius non dubitavit Constantinopolim accedere, & licet à Joanne perhonorificè fuisset exceptus, & omni officio ad pacem invitatus, omnem tamen cum illo communionem abruptit, voluitque in Monachos dictos *Fratres longos*, eisque adhærentes velut Origenis fautores palàm in Ecclesia excommunicationis ferre sententiam, sed, ne id attentaret, à *Serapione* Diacono tempestivè admonitus, proprioque ipsemet deterritus conatu abstinit à cœptis, tacitusque Constantinopoli abscessit.

sceffit in suam reversurus Ecclesiam . Sunt nonnulli, qui scribunt , *Joannem* Epiphanio Constantinopoli proficiscenti prædixisse mortem antequàm Cyprum attingeret; & vicissim *Epiphanium* Joanni Chrysostomo imminens exilium fuisse vaticinatum . Sed istas prædictiones Epiphanii, & Chrysostomi, ut fabulosas, & planè commenticias jure optimo irridet Baronius, quippè quæ non solum sanctis hominibus indignæ prorsus videntur, sed etiam à Socrate in sua Historia Ecclesiastica non referuntur pro veris ac certis .

Postquàm S. Epiphanius Constantinopoli abisset , S. Joannes Chrysostomus Orationem habuit ad Populum , quæ omnium generaliter mulierum vitia carpebat, & *Eudoxia* Augustæ animum in S. Chrysostomum exasperavit . Putans siquidem Eudoxia illam sibi hac Chrysostomi Oratione contumeliam, curavit ut Theophilus Patriarcha Alexandrinus, qui Constantinopolim cum multis Episcopis Ægypti venerat , Synodum in Suburbio Chalcedonis ad *Quercum* anno cccciii. convocaret, cui etiam interfuere quidam Asiæ Episcopi à Chrysostomo justè depositi, & hac de causa ei maximè infensi . Ad istud Conciliabulum citatur Joannes, qui tamen, comparere noluit coram Episcopis, qui spretis æquitatis, & disciplinæ Ecclesiasticæ legibus in ejus exitium toti incumbabant . Nihiloscilicet hæc Pseudo-Synodus Chrysostomum damnavit, eumque *Aradius* Imperator suo decreto exulare jussit . Paruit Chrysostomus, & ineunte nocte solvit è portu navis, quæ Sanctissimum illum Antistitem in exilium deferebat, populo in littore vehementer indolente . Verùm ingenti terræ motu factò, quo concussa est tota Civitas, ac plebe ad seditionem urgen-

te, coactus est *Arcadius* ab exilio quamprimum revocare *Chrysostrum*, qui tam festivis totius populi acclamationibus exceptus est, ut non ab exilio, sed potius ex victoria redire videretur, sed ecce paulò post, novus intonuit turbo, qui conceptam populi lætitiā in acerbū luctum convertit. At enim, cū celebrarentur ludi ad Ecclesiam, ob argentēam *Eudoxiæ Augustæ* statuam, quæ suprà columnam purpuream grāt erecta, *Chrysostrum* ejusmodi ludos magno animi æstu exagitans, celebrem illam habuit orationem, quæ adhuc inter ejus Opera legitur, & cujus initium est: *Rursus Herodias furit &c.* quā oratione, quasi in se dictā, sibi ampliùs temperare haud potuit *Eudoxia*, sed muliebri more irā supra modum excandescens dedit operam, ut altera è vestigio Constantinopoli haberetur Synodus, ad quam vocatus *Theophilus Alexandrinus* consultò adesse noluit, veritus ne factā populi commotione vitam suam in discrimen adduceret. Misit tamen Legatos, qui cum aliis Episcopis in *Joannem Chrysostrum* malè affectis depositionis sententiam, in ipsum à *Theophilo Alexandrino* in Synodo ad *Quercum* jam latam, confirmarunt. Sic *Chrysostrum* à suis adversariis injustè iterum oppressus, in exilium jussu *Arcadii Imperatoris* abductus est, quod illi fuit gravissimum, non solum ob periculum itineris ab *Isauris* latronibus infestati, & ob febres, & dolores stomachi, quibus frequenter torquebatur, sed etiam ob rerum omnium penuriam, quam per triennium, & quatuor circiter menses, usque ad mortem in suo exilio constanter, & infractò pectore passus est. *Innocentius I. Summus Pontifex*, ad quem *Chrysostrum* injustè damnatus

mnatus appellaverat, Romæ Synodum coëgit, in qua Chrysostomum innocentem declaratum suam in communionem recepit, misitque Legatos ad *Honorium*, Occidentis Imperatorem, ut scriberet ad fratrem suum *Arcadium* Orientis Imperatorem, ejusque auxilio Synodus celebraretur Thessalonica, ibique Chrysostomi causa, quæ Orientem, & Occidentem suspensum, distractumque tenebat, in rem Ecclesiæ dijudicaretur. Sed Legati, acceptis Innocentii Papæ, & Honorii Imperatoris litteris Constantinopolim profecti, re infectâ redire coacti sunt. Theophilus siquidem Alexandrinus impedivit, ne hæc Synodus, in qua detectis ejus fraudibus, innocentia Chrysostomi patuisset, celebraretur. Immò, mortuo etiam Chrysostomo sese adeò infensum exhibuit Theophilus, ut omni conatu semper obstiterit, ne ejus nomen in Diptychis inscriberetur. Mortuo Theophilo, Cyrillus ejus nepos, & in eadem Sede Alexandrina successor, rogatus ab Attico Episcopo Constantinopolitano ut Chrysostomi nomen in Ecclesiæ Alexandrinæ tabulis conscriberetur, statim consentire noluit, sed postmodum, re melius perspectâ, *Arsacium*, qui, vivente adhuc Chrysostomo, Episcopus Constantinopolitanus fuerat ordinatus, è Diptychis, Alexandrinis deleri, ejusque loco Chrysostomi nomen subrogari consensit. Tunc per universum Orientem Festus dies Sancto Joanni Chrysostomo sacer publico cultu cœpit celebrari, quæ festivitas majori cultu aucta est, quando sub *Procto* Episcopo Constantinopolitano, anno videlicet ccccxviii. Reliquiæ Sancti Joannis Chrysostomi magnificentissimâ pompâ Constantinopolim advectæ sunt, & ad eas Theo-

dofius junior Imperator Arcadii filius genibus pro-
 volutus veniam suppliciter pro suis parentibus oravit,
 & Sanctissimo Pontifici se suumque commendavit
 Imperium. Sed satis hætenus dictum sit de origine
 & progressu celebris illius controversiæ, quam non
 solum Theophilus Alexandrinus, sed etiam San-
 cti Epiphanius, & Hieronymus habuerunt cum
 Sancto Chrysostomo in causa Origenistarum. Cul-
 pandi tamen non sunt Sancti illi Patres, quia, ut
 optimè observat Baronius ad annum cccc. n. lxxi.
*Sæpè contingit, Sapientissimos quosque falli, eosdem
 tamen à Sapientia, & insita probitate non excidere,
 cum nimirum ad ea, quæ agunt, recto sinceroque men-
 tis feruntur intuitu. Cum igitur de Sanctissimorum Viro-
 rum Epiphanii, Hieronymi (ut de Theophilo dicere præ-
 termittamus) atque Joannis Chrysostomi optima mente
 dubitare religio sit, quæcumque ab eis acta sunt, in melio-
 rem partem accipias necesse est. Hanc sapientissimam in
 factis hominum metiendis Baronii regulam semper
 præ oculis habere debes, ut ea, quæ à SS. Patribus, vel
 à Catholicis Scriptoribus sincerè acta, vel tradita
 sunt, nunquam in sinistrum sensum interpreteris.*

D. De Conciliis, quæ in quinto Ecclesiæ sæcu-
 lo contra Pelagianos, Nestorianos, Eutychianos, &
 Origenistas habita sunt satis hætenus disseruisti.
 Superest nunc ut paucis referas Concilia, quæ eo-
 dem Ecclesiæ sæculo ad sancendam Ecclesiæ Disci-
 plinam fuerunt celebrata.

M. Multa in quinto Ecclesiæ sæculo Concilia
 Nationalia & Provincialia fuerunt coacta ad san-
 ciendam Ecclesiæ Disciplinam, & ad dirimendas
 Controversias, quæ identidem occasione Ecclesia-
 sticæ jurisdictionis oriebantur. In primis, in Con-
 cilio

cilio *Taurinensi*, quod, juxta *Cl. Pagium* indictum est anno cccci. non verò anno cccxcvii. ut autumat *Baronius*, agitata est controversia de Primatu inter *Episcopos Arelatensem, & Viennensem*, decretumque est Canone secundo, ut qui ex duobus illis *Episcopis* probare posset, suam Civitatem esse Metropolim, is totius Provincie honorem Primatus obtineret, & juxta Canonum præceptum, Ordinationum haberet potestatem. Hinc, ut obiter dicam, falsi convincitur quorundam hujus temporis Criticorum opinio, qui origines omnium Ecclesiarum Gallicanarum, præter *Lugdunensem, &* alias paucas, ad medium tertii sæculi detrudunt, affixâ ex *Gregorio Turonensi* *Grati* Consulatu gesto anno ducentesimo quinquagesimo missione Sancti *Trophimi* in Gallias. Enim verò *Episcopus Arelatensis* à Concilio *Taurinensi* juris *Metropolitici Ecclesiastici* honorem sibi conservari non alio nixus, fundamento postulabat, nisi quia ad Urbem *Arelatensem* primo Ecclesie sæculo *S. Trophimus* *Episcopus* missus fuerat. Quæ traditio, si tum temporis certa apud omnes non fuisset, præsertim apud Patres Concilii *Taurinensis* hujus Controversie judices, omni procùl dubio *Episcopus Arelatensis* non solum repulsam tulisset, sed etiam falsam obtrudendo traditionem sese omnibus illis *Episcopis* antiquitatis Ecclesiasticæ haud ignaris deridendum propinasset. Id autem non contigit, quia persuasum habebant Patres Concilii *Taurinensis*, *S. Trophimum* longè antè *Deciana* tempora, annumque Christi ccl. Ecclesiam *Arelatensem* fundasse, ex qua postea, velut ex fonte, ut ait *Zosimus* Papa, universæ Gallie fidei rivulos acceperunt.

Com-

Complures Carthagine in quinto Ecclesiæ sæculo celebratæ sunt Synodi, in quibus ad instaurandam Ecclesiæ Africanæ disciplinam saluberrimi conditi sunt Canones, Sedis Apostolicæ consensu & auctoritate adeò probati, ut partem deindè fecerint veteris Collectionis Canonum, quæ incipit à tertio Carthaginensi Concilio, & alia ex ordine complectitur Concilia, quæ habita sunt sub Aurelio Carthaginensi Episcopo usque ad septimum Carthaginense Concilium, & præterea Synodum Milevitanam sub eodem Aurelio habitam. Legendus est super hac re Illustrissimus *Petrus de Marca* Parisiensis Archiepiscopus cap. 4. Dissertationis de veteribus Collectionibus Canonum, ubi plura perdoctè notat de ordine Conciliorum Africæ in veteri Collectione.

Hic tamen intactam prætermittere haud possum difficultatem circa Appellationes Episcoporum ad Sedem Apostolicam, de quibus actum est in sexta Synodo Carthaginensi, & quas à Patribus illius Synodi omninò prohibitas fuisse, affirmant nonnulli hujus temporis Scriptores. At si perscrutemur originem illius Controversiæ de Appellationibus ad Sedem Apostolicam, apertè liquebit, hanc Synodum non prohibuisse absolutè Appellationem Episcoporum, sed solùm simplicium Presbyterorum, & aliorum inferiorum Clericorum ad Sedem Apostolicam. Huic quippè enatæ Controversiæ de Appellationibus ad Romanam Sedem occasionem in sexto Concilio Carthaginensi dedit *Apiarius* Siccensis Ecclesiæ Presbyter, quem *Urbanus* ejusdem Ecclesiæ Episcopus quorundam criminum convictum Synodali sententiâ curaverat amoveri. Ille verò,

rò, contra Disciplinam Ecclesiæ Africanæ à judicio sui Episcopi ad Zosimum Romanum Pontificem appellaverat, & Zosimus Legatos in Africam destinaverat, ut Apiarii causam retractarent. Quapropter Antistites Africani avitæ suæ Disciplinæ tenacissimi, ne deinceps alii Presbyteri, vel Clerici inferiores Apiarii exemplum sequerentur, prohibuerunt, ne Presbyteri, Diaconi, & cæteri inferiores Clerici à judiciis Episcoporum suorum ad Romanam Sedem provocarent. Quam prohibitionem Appellationum Presbyterorum, & aliorum inferiorum Clericorum ad Sedem Apostolicam paulò antè promulgaverat Synodus Milevitana, cujus Canon vicissimus secundus ita decernit: *Item placuit, ut Presbyteri, Diaconi, vel cæteri inferiores Clerici, in causis quas habuerint, si de judiciis Episcoporum suorum questi fuerint, vicini Episcopi eos audiant, & inter eos quidquid est finiant, adhibiti ab eis ex consensu Episcoporum suorum. Quod si ab eis provocandum putaverint, non provocent nisi ad Africana Concilia, vel ad Præfatos Provinciarum suarum. Ad Transmarinam autem qui putaverit appellandum, à nullo intra Africam in communionem suscipiatur.* Viden, Africanæ Ecclesiæ Antistites non prohibere Episcopis, sed tantum Presbyteris, & aliis Clericis inferioribus transmarinas Appellationes. Fatendum tamen est, juxta Africanæ Ecclesiæ Disciplinam licitum non fuisse Episcopis immediatè, hoc est, antè examen & Judicium Concilii Nationalis, vel plenarii Africani appellare ad Sedem Apostolicam. Verùm appellationes Episcoporum ad Sedem Apostolicam factæ post examen & judicium Concilii Nationalis, vel plenarii Africani nunquam in Ecclesia Africana vetitæ fuerunt.

fuerunt. Denique, si quis obstinatè velit, Africanos Antistites in sexta Synodo Carthagenensi omnino & absolutè prohibuisse appellationes Episcoporum ad Sedem Apostolicam sive antè, sive post examen & iudicium Concilii Nationalis, vel plenarii Africani, huic respondendum est, Antistites Africanos id fecisse errore facti deceptos. At enim cum Zosimus Papa jus appellationum Episcoporum, tanquam à Patribus Concilii Nicæni definitum, suæ Sedi vindicaret, nec tamen de eo iure quidquam Patres Africani stabilitum reperirent sive in Canonibus Nicænis Latinis, quos penès se habebant, nec in Græcis exemplaribus, quæ rogati *Atticus* Constantinopolitanus, & *Cyrillus* Alexandrinus ad illos transmiserant; rogarunt Africani Antistites Zosimum, nisi pleniori factâ perquisitione constaret, hoc ipsum à Nicænis Patribus fuisse decretum, ne Africanas Ecclesias vellet ad hanc observantiam adigere. At statim ac Patres Africani intellexerunt, id juris appellationum Episcoporum ad Sedem Apostolicam decretum fuisse, non quidem in Concilio Nicæno, uti affirmabat Zosimus Papa, sed in Concilio Sardicensi Canone septimo, non amplius reluctati sunt, sed ultrò admiserunt appellationes Episcoporum ad Sedem Apostolicam, ut liquidò constet ex causa *Antonii* Fussalensis Episcopi, qui, teste Sancto Augustino Epist. 161. à Synodo Africana exauctoratus ad Cœlestinum I. Pontificem, non reclamantibus Episcopis Africanis, appellavit. Causa autem cur Zosimus pro Sardicensi Canone Nicænum allegaverit Concilium, hæc est: quia tametsi duo ista Concilia fuerint generalia, parisque auctoritatis, Nicænum tamen notius erat, illiusque quasi Ap-

Appendix dicebatur Concilium Sardicense. Deinde, quia in Collectione Canonum, quibus Romana utebatur Ecclesia, promiscuè permixti erant Canones Nicæni, & Sardicenses sub eadem Nicæni Concilii inscriptione, sicut manifestò apparet in Justellianis, & Quesnellianis Nicænorum Canonum editionibus. Sed hæc breviter dicta sufficiant de transmarinarum appellationum controversiâ, cui in Concilio sexto Carthaginensi occasionem dedit *Apiarius* Presbyter Siccensis, cujus causa in eodem Concilio sic finita fuit, ut ipse in communionem susciperetur, servaretque sui gradus honorem, eâ tamen lege, ut ex Civitate Siccensi, cui scandalo fuerat, secedere cogeretur.

D. Summâ profectò laude ac commendatione digni sunt Africanæ Ecclesiæ Antistites, qui ad sancendam Ecclesiæ Disciplinam tot Concilia convocarunt, sed nunquid alii Orbis Christiani Ecclesiarum Episcopi ad instaurandam Disciplinam, Ecclesiasticam pari zelo, & vigilantia pastoralis adlaborarunt?

M. Episcopi Ecclesiæ Gallicanæ in conservando Disciplinæ Ecclesiasticæ vigore, & in Sanctissimis pro externo Ecclesiæ regimine condendis legibus, Episcopis Africanis in quinto Ecclesiæ sæculo haud inferiores fuerunt. Postquàm enim Ecclesia Africana oppressa incursione Vandalorum, qui Ariani erant, & anno ccccxxviii. in Africa dominari cœperunt, Concilia convocare non potuit; singulari Divinæ Providentiæ beneficio factum est, ut Ecclesia Gallicana in quinto sæculo multa celebravit Concilia, quorum saluberrimis decretis, seu Canonibus, Disciplinæ Ecclesiasticæ optimè fuit consul-

sultum . Hæc Gallicana Concilia breviter indicasse sufficiet, quorum pleniorē notitiā si assequi desideres, adire poteris *Sirmondum*, qui omnia Gallicana Concilia collegit, & perdoctis Annotationibus illustravit .

In primis, anno ccccxxix. die xv. mensis Augusti habitum est in Galliis à duodecim Episcopis Concilium *Regense*, seu *Rejense*, gallicè *Riez*, quæ est Urbs Episcopalis in Provincia sub Archiepiscopo Aquisi, in quo abrogata, & nulla declarata fuit *Armentarii* Ebredunensis Episcopi ordinatio facta à duobus tantum Episcopis, citrà aliorum Provinciarum Episcoporum consensum, ac solum Chorepiscopi titulus *Armentario* concessus est . Octo etiam Canones in rem Ecclesiasticæ Disciplinæ conditi sunt .

Anno ccccxli. in Gallia Narbonensi coactum est à xvii. Episcopis Concilium *Arausicanum*, Gallicè *Orange*, quæ est Urbs in Provincia sub Archiepiscopo Arelateni, in quo statuti sunt Canones xxx. ad Disciplinam Ecclesiam spectantes, & à *Sirmondo*, & ab Illustrissimo *Albaspineo* Aurelianensi Episcopo eruditis Notis illustrati .

Anno ccccxlii. in Comitatu Venaſcino habitum est Concilium *Vasense*, seu *Vasionense*, Gallicè *Vaison*, cujus de Disciplina Ecclesiastica extant Canones x. quos *Sirmondus*, *Binius*, & *Albaspineus* Notis suis illustrarunt .

Deniquè, alia Concilia in Galliis ad refarciendam collapsam Ecclesiæ Disciplinam fuerunt celebrata, *Arelatense* videlicet anno cccclii. cujus extant Canones lvi. *Andegavense*, anno ccccli. cujus extant Canones xii. *Arelatense* alterum an-

na cccclv. *Thronicum* anno cccclxi. in quo editi sunt Canones xlii. *Veneticum* Gallicè *Vannes* in Aremorica, sive Britannia minori anno cccclxv. in quo confecti sunt xvi. Canones. Sed de his Conciliis Gallicanis, sicut & de Canonibus, qui in illis conditi sunt, plura legis apud doctissimum Sirmondum, nos autem, quibus placet brevitatis, huic Colloquio finem imponemus.

COLLOQUIUM V.

De Viris illustribus, qui eruditione & pietate Ecclesiæ in quinto sæculo multum splendoris contulerunt.

D. **E**T si benè multos in quinto Ecclesiæ sæculo floruisse viros doctrinâ, & pietate conspicuos facile admodum colligere possim ex Historia istius sæculi, quam hætenus accuratè descripsisti; optarem tamen ut in hocce Colloquio merita & opera recenseres, si non singulorum, saltem eorum præcipuè, qui in quinto sæculo mirâ eruditione Ecclesiam præ cæteris illustrarunt, eamque ab Hæreticorum insultibus egregiè vindicarunt.

M. Incunte quinto sæculo multum splendoris Ecclesiæ contulerunt innumeri propemodum viri undecumque doctissimi, quibus optimo jure Theologia acceptum referre debet quidquid verum, quidquid habet sublime & augustum. Hi sunt quippè, qui de omnibus Christianæ Religionis mysteriis, admotâ veritatis luce, disseruerunt, qui vocum, ad ea planius explananda, propriam & nativam

vam significationem præfixerunt; qui eorum principia solidè firmarunt; omnes consecutiones, quæ ex illis elici possunt, studiosè investigarunt, & oppositos errores immensis non minùs mole, quàm eruditione voluminibus confutarunt. Hi sunt, qui *Moralis Christianæ integritatem* eâ ingenii ubertate, dicendi copiâ, totque acutissimis sententiis propugnarunt, asseruerunt, vindicarunt, ut eloquentissimorum *Oratorum facundiam* longo intervallo superasse videantur. Verbo dicam, hi sunt, ex quorum eruditissimis lucubrationibus *Ecclesiastici Scriptores* in succedenti sæculorum, serie suam doctrinam, velut ex purissimo fonte, hauserunt, & ab eorum vestigiis ne latum quidem unguem desciscere maximo sibi semper honoris loco duxerunt.

D. Quinam sunt celebriores Scriptores, qui incunte quinto Ecclesiæ sæculo floruerunt?

M. Inter Græcos unus instar omnium est *S. Chrysostomus*. Inter Latinos verò Principem locum jure ac meritò obtinent *S. Hieronymus*, & *S. Augustinus*.

D. Vitam horumce illustrium Scriptorum, qui in omnium gentium commendatione versantur, rogo te ut breviter describas, & Opera ab ipsis edita ab Apocryphis accuratè secernas.

M. Ea, quæ Sanctus Joannes Chrysostomus in Episcopatu gessit, memini me jam in superiori Colloquio attigisse. Quapropter, ne tibi iteratis repetitionibus fastidium ingeram, his in præsentia referendis supersedebam, eaque dumtaxat perstringam, quæ privatam illius vitam spectant, & Opera, quibus universam locupletavit Ecclesiam. *Joan-*
nes

nes itaque, ob aureum eloquentiæ flumen, & admirabilem in dicendo facundiam græcè vulgari cognomine *Chrysostomus* dictus, anno trecentesimo quadragesimo septimo natus est Antiochiæ ex Patre dicto *Secundo*, & ex matre *Anthusa*. Mortuo Patre, Joannem adhuc juvenem *Anthusa* ipsius mater incredibili sollicitudine educavit, & ad perfectam virtutem provexit. Adolescens *Joannes* Rhetoricæ sub *Libanio*, & Philosophiæ sub *Andragathio* viris id ætatis in his artibus longè celeberrimis operam navavit. Aliquot annos in Foro versatus est, sed mox ad severioris vitæ genus, & ad Christianam pietatem conversus, totum sese obsequio Ecclesiæ mancipavit, & Sacrarum Scripturarum studio ad-dixit. Dein, à Meletio Episcopo Antiochæo baptizatus & Lector ordinatus *Joannes*, timens ne Episcopus consecraretur, secessit anno CCCLXXIV. in montes Antiochiæ vicinos, ubi per quadriennium, hoc est, usque annum CCCLXXVII. solitariam vitam duxit, & postea, teste Palladio in ejus vita, per biennium in loco secretiori vitam egit Anachoreticam; at cogentibus ejus infirmitatibus, anno CCCLXXX. ex Eremito ad natale solum reversus, ab Meletio Diaconus fuit ordinatus, & post mortem Meletii à Flaviano ejus in Sede Antiochæna successore ad gradum presbyteri provectus, in quo gradu per annos duodecim ad populum Antiochenum tantâ omnium acclamatione sermones habuit, ut, mortuo *Nectario* Patriarcha Constantinopolitano, conspirantibus totius Cleri, & fidelium votis in ejus locum suffectus fuerit, quamvis ipse pertinacissimâ reniteretur modestiâ, quæ tantum adhibita vi, & Imperiali interpositâ autoritate superari

potuit. Episcopus Constantinopolitanus inauguratus Joannes Chrysostomus multa gessit, & gravissima passus est incommoda conspiratione *Eudoxia* Augustæ, *Theophili* Alexandrini, & aliorum Episcoporum, quæ jam à nobis in superioribus Colloquiis relata, hic repetere omninò supervacaneum esset. Reliquit Joannes Chrysostomus moriens præclara ingenii sui Monumenta, in primis *Homilias* in omnes fermè libros cùm Veteris, tum Novi Testamenti; varios *Sermones* de variis argumentis Moralibus, Doctrinalibus, de Mysteriis, & de Laudibus Sanctorum. Scripsit etiam S. Joannes Chrysostomus librum adversus Judæos; alterum adversus Gentiles; contra vitæ Monasticæ osores & vituperatores libros tres; præterea, edidit libros sex de Sacerdotio; libros duos de Compunctione Cordis; de Providentia Dei libros tres; de Virginitate librum, & aliqua alia Opera Moralia, pluresque Epistolas. *Liturgiam*, quæ extat inter Opera S. Joannis Chrysostomi, germanum esse Sancti illius Doctoris fœtum affirmant peritiores Catholici Critici. Sed paulo major est difficultas de Epistola ad *Casarium* Monachum, quæ S. Joannis Chrysostomi nomine insignita est. Hanc si quidem Epistolam sub nomine S. Chrysostomi laudant S. *Joannes Damascenus* in calce dissertationis contra Jacobitas, *Nicephorus* Constantinopolitanus in Antirrethicis contra Iconomachos, aliique, qui de duabus Christi Domini naturis disputarunt. immò, antiquam ejusdem Epistolæ versionem latinam *Emericus Bigotius* ex Codice Florentino à se descriptam Palladii Dialogo de vita S. Chrysostomi subnexuit, & statim Hæretici Angliz,

gliz, & Bataviz eandem Epistolam tanquam à S. Chrysostomo exaratam multiplici prælo excuderunt, eamque adversus Transubstantiationis dogma Catholicis objecerunt. Non defuerunt quidem pereruditi Orthodoxi Theologi, qui hanc Epistolam ad *Cesarium* Monachum sagacissimis observationibus illustrarunt, quibus Heterodoxorum ora obstruerent, & S. Chrysostomum, quem authorem istius Epistolæ esse autumabant, Transubstantiationis dogmati minimè adversari demonstrarent; at felicius præ cæteris nodum istum dissolvit doctissimus noster Pater *Michael Lequien*, qui postremam & castigatissimam Operum S. Joannis Damasceni Editionem nuper adornavit. Is quippe dissertatione tertia Damascenica multis momentis evincit, hanc Epistolam ad *Cesarium* Monachum non esse exaratam à S. Joanne Chrysostomo, sed à quodam recentiore Scriptore, qui Nestorianæ Hæreseos patronus erat, & post Synodum Chalcedonensem scripsit. Certè constat, neminem Damasceno antiquiorem hanc Epistolam ad *Cesarium* Monachum laudasse, cum tamen expressissima habeat adversus Eutychianos, aliosque unius naturæ in Christo, necnon unius voluntatis & operationis assertores. Hanc, inquam, Epistolam non laudavit Concilium Oecumenicum Chalcedonense, sexta Synodus generalis contra Monothelitas celebrata, non Lateranensis sub Martino I. non *Theodoretus*, non *Leontius* Bizantinus, non *Anastasius* Sinaita, non *Maximus* Confessor, non Nestorii vindices, non cæteri, denique, qui alia S. Chrysostomi non sic diserta protulerunt testimonia. Perperam igitur hæc Epistola ad *Cesarium* Monachum

tribuitur S. Chrysoſtomo , ac proinde injuſtè conqueruntur Hæretici , quod cum aliis ejuſdem Sancti Doctõris genuinis Epiſtolis edita non ſit .

Ad eandem ſuppoſitionum S. Joannis Chryſoſtomi Operum claſſem ablegari quoque debent quatuordecim Homiliæ in Evangelium Marci , & ſex ex Homiliis in Genefim , videlicet Homiliæ prima , ſecunda , & tertia in Caput ſecundum Genefis , & tres aliæ Homiliæ in Caput tertium ejuſdem libri Genefis . Denique , Opus in Matthæum , quod vulgò *imperfectum* dicitur , quia non ad finem aſque Evangelii Matthæi , ſed ad Caput dumtaxat viceſimum quintum productum eſt , S. Chryſoſtomum non habet parentem ; tum quia nec ejus ſtylum , nec doctrinam ſapit ; tum quia etiam plurima continet hæretica dogmata contra Conſubſtantialitatem Filii Dei cum Patre Æterno , contra divinitatem Spiritus Sancti , & adverſus validitatem Baptiſmi ab Hæreticis collati . Sunt tamen quidam eruditi viri , quos inter recensentur *Sixtus Senenſis* , & *Savilius* , qui exiſtimant , hæc hæretica dogmata , quibus reſperſum eſt Opus iſtud *imperfectum* in Matthæum , fuiſſe ab Hæreticis interpolatoribus in illud intruſa , idque probant , primo , quia manuſcripta quædam vetuſtiſſima nihil hujusmodi errorum contineant , ſed aliâ manu prædicti illi errores ad marginem deſcripti ſint . Secundò , quia iis reſecatis & expunctis erroribus , nihil in textu hiulcum & mutilum appareat , ſed plenius fluat oratio ; quod quidem argumento eſt , hæc hæretica dogmata iſti Operi eſſe aſſuta . Verùm , miſſis illis conjecturis , ſtandum eſt communi ſententiæ Theologorum & diſciplinæ Cri-

Critices peritorum asserentium, hoc Opus imperfectum in Matthæum non esse S. Joannis Chrysostomi factum. Plura de Operibus Sancti illius Doctoris legi possunt apud *Labbeum* in dissertatione de *Scriptoribus Ecclesiasticis*, apud Natalem Alexandrum in quarto Ecclesiæ sæculo.

D. Quâ dote S. Chrysostomus inter cæteros alios sui sæculi Scriptores præsertim emicuit?

M. Omnes sui sæculi Scriptores S. Chrysostomus eloquentiâ & perspicuitate superavit. Habet si quidem dictionem nativam, nitidam, puram, splendidam insuper ac fluentem cum admirabili docendi facultate conjunctam, qualis nulli unquam vel Græcorum eloquentissimo contigit. In explicandis Christianæ Religionis dogmatibus sese auribus populi accommodat, & pio quodam juvandi studio ad illius captum dimittit orationis habitum. Præcipuas Christianæ Moralis quæstiones magnâ vi, mirâ eruditione, & appositis exemplis uberrimè tractat. Nihil ejus instructionibus facilius, descriptionibus & narrationibus, quas passim interserit, nihil jucundiùs, atque ad persuadendum nihil efficacius ejus argumentis, quorum claritate, dulcedine & amœnitate Lectorum animos quòcumque vult flectit, movet, rapit & deletat. In exponendis sacris Scripturis sistit potissimum in sensu literali, & consultò abstinet a sensibus Mysticis & Allegoricis, quibus plus æquo indulserant interpretes & verbi divini præcones, qui ipsum præcesserant. In Homiliis, quas habebat ad populum, post genuinam textus Scripturæ sacræ interpretationem, solebat in rem suorum auditorum aliquod morale proponere argumen-

tum, illudque latè explanare. Quam methodum salutis animarum utilissimam in omnibus suis Homiliis observat Sanctus ille Doctor.

D. Satis de S. Joanne Chrysostomo. Paululum nunc differamus de Patribus latinis, & in primis vitam S. Hieronymi, quem omnigenâ eruditione præditum fuisse sæpius audiui, paucis describere, ac varia ejus recensere Opera.

M. Hieronymus anno cccxxxi. sub Consulatu *Bassi*, & *Ablavii*, teste Prospero in Chronico, natus est *Stridone*, sito in Dalmatiæ & Pannoniæ finibus Oppido. Patrem habuit *Eusebium*, à quo primis & teneræ adhuc ætati congruis literis, sanctissimisque moribus imbutus, Romam missus est, ubi sub *Donato* literas Græcas & Latinas, omnesque sæculares didicit disciplinas, ibidemque per sacrum Baptisma Christo in fide renatus est. Inde incredibili discendi studio incensus Galliarum Oras, in quibus florebant viri famâ celeberrimi, lustravit; Romamque reversus, insignem, variisque voluminibus locupletem Bibliothecam sibi paravit, ut per totum vitæ suæ cursum lectioni & orationi incumbere posset. Quocircà suam secum Bibliothecam deferens, velut alter *Bias* sua secum omnia portans in Orientem secessit, & postquàm non nihil temporis Antiochiæ mansisset, in vastam Syriæ solitudinem sese contulit, in qua permansit quadriennio, ibique Hebraicam didicit linguam, sicut ipsemet testatur in Epistola iv. ad *Rusticum*. Dein è sua solitudine, ob gravem ab Arianis incatholicos excitatam persecutionem, exire coactus Antiochiam rediit, ubi tricesimum jam percurrentis ætatis suæ annum à *Paulino* Antiocheno Epi-

Episcopo Presbyter fuit ordinatus. Post brevem Antiochiæ moram, suum in Bethleemitico solo domicilium fixit. Exindè tamen, post auditum aliquandiu Gregorium Nazianzenum Constanti-
nopoly degentem, quem suum præceptorem ap-
pellat, Romam ad *Damasum* Papam accessit, à quo
perbenignè exceptus est, dignusque ab eo judica-
tus, quum ad emergentia fidei, Religionisque du-
bia discutienda adiutorem sibi retineret. Hac sibi
à Sancto Pontifice demandatâ provinciâ Hierony-
mus summa cum laude & Ecclesiæ utilitate perfun-
ctus est. Sed mortuo Damaso, rediit Hieronymus
in Orientem, & transiens per Ægyptum & Antio-
chiam, ad selecta tandem sibi que charissima Bethlee-
mitica loca feliciter appulit. Ad eadem sanctissima
loca celebres fœminæ *Paula*, *Eustochium* & *Melania*,
quas Hieronymus Romæ degens ad sanctioris vitæ
propositum duxerat, è vestigio pietatis ergò con-
volant, totque sive viros, sive mulieres ad idem
austeræ vitæ genus suis exemplis pertraxerunt, ut
Paula tria pro mulieribus Monasteria, & unum pro
viris ibidem extrui curaverit. Tum Hieronymus
votorum suorum compos vitam in Monasterio egit,
corpus suum vigiliis & abstinentiis macerando, &
indefessis studiis, componendisve in sacram Scri-
pturam Commentariis unice intentus. Sic totus
libris affixus tantam sibi rerum divinarum erudi-
tionem comparavit Hieronymus, ut in obscuris
sanctorum voluminum difficultatibus S. Augusti-
nus, Paulinus, Chromatius, Heliodorus, multique
alii passim per Italiam, Galliam, Hispaniam, Afri-
cam, Palæstinam & Græciam eruditissimi Episcopi
ipsum per literas consulerent. Demùm meritis

plenus obiit Hieronymus nonagenarius laboribus & senio confectus anno Christi ccccxx. si plura de vita S. Hieronymi scire desideres, legis vitam Sancti illius Doctoris, quam gallicè descripsit doctissimus Pater *Joannes Martianeus* Monachus Benedictinus Congregationis S. Mauri.

D. Cui potissimum studio sese addixit Hieronymus suo in Bethleemitico solo solitarius hærens?

M. Hieronymus in sua solitudine degens non solum multa edidit Opera Exegetica, quibus Scripturam sacram mirè illustravit, verum etiam Opera scripsit Polemica, quibus Hæreticorum sui temporis errores prostravit, & Catholicam Fidem asseruit ac vindicavit. In primis composuit librum contra *Helvidium*, qui impiè docebat, Beatam Mariam Christum peperisse Virginem, sed postea cum Josepho marito suo congressam alios peperisse filios, suæque virginitatis post partum jacturam fecisse. Præterea, calamum suum acuit Hieronymus in *Jovinianum* Romanæ Urbis Monachum, qui inter alia asserebat, primò, virginitatem non præstare matrimonio. Secundò, eos, qui semel erant baptizati, in peccatum relabi, & acceptam in baptismo justitiam amittere non posse. Tertiò, abstinenciam à quibusdam cibis inutilem prorsus esse prædicabat. Postremò, æqualem in omnibus Sanctis fore Visionem Beatificam affirmabat. Hos Joviniani errores summâ ingenii vi, & eruditione profundâ duobus libris confutavit, ac jugulavit Hieronymus. Scripsit quoque S. ille Doctor librum adversus *Vigilantium* natione Gallum, qui Cleri Cælibatum improbabat, Martyrum Reliquias colen-

lendas esse negabat, ad eorum sepulchra vigilare superstitiosum, & inutile esse agebat, cereos in Ecclesiis accendi, lucente Sole, ridebat, Monachorum in solitudine vitam vituperabat, & alios id genus spargebat errores, quos S. Hieronymus fuse & acriter in hoc libro refellit. Montanistarum errores postea infectatus est in Epistola LIV. ad *Marcellam*. Ad confutandos Luciferianos unum Dialogum composuit. Adversus Pelagianos tres Dialogorum libros edidit. Aliquas literarias concertationes habuit cum S. Augustino, sed vehementius, majorique animi æstu cum *Joanne* Episcopo Hierosolymitano, & cum *Rufino*, occasione librorum Origenis, decertavit.

D. Potuitne Hieronymus in his Polemicis conscribendis Operibus occupatus, alios lucubrare libros?

M. Præter hæc Opera Polemica, quæ mox laudavi, edidit S. Hieronymus multa scripta Critica in libros Scripturæ sacræ, Commentarios in Prophetas, in Evangelium Matthæi, in aliquas Epistolas S. Pauli. Duas insuper sacrorum Bibliorum versiones latinas concinnavit, unam, ad normam textus LXX. Interp. & alteram exactam ad Hebraici textus veritatem, quâ versione tanquam authenticâ & vulgatâ à Concilio Tridentino approbatâ etiamnum utitur Ecclesia latinâ. Antiquam versionem latinam, vulgò *Italicam* appellatam, S. Hieronymus correxit, purgavit, castigavit, græcæque fidei reddidit. Quàm plures Epistolas Exegeticas, sive sacrarum Scripturarum, expositiones, vel quæstionum, dubiorumque resolutorias, & alias de variis argumentis exaravit.

Chro-

Chronicon Eusebii, plures Homilias Origenis, libros *Didymi* de Spiritu Sancto in latinum sermonem convertit. Vitas, seu Historias Sanctorum, Monachorum *Hilarionis*, & *Malchi* descripsit, & Catalogum de Viris illustribus contexuit, multaque alia egregia edidit Opera, quæ quinque tomis comprehensa jam citatus *P. Martianus* novâ & accuratâ Editione publicavit, doctis Præfationibus & Annotationibus illustravit, atque genuina Opera ab Apochryphis accurato Criterio secrevit. Hanc itaque novam Operum S. Hieronymi consule Editionem, sed præcipuè tomum V. ad cujus calcem *P. Martianus* attexit Appendicem omnibus Scripturæ sacræ & librorum S. Hieronymi studiosis curiosissimam.

D. Ex tot Operibus, quæ edidit S. Hieronymus, faciliè coniiicio eum fuisse Virum eruditissimum, & omni doctrinarum genere absolutissimum.

M. Sic est. S. Hieronymus, omnium, qui olim sacras literas interpretati sunt, fuit longè doctissimus. Linguarum exoticarum tantam habuit peritiam, ut Græcam, Hebræam, Syram, Chaldæam & Latinam, perinde ac Dalmaticam vernaculam suam linguam calleret. Politioribus literis erat optimè excultus. In Historia sacra, Ecclesiastica & Prophana apprimè versatus. Nullum Scriptorum genus, quod non delibavit, nulli Historici, nulli Poætæ, nulli Oratores, nulli Philosophi, tam Græci, quàm Latini, quos ipse herculeo & indefatigabili studio nocturnâ non versavit manu, versavitque diurnâ. Ejus inter scribendum stylus purus ac tersus est, & teste Erasmo lib. 5. Epit. 19. cum ipso Cicerone certare videtur. Inter disputandum Hie-

Hieronymus fuit vehementis ac præfervidi ingenii, suosque adversarios, præsertim Hæreticos, acriter exagitavit, & plautino sale defricuit. Denique, Hieronymus in Moralibus austerus, & in Criticis pertractandis quæstionibus accuratissimus fuit.

D. Quis est ille *Rufinus*, qui cum S. Hieronymus, ut modò dicebas, tanto animi æstu disputavit?

M. *Rufinus*, cognomine *Toranius* dictus, Aquilejensis Ecclesiæ Presbyter fuit, qui vitam Monasticam professus Româ cum *Melania* in Orientem profectus est anno ccclxi. & per viginti quinque annos in ædibus *Melaniæ* Hierosolymis permansit variis Operibus in publicum edendis intentus. Sed quòd Origenis admirator esset, eorumque scriptis plus æquò tribueret, hoc primùm cum Hieronymo ipsum collisit. Hæc lis, quæ ante *Rufini* ex Oriente discessionem utcumque composita fuerat, acriùs recrudit postquàm *Rufinus* & *Melania* Romam relicto Oriente pervenerunt anno cccxcvii. at enim *Rufinus* Romæ degens cœpit Origenis Apologiam adornare, suamque versionem libri *Periarchon* Origenis, seu *de Principiis*, Romæ publicavit, cui Præfationem præfixit, in qua Hieronymus obliquè, immò, apertè petebatur. Hanc *Rufini* Præfationem cùm legisset Hieronymus, acutùm Epistolam ad *Pammachium*, & *Oceanum* ordine lxxv. scripsit, in qua factam à *Rufino* Interpretationem libri *Periarchon* Origenis uti perniciosissimam detestatur. Brevem etiam, Epistolam ordine lxxvi. eadem de re ad *Rufinum* misit. Statim ac Hieronymi literæ *Pammachio* traditæ sunt, earum exemplar *Aproniano*, qui *Rufino*

fino additiſſimus erat , tradidit Pammachius Hieronymi , & Rufini communis amicus , easque Apronianus tranſmiſit ad Rufinum , qui totus in furorem actus , duos è veſtigio *Invectivarum* libros , qui inter Opera S. Hieronymi leguntur , ſcripſit , hisque non modo datam ad Pammachium Epistolam Hieronymi confutavit , ſed etiam illius in Scripturam ſacram Commentaria aculeatis cenſuris perſtrinxit . Romã diſcedens Rufinus Aquilejam , petiturus Siricio Papæ illuſit , & à Candido illo Pontifice extorſit Epistolas *formatas* , ſeu Communicatorias vulgò dictas , quæ erant publicæ velut teſſeræ , quibus in longinqua peregrinatione Orthodoxæ fidei profeſſores oſtendebantur . Sed poſt obitum Siricii *Anaſtaſius* illius ſucceſſor damnavit Interpretationem Rufini , qui tamen in gradu Presbyteri in Eccleſia Aquilejenſi perſiſtitit uſque ad annum ccccix. quo anno Italiam vaſtante *Alarico* in Siciliam cum Melania , ejusque familia venit , ibique mortuus eſt anno ccccx.

D. Præter illos duos *Invectivarum* libros , ediditne Rufinus alia Opera ?

M. Vertit è Græco ſermone in latinum Rufinus Opera Joſephi Judæi , Hiſtoriam Eccleſiaſticam Eusebii , recognitiones , quæ S. Clementi Papæ tribuuntur , ſententias Sixti Pythagoræi , ſententias Evagrii Ponti , librum *Periarchon* Origenis , librum primum Apologiæ Pamphili , Orationes S. Gregorii Nazianzenſi , Regulas Aſceticas S. Baſilii , & aliquot alia Opera græca . His verſionibus à ſe adornatis Rufinus addidit Opera , quæ proprio Marte lucubravir , videlicet duos libros , quibus Hiſtoriam Eccleſiaſticam Eusebii Cæſarienſis continua-

vit ,

vit, duos *Invectivarum* contra S. Hieronymum libros, quos jam memoravimus, insuper, suæ doctrinæ Apologiam ad Anastasium Papam, Explicationem Symboli; Expositionem Benedictionum, Patriarchæ Jacob; Commentarios in Prophetas Oseam, Joelem & Amosum. Circumfertur etiam sub Rufini nomine Commentarius in septuaginta quinque priores Davidis Psalmos, sed hunc Commentarium, in quo integræ periodi ex Commentariis S. Augustini in Psalmos, ex libris Moralibus S. Gregorii Magni excerptæ leguntur, Rufino jure optimo abjudicant eruditi Critici.

D. Fuitne Hæreticus Rufinus, qui tam acriter S. Hieronymum exagitavit, & Origenem tanto animi ardore defendit?

M. Quamvis ultrò fatear, Rufinum juxta de causa à S. Hieronymo vapulasse, quod nimio erga Origenem, ejusque scripta amore Censuras Romanæ Ecclesiæ meruerit, Pelagianæ Sectæ fundamenta jecerit, & gravissimorum dissidiorum causa fuerit; cum tamen Hæreticum fuisse non ausim asserere; tum quia Rufinus etsi Origenem defenderit, errores tamen illi adscriptos semper repudiavit; tum quia etiam, ut optimè observat Card. Norisius cap. 3. lib. 1. Hist. Pelagianæ, si Rufinus fuisset Hæreticus, neque S. Paulinus religiosam cum illo coluisset amicitiam, nec *Pinianus*, & utraque *Melania* illum in Siciliam adduxissent, nec ipse Rufinus in suburbano *Pineti* Monasterio juxta urbem, degere potuisset. Quapropter verosimile putat Cardinalis Norisius, Rufinum errorum suspicionem, quâ apud Anastasium Papam laboraverat, postea coram Innocentio I. Summo Pontifice à se pro-

procul amolitur fuisse. Quin, doctissimus idem Cardinalis profert libellum, quo errores partim à se assertos, partim sibi, ut questus est, imputatos Rufinus condemnavit. Gelasius quidem Papa Rufinum damnavit post mortem, quod de libertate Arbitrii contraria Hieronymo sensisset, sed, sicut advertit Clarissimus *Pagius* ad annum Christi ccccx. hoc Gelasii Papæ decretum non pertinet ad personam, sed ad libros Rufini. Quâ ratione damnati sæpè sunt, nullo sanctitatis præjudicio, viri moribus probatissimi. Ut ut est, non audeo Hærescos dicam scribere Rufino, cui, ut nemo diffiteri potest, multum debet Ecclesia Latina, quod præcipuorum Authorum Græcorum notitiam, præsertim Historiæ Ecclesiasticæ ei gratificatus sit.

D. Veniamus modò ad S. Augustinum, qui tanquàm Doctorum Aquila, & omnium Ecclesiæ Latinæ Patrum maximus vulgò audire solet.

M. *Aurelius Augustinus* Tagaste, Numidiæ urbe in Africa natus est Idibus Novembris anno cccliv. non vero ann. ccclv. ut putat Baronius. Patrem habuit *Patricium*, & matrem *S. Monicam*, quorum curâ & diligentiam liberalibus disciplinis ita imbutus est Augustinus, ut adolescens factus Grammaticam prius Tagaste, & Rhetoricam postea Carthagine summâ cum laude docuerit. Manichæorum Carthagine degens seductus erroribus, ac voluptatum inescatus illecebris Romam venit, clam matre, ut Rhetoricam doceret. Inde à Symmacho urbis Præfeto Mediolanum ad eandem artem edocendam missus est, ubi pia mater *Monica* de illius salute multum sollicita, cum eum fuisset assecuta, nihil non egit ut eum Cælo pareret, &
à Ma-

à Manichæorum retraheret erroribus. S. Ambrosius Mediolanensis Episcopus conversionem Augustini inchoavit, eamque multum promovit *Simplicianus* Presbyter eruditus, qui postea in locum S. Ambrosii in Sede Mediolanensi successus est. Ab hoc Simpliciano Presbytero didicit Augustinus *Victorini* magni cujusdam Oratoris conversionem, item duorum Aulicorum, quorum exemplis incitatus Augustinus, & cœlesti voce monitus ut legeret Epistolas S. Pauli, sic repente his perlectis immutatus est, ut mundo nuncium remittens totum sese Deo dederit. Magnum sane victricis gratiæ, quæ tarda molimina nescit, & quam ipse contra Pelagianos pro aris ac focis defendere debebat, monumentum! anno trecentesimo octogesimo septimo Augustinus, cum annum ætatis suæ tricesimum tertium necdum complevisset juxta communem eruditorum sententiam baptizatus est die vicesimâ quartâ Aprilis Sabbato Sancto. Post obitum matris suæ Monicæ ad Ostia Tiberina, melioris vitæ desiderio accensus Augustinus ad proprios lares rediit, & sub finem anni cccxxxviii. Africam appulit. Meditationi Legis Dei, jejuniis & orationibus cum per triennium Tagaste unâ cum suis amicis vacasset Augustinus, Hipponem se transtulit, ubi urgente Ecclesiæ necessitate, & flagitante populo, à *Valerio* tum Hipponensium Episcopo Presbyter est ordinatus anno cccxci. & paucis ab hinc annis, hoc est, anno cccxcv. Augustinus, ne ab aliis raperetur Ecclesiis, vivente adhuc Valerio, consecratus est Episcopus Hipponensis à *Megalio* Calamensi Primate Numidiæ cum aliquot Episcopis Catholicis, assentiente Primatæ

totius Africæ Episcopo Carthaginensi. Quamvis autem hæc Augustini Ordinatio esset contra Canones Concilii Nicæni, nihilofecius omnium calculo probata est, quoniam hæc dederat Ecclesiæ Augustinum. Hac novâ dignitate auctus, sive populum docendo, sive Hæreticos Manichæos, Donatistas, Arianos, Priscillianistas, Pelagianos & Semipelagianos confutando, & sanctissimæ vitæ suæ exemplis, ubique gentium claruit Augustinus, & postquam per quadraginta annos Episcopatum Hipponensem gessisset, tertio mense, quo urbs Hipponensis à Vandalis obsidebatur, gravi febre correptus anno ætatis suæ septuagesimo sexto intra paucos dies finem vivendi fecit anno ccccxxx. ut scribit *Possidius* in ejus vita. Omnia Sancti Augustini Opera sedulo studio Patrum Benedictinorum Congregationis Sancti Mauri ad MSS. Codices, & antiquiores Editiones castigata, variè illustrata, & in præclarum ordinem digesta ac disposita fuerunt.

D. Pergratum mihi faceres, si omnia S. Augustini Opera juxta seriem seu ordinem, quo in postrema Patrum Benedictinorum Congregationis S. Mauri Editione disposita sunt, velles impræsentiarum recensere, & ab Apocryphis discernere.

M. Recens editio Operum S. Augustini à doctissimis Monachis Benedictinis adornata decem complectitur Tomos, quorum seriem, & librorum, qui in ipsis continentur, ordinem tuis oculis, majoris claritatis ergo, subiiciam.

TOMUS PRIMUS

Ea continet Opera, quæ S. Augustinus juvenis & nondum Presbyter ordinatus contexuit, præmissis *Retractionum*, & *Confessionum* S. Augustini libris, qui præviæ cujusdam Præfationis locum tenere possunt. Isto autem ordine Opera S. Augustini in primo Tomo disposita sunt.

Retractionum libri duo.

Confessionum libri tredecim.

Contra Academicos libri tres.

De beata Vita liber unus.

De Ordine, seu de Providentia libri duo.

Soliloquiorum libri duo.

De Immortalitate Animæ liber unus.

De quantitate Animæ liber unus.

De Musica libri sex.

De Magistro ad formam Dialogi inter se & filium suum Adeodatum liber unus.

De libero Arbitrio libri tres.

De moribus Ecclesiæ Catholicæ, & de moribus Manichæorum libri duo.

De vera Religione liber unus.

Regula ad Servos Dei.

Supposititia Opera S. Augustini ad Appendicem
Tomæ primi rejecta, sunt ista:

De Grammatica liber.

Principia Dialecticæ.

Categoricæ decem.

Tom. II.

K

Prin-

Principia Rhetoricæ .

Regulæ Clericis data fragmentum .

Regula secunda .

De Vita Eremitica ad sororem .

TOMUS SECUNDUS

Complectitur Epistolas S. Augustini numero cclxx. quæ ordine Chronologico juxta temporis, quo scriptæ sunt, rationem, disponuntur. Ex his Sancti Augustini Epistolis hauriri possunt certissimæ regulæ circa Dogmata Fidei, Disciplinam Ecclesiæ, & Ethicam Christianam, necnon saluberrima præcepta ad bene beatèque vivendum.

Supposititia Opera S. Augustini ad Appendicem Tomi secundi rejecta, sunt ista :

Ad Bonifacium, & è contra Epistola breviores xvi.
Epistola ad Demetriadem, quæ Pelagio adjudicatur.
Ad Cyrillum, & è contra de laudibus Hieronymi.
Altercatio cum Pascentio.

TOMUS TERTIUS

In duas partes divisus est, & omnes libros, quos S. Augustinus in sacram Scripturam lucubravit, quique antehac in variis Tomis erant dispersi, atque dissipati, in unum collectos exhibet.

PRIMA PARS TOMI TERTII.

In hac prima parte tomi tertii Operum S. Augustini extant libri quatuor de Doctrina Christiana.

De

De Genesi ad literam liber imperfectus .

De Genesi ad literam libri duodecim .

Locutionum libri octo .

Questionum in Heptateuchum libri septem .

Annotationum in Job liber unus .

Speculum .

Supposititia S. Augustini Opera ad Appendicem
hujus primæ partis rejecta , sunt ista :

De mirabilibus Scripturæ sacre libri tres .

De Benedictionibus Patriarchæ Jacob .

Questiones Veteris & Novi Testamenti .

In Apocalypsin Joannis expositio .

PARS SECUNDA TOMI TERTII.

In hac secunda parte continentur libri quatuor de
consensu Evangelistarum .

De sermone in monte Domini libri duo .

Questionum Evangelicarum libri duo .

Questionum XVII. in Matthæum liber unus .

Tractatus in Joannem CXXIV. .

In Epistolam Joannis Tractatus decem .

*Expositio quarundam propositionum ex Epistola ad
Romanos .*

Ex Epistola ad Romanos inchoata expositio .

Expositionis Epistolæ ad Galatas liber unus .

TOMUS QUARTUS

Comprehendit narrationes in Psalmos , in quibus
S. Augustinus de variis differit argumentis , & varios
sensus Mysticos & Morales Psalmorum explanat .

TOMUS QUINTUS

Exhibet Sermones cccxiv. S. Augustini ad populum,
& ad ejusdem Tomi Appendicem reiciuntur Ser-
mones cccxvii. qui falso tribuuntur S. Augustino.

TOMUS SEXTUS

Continet Opera Moralia S. Augustini isto ordine
disposita

- Ex diversis questionibus LXXXIII. liber unus.*
Ex diversis questionibus ad Simplicianum libri duo.
De octo Dulcitii questionibus liber unus.
De Fide & Symbolo liber unus.
De Fide & Operibus liber unus.
*Enchiridion ad Laurentium, seu de Fide, Spe & Cha-
ritate liber unus.*
De Agone Christiano liber unus.
De Catechizandis rudibus liber unus.
De Continentia liber unus.
De bono Conjugali liber unus.
De sancta Virginitate liber unus.
De bono Viduitatis ad Julianum.
De Conjugiis Adulterinis ad Pollentium libri duo.
De Mendacio liber unus.
Contra Mendacium ad Consentium liber unus.
De Opere Monachorum liber unus.
De Divinatione Dæmonum liber unus.
De cura gerenda pro mortuis ad Paulinum liber unus.
De Patientia liber unus.
De Symbolo ad Cathecumenos.

De

De Symbolo alii tres libri, qui tamen doctissimis Patribus Benedictinis Augustini Ingenium, eruditionem, & stylum præferre non videntur.

Sermo de Disciplina Christiana.

De Cantico novo ad Catechumenos.

Sermones de quarta Feria.

Sermones de Catachlysmo, & de tempore Barbarico, qui tamen iisdem eruditissimis editoribus dubii vel potius spurii videntur.

Sermo de utilitate jejunii.

Sermo de Urbis Excidio.

In Appendice hujus Tomi sexti doctissimi Patres Benedictini reposuerunt Opera Moralia supposititia, quæ S. Augustinum Parentem non agnoscunt.

T O M U S S E P T I M U S

Continet excellentissimum Opus Sancti Augustini in viginti duos libros divisum *De Civitate Dei*. Decem primos istius insignis Operis libros conscripsit S. Augustinus adversus falsorum Deorum Cultores, qui dictebant, ideò Romam fuisse captam, & ferro flammâque à Gothis vastatam, quòd abolitus fuisset suorum Numinum Cultus, & invecata esset Christiana Religio. In aliis duodecim ejusdem Operis libris textit S. Augustinus Historiam ortus, progressus, & finis duarum Civitatum, scilicet *Dei & Mundi*. Hoc S. Augustini Opus jucundum, ac perspicuum est, tamque rerum tum divinarum, cum Prophanarum affluentiam redundans, tantâque ingenii eruditione elaboratum, ut omnium lectorum sibi admirationem conciliet.

TOMUS OCTAVUS

Exhibet libros Polemicos, seu quos S. Augustinus scripsit contra Hæreticos, exceptis tamen iis Operibus, quæ Sanctus ille Doctor edidit contra Donatistas, & Pelagianos. Hæc autem Opera S. Augustini Polemica isto ordine disponuntur.

Liber de Hæresibus ad quod vult Deum, cum Appendice de Hæresi Nestoriana, Eutychiana & Timotheana.

Tractatus contra Judæos.

Tractatus de utilitate credendi.

Liber unus de duabus Animabus.

Acta, seu disputatio, quam habuit S. Augustinus contra Fortunatum Manichæum.

Liber unus contra Adimantum Manichæum.

Contra Epistolam Fundamenti liber unus.

Contra Faustum Manichæum disputationes, seu libri xxiii.

De Actis, seu de Disputatione, quam habuit S. Augustinus cum Felice Manichæo libri duo.

De natura boni adversus Manichæos liber unus.

Contra Epistolam Secundini Manichæi liber unus.

Contra Adversarium Legis & Prophetarum libri duo.

Contra Priscillianistas, & Origenistas liber unus.

Contra Sermonem Arianorum liber unus.

Collatio cum Maximino Arianorum Episcopo.

Contra eundem Maximinum libri tres.

De Trinitate libri xv.

In Appendice hujus Tomi octavi inseruerunt Patres Benedictini multa supposititia Opera Polemica, quæ perperam tribuuntur S. Augustino.

TO-

TOMUS NONUS

Complectitur Opera , quæ S. Augustinus lucubra-
vit contra Hæreticos Donatistas , istoque ordine
disponuntur .

Psalmus contra Donatistas .

Contra Epistolam Parmeniani libri tres .

De Baptismo contra Donatistas libri septem :

Contra litteras Petiliani libri tres .

*Ad Catholicos Epistola contra Donatistas , vulgò de
unitate Ecclesiæ liber unus .*

*Contra Cresconium Grammaticum partis Donati libri
quatuor .*

*De unico Baptismo contra Petilianum ad Constantium
liber unus .*

Breviculus Collationum contra Donatistas libri tres .

*Ad Donatistas post Collationem Carthaginensem liber
unus .*

*Sermo ad Casarensis Ecclesiæ plebem Emerito præsentem
habitus .*

Sermo super gestis cum Emerito Donatista liber unus .

Contra Gaudentium Donatistam libri duo .

In Appendice hujus Tomi noni extant quædam
Opera contra Donatistas , quæ sunt supposititia ,
& S. Augustinum Parentem non agnoscunt .

TOMUS DECIMUS

Comprehendit omnes libros , quos S. Augustinus
edidit contra Pelagianos , & Semipelagianos , in
quibus Peccati Originalis ad omnes omninò Ada-

mi posteros propagationem, & gratiæ victricis, seu seipsâ efficacis ad omnes & singulos pietatis actus necessitatem invictis argumentis demonstrat. Hoc autem ordine disponuntur.

De meritis, & remissione peccatorum, & de parvulorum Baptismo ad Marcellinum libri tres.

De spiritu & litera ad Marcellinum liber unus.

De Natura & Gratia ad Timasium & Jacobum contra Pelagium liber unus.

Ad Episcopos Utropium, & Paulum Epistola, seu liber de Perfectione justitiæ hominis.

De Gestis Pelagii ad Aurelium Episcopum liber unus.

De Gratia Christi, & de peccato Originali libri duo.

Epistola ad Valerium Comitem.

De Nuptiis & Concupiscentia ad Valerium Comitem, libri duo.

De Anima & ejus origine libri quatuor.

Epistola ad Claudium Episcopum.

Contra duas Epistolas Pelagianorum ad Bonifacium Papam libri quatuor.

Contra Julianum libri sex.

De Gratia & libero Arbitrio ad Valentinum, & Monachos Aduemetinos liber unus.

De Correctione & Gratia ad eosdem liber unus.

De Prædestinatione Sanctorum ad Prosperum, & Hilarium liber unus.

De Dono Perseuerantiæ ad eosdem liber unus.

Alterius Operis, quod est imperfectum, contra Julianum libri sex.

Hæc sunt Opera decem Tomis comprehensa, quæ edidit S. Augustinus, & quæ doctissimi Patres Mo-

nachi Benedictini à spuriiis & supposititiis iudicio Critico , magnâ curâ & diligentia à supposititiis seceverunt solidis firmisque adductis rationibus , quas ex MSS. Codicum , & antiquarum Editionum autoritate , ex S. Augustini stylo , ex illius doctrina , dicendi formulis S. Augustino propriis , ex personarum , temporum , locorumque circumstantiis deprompserunt . • In rem etiam & utilitatem eorum , qui Operum Sancti Augustini sunt studiosi , iidem Patres Benedictini unicuique libro , vel Tractatui Sancti Augustini præmiserunt argumentum , admonitionem , vel censuram , quâ illius libri , vel Tractatus rationem candidè reddunt , & vel genuinum , vel spurium esse ostendunt , subiectis ad imam cuiusvis paginæ partem Notis , quibus breviter vel variantes lectiones adnotant , vel loca difficiliora illustrant . Quapropter , convenit apud omnes viros eruditos , hanc postremam Operum Sancti Augustini Editionem à PP. Monachis Benedictinis Reipublicæ Ecclesiasticæ bono natis adornatam , omnium , quæ hætenùs prodierunt , optimam atque castigatissimam esse .

D. Quam auctoritatem & æstimationem in Ecclesia Latina habuerunt doctrina & Opera Sancti Augustini .

M. Maximam auctoritatem , & summam omnium fidelium venerationem semper in Ecclesia Latina obtinuit doctrina S. Augustini . Eam siquidem egregiis encomiis commendarunt multi Pontifices Romani , Concilia in suis condendis Canonibus ac decretis ipsissima S. Augustini verba adhibuerunt , Patres Latini ex libris Sancti illius Doctoris non solum hauserunt principia , quibus passim usi sunt ,

sed

sed etiam frequenter S. Augustinum ferè transcripserunt. *Petrus Lombardus* Parisiensis Episcopus, qui sæculo duodecimo Theologiam universam in Epitomen cogere voluit, nihil ferè egit, quàm S. Augustini locos & sententias excerptare. *S. Thomas* omnium Theologorum facilè princeps à doctrina S. Augustini, quàm in purum putumque, uti dici solet, succum converterat, ne latum quidem unguem in suis Operibus descendit, unde jure ac meritò *Augustinus contractus* appellatur. Denique, præcipuè totius Orbis Academix, & Scholæ nobilissimæ Sancto Augustino assurgere, ejusque doctrinæ fasces submittere gloriantur. Fuerunt quidem nonnulli tenebriones, & ignobiles Scriptores, qui Sanctum Augustinum aliquot errorum insimulare, ejusque doctrinam pro viribus arrodere tentarunt, sed eorum calumnias retuderunt non solum Sancti Hilarius, Prosper, Fulgentius & Remigius, sed etiam peritissimi hujus temporis Theologi, Cardinalis Norisus in suis *Vindiciis Augustinianis*, & doctissimus noster *Hyacinthus Serry* Doctor Sorbonicus in libro, cui titulus est: *Augustinus vindicatus*. Quid plura? Clemens XI. Pontifex Maximus die 28. Januarii anni mdcclv. publicavit decretum, quo proscripsit, & natalitiis tenebris damnavit quemdam malè confarcinatum libellum, qui sub nomine *Joannis Launoii* Doctoris Sorbonici circumferebatur, in quo doctrina S. Augustini de *Gratia & Prædestinatione*, quam semper Ecclesia adoptavit, atrocibus calumniis impetebatur.

D. Sanctorum Patrum Chrysostomi, Hieronymi & Augustini vitam & Opera satis hætenus expendimus, superest nunc ut pauca dicas de aliis Scri-

Scriptoribus Ecclesiasticis, qui in quinto Ecclesiæ sæculo floruerunt.

M. In exordio quinti Ecclesiæ sæculi floruit *Evagrius* Ponticus, qui multa Opera scripsit, quorum tum fragmenta, tum citationes habentur in Codice Regularum, in Patrum Vitis & Apophtegmatibus, in Catenis, in Thesauro Ascetico, in Scholiis ad Climachum, necnon apud Palladium, Socratem, Dorotheum, itemque in Damasceno Billii, & in Palladio Bigotiano. Scripsit *Evagrius* librum unum *de octo visitationibus* editum ab *Emérico* Bigotio ad calcem Vitz S. Chrysostomi à Palladio compositæ. Item, Sermonem dogmaticum *de sancta Trinitate* ad eos qui Monasticam vitam degunt in patria, quem *Josephus Maria Suares* Episcopus Vasionensis cum *Niliacis* publici juris fecit. Præterea, Clarissimus *Cotelerius* tomo 3. Monumentorum Ecclesiæ Græcæ in lucem emisit Epistolam *Evagrii* ad Anatolium; insuper, librum *Præticum*, & aliud Opusculum, cui titulus: *Evagrii Monachi rerum Monachalium rationes, earumque juxta quietem appositio*. Quibus in libris multa utilissima ad mores probe informandos habentur documenta.

Sub initium ejusdem quinti Ecclesiæ sæculi illustres fuerunt *Aurelius Prudentius* famosus Poëta, *Antiochus* Episcopus Ptolomaidis in Phœnicia, *Severianus* Episcopus Gabalæ in Syria, *Asterius* Amasæ in Ponto Episcopus, qui eloquentissimos ad populum Sermones habuerunt. *Cotelerius* in tomo 3. Monumentorum Ecclesiæ Græcæ publicavit, & latino idiomate donavit aliqua Opuscula *Asterii* Amasensis Episcopi. Supersunt adhuc ali-

qui

qui Sermones *Gaudentii* Brixienſis Epifcopi , & aliquot Epiftołæ Paſchales & Canonice Theophili Patriarchæ Alexandrini , ſed Tractatus , quem edidit ille Alexandrinus Patriarcha contra Antropomorphitas , omninò periit. *Chromatii* Epifcopi Aquilejenſis toto in Occidente celeberrimi Opera , excepto unico Sermone, nobis fata inviderunt. *Theodorus* Mopſueſtenus Epifcopus plures in Scripturam ſacram Commentarios , & multa Opera Polemica contra Hæreticos ſcripſit , ſed poſteà ingenio plus juſtò indulgens , & antiquiores ſemitas ſtudiendi in abſurdiſſimos errores lapſus, Magiſter Hæreſeon evaſit , & Pelagianorum , ac Neſtorianorum erroribus præluſit . Undè ejus Opera in quinta Synodo generali , ob errores, quibus ſcatebant , proſcripta penitus interciderunt . Multum Eccleſiæ nocuit *Theodorus* Mopſueſtenus , ſed plus ei obfuit mortuus , quàm vivens . Quamdiù enim ſuperſtes fuit, unus tantùm infectis ſuis libris erroribus Eccleſiæ non modicam perniciem intulit , at mortuus mille doctiſſimorum Scriptorum dexteris pro ipſius nomine defendendo armavit , & Synodos Synodis objecit , ut fuſè oſtendit Cardinalis Noriſius in *Diſſertatione de quinta Synodo Generali* . *Palladius* Origeniſta , Ruſini amicus , & Epifcopus Heliopolitanus anno quadringenteſimo vicesimo Hiftoriam ſuam dictam *Laufiacam* de Vita , Miraculis & Geſtis Monachorum Orientis ſcripſit . Exiſtimarunt nonnulli , Vitam S. Chryſoſtomi ab iſto *Palladio* Epifcopo Heliopolitano non fuiſſe deſcriptam , ſed ab altero *Palladio* Scotorum Epifcopo . Verùm perdoctus *Pagiſ* ad annum Chriſti ccccxxix. rectè poſt *Uſſerium* obſervat , quidpiam literarum monu-

men-

mentis à Palladio Scotorum Episcopo traditum, fuisse, nihil esse quod fidem faciat. Auctorem itaque Vitæ S. Chrysostomi in formam Dialogi esse Palladium Episcopum Heliopolitanum in dubium revocari non potest. *Sulpicius Severus* Presbyter, S. Martini Turonensis Episcopi discipulus, Gallias, unde oriundus erat, plurimum illustravit. Fallitur porro Baronius, dum ad annum cccxciv. num. xcvi. ait, Sulpicium fuisse Romanum Civem, eumque in Galliis degisse. Constat enim ex ipsomet Sulpicio Dialogo l. cap. 20. & ex Gennadio in lib. de Scriptoribus Ecclesiasticis, eum fuisse domo *Aquitanum*, & quidem è *Nitiobrigibus*, cum lib. 2. suæ Historiæ *Phebadium Agenni* Episcopum, suum Episcopum vocet Sulpicius. Agennum autem in *Nitiobrigibus* situm esse in confesso est apud omnes. Cum Paulino Episcopo Nolano summâ fuit Sulpicius necessitudine conjunctus, ut liquet ex Paulini ad illum Epistolis, quæ inter ejus Opera leguntur. Præter hunc Sulpicium Severum Aginensem Presbyterum, fuerunt alii duo *Sulpicii Severi* Biturigum Episcopi, cum quibus proinde confundi minime debet iste Sulpicius, qui, ut mox diximus, fuit dumtaxat Presbyter Aginensis, & cujus nomen, quod Martyrologio Romano erat inscriptum, postea ab his, qui illud Martyrologium sub Urbano VIII. recognoverunt ac correxerunt, expunctum est. Opera Sulpicii Severi sunt ista: *Duo libri de Historia sacra*, quam à mundi cunis exorsus, perduxit usque ad *Stiliconis*, & *Aureliani* Consulatum, hoc est, ad Christi annum quadringentesimum. *Liber unus de Vita S. Martini Turonensis Episcopi*. *Epistola tres*. Una videlicet ad *Eusebium* Presbyterum

rum, *contra amulos virtutum B. Martini*; Altera; ad *Aurelium Diaconum*, de obitu & apparitione *B. Martini*; Tertia, ad *Bassulam*, socrum suam, *Quomodo B. Martinus ex hac vita ad immortalem transierit*. Denique, *Sulpicius Severus* scripsit tres Dialogos, in quibus *Millenariorum* errorem necdum ab Ecclesia damnatum sequitur. Ejus Opera stylo eleganti, terfo, polito, facili & claro elaborata *Carolus Sigonius*, & *Joannes Vorstius* Notis illustrarunt. *Orosius* *Tarracone* in *Hispania* ortus, vir fuit in divinis Scripturis eruditus, in secularibus literis peritissimus, & rerum Christianarum Historicus nobilissimus. Consilio & suasu *S. Augustini* septem Historiarum libros composuit, quibus manifestò ostendit, ab orbe condito ad suam usque ætatem maximas semper atque atrocissimas calamitates contigisse, ac subindè falsas esse calumnias *Paganorum* adherentium, urbis *Romæ* direptionem ab *Alarico* Rege factam, & alias elades *Romano Imperio* illatas, ex neglectu *Deorum* cultus & ex Religionis Christianæ propagatione originem habuisse. Ad *S. Hieronymum* anno *cccxcv.* missus est *Orosius* à *S. Augustino*, ut cum de Animarum origine consuleret. Scripsit etiam *Orosius* Apologiam contra *Pelagium* de libertate Arbitrii.

In Ecclesia Græca sub initium quinti Ecclesiæ sæculi floruit *Synesius* patriâ *Cyrenensis*, Philosophus Platonicus insignis, qui, ubi primum se à *Ptolomo* aidentibus ad Episcopale munus electum intellexit, rei novitate perculsus, prolixam *Evoptio* fratri suo scripsit Epistolam, causasque aperuit, ob quas oblatum Episcopale munus nequaquam sibi recipiendum putaret; quæ Epistola est *lv.* inter

ter ejus Epistolas. Primam causam deducit ab uxore sua, quam nullo pacto deferere volebat. Altera causa erat, quod Platonica Philosophia præceptis imbutus, à præcipuis fidei Christianæ capitibus dissentiret. Scilicet Animam præexistere, nec corpori jam formato immitti se sentire ajebat. Præterea, de æternitate mundi, quem aliquando interitum crederet, neutiquam adduci poterat. Denique, Mortuorum resurrectionem inficiabatur. Multi post Baronium censent, has causas, seu rationes à *Synesio* non verè, sed fictè & simulatè fuisse adductas, ut portentosis illis contestationibus Baptismum, & Episcopale munus sibi oblatum deprecaretur, adeoque mirum non esse, si *Theophilus* Patriarcha Alexandrinus fictas illas rationes flocci faciens *Synesium* non solum per Baptismi lavacrum ad fidelium numerum, sed etiam per manuum impositionem ad Ecclesiæ regimen admiserit. Alii tamen doctissimi viri post *Holstenium* in Dissertatione de *Synesio* & fuga Episcopatus, quam eruditus *Valesius* ad calcem Notarum suarum in *Evagrium* integram attexuit, affirmant, *Synesium* in his afferendis & inculcandis causis seu rationibus, seriò & ex animo fuisse locutum. Excusant nihilominus *Theophilum* Alexandrinum quod *Synesium* adhuc Semipaganum ad baptismum & ad Ecclesiæ regimen admiserit, quia, inquiunt, *Theophilus* Alexandrinus probè perspectum habebat animum *Synesi* ad Christianam Religionem propensissimum. experimento etiam didicerat, quàm facilè veritati cederet, & quàm nullo negotio semel baptizatus & Episcopus inauguratus ad exactam Christianæ veritatis cognitionem traduceretur. Nec spes fel-

fellit Theophilum ; nam Synesius semel Christianus factus, pristinos errores ē vestigio abdicavit, cūque esset perdoctus Philosophus, & facundissimus Orator, egregiis suis Operibus, & Epistolis summā rei Ecclesiasticæ eruditione refertis plurimū, Ecclesiæ profuit, eique maximum contulit splendorem.

Inter Monachos quinti Ecclesiæ seculi, quatuor præcipuè recensentur, qui illustres Scriptores fuerunt. Nimirū, *S. Isidorus Pelusiota*, *S. Nilus*, *Cassianus* & *Vincentius Lerinensis*, de quorum Operibus pauca hic subnectere non abs re erit. *S. Isidorus* vulgò dictus *Pelusiota*, eo quod Monasterii *Pelusi*, quæ urbs est Ægypti inferioris post Alexandriam primaria, Presbyter & Abbas fuerit, Angelicam in carne vitam degit, & multa scripsit variaz & multiplicis eruditionis plena. Duo millia Epistolarum ad ædificationem Ecclesiæ ab eo scripta fuisse, testatur *Facundus* lib. 2. *defensionis trium Capitulorum*; sed *Suidas* ter mille Epistolas ab eo exaratas tradit. Nunc tamen extant tantū bis mille centum ac tredecim Isidori Epistolæ, quæ succinctæ sunt, & oppidò elegantes, in quibus plurima, eaque difficilia Scripturæ sacræ loca enodantur, præcipua Christianæ Religionis mysteria in optimo lumine collocantur, utiles ac curiosæ in Disciplinam Ecclesiasticam observationes inferuntur, & ad instituendam vitam Asceticam sanctissima præcepta & moralia documenta traduntur. *S. Nilus* discipulus *S. Chrysostomi*, ex Præfecto Constantinopolitano Monachus factus doctrinā & pietate claruit. Ejus Epistolas *Leo Allatius* Romæ edidit anno 1668. eisq; editis subjecit accuratam & eru-

& eruditam *Diatribam de Niliis*, & eorum scriptis. Composuit etiam S. Nilus multa Opuscula Ascetica, quæ *Josephus Maria Suares* Episcopus Vasio-
nensis publicâ luce donavit. Monasticæ vitæ cul-
tor pariter fuit *Joannes Cassianus*, quem natione,
nec Romanum, nec Scytham, sed Gallo Provin-
cialem fuisse multis argumentis evincit Card. No-
risius lib. 2. Hist. Pelag. cap. 1. à Clero Constanti-
nopolitano anno cccciii. missus est Cassianus unâ
cum Germano Presbytero ad Innocentium I. Sum-
mum Pontificem, ut eum certiolem faceret de
injustis persecutionibus, quibus tûm temporis exa-
gitabatur S. Chrysostomus, & de tyrannide, quam
patiebatur Constantinopolitana Ecclesia. Hac per-
functus legatione Cassianus in Occidente hæsit, &
Massiliæ suas Sedes fixit, ibique duo fundavit Mo-
nasteria, unum pro viris, alterum pro mulieribus,
quibus ut normam benè vivendi præscriberet,
xii. libros de *Institutis Cœnobiorum* edidit, quos
Castori Episcopo Aptensi nuncupavit. Septem etiam
libros de *Incarnatione Verbi Divini* adversus Nesto-
rium scripsit, & *Collationes* viginti quatuor, qua-
rum decima tertia tota referta est erroribus Semi-
pelagianorum, & ob id à S. Prospero egregiè con-
futatus. Cassiano adjungi meritò debet *Vincentius*
Lerinensis, quippè qui in *Commonitorio*, quod edi-
dit adversus prophanas omnium Hæreticorum no-
vitates, Semipelagianorum factioni impensè patro-
cinatur, & S. Augustini doctrinam, seu novam,
textè & per cuniculos oppugnat. Hinc Card. No-
risius lib. 2. Hist. Pelag. cap. 11. multis momentis
demonstrat, Vincentium Lerinensem auctorem
Commonitorii non esse diversum ab illo *Vincentio*

Semipelagiano, quem S. Prosper refellit ad Capitula objectionum *Vincentianarum*, quæ maxima ex parte cum Gallorum objectionibus, altero libro à S. Prospero dilutis, coincidunt.

D. Quis est ille Prosper, qui Cassianum, & Vincentium Lerinensem confutavit?

M. S. Prosper, qui Cassianum, Vincentium Lerinensem, & alios Semipelagianos impugnavit, fuit simplex Laicus ex Aquitania oriundus, acerrimus doctrinæ S. Augustini propugnator, in scribendo accuratus sive solutâ, sive ligatâ oratione scriberet, & cum eximia vitæ sanctimonia divinarum & humanarum rerum eruditione pollens. Genuina Opera, quæ S. Prosper contra Semipelagianos scripsit, sunt ista: *Epistola de Gratia & libero Arbitrio ad Rufinum*, in qua capitale Pelagianorum dogma refellit, quo asseriebant, *Gratiam Dei secundum hominis merita dari*. Liber *de Gratia Dei contra Collatorem*, seu Cassianum Collationum auctorem. Liber unus *Epigrammatum* ex sententiis S. Augustini. *Carmen de Ingratis* adversus Pelagianos. *Expositio* in Psalmum centesimum, & in quinquaginta alios sequentes. *Epistola ad Augustinum*, in qua Sancti illius Doctoris contra Semipelagianos implorat auxilium. *Chronicon*, quod tempore Baronii desinebat anno Christi ccccxlv. sed *Andreas Duchesnius* tom. 1. Historicorum Franciæ, addidit huic Prosperi Chronico alios decem annos, qui in quibusdam MSS. legebantur, ita ut S. Prosper Chronicon suum perduxerit usque ad annum cccclv. seu usque ad captam à *Genferico* Vandalorum Regem Urbem Romanam.

Opera dubia S. Prosperi sunt hæc: *Epistola*
ad

ad *Demetriadem*. *Capitula de Gratia & libero voluntatis arbitrio*. Duo libri de *Vocatione Gentium*; quæ Opera *Quesnellus* attribuit S. Leoni Papæ. Probabilius tamen doctissimus *Antelmius* hæc Opera Sancto Prospero Aquitano vindicat in dissertatione de Operibus Sanctorum Leonis M. & Prosperi. Opera spuria S. Prosperi sunt ista: *Libri tres de prædicationibus & promissionibus Dei*. *Libri tres de Vita Contemplativa*; quos à *Juliano Pomerio* editos fuisse censent periti Critici. *Poema de Providentia Dei*, quod quemdam Pelagianum agnoscit authorem.

D. Præter Joannem Cassianum, & Vincen-
tium Lerinensem, fueruntne alii in quinto Ecclesiæ
sæculo viri eruditi, qui Semipelagianorum parti-
bus adhæserint?

M. Fuerunt alii tres famâ celebres, qui in
quinto Ecclesiæ sæculo à Semipelagianorum parti-
bus steterunt, videlicet *Faustus* Rejensis Episcopus,
Gennadius Presbyter Massiliensis, & *Hilarius* Are-
latensis Præsul. *Faustus* primùm Monasterii Leri-
nensis Abbas, dein Episcopus Rejensis factus Epi-
stolam ad quemdam *Lucidum* Presbyterum scripsit,
& duos libros de Gratia & libero Arbitrio, in qui-
bus, sub specioso obtentu refellendi quorundam
prædestinationum errores, doctrinam S. Augu-
stini de Gratia & Prædestinatione datâ Operâ im-
pugnat. Quâ de causâ anno DXX. *Hormisdas* Papa à
Possessore, uno ex his Episcopis Africanis à *Trafi-*
mundo Rege in exilium missis, consultus quid de
Fausti libris sentiendum esset? Respondit, libros
Fausti non recipi in Ecclesia Catholica, sed legen-
da esse postrema volumina S. Augustini, è quibus,
velut è purissimis fontibus, doctrina Catholica de

libero arbitrio & gratia Dei esset haurienda. Im-
 meritò igitur *Sirmondus* in sua *Historia Prædestina-*
tiana prolixam concinnavit Apologiam pro *Fausto*,
 cujus libri fuerunt etiam damnati à *Gelasio Papa*,
 anno cccxciv. *Gennadius*, non Episcopus, ut qui-
 dam putant, sed Presbyter tantum Massiliensis,
 texuit Catalogum Illustrium Scriptorum, qui eum
 præcesserant. Edidit etiam librum *de Ecclesiasticis*
Dogmatibus, qui olim falsò tribuebatur *S. Augusti-*
no. Subjunxit quoque *Gennadius* tamquam Apen-
 dices ad librum *S. Augustini de Hæresibus*, quatuor
 Hæreses, nempe *Prædestinatianam*, *Nestorianam*,
Eutychianam & *Timotheanam*, ut docet *Hincmarus*
Remensis Episcopus in lib. *de Prædestinatione cap. i.*
 Denique, *S. Hilarius Episcopus Arelatenfis*, qui,
 ut in superioribus Colloquiis jam observavimus,
 gravem cum *S. Leone Papa* contentionem habuit,
 Semipelagianorum doctrinæ adhæsit, quam tamen
 propediem moriturus penitus abdicavit, ut colligit
Quesnellus ex ejus Vita in Notis ad Opera *S. Leonis*
 tomo II. pag. 913. *S. Hilarium Arelatensem*
 Episcopum, eum esse, qui ad *S. Augustinum* Epi-
 stolam contra Semipelagianos scripsit, autumavit
Baronius. At in hoc hallucinatum fuisse Eminen-
 tissimum illum Annalium Parentem fatentur omnes
 periti Critici, tum quia, ut mox dixi, *S. Hilarius*
Arelatensis Episcopus Semipelagianorum doctrinæ
 adstipulatus est, ac subindè abhorret ab omni veri
 specie, quod ad *S. Augustinum* contra Semipela-
 gianos scripserit; tum quia etiam *Hilarius* ille, qui
 adversus Semipelagianos dedit ad *S. Augustinum*
 Epistolam, se tantum ex ordine Laicorum fuisse in
 fine suæ Epistolæ quodam modo indicat, quando
 pro-

profitetur, se parem non esse auctoritati Adversariorum, idest, Semipelagianorum, à quibus multum & vitæ meritis & summo Sacerdotii honore superetur. Appellat etiam S. Augustinum *Patrem*, à quo vicissim in lib. de *Prædeterminatione Sanctorum* cap. 1. *filius* nuncupatur. Hilarium autem non appellasset S. Augustinus *filium*, si Hilarius, qui ad ipsum contra Semipelagianos scripsit, fuisset revera Episcopus. Hic velim obiter observes, S. *Honoratum*, qui postea fuit Episcopus Arelatensis, fundasse in quinto Ecclesiæ sæculo Monasterium Lerinense, in quo ejus tempore, præter *Vincentium Lerinensem*, *Eustum* & *Hilarium*, de quibus mox sermonem habuimus, floruerunt *Maximus*, *Lupus*, *Eucherius*, qui fuit Episcopus Lugdunensis, & *Opèrum de solitudine, & contemptu mundi* Scriptor egregius. Idem Cœnobium Lerinense illustrarunt alii celeberrimi Monachi, qui deindè ad Episcopales Insulas in diversis Galliarum Ecclesiis assumpti sunt. Extat etiam nunc Lerinense Monasterium ædificatum in Lerina Insula, quæ Provinciæ adjacet adversus Antipolim.

D. Hi sunt igitur præcipui Scriptores, qui in quinto Ecclesiæ sæculo floruerunt?

M. Fuerunt alii insignes Scriptores, quos hic breviter indicasse sufficiet. S. Leo Papa I. re & cognomine Magnus Ecclesiæ multum splendoris contulit eruditione, pietate, eloquentiâ, multisque editis lucubrationibus, quas *Queshnellus* cum variis MSS. contulit, ejus Epistolas ordine Chronologico digessit, varias, quæ nunquam lucem viderant, è tenebris eruit, ac quotquot aliorum Epistolæ ad S. Leonem datæ sunt, ejusdem literis inseruit.

ruit. Quædam tamen Opera, ut mox observavimus, *Quesnellus* attribuit S. Leoni, quæ alii periti Critici probabilius S. Prospero adjudicant. *S. Cyrillus* Alexandrinus Antistes, de quo plura in præcedentibus Colloquiis diximus, rebus pro Ecclesia gestis præsertim contra Nestorii Hæresim in quinto sæculo insurgentem, Scriptorumque multitudine, & splendore clarissimus fuit. *Socrates*, & *Sozomenus* suos de Historia Ecclesiastica libros eodem tempore scripserunt, seu potius Historiam Ecclesiasticam *Eusebii* continuarunt usque ad annum cccxxxix. *Theodoretus* Cyri in Palæstina Episcopus, præter Historiam Ecclesiasticam, quam adornavit, & anno ccccxxix. terminavit, edidit etiam Tractatus & eruditos Commentarios in Scripturam sacram. *S. Chrysologus* Episcopus Ravennæ in Sermonibus, seu Homiliis ad populum habendis magnum sibi nomen peperit. Quo in genere etiam excelluerunt *Maximus* Taurinensis Episcopus, *Valerianus* Cimmelenensis Præsul, & *Basilius* Episcopus Seleucienfis. Contra Pelagianos, & Nestorianos *Marius Mercator* multa edidit Opera, quæ anno mdcclxxiii. *Joannes Garnerius* Soc. Jesu publici juris fecit, addiditque Annotationes & Dissertationes amplissimas, quæ Marii Mercatoris scriptis magnam lucem afferunt. Alteram, sed accuratiorẽ eorundem Marii Mercatoris Operum Editionem ex Collatione Codicis Bellovacensis cum Vaticano, in quibus solis antiqui hujusce Scriptoris Opera habentur, concinnavit doctissimus *Baluzius*. Denique, in quinto Ecclesiæ sæculo floruerunt *Salvianus* Presbyter Massiliensis auctor elegantissimi Tractatus de Providentia, & quatuor librorum de Eleemosyna: Arnobius ju-

junior auctor Commentarii in Psalmos: *Claudius Mammertus*, *Sidonius Apollinaris* Episcopus *Claramontanus* insignis Poëta, *Gelasius Cyzicenus* Historiæ Concilii Nicæni compilator: *Victor Vitenſis* Episcopus, qui tres libros de *Vandalica persecutione* scripsit. Sunt multi periti Critici, qui asserunt, libros de *Divinis Nominibus*, de *Cælesti*, & de *Ecclesiastica Hierarchia*, qui *S. Dionysii Arcopagite* nomine insiguntur, sub finem tantum quinti Ecclesiæ sæculi ab incerto Scriptore editos fuisse, eosque dumtaxat anno DXXXIII. in Collatione Constantinopolitana ab Acephalis, seu *Severianis Hæreticis* adversus Orthodoxos primum sub *S. Dionysii Arcopagite* nomine fuisse citatos. Sed de celebrioribus quinti sæculi Scriptoribus, eorumque Operibus hæc pauca prælibasse, ac levi brachio attigisse sufficiat.

COLLOQUIUM VI

*De Doctrina, Disciplina, & Morali
quinti Ecclesiæ sæculi.*

D. CUM sub finem Historiæ cujuslibet Ecclesiæ sæculi aliquod specimen illius Doctrinæ, Disciplinæ & Moralis exhibere soleas, de his in præsentia edoceri cupio, ut nihil eorum, quæ ad noticiam Historiæ, Doctrinæ, Disciplinæ & Moralis quinti Ecclesiæ sæculi attinent, intactum prætermittamus. Expone primò igitur quænam fuerit Doctrina quinti Ecclesiæ sæculi?

M. Doctrina Ecclesiæ à Christo Domino , & ab Apostolis tradita cum omnino invariabilis sit , nec ullâ , ut sæpè diximus , temporum vicissitudine violari , aut immutari possit ; certum apud omnes esse debet , eandem prorsus in quinto Ecclesiæ sæculo obtinuisse doctrinam , quæ in quarto , & in tribus aliis præcedentibus sæculis jugiter viguit . Quia tamen in quinto sæculo , ut in secundo Colloquio in Historiam hujusce sæculi dicebamus , multæ grassatæ sunt Hæreses , Pelagianorum videlicet , Semipelagianorum , Nestorianorum , Eutychianorum , Helvidii , Joviniani & Vigilantii , necesse fuit ut doctrina fidei ab illis Hæreticis impetita , clariùs & uberius à Conciliis , & à Sanctis Patribus explicaretur , novæque consecrarentur fidei formulæ , quibus serpentes errores faciliùs à fidelibus præcaveri possent :

In primis , statutum est contra Pelagium , Peccatum Originale ab Adamo in omnes illius posteros propagari , nec quemquam ; nisi Christi gratiâ posse salvari . Secundò , Baptismum ad salutem consequendam parvulis esse omnino necessarium . Tertio , neminem esse bonum suis viribus , nisi participatione ejus , qui solus bonus est . Quarto , quod nisi gratiâ Dei continuo juvemur , insidias , seu tentationes Diaboli superare haud possumus . Quintò , quod per Christum Servatorem nostrum benè utamur libero arbitrio . Sextò , quod omnia Sanctorum merita sint dona Dei . Septimò , quod omnis sancta cogitatio , & motus piæ voluntatis ex Deo sit . Octavò , quod gratia Dei non solum peccata dimittat , sed etiam adjuvet ne committantur , & præstet , ut lex impleatur , non sicut agebat

bat Pelagius *facile*, quasi absque gratia Dei difficilius posset impleri. Denique, quod nemo potest mereri gratiam. His Ecclesiæ definitionibus jugulata est Pelagiana Hæresis.

Ventum est postea ad errorem Semipelagianorum; qui licet Peccatum Originale ab Adamo ad omnes illius posteros transfusum fuisse ultrò fa-
terentur, prævenientis tamen gratiæ interioris necessitatem ad initium fidei & bonorum operum non admittebant, & perseverantiam finalem in bono singulare Dei donum esse negabant. Contra illos igitur Sancti Patres unanimi consensu docuerunt gratiam prævenientem necessariam esse ad omnes & singulos pietatis actus, etiam ad initium fidei & bonorum operum, insuper & perseverantiam usque in finem esse speciale & magnum Dei donum. In hoc contra Pelagianos, & Semipelagianos custodiendo gratiæ Christi deposito, Ecclesiæ imprimis charo, strenuè præ cæteris Patribus per viginti & amplius annos adlaboravit S. Augustinus, & omnia, quæ ad medicinale Christi gratiam spectant, tam dilucidè explanavit, tam nervosè stabilivit, ut Concilia, quæ post ipsius obitum celebrata fuerunt, sua de quæstionibus judicia, & potissimum de gratia Canones ex Sancti Doctoris sententiis ad verbum formanda senserint. Unde Cardinalis Bellarminus lib. 2. de Gratia cap. 11, veridicè pronunciavit; S. Augustini de Gratia & Prædestinatione sententias, non esse privatas alicujus Doctoris opiniones, sed *fidem Catholicæ Ecclesiæ dici debere*. Mirum igitur esse non debet, si Theologi prædestinationis gratuitæ, & gratiæ se ipsâ efficacis defensores S. Augustinum Theologiæ prin-

principem , Catholici orbis Magistrum , Hæreticorum malleum tantoperè veneratione , ejusque inconcussæ , tutissimæque doctrinæ indivulsè adhaereant . Extiterunt quidem proh dolor ! non nulli æmuli , qui totis viribus , incredibili conatu , vehementique studio laborarunt , ut doctrinam S. Augustini vellicarent , & invenirent , sicut vulgò dici solet , pilum in ovo , nodum in scirpo , scopulos in plano , atomos in Sole , maculas in Cœlo , sed ut in superiori Colloquio dicebamus , Cardinalis *Norisius* grassantem hanc maledicentiam luem , vindictis pro Divo Augustino adornatis , velut cauterii unctione cohibuit , & tanti Magistri doctrinam eò clariorem effecit , quò obscuriorem illam reddere , eique erroris notam inurere ignorantia & malignitas satagebant .

Circà Verbi divini Incarnationis mysterium confirmata ac magis explicata fuit in quinto Ecclesiæ sæculo contra Nestorianos , & Eutychianos constans ac perpetua fidei Catholicæ doctrinæ , quæ semper , ubique , & ab omnibus creditum est , unicam in Christo esse personam , seu divinam , & duabus constantem naturis divinâ & humanâ , quarum proprietates per communicationem idiomaticum , ut loquuntur Theologi de Schola , personæ divinæ tribuuntur , ita ut non solum veræ sint istæ propositiones : *Jesus Christus est immortalis & impassibilis* : *Jesus Christus est natus , mortuus , & passus* : sed etiam verè & Catholicè dici debeat : quod *Dens est natus* ; quod *Maria Virgo est mater Dei* : quod *Dens passus , & Cruci suffixus est* . Proprietates tamen naturæ humanæ nullo pacto tribui possunt naturæ divinæ , nec versâ vice proprietates di-

divinæ naturæ adscribi queunt naturæ humanæ .
Inde Hæreticæ sunt istæ propositiones *Deitas, est nata, passa &c.* vel è contrà: *Humanitas Christi est immortalis, aterna, impassibilis &c.*

D. Audivi nuperrimè à quibusdam viris eruditis, hanc propositionem: *Unus de Sancta Trinitate passus est*, erroris damnatam fuisse in Monachis Scythiæ ab *Hormisda* Summo Pontifice. Vera igitur esse non potest hæc propositio: *Deus passus est*.

M. Hanc propositionem: *Unus de Trinitate passus est*, nunquam, pace tuâ dixerim, damnavit *Hormisdas* Papa, sed tantum improbavit Scytharum Monachorum temeritatem ac pervicaciam, quæ prædictam propositionem definitioni Concilii Chalcedonenfis necessariò addendam esse infectè pertendebant; quasi illius Concilii definitio absque isto loquendi modo manca & mutila esset. Cæterum, hanc propositionem: *Unus de Trinitate passus est*, quæ eundem planè sensum habet ac ista propositio: *Filius Dei passus est in Carne*, recepit & approbavit universa Ecclesia, ut patet ex quinta Synodo generali Can. 4. & 5. & ex Joanne II. Romano Pontifice in Epistola ad *Justinianum* Imperatorem, in qua eum laudat, quod fidem hac propositione expressam teneat, & *Acametas* Monachos contrà sentientes condemnat. Sed de hac propositione: *Unus de Trinitate passus est*, plura, auxiliante Deo, dicemus in nostris Colloquiis in sextum Ecclesiæ sæculum, ubi ostendemus, Monachos Scythas Eurychiana Hæresi non fuisse infectos, eosque in sensu Catholico asseruisse, *num de Sancta Trinitate esse passum*.

D. Pos-

D. Possumus ne probare adversus Hæreticos nostri temporis, ea fidei dogmata, quæ nunc tenet Sancta Mater Ecclesia Catholica, & quæ ab ipsis reprobantur, fuisse in quinto sæculo à fidelibus recepta, atque Conciliorum, & Sanctorum Patrum consensione firmata?

M. Proclive esset demonstrare, Christianos quinti Ecclesiæ sæculi firmâ fide omnia illa credidisse dogmata, quæ nunc Sancta Romana Ecclesia avitæ traditionis pervigil custos tenet, & Catholicis credenda proponit. Verum; quia doctissimi viri *Bellarminus*, *Perronius*, *Coeffetaus*, *Walemburgenses*, alique egregiè hac Provinciâ contrâ Hæreticos nostri temporis jam defuncti sunt; duo dumtaxat hic obiter observabo, quæ ad stabiliendam Catholicæ Fidei veritatem plurimum conducere possunt. Primò, constat, *Socinianos* hujus ætatis Hæreticos, qui Peccatum Originale ab Adamo in omnes illius posteros propagatum esse præfractè negant, fuisse in Pelagio à Sanctis Patribus, & à Conciliis in quinto sæculo habitis prædamnatos. Nam statim ac falsum istud dogma, quo Pelagius Peccatum Originale, & illius ad omnes Adami posteros transfusionem negabat; apertam in lucem erupit, Ecclesiastici Doctores, & Episcopi illud palàm impugnarunt; Ecclesia execrata est, anathemate confixit, & Pelagianos ubique damnavit. Secundo, Hæretici Lutherani, & Calvinistæ, qui Sacrarum Reliquiarum venerationem, cultum, qui Sanctis deferatur, eorumque invocationem negant, qui etiam Cœlibatum, Virginitatem, Monasticum Ordinem canepius & angue averfantur, velint nolint; fateri coguntur, hæc falsa dogmata, quæ ipsi tam acriter con-

contrà Ecclesiam Romanam propugnant, fuisse à Patribus quinti Ecclesiæ sæculi in *Vigilantio* Hæretico proscripta, & ab omnibus fidelibus rejecta. Inane autem est, & oppidò falsum, quod dicunt moderni illi Hæretici, videlicet hujus doctrinæ de Peccato Originali, de Veneratione Reliquiarum, de Cultu Sanctorum &c. nullam in tribus prioribus Ecclesiæ sæculis extare vestigium, eamque dumtaxat fuisse inventam à Doctoribus & Episcopis quarti vel quinti Ecclesiæ sæculi. Id, inquam, tam falsum est, quàm quod maxime. Nam, præterquam quod Patres quinti Ecclesiæ sæculi ad confutandos istos Pelagii, & Vigilantii errores, quos nostri temporis Hæretici postliminiò revocaverunt, usi sunt Scripturâ Sacrà, & Sanctorum Patrum traditione à temporibus Apostolorum ad suam usque ætatem constanter firmatâ; incredibile omninò est, Christianos omnes, Doctores Ecclesiasticos, Monachos, & Episcopos, quos quintum Ecclesiæ sæculum plurimos, eosque doctrinâ & pietate præstantissimos protulit, nescivisse quænam fuisset priorum Ecclesiæ sæculorum fides? novam & peregrinam induxisse doctrinam, Scripturam Sacram alio sensu intellexisse, vel eos scientes ac volentes à fide majorum suorum descivisse, nemine interim reclamante, immò, cunctis vel consentientibus, & applaudentibus, vel profundo lethargo somno oppressis, & adversus Novatores nequidem mutire audentibus. Id porrò abhorret ab omni veri specie, & injuriam irrogat Christo Servatori nostro, qui promisit, Spiritum Sanctum nunquam defuturum Ecclesiæ. Cum igitur errores, quos Sociniani, Lutherani, & Calvinistæ tanto ardore propugnant, fuerint jam in Pelagio, & in
Vigi-

Vigilantio damnati in quinto sæculo, jure optimo Ecclesia Romana hæcce vividas Tertulliani lib. de præscript. Hæreticorum cap. 37. interrogationes in istos, & in alios hujus furfuris Hæreticos intorquere potest: *Qui estis vos? quando, & undè venistis? quid in meo agitis non mei? quo denique Marcion (Sociniane, Lutherane, Calvinista) jure sylvam meam cadis? qua licentia fontes meos transvertis? qua potestate limites meos commoves? mea est possessio, quid hic cæteri ad vestram voluntatem seminatis, & pascitis? mea est possessio, olim possideo, prior possideo, habeo origines firmas ab ipsis authoribus, quorum fuit res. Ego sum Hæres Apostolorum, sicut caverunt testamento suo, sicut fidei commiserunt, sicut adjuraverunt, ita teneo. Vos certè exheredaverunt semper, & abdicaverunt ut extraneos & inimicos.*

D. Doctrina Patrum quinti Ecclesiæ sæculi, præsertim Hieronymi, Augustini, & Chrysostomi, est ne ita ab omni nævo immunis, ut nullus illis Patribus inter scribendum obrepserit error, à quo cavere debeamus.

M. Plurimos in libris Sanctorum Patrum Hieronymi, Augustini, & Chrysostomi nævos, erroresque notat, & carpit in suo libro *de vero Patrum Usu* Dallæus Pseudo-Minister Calvinista tetricus sanè homo, & superciliosus Censor Sanctorum Patrum, quorum mensuras sensuum, pondera locutionum, nervos quæstionum, & ferè verborum, ac syllabarum apices insidiosè excussit, & ventilavit; magnum lucrum reputans si Ecclesiæ Catholicæ luminibus nævorum inaculas, & errorum caliginem affingere posset. Qua in re *Dallæus* secutus est Pseudo-Magistrum suum *Calvinum*, qui apud Regem Gal-

Galliæ *Franciscum* I. ut Lutheranorum impudentiam excusaret, Catholicorum innocentiam traduxit. Cum enim Lutheranis verissimè ac gravissimè objiceretur, quod Patrum essent contemptores, & adversarii: multa, ait Calvinus, *ignorant Sancti illi viri sæpe inter se conflitantur, interdum etiam secum ipsi pugnant.* Tum deinceps, quotquot Patrum errores colligere potuit, falso etiam illis affictos, enumerat, quæritque, *cur nos item à Patribus discedamus?* Sed Calvino Catholici Doctores responderunt Primò, nos in iis, quæ ad ipsa fidei pertinent fundamenta, à Patribus non discedere, sed tantum in iis, in quibus Patres salvâ fidei compage non consonant. Responderunt secundò, nonnullos quidem naves reperiri in Operibus Sanctorum Patrum, qui tamen leviores sunt, quàm ut illorum auctoritatem elevare vel labefactare possint. Catholici igitur reverentè ac modestè oculos ab illis Patrum navis avertunt, tantum abest ut imitentur Hæreticos, qui Sanctos Patres aut irridendos, aut certè despiciendos propinant, quique, ut eleganter ait Vincentius Lerinensis, *Sancti cujusque viri memoriam, tamquam sepultos jam cineres, prophana manu ventilant, & qua silentio operire oportebat, redivisa opinione diffamant; sequentes omnino vestigia auctoris sui Cham, qui nuditatem venerandi Noe non modò operire neglexit, verum quoque irridendam cæteris enunciavit.* Longè aliter fratres illi sui, qui nuditatem ipsam reverenter Patris sui nec temerare oculis, nec alienis patere voluerunt, sed aversi, ut scribitur, *texerunt eum.* Quod est erratum Sancti viri nec approbasse, nec prodidisse. Sed nunc breviter examinemus, an reverà in Operibus Sanctorum Patrum Augusti-

ni,

ni, Hieronymi, & Chrysostomi reperiantur navi seu errores, qui in rebus fidei eorum auctoritatem deprimere possint, sicut allatrat *Dalleus*. In primis, Sanctus Augustinus videtur quidem in eam propendere sententiam, quæ animas ex traduce, seu per propagationem produci tenebat. At in hoc non, erravit Augustinus, quia tum temporis nec error, nec hæresis erat id asserere, sed in varias hac de re sententias, salvâ & inculpatâ fide, abibant Catholici, & integrum unicuique erat in suo sensu abundare. Secundò, Sanctus Augustinus Dæmonibus tribuit corpora. Sed eidem opinioni multi antiqui Patres citrà ullum fidei dispendium suffragati sunt. Immò non desunt etiamnum multi gravissimi Theologi, qui docent, omnimodam Angelorum incorporeitatem esse quidem sanæ Theologiæ dogma, à quo nemo absque temeritate in præsentia recedere potest, ab Ecclesia tamen necdùm esse definitum ut fidei dogma. Tertiò, *Antipodas* existere negavit Augustinus, sed in hac quæstione meri facti, cujus nullum in libris sive sacris, sive prophanis extat vestigium, & cujus certa notitia, dumtaxat ex navigationibus, ac relationibus postremis hisce temporibus haberi cœpit, errasse Augustinum, quid mirum? Denique, Sancto Augustino crimini datur, quod doceat, Infantes absque Baptismo decedentes non solum pœnâ damni, seu privatione visionis beatificæ, sed etiam pœnâ sensus, seu æterno ignis tormento puniri. Verùm, tantùm abest, ut hæc sententia erroris insinulari debeat, ut potiùs Cardinalis *Norisius* in suis *Vindictis Augustinianis* omni argumentorum genere evinceat, hanc opinionem, traditioni Patrum, & definitionibus Conciliorum esse

esse magis consentaneam, solidioribus fultam rationibus, & ad doctrinam de Peccato Originali contra Pelagianorum errorem propugnandam magis appositam. Consule itaque doctissimum illum Cardinalem, qui datâ operâ Sanctum Augustinum vindicavit ab omnibus nævis, & erroribus, quos non solum Hæretici, sed etiam invidi obrectatores suis privatorum commodorum præjudiciis occæcati falsò ei impegerunt, misero tamen & irritò successu.

Quantum attinet ad Opera Sancti Hieronymi, qui, teste Sancto Augustino lib. 1. Contra Julianum cap. 7. *Ab Oriente usque in Occidentem ad instar lampadis resplenduit*, nihil planè in his occurrit, quod censurâ aliquâ perstringi possit, sicut P. *Martianæus* Congregationis Sancti Mauri Benedictinus, alique doctissimi viri apertè demonstrant contra *Dallaum* Calvinianæ superstitionis Ministrum. Propugnavit quidem Hieronymus, legalia Sacramenta, Mosai- cæque Legis ritus mortiferos esse cœpisse statim à Passione Christi Domini, & Apostolos simulatione quadam cœremonias illas legales observasse, adeò- que Sanctum Petrum sincerè & ex animo non fuisse reprehensum à Sancto Paulo. Sed hanc sententiam postea abjecit Sanctus ille Doctor, cessitque tandem rationibus Sancti Augustini, qui cum hac de re li- terariam concertationem habuit Hieronymus, de cujus doctrina plura non dicam, maximè cum jam citatus P. *Martianæus* in sua nova Operum S. Hieronymi Editione Sanctissimum illam Doctorem, vindicet ab illis erroribus, quos ipsi temerè impe- git *Dallæus* perfrixtæ frontis audaciâ asserens, San- ctum Hieronymum Origenis de damnatorum pur-

gatione & salute delirium secutum. Secundò, impropèrat huic Sancto Doctòri, quod secundas nuptias rebus turpibus & fœdis accenseat, & Digamos eodem loco habeat quo Scortatores. Tertiò, affirmat, S. Hieronymum favisse Aëriano dogmati, quo Episcopum inter & Presbyterum æqualitas summa constituitur. Ab his, & aliis erroribus, quos *Dallæus* impegit S. Hieronymo, prorsus alienum, fuisse Sanctum illum Doctorem demonstrat non solum *Martianæus*, sed etiam noster *Natalis Alexander* in *Panoplia* adversus Hæreses secundi sæculi, Dissertatione XVIII. art. 1. in *Panoplia* adversus Hæreses tertii sæculi art. 2. in singulari Dissertatione, quam edidit contra *Blondellum* Hæreticum Calvinistam ad probandum Episcopos esse de jure divino Presbyteris Superiores, & ab hoc fidei dogmatæ nunquam recessisse Sanctum Hieronymum, denique in articulo trigésimo primo capitis sexti Historiæ Ecclesiasticæ quarti sæculi. Hæc loca, si consulas, egregiam pro S. Hieronymo Apologiam adversus Hæreticos concinnare poteris.

Denique, accusatur S. Chrysostomus, quod Confessionis Sacramentalis usum sustulerit, Peccati Originalis propagationem & intuitivæ Visionis Dei possibilitatem negaverit, & gratiæ interioris prævenientis ad initium fidei, & bonorum operum necessitatem non admiserit. Sed Sanctum Chrysostomum ab his erroribus facili negotio purgant Catholici Doctores, qui tamen post Sanctum Thomam 3. p. q. 27. art. 4. ad 3. in hoc uno solo Sanctum Chrysostomum excessisse dicunt, quod senserit, Beatam Mariam Virginem ex vana gloria peccasse venialiter, dum in nuptiis factis in Cana Galilææ

lileæ dixit filio suo: *Vinum non habent*: Leges ar-
ticulum *xxix.* Capitis sexti Historiæ Ecclesiasticæ
quarti sæculi *Natalis Alexandri*, ubi disertè probat,
S. Chrysostomum intuitivæ Visionis Dei possibili-
tatem, & gratiæ interioris prævenientis ad initium
fidei & bonorum operum necessitatem admisisse.
Singularem etiam Dissertationem edidit idem Scri-
ptor *de Confessione Sacramentali* contra Heterodo-
xos, in qua Sanctum Chrysostomum Confessionis
Sacramentalis usum nunquam fustulisse, vel ejus ne-
cessitatem negasse validis argumentis ostendit. Po-
stremò, in *Panoplia* adversus Hæreses quinti Eccle-
siæ sæculi disputans idem auctor contra Pelagianos,
omnia Sancti Chrysostomi testimonia, quæ Hære-
tici *Sociniani* contra Peccati Originalis propagatio-
nem objectare solent, ex eorum manibus avellit,
& Sanctum Chrysostomum doctrinæ Ecclesiæ de
Peccato Originali, & de ejus ad omnes Adami po-
steros propagatione semper adhæsisse luculenter
evincit. Digitum ad fontem intendisse sufficiat.
Nec enim patitur suscepti hujus Operis brevitās,
ut vindicias adornem Sancti Chrysostomi, & alio-
rum SS. Patrum, ad quos dehonestandos *Dallens*,
aliique hujus furfuris Heterodoxi nihil non per-
tentandum, faciendum, fingendum, inveniendum,
efficiendumve putarunt. Quod sanè nemini mirum
videri debet, quia, ut vulgò dicitur, *agnoscunt lupi
canes, & eos odio prosequuntur, quia illos timent.* Nos
verò cum Vincentio Lerinensi existimamus, neces-
se esse omnibus Catholicis, qui sese Ecclesiæ legi-
timos filios probare student, ut Sanctorum Patrum
fidei inhæreant, adglutinentur, immoriantur: Pro-
phanas verò novitates detestentur, horrescant, per-

sequantur. Id quippè proprium est Christianæ modestiæ ac gravitatis, non sua posteris tradere, sed à majoribus accepta servare. Ducatùm siquidem nobis præbet Religio, non nos Religioni. Nec Majorum sensa, quæ volumus, trahemus, sed potiùs quæ illa trahunt retrahuntque, sequemur.

D. Doctrinam quinti Ecclesiæ sæculi satis nunc perspectam habeo. Age ergò, paululùm modò expendamus ea, quæ ad Politiam, & Disciplinam Ecclesiasticam ejusdem sæculi spectant?

M. Eadem planè Disciplina Ecclesiastica, quæ in quarto vigeat sæculo, fuit accuratè itidem observata in quinto Ecclesiæ sæculo, sive in his, quæ pertinent ad Sacramentorum administrationem, sive in his, quæ spectant regulas morum & observationem Canonum, qui ad præfigendum tempus, modumque peragendæ pœnitentiæ antiquitùs fuerunt statuti. In his itaque cùm nihil omninò in quinto Ecclesiæ sæculo immutata sit Ecclesiæ Disciplina, supervacaneum esset hic repetere, quæ jam diximus de Disciplina quarti Ecclesiæ sæculi. His ergò prætermisiss, pauca tantùm dicam de Politia, & Disciplina, quæ erga Episcopos, Clericos, & Monachos fuit in quinto Ecclesiæ sæculo observata.

D. Incipe, quæso, à Politia, & Disciplina, quæ erga Episcopos, & Clericos in quinto Ecclesiæ sæculo fuit observata.

M. In primis, Episcopi consensu & votis Clericorum, testimonio plebis; & suffragiis Episcoporum Comprovincialium eligebantur, & è Clero Ecclesiæ vacantis assumebantur. Quando tamen nullus Ecclesiæ vacantis Clericus dignus erat, qui Episcopus ordinaretur, licitum tunc erat alterum ex
alte-

altera Ecclesia accersere Clericum, eumque eligere Episcopum; qui tamen consecrari haud poterat absque Metropolitani notitia, consensu, & iudicio. Antequam aliquis in Episcopum eligeretur, vel consecraretur, accuratè examinari debebat, an esset prudens, docilis & moribus temperatus? an in vita castus, in victu sobrius, humilis, affabilis & misericors? an suis semper negotiis, & officiis intentus, & rebus sæculi liber? an in Lege Domini esset versatus, in Scripturarum sensibus cautus, in dogmatibus Ecclesiæ exercitatus, & fidei documenta verbis simplicibus, & ad fidelium captum accommodatis enunciare posset? Episcopatus ambitum ac desiderium illicitum esse censebant Patres quinti Ecclesiæ sæculi, nec migrationes & translationes Episcoporum de uno Episcopatu ad alterum patiebantur, nisi Ecclesiæ auctoritate, & propter ejus bonum atque utilitatem fierent. Episcoporum à suis Ecclesiis absentiam (nisi hæc necessariâ servitute, seu Ecclesiæ utilitatis procurandæ gratiâ contingeret) non permittebat quinti Ecclesiæ sæculi Disciplina. At poterant Episcopi, gravi urgente causâ sese Episcopali dignitate abdicare, ut patet exemplo Sancti Gregorii Nazianzeni, qui pro bono Ecclesiasticæ pacis, ejus cupidissimus erat, Constantinopolitano cessit Episcopatu, Patribus Synodi Constantinopolitanæ dicens: *Si propter me orta est hæc tempestas, mittite me in mare.* Hæc autem abdicationis, seu cessionis causa debebat, ut mox dixi, esse gravis, alioquin non licebat ob quascumque difficultates in regimine populorum emergentes Episcopatu cedere, & à suscepto labore recedere, quia, ut ait Sanctus Leo Papa in Epistola ad *Rusti-*

cum Narbonensem Episcopum, *etsi periculosum sit navim inter fluctus cautè non regere, multò periculosius est eam undis intumescantibus fluctuantem in tempestate relinquere*. Quamvis in quinto Ecclesiæ sæculo Canonibus esset prohibitum, ne Episcopi sibi successores eligerent, idque ab Ecclesiæ moribus fuerit semper alienum, nihilofeciùs, postulante Ecclesiæ bono, Sanctissimi Antistites, Clero & plebe, vel Comprovincialibus Episcopis consentientibus, successores suos designarunt, aut adiutores cum spe futuræ successionis sibi adsciverunt. Sic Valerius Episcopus Hipponensis senio & laboribus fractus Sanctum Augustinum cõadiutorem assumpsit, & Hipponensem Episcopum ordinari curavit, ut unà secum Hipponensem regeret Ecclesiam. Sic etiam Sanctus Augustinus Eradium suum successorem designavit, & Clero, populoque Hipponensi consentiente, eidem munia Ecclesiastica obeundi Provinciam demandavit, eã tamen lege, ut nonnisi post ipsius obitum ordinaretur Episcopus. Bona Ecclesiæ quatuor in partes erant distributa in Ecclesia Occidentali, quarum una Episcopo; altera Clericis; tertia Templorum restorationi; quarta pauperum sustentationi cedebat; Episcopi, & Clerici bonorum Ecclesiasticorum se non Dominos, sed dispensatores tantum, Oeconomos, & administratores existimabant. Quam in rem luculenter ait Sanctus Augustinus in Epistola L. ad Bonifacium Papam datã: *Si autem qua nobis sufficiunt, possidemus, non sunt illa nostra, sed pauperum, quorum procuratorem quodammodò gerimus, non proprietatem nobis usurpatione damnabili vindicamus*. Fidelium lites Episcopi dirimebant, & tam sibi, quàm suis Clericis

cis de caducis ac temporaneis bonis litigare maximo ignominia loco ducebant. Episcopis prohibitum erat Gentilium libros legere, gubernationem Viduarum, Pupillorum, & Peregrinorum per se ipsos agere, tuitionem testamentorum suscipere, rei familiaris curam ad se revocare, sine consilio suorum Clericorum, & Civium testimonio Clericos ordinare, bona Ecclesiae vendere, vel alienare. Demum Episcopi vilem supellectilem, & mensam pauperem habere, suaeque dignitatis auctoritatem non fastu & numeroso satellitio, non Beneficiorum pluralitate, sed Fide, vitaeque meritis, juxta sacros Canones, quærere debebant. Hæc est Disciplina, quam Episcopi quinti Ecclesiae sæculi adamussim, sacratissimorum Canonum observabant. Eadem curâ, ac sollicitudine Ecclesia in quinto sæculo ad bene informandos Clericorum mores sanctissimas Leges condidit, quibus Clericis vetitum erat, ne barbam aut comam nutrent, ne vestibus aut calceamentis decorem quærerent, vel affectarent; ne cum extraneis mulieribus habitarent, ne per plateas (nisi certâ & maximâ sui officii necessitate) ambularent; ne turpia & scurrilia verba proferrent, ne simoniae, & usurae vitiis sese implicarent, sed potius satagerent, ut professionem suam & in habitu, & in incessu suo probarent, sibi que victum & vestitum, aliquo artificolo, vel agriculturâ, absque tamen officii sui detrimento, studiosè pararent. Legi potest præsertim super hac re Concilium Carthaginense, quartum Idibus mensis Novembris anni cccxcviii. Honorio Augusto IV. & Eutychiano VI. Coss. celebratum, quod verè totius Ecclesiasticæ Disciplinæ Emporium appellari potest, cum in eo editi fuerint

centum & quatuor Canones, quibus Disciplina Ecclesiastica optimè fuit consultum atque provisum. Non me fugit, quosdam esse Criticos, qui istud Concilium quartum Carthaginense supposititium esse, censent eo potissimum nomine, quod nullibi apud antiquiores Latinos, nec ab Auctore Concilii vulgò *Africani* appellati, nec à *Ferrando*, & *Dionysio*, nec ab iis, qui Codicem Canonum Ecclesiæ Africanæ in græcum transtulerunt, ulla sit mentio de Canonibus centum & quatuor; qui eidem Concilio adscribuntur. At istud Concilium iv. Carthaginense genuinum esse invictè probant *Petrus de Marca* in *Veter. Collect. Canonum*, *Card. Perronius* in responsione ad Regem Angliæ cap. 48. & *Schellstratius* in Dissertatione tertia de *Ecclesia Africana* cap. 8. ubi plerosque istius Concilii Canones, explicat, Notisque suis illustrat.

D. Dicebat mihi nuperrimè nescio quis, antiquos de Disciplina Ecclesiastica Canones non esse amplius in usu, sed per desuetudinem fuisse abrogatos ac penitus antiquatos.

M. Jurarem profectò, eum, qui te isthæc docuit, unum esse de grege illorum, qui magnam Ecclesiasticæ disciplinæ ac sacrorum Canonum partem sine metu, sine pudore abigunt, explodunt, & exsufflant. Sed quisquis ille sit, prorsus Ecclesiastici spiritus expertem, & in Ecclesiastica doctrina rudem se & hospitem prodit. Ecquis enim, amabo, qui doctrinam Ecclesiæ tantisper callet, dicere audeat, sacros Canones, quibus Ecclesia disciplinam suam, & filiorum, præcipuè Ministrorum suorum, mores conformat, quibus nascentes rescocat labes, & vitia succrescentia rescindit, solâ desuetudine, idest,

ideſt, hominum in iis violandis audaciâ abrogari ac penitus deleri? quis, inquam, dicere audeat, Eccleſiam nunc minus, quàm olim, ſcelera deteſtari, minorem ad ſacramenta percipienda ſanctimoniam exigere? Minus caſtos & ſanctos optare Sacerdotes? Minus quàm olim avaritiam & ambitionem in ſuis Miniſtris averſari, minusque illos execrari, qui ſibi honorem rapiunt, & in ſacros, abſque ſingulari vocatione Dei, ordines involant? Quod ſi nemo hæc tam abſurda dicere audeat, certum apud omnes eſſe debet, eadem Eccleſiæ nunc probari, quæ olim probata ſunt, eamque ſubinde illos Canones, qui formæ quædam ac regulæ morum ſunt, in intimo ſuo ſpiritu gerere impreſſos, eosque etiamnum tenere, aut quod eos temporum difficultatibus præpedita tenere non poſſit, vehementer ingemifcere, & indolere. Levitatem igitur Sacerdotum, qui ab uno Beneficio ad aliud, & ex alia in aliam tranſiliunt Eccleſiam, eorum à ſuis Eccleſiis diuturnam abſentiam, & Beneficiorum pluralitatem, quando hæc carnali cupiditate, ſolâ animi inconstantia, vel ſordido lucri appetitu fiunt, non probat modo, ſed potiùs damnat Eccleſia, quamvis tamen hæc propter majus Eccleſiæ bonum, vel ob alias circumſtantias, quas perdoctè exponit S. Thomas quodlibeto 9. art. 15. aliquando juſtis de cauſis concedat Eccleſia. Alios verò in Clericis glifcentes abuſus, ſeu corruptelas & prævaricationes improbat, nedùm permittit Eccleſia, quæ tota pro viribus conſtituitur ad collapſam in ſuis Miniſtris inſtaurandam diſciplinam, quantum patitur Chriſtiana prudentia, quæ non nullas labeſ, majoris mali vitandi cauſâ, non nunquam

quàm tolerari præcipit . Cave itaque à pernicioſa opinione illorum , qui nihil ægrum , nihil ſaucium vident in Eccleſia , omnes abuſus , qui temporum diuturnitate impunitatem naſti ſunt , licitos putant , antiquos Canones ad cohibendas morum corruptelas olim ſancitos non ampliùs vigere , ſed prorsùs extinctos eſſe dicunt , uno verbo , quidquid præpoſterâ , ac vitioſâ conſuetudine inolevit , pro lege habent .

D. Cùm Monachi ſeveriorem morum ſectentur Diſciplinam , nullus dubito , quin Monaſtica Diſciplina in quinto Eccleſiæ ſæculo maximè flourerit , ac maximum ſuſceperit incrementum . Sed quæ , & qualis fuerit in variis Monaſteriis eo in ſæculo fundatis obſervata diſciplina ? velim modò ut paucis exponas .

M. Præter plura Monaſteria cùm virorum , tum mulierum , quæ S. Auguſtinus , teſte *Poſſidio* in ejus Vita , inſtituit in Africa , multa alia Cœnobia , eaque celeberrima in Galliis erant jam quinto ſæculo conſtructa , ſcilicet Maſſilienſia à Caſſiano fundata , Lerinenſe , Agaunenſe , Jurenſia , Griniacenſia Reomaënſe , ſanctiſſimis Monachis repleta , quorum diſciplinam , ac ſingulare vitæ genus paucis hic deſcribam . In primis , Monachi , vel , ut alii volunt , Clerici Regulares , qui in Monaſteriis à S. Auguſtino inſtitutis vivebant , curis ſecularibus expediti , jejuniis , orationibus , bonisque operibus jugiter vacabant , in Lege Domini meditantés die ac nocte . Omnia erant illis communia , diſtribuebatur unicuique prout cuique opus erat , juxta Regulam , quam S. Auguſtinus ſcripſit pro ſceminis , ſeu pro Sanctimonialibus , quibus præerat

erat ejus soror, & quæ legitur Epistola centesimâ nonâ ejusdem Sancti Doctoris. Sunt qui putant, S. Augustinum non solum vitam Monasticam sectatum esse, sed etiam Monachorum gessisse habitum, & cucullatum, immò & excalceatum fuisse asserunt. Verum, licet ipse post Possidium, qui vitam S. Augustini descripsit, lubens fatear, S. Augustinum instituisse Monasterium, & in eo vitam Monasticam, seu religiosum vivendi modum egisse, nunquam tamen adducar, ut credam, eum cucullatum, & excalceatum fuisse. Primò, quia hæc opinio non aliundè nata est, quàm ex supposititiis Sermionibus ad Fratres in Eremito, qui S. Augustinum Monachorum indutum habitu falsò adumbrant. Secundò, testatur ipsemet S. Augustinus in Sermone 50. de diversis, se non aliis indutum fuisse vestibus, quam quibus Clerici vulgò in Africa utebantur. Sic enim loquitur: *nemo det byrrum, vel lineam tunicam, seu aliquid nisi in commune; de communi accipiam mihi ipsi, cum sciam commune me habere velle quidquid habeo.* Excalceatum etiam non fuisse S. Augustinum disertè affirmat Possidius in ejus Vita, ubi hæc habet: *vestis ejus & calceamenta, & lectualia ex moderato & competenti habitu erant, nec nitida nimium, nec abjecta plurimum.* Ludunt ergo nos pictores, qui S. Augustinum cucullatum & excalceatum depingunt. Complures nunc extant Congregationes Clericorum, & Canoniorum Regularium, qui suum Institutum, vitæque genus referunt ad S. Augustinum, quo cæu fundatore & patre gloriantur. Sed viri doctissimi, quos inter numerantur Mabillonius, Thomassinus & Pagius putant, ejusmodi Congregationes undecimo dum-

taxat Ecclesiæ sæculo initium habuisse. Quæ de re opportuniùs alio loco differemus. Monachi Cœnobiorum Massiliensium *Cassiani* eorum fundatoris Regulam profitebantur, quam *S. Benedictus* Anianensis Abbas in concordia Regularum non semel laudat, illiusque meminit *S. Gregorius Turonensis* lib. 10. cap. 29. de *Cassiani* Abbatibus patria, doctrina, & sanctitate plura in superioribus Colloquiis diximus.

Monasterium *Lerinese* à *S. Honorato*, Episcopo deinde Arelatenſi, fundatum est, indeque dictum Monasterium *S. Honorati*, in quo floruerunt celeberrimi Monachi. Quamvis tempus conditi illius Monasterii incertum sit, citius tamen, quam par erat, *Baronius* illud conditum affirmat: circa annum *ccclxxv.* nam *S. Honoratus*, *S. Leontio* Forojulienſi Episcopo sedente, Monasterium *Lerinese* excitavit, teste *S. Hilario* Arelatenſi Episcopo, qui ejus vitam descripsit. Quare, cum *Leontius* Episcopus Forojulienſis mortuus fuerit ann. *ccccxxxiii.* ejus Episcopatus initium incidisse videtur in priores hujus sæculi annos. Quò fit, ut in quinto dumtaxat sæculo jacta fuerint *Lerinenſis* Monasterii fundamenta. Vetustioris Regulæ, quam *Lerinenſes* Monachi observarunt, priusquam *Benedictinam* Regulam susciperent, idem auctor fuit, qui Monasterii conditor *S. Honoratus*. Sed hæc antiqua Regula modò non extat, sicut nec *Disciplinæ* Regularis observatio, quæ primis temporibus in hocce Monasterio magno cum fervore vigeat.

De Agaunensi Monasterio, quod nunc vulgò nuncupatur Cœnobium *S. Mauriti* in *Vallesia*, quia ibi *SS. Martyrum Thebæorum*, quibus præerat *S. Mau-*

S. Mauritius, asservantur, & coluntur Reliquiæ, latè tractant Card. *Norifius* lib.2. Hist. Pelag. cap.3. *Henschenius* in Vita S. Sigismundi Burgundiæ Regis ad diem 1. mensis Maii, & *Carolus Cointius* Presbyter Oratorianus in Annalibus Ecclesiæ Francorum ad annum DXXXV. Istud Monasterium antiquissimum est, & ante annum quingentesimum *Acauno* constructum in angusta planitie, in qua parvus vicus antiquitus ædificatus fuit, quem *Tornatam*, seu *Tornudam* non longe ab Octoduro disitum, incolæ appellarunt, indeque Monasterium modò *Agaunense* à situ, modò *Tornatense* ab Oppidulo ibi condito denominatur. *Agaunenses* Monachi peculiarem Regulam servabant à S. Severino Monasterii Abbate editam, quam *Holstenius* unâ cum aliis Regulis à S. Benedicto Anianensi Abbate collectis in lucem emisit, cujus hic titulus est: incipit Regula Monasterii Tornatensis, quæ Capitibus XIII. constat, quamque à Capite XIII. usque ad ultimum, ex Regula S. Augustini ad verbum exscriptam esse Card. *Norifius*, & *Carolus Cointius* jam laudati demonstrant. *Sigismundus* Rex Burgundiæ, postquam filium suum *Sigericum* occidi jussisset, facti pœnitens perennem Psalmodiam circa annum ccccxv. in Monasterio Agaunensi instituit. Sed quænam fuerit illa Psalmodia perpetua? non convenit inter eruditos. Alii vocant illam Psalmodiam *assiduam*, quòd aliis atque aliis mutuò, & alternatim succedentibus, diu noctuque continuaretur, uti fiebat apud *Acemetas* Monachos Orientales. *Cointius* vero in Annalibus Ecclesiæ Francorum ad annum DXXXVI. num. ccxxiv. & seqq. contendit, peculiarem duntaxat psallendi formam certis horis dici & no-

& noctis præscriptam fuisse, non verò Psalmodiam perpetuam. At *Cointium* hac in re hallucinatum fuisse probat doctissimus *Mabillonius* in Præfatione par. 11. sæculi IV. Benedictini, ac manifestò ostendit, in locis, in quibus jugis hujusmodi Psalmodia vigeat, Monachos in plures turmas fuisse divisos, ita ut primæ recedenti à matutinis Officiis succederet secunda, & hinc tertia; dein absolutâ primâ, priores locum secuturis facerent, & ad assignatum laborem pergerent. Idem jugis Psalmodiæ ritus obtinebat apud *Centullenses* Monachos, & in nonnullis Galliæ Monasteriis, nempe in *Cabilonensi* S. Marcelli, *Dionysiano* propè Parisios, *Luxoviensi*, *Habedensi*, & *Lugdunensi* Sanctæ Salabergæ. Sed de his legendus est *Mabillonius* loco mox laudato. Extat adhuc Monasterium *Agaunense*, vulgò *S. Mauricii* nuncupatum, quod à pluribus sæculis à Clericis Regularibus Ordinis S. Augustini inhabitatur. Anno siquidem MCLXI. ut liquet ex charta à Sammarthanis tomo quarto *Galliæ Christianæ*, dum de Abbatia Agaunensi loquuntur, recitata, jam istud Monasterium Canonici Regulares incolebant.

Monasteria *Jurenſia* duo videlicet virorum, & unum puellarum in Episcopatu Lugdunensi fundata sunt in quinto Ecclesiæ sæculo, quorum origines in Vitis Sanctissimorum Abbatum *Romani*, & *Lupicini* fratrum referuntur apud *Bollandum* ad diem 28. mensis Februarii.

De Monachorum Grinniacensium Cœnobiis, quæ Viennæ in Gallia quinto sæculo condita sunt, legendus est idem *Bollandus* ad diem 1. Januarii, ubi inseruit Vitam S. Clari à quodam vetere auctore descriptam.

Reomaenses Monachi ita dicti à Pago *Tornodorenfi*, cui nomen *Reomaus* in Diœcesi Lingonensi, in quo extructum est eorum Monasterium circa annum CCCCLXXXVI. vivebant sub Regula *S. Macarii Alexandrini*, quæ brevia, sed divino spiritu plena continet præcepta.

Præter hæc jam recensita Monasteria, alia adhuc in Galliis celeberrima erant, videlicet Cœnobium, quod *S. Martinus Turonensis* Episcopus duobus ferè extrâ civitatem Millibus construxit, quodque *Majus Monasterium* hætenus appellatur. Monasterium Lugdunense apud Insulam *Barbaram*, quæ paulò suprà confluentes Araris & Rhodani in medio Araris sita est. In his Cœnobiis sanctissimè vivebant Monachi, precibus vacabant, jejuniis & abstinentiis corpus macerabant, Clericatum, vel Episcopatum nec ambibant, nec postulabant, sed, vocante Ecclesia, suscipiebant, victum tamen, nec vestitum immutantes, ut patet exemplis *S. Martini Turonensis* Episcopi, *Fausli Rejenis*, *Germani Antistiodorensis*, *Hilarii Arelatensis*, *Fulgentii Ruspensis*, qui omnes ex umbraculis vitæ Monasticæ ad Episcopalem thronum sublimati, nihil de pristinis moribus, victu & vestitu mutarunt. Otio perpetuum bellum indicebant Monachi, seque quotidie labore manuum exercebant. Qui verò præ corporis infirmitate operosis manuum laboribus incumbere haud poterant, iis, pro Regulæ indulgentia, Codices excribere, & proluxioribus studiis aliorum operas compensare licebat. Quem laborem, ut optimè observat *Cl. Mabillonius* præfatione in sæculum 1. Benedictinum, strenuè susceperunt postea Monachi Benedictini, cumque posteris suis quasi

quasi testamento reliquerunt. Adeò ut quidquid apud antiquos eruditum, ac scitu dignum, quidquid apud Patres pium & sapientiæ plenum, quidquid in Conciliis sanctum, quidquid in libris sacris divinum est, totum id per Monachorum Benedictinorum manus ad hæc usque tempora pervenerit.

D. Antequàm huicce Colloquio finem imponamus; cedo, si placet, præcipua Doctrinæ Moralis documenta & præcepta, quæ Sancti Patres ad probè informandos Christianorum quinti Ecclesiæ sæculi mores præscripserunt.

M. Patres quinti Ecclesiæ sæculi de emendandis moribus, & de restituenda Disciplinæ Ecclesiasticæ integritate semper solliciti, non solum omnem adhibuerunt operam, ut sacri Canones ad tollendas morum corruptelas conditi adamussim servarentur, sed etiam ad omnia veræ virtutis & germanæ pietatis officia fideles quâ verbo, quâ scriptis efficaciter sunt adhortati. Infinitus essem, si hic per censere vellem omnes morum regulas, & saluberrima bene vivendi præcepta, quæ Sancti Patres in libris suis moralibus, & in Homiliis, quas ad populum habuerunt, passim proponunt, inculcant, inferciunt. Breviter dicam, illos ad sacram legis severitatem compositos, omnes ingenii & eloquentiæ suæ intendisse nervos, ut Christianos à vitiis retraherent, ad exercitium virtutum provocarent, sed potissimum ad amorem Dei, quo Christiani discernuntur à Judæis, qui servili temporalis pœnæ timore, qui manum, non animum cohibet, à vitiis abstinabant: *brevissima & apertissima differentia duorum Testamentorum, timor & amor; illud ad hominem veterem, hoc ad novum hominem pertinet*, ait S. Augu-
sti-

stinus cap. 17. libri contra Adimantum Manichæum. Et certè, sicut sæpius ingerit Sanctus ille Doctor, lex Evangelica est lex amoris, & quantum Christianus proficit in amore Dei, tantum in eo decrescit amor mundi, & imminuitur regnum cupiditatis, quæ est radix omnium maiorum. *Sub lege est*, inquit S. Augustinus lib. de Natura & Gratia cap. 57. *qui timore supplicii, quod lex minatur, non amore justitiæ, se sentit abstinere ab opere peccati, nondum liber est, nec alienus à voluntate peccandi. In ipsa enim voluntate reus est, qua mallet, si fieri posset, non esse quod timet, ut occultè fiat, quod occultè desiderat.* Nihil ergò, juxtà doctrinam Patrum quinti Ecclesiæ sæculi, amare, nihil mirari, nihil expetere debet Christianus, nisi Deum, aut propter Deum. Nihil odio habere, nihil horrere, nihil fugere debet, præter unam turpitudinem, aut propter turpitudinem. Ita fit, ut hac cœlesti doctrinâ imbutus Christianus, quidquid agit, sive dormiat, sive vigilet, sive edat aut bibat, ipsi denique lusus & otia ei cedant in cumulum præmii. Jam verò quâ curâ & sollicitudine vias ad salutem tutiores & quærere, & sequi debeant Christiani, docet S. Chrysostomus Homilia 44. in Matthæum, his verbis: *Si vestimentum empturus unum gyras negotiatorem & alterum, & ubi meliores vestes inveneris, & pretio viliori, ab illo comparas. An non oportet populum circumire omnes Doctores, & inquirere ubi sincerè vestitus Christi venundatur, & ubi corrupta, & veriorrem eligere plusquàm vestimentum?* Hinc etiam à Doctoribus instar effati celebratur istud S. Augustini consilium ex ejus verbis concinnatum: *in his, quæ salutis sunt, tene certum, dimitte incertum.* Deni-

que, Patres quinti sæculi iustorum animis sanctum timorem, non salutis securitatem ingenerabant, peccatoribus diurnam & laboriosam pœnitentiam imponebant, nec eos, in quibus nulla mutata in melius vitæ vestigia comparebant, præproperâ absolutione donabant. Pœnitentiam, quæ differretur usque ad mortem, incertam, suspectam & moribundam appellarunt, eamque dumtaxat sinceram esse pœnitentiam docuerunt, quæ fit in hac vita, & nascitur ex amore Dei, & odio peccati, ut loquitur S. Augustinus. Ignorarunt Sancti illi Patres, arctâ viâ, quæ ducit ad Cœlum, gradientes, subtilem & mirabilem illam artem ancipitis significationis verba proferendi & restrictiones mentales faciendi absque mendacio, homines palam in duello, vel clam occidendi absque salutis dispendio, usuras, & simonias palliandi, sine vel minimo divinæ & Ecclesiasticæ legis detrimento. Ignorarunt ista lenimenta sacramenti Pœnitentiæ à nuperis Casuistis reperta circa confessionem, satisfactionem, absolutionem, proximas peccandi occasiones, contritionem, & amorem divinum. Uno verbo, ignorarunt mille distinctiones, quas moderni Probabilistæ latam portam aperientes, quæ ducit ad perditionem, excogitarunt ad excusandas excusationes in peccatis, ad emolliendam legem Dei, ad laxandam Disciplinam Ecclesiæ, ad invehenda horrenda opinionum portenta, à quibus profectò abhorruissent Pagani non omnino flagitiosi, quæque à Summis Pontificibus Alexandro VII. & Innocentio XI. totâ plaudente Catholicâ Ecclesiâ, fuerunt vaticanis fulminibus protrita. Hæc igitur, quæ in doctrina morum ignorarunt antiqui Ecclesiæ Patres,

trés , & nos quoque penitus ignorare debemus ,
 eumque dumtaxat incorruptum de moribus tenere
 sensum , quem Sancti , Majores , ac Patres nostri
 uno eodemque consensu apertè , perseveranter te-
 nuerunt , scripserunt , docuerunt . Sic integrita-
 tem Moralis Christianæ sartam tectam conserva-
 bimus , nec eam violari patiemur ab illis , qui no-
 lunt sitientes justitiam de puro latice bibere , sed
 adducunt ad suas cisternas contritas , luto & for-
 dibus conspurcatas , quæ rudera habent , aquam
 non habent , ita ut , qui indè biberit , plus hauriat
 limi sordiumque , quàm liquoris .



HISTORIA

ECCLESIASTICA

VI. Ecclesiæ sæculi.

Variis Colloquiis digesta.

BEnè habet. Jam quinque emensi sumus Ecclesiæ sæcula, & mox Historiam sexti sæculi aggredimur, quam solitæ nostræ inhærentes methodo, sex Colloquiis absolvemus. In primo exhibebimus statum Ecclesiæ sub Imperatoribus, & Principibus Christianis. In secundo referemus Controversias, Hæreses & tumultus, qui occasione trium Capitulorum in Ecclesia exorti sunt, eamque diù exagitarunt. In tertio agemus de Conciliis, & de rebus in illis gestis. In quarto texemus seriem Episcoporum, qui præcipuas Ecclesiæ Sedes in sexto Ecclesiæ sæculo tenuerunt. In quinto de Viris illustribus, qui in eodem sæculo floruerunt, & de eorum Operibus sermonem instituemus. In postremo, de Doctrina, Disciplina, & Morali sexti Ecclesiæ sæculi compendiosè tractabimus.



COL-

COLLOQUIUM PRIMUM.

De statu Ecclesiæ in sexto sæculo sub Imperatoribus & Regibus Christianis.

D. **F**uitne tandem sexto ineunte sæculo restituta Ecclesiæ tranquillitas, quam Hæretici Pelagiani, Nestoriani & Eutychiani toto durante quinto sæculo perturbarunt?

M. Ecclesia in Oriente, sexto ineunte sæculo, altâ pace potita fuisset, nisi Imperator *Anastasius*, *Acephalorum*, seu Hæreticorum *Severianorum*, quorum dux erat *Severus* Monachus, malis artibus instigatus, multos excivisset tumultus, gravesque persecutiones, quibus Ecclesiam miserum in modum dilaniavit. Magno at enim Religionis Catholicæ damno, ut jam in præcedentibus Colloquiis observavimus, pessimo Imperatori *Zenoni* successit *Anastasius* anno ccccxc. qui in exordio Imperii sui non nulla boni regiminis specimina edidit, abolendo videlicet antiquum tributum *Chrysargyrum*, quod ab omnibus, etiam infimæ sortis hominibus, meretricibus, exoletis & de animalibus etiam vilissimis exigebatur; venationes etiam, sive pugnas cum bestiis publicas prohibendo; Magistratus, qui antehac venales erant, gratis conferendo, & suæ fidei professionem Chirographo suo munitam cum approbatione Concilii Chalcedonensis *Euphemio* Patriarchæ Constantinopolitano exhibendo, ut à se omnem Eutychiani dogmatis suspensionem amoliretur. Verùm, in his omnibus vim sibi fecit homo

improbis. Optati si quidem Imperii compos factus, ac semel obfirmatâ dominatione, avitæ fidei, & Concilii Chalcedonensis infensissimum hostem, populorumque oppressorem sese prodidit, *Henoticon* Zenonis decessoris sui districtè servandum iussit. In eos, qui Concilii Chalcedonensis defensores erant, carceribus, exiliis, omnium dignitatum abdicatione, bonorum spoliatione atrociter sævit. Legem emisit contrâ *Synoditas*, seu contrâ eos, qui Synodum Chalcedonensem tuebantur, & eâ de causâ *Euphemium* Constantinopolitanæ urbis Episcopum, & deindè *Macedonium* ejusdem urbis Antistitem Sede dejecit, & in exilium misit, eo solo nomine, quod Concilio Chalcedonensi constanter adhærerent. Ducentos Monachos cum *Severo* Acephalorum duce & Theopaschita Eutychiano ex Oriente profectos, ut Synodum Chalcedonensem oppugnarent, Constantinopolim advenientes benignè & honorificè excepit Anastasius Imperator, ejusque gratiâ & patrocinio fretus impius ille *Severus* Sectæ Acephalorum antesignanus, Flaviano Antiocheno ob fidei constantiam è Sede dejecto, se illius in locum per vim apertam intravit, & omnes Orientales ad Synodi Chalcedonensis damnationem pertrahere studuit, sibi que obistentes Antistites, quos inter fuit *Elias* Hierosolymorum Episcopus, exaudivit. Quin eò usque sævitæ prorupit malè feriatu ille Hæreticus Antiochenæ Ecclesiæ invasor, ut, Judæorum & sceleratorum conductâ manu, trecentos & quinquaginta Monachos, quorum multi ad Altaria confugerant, non aliâ de causâ, quàm odii adversus Catholicam fidem concepti immanitèr trucidavit, eorum cadavera avibus

bus dilanianda projecerit , multos in vincula con-
jecerit , plurimos , dilapidatis eorum facultatibus,
ex ædibus & civitatibus expulerit , ut constat ex li-
bello Monachorum & Clericorum Antiochiæ , &
Syriæ lecto in Synodo Constantinopolitana sub
Menna Patriarcha Constantinopolitano .

His malis , quæ in perniciem Catholicorum ,
latè & impunè grassabantur , cumulum addidit
Anastasius Imperator , quippè qui à Theopaschitis
Eutychanis seductus, sacro Trisagio : *Sanctus Deus,*
Sanctus fortis , Sanctus immortalis , istam clausulam
adiici voluit : *qui crucifixus es pro nobis , miserere*
nobis . Hujus clausulæ primus auctor fuit *Petrus*
Fullo Episcopus Antiochenus , qui Eutychanâ hæ-
resi cùm esset infectus , hanc clausulam sacro Trisa-
gio eo fine addiderat , ut Passionem Deo Trino , ad
quem superiora Trisagii verba spectabant , adscri-
beret . Huic malo *Calendio* post mortem utriusque
Stephani in Sede Antiochena successor duobus ver-
bis remedium attulerat , errorique ansam præcede-
rat, huic clausulæ nempe his verbis præmissis : *Chri-*
ste Rex , qui crucifixus es pro nobis &c. sed *Petrus*
Fullo Sedi Antiochenæ postea restitutus , hæc ver-
ba : *Christe Rex* , sustulit , sicque pristinam Eu-
tychianam labem redintegravit Antiochiæ anno
ccccLxxxv. hoc itaque additamentum à Petro Ful-
lone Eutychiano factum Imperator *Anastasius* , unâ
cum *Timotheo* , qui post depositum Macedonium ,
Sedem Constantinopolitanam invaserat , in sacrum
Trisagium inferre conatus est . Sed reclamantibus
Catholicis , qui antiquam fidem violari non patie-
bantur , nihil consequi potuit , sed potius Constans-
tinopolitani populi benè in Catholicam fidem affe-

Æt odium sibi conflavit , eumque ad rebellionem , provocavit , in qua parùm abfuit , quin ipse succumberet , debitasque suæ perfidiæ lueret pœnas .

D. Quorsùm tendebat ista populi Constantinopolitani rebellio , & quinam ipsius exitus fuit ?

M. Populus Constantinopolitanus ab Anastasio Imperatore propter fidei Catholicæ professionem oppressus in apertam rebellionem prorupit , Ducemque sibi constituit *Vitalianum* Scytham , Magistrum Militum , & egregium fidei Catholicæ defensorem , qui Cyrillum Thraciæ Præfectum interemit , Provincias Thraciæ , Scythiæ & Mysiæ cum arcibus occupavit , ipsamque urbem Constantinopolim obsidione cinxit. His in angustiis constitutus Anastasius , ut sibi consuleret , palam , sed simulatè promisit , se Chalcedonensis Concilii , & Epistolæ S. Leonis fidem inviolatè servaturum , exules Catholicos Antistites postliminiò revocaturum , litterasque ad Hormisdam Romanum Pontificem de redintegrandâ Orientalium Ecclesiarum cum Romana concordia scripsit , atque sigillò munivit . Eo specioso resipiscentiæ prætextu , & fucatis promissis rebellionem sedavit Anastasius , tumultuantem populum sibi conciliavit , & in ordinem redegit *Vitalianum* , quem in defendendo Concilio Chalcedonensi adversùs Anastasium Imperatorem magnam gloriam consecutum esse fatetur Baronius , qui tamen in hoc fallitur , quod putet , eum postea Monachis Scythis patrocinando illam gloriam obscurasse . Nam Monachi Scythæ , ut ostendimus in sequentibus Colloquiis , non solùm Eutychanis non adhæserunt , sed etiam ejusdem Hæresis strenui oppugnatores extiterunt . Quò fit , ut *Vitalianus*
suam

sam gloriam non obscuraverit, dum illos Monachos suo patrocínio fovit.

D. Sedatâ hac rebellione, & dissipatis Vitalianis copiis, stetitne Anastasius Imperator promissis, quibus sese ad tenendam Catholicam fidem obstrinxerat?

M. Perfidus ille Imperator imitatus est Pharaonem Regem Ægypti, qui, ut sacra commemorat historia, ingruentibus malis divinitus immisissis, à vexandis Israëlitis tantisper destitit, sed illis cessantibus poenis, ad pristinam rediit immanitatem. Sic Anastasius Imperator, ut mala sibi ex populi rebellione impendentia declinaret, aureos montes pollicitus est, & initam cum Catholicis amicitiam ac reconciliationem mentitus est. At sublato periculo, & Vitaliano in ordinem redacto, simulationis larvam deposuit, in Catholicos furorem suum exacuit, Legatos, quos Hormisdas Papa, redintegrandæ pacis causâ, in Orientem miserat, perjuriis & tergiversationibus elusit, nec ullo pacto adduci potuit, ut *Acacii* quondam Episcopi Constantinopolitani nomen è sacris Dyptichis expungeretur. Quapropter Anastasius sub Hormisdâ Papâ multum perturbavit Ecclesiam, quam sub Symmacho Hormisdæ decessore diro Schismate diviserat, sicut observaviâus in Colloquio tertio in Historiam quarti Ecclesiæ sæculi, de quo Schismate etiam redibit sermo, dum de Synodo *Palmari*, in qua judicata est causa Symmachi Papæ, agemus in Colloquio tertio in Historiam hujusce sæculi sexti.

D. Fuitne tranquillior in Oriente status Ecclesiæ sub Anastasii Imperatoris successore?

M. Anno *DXVIII.* Anastasio Imperatore isto
de

de Cælo fulmine atque è vivis sublato successit *Justinus* olim suum ac boum custos, qui erga Fidem Catholicam optimè affectus, statim Imperii sui initio Edictum promulgavit, quo iussit ut omnes ab *Anastasio* decessore suo in exilium pulsi revocarentur, & Synodus Chalcedonenfis sacris Dyptichis infereretur. *Hormisdas* Papa Legatos ad Imperatorem *Justinum* misit, ut tandem aliquandò Ecclesia Orientalis in communionem cum Romana rediret, nomina Episcoporum Hæreticorum, sed præcipuè *Acacii* olim Episcopi Constantinopolitani, *Zenonis*, & *Anastasio* impiorum Imperatorum ex sacris tabulis omnium Ecclesiarum Orientalium eraderentur, ac tandem Chalcedonenfis Synodus aliis tribus Oecumenicis Conciliis annumeraretur. Quæ omnia à Legatis Summi Pontificis feliciter, votisque omnium conspirantibus facta & executioni mandata fuisse, pluribus ostendit *Baronius*. Hac ratione cessavit dissidium Ecclesiarum Orientalium, cum Romana Ecclesia, quod annos triginta sex perduraverat, ex quo videlicet *Felix* Papa Tertius iusto Anathemate *Acacium* Patriarcham Constantinopolitanum perculit. *Theodoricus* Italiæ Rex Arianus ægrè admodum tulit, quod *Justinus* religiosissimus Imperator Catholicis impensè faveret, & Hæreticos Arianos, Manichæos variis Edictis comprimeret. Quare Gothorum ille Rex coëgit *Joannem* Papam, qui *Hormisdæ* successerat, Constantinopolim proficisci, ut *Justinum* Imperatorem induceret ad restituendas Arianis Ecclesias, quas ipsis abstulerat. Sunt quidam Historici, qui asserunt, *Justinum* Augustum omnem *Joannis* Papæ concessisse petitionem, & propter sanguinem Romanorum reddidisse

Hæ-

Hæreticis Arianis Ecclesias secundum voluntatem Regis Theodorici, ne videlicet Christiani, maxime Sacerdotes ad gladium mitterentur. Alii ex adverso post Baronium affirmant, Joannem Papam tempore suæ Legationis quascumque reperire potuit Ecclesias Arianis ereptas consecrasse Catholicis ab Imperatore Justino vindicatas; idque probant ex Epistola hujus Sancti Pontificis Joannis ad omnes Italiae Episcopos scripta, in qua asserit, se, dum Constantinopoli esset, Arianorum Ecclesias consecrasse, eosque adhortatur ut in agro Dominico viriliter laborent, idemque in Italia præstent. Verum, ut cordatè fatear, ex hac Joannis Papæ Epistola nihil certi super hac re elici potest, quia eam supposititiam, & Joanni Papæ falsò attributam esse, ostendam in quarto Colloquio in Historiam istius sæculi. Hoc unum dumtaxat certum ac exploratum est, Joannem Papam ex illa Legatione regressum, quasi demandatæ Legationis prævaricatorem à Theodorico Rege habitum fuisse, & in vincula Ravennæ conjectum, ubi inediâ & squallore mortuus est Sanctus ille Pontifex anno DXXXVI. Paulò post mortem Joannis Papæ, Theodoricus Italiæ Rex interiiit, eique in Regno Italiæ successit *Athalaricus* nepos ejus ex *Amalasuntha* filia, quam ex *Audefleda* Clodovæi Francorum Regis sorore susceperat. *Amalaricus* verò Visigothorum Rex, Theodorici ex *Theudetusa* filia nepos, ditiones in Hispania & in Gallia positas accepit, moxque inter Athalaricum, & Amalaricum consobrinos Arianam sectantes Hæresim conventum est, ut inter Alpes, & Rhodanum Ostrogothi, ultra verò fluvium regnarent Visigothi. *Amalaricus* Visigothorum Rex, Gallorum

potentiam reformidans, *Clotildem* sororem Childeberti Francorum Regis, cujus Regia Sedes Parisiis erat, in matrimonium duxit. At cum Clotildes propter suam Fidem Catholicam multas insidias ab Amalarico viro suo pateretur; *Childebertus* Francorum Rex anno dxxi. exercitum movit in Hispaniam, ut sororem suam Clotildem liberaret. Quod statim ac *Amalaricus* Visigothorum Rex accepit, consensu navi fugit, & cum in quamdam Ecclesiam se recipere vellet, à quodam milite occisus est. Childebertus sororem suam secum adducere cupiebat, sed ea in via mortua est.

D. Quis in Imperio Orientis successit Justino?

M. Postquam Justinus, qui in Imperio Orientis Anastasio successerat die ix. mensis Julii anni dxxviii. imperasset annos novem & dies vigintitres, mortuus est anno dxxvii. & Imperii sui successorem reliquit *Justinianum* è sorore nepotem. Fuit autem Justinianus Princeps domi forisque clarus, doctus, liberalibus disciplinis excultus, & in Theologia exercitatus. Leges omnes in unum corpus colligi jussit, undè effluxere celebrata illa volumina, *Codex* scilicet, *Pandectæ*, & *Institutiones*, quarum usus non solum in Civilibus, sed etiam in Judiciis Ecclesiasticis obtinet. Cum Gothis sæpissimè pugnavit Justinianus, & plerumque feliciter per Duces suos *Belisarium*, *Alexandrum*, & *Narsetem*, atque post varios eventus, sublato tandem ultimo Gothorum Rege *Teja*, Italiam à Barbaris vindicavit. Vicit quoque per Belisarium Persas, necnon Vandalos, & Africam Romano restituit Imperio. S. *Sophia* Ecclesiam Constantinopoli ædificavit. Epi-

Epistolam Encyclicam ad quinque Patriarchas scripsit, in qua doctrinam Origenis damnavit. Multa contra Hæreticos promulgavit Ediſta, quibus Catholicæ Religioni consultum voluit. Ad *Severi* Sæctatores, seu Hæreticos Acephalos Catholicæ Ecclesiæ reconciliandos, Collationem inter ipsos & Catholicos anno DLII. vel, ut alii volunt, DLIII. Constantinopoli haberi voluit, quam integram Cardinalis Baronius in suis Annalibus inseruit. Hæc & alia hujusmodi in exordio Imperii sui in rem & utilitatem Ecclesiæ præstitit *Justinianus* Imperator. At dum *Theodora* uxoris suæ, Eutylianæ fœminæ, & aliorum ejusdem Hæresis fautorum perversa consilia auscultare cœpit, perniciem gravem, & Schisma in Ecclesiam invexit, in summos Pontifices *Silverium*, & *Vigilium*, sicut in quarto Colloquio in Historiam hujusce sæculi videbimus, impius & crudelis fuit, ac tandem Eutychianorum, & Severianorum Hæresibus sese irretivit. Telam istam ordiri cœpit *Theodorus* Cæsareæ Cappadocum Metropoliſita, qui magna apud Justinianum gratiâ & auctoritate pollens, ei persuasit, Acephalos ad subscribendum Synodo Chalcedonensi compendiò adduci posse, si tria tantum, quibus offendeabantur, corrigenda curaret; nempe si damnaretur *Theodorus* Episcopus Mopsuestiæ Nestorii Magister. Dein, si prohiberentur libri Theodoreti contra XII. Capitula, seu Anathematismos Sancti Cyrilli Alexandrini. Demum, si rejiceretur Epistola *Iba* ad *Marim Persam*. His tribus proscriptis Capitulis, *Theodorus* Cæsareæ Metropoliſita Justiniano pollicitus est Acephalorum unionem. Similiter *Theodora* Augusta, quæ palàm Acephalis studebat, id ipsum quod suaserat Theodo-

dorus Cæsariensis Metropolitanus Principi marito suo inculcavit, sed eo consilio pessima mulier facinus moliebatur, ut ubi Chalcedonensis Synodi correctio semel fieret, universa ejus collaberetur auctoritas, ejusque doctrina nullius ponderis evaderet. His consiliis delusus Justinianus Imperator, multos in Ecclesia excitavit tumultus occasione trium istorum Capitulorum, quæ in quinta Synodo generali, ut postea dicemus, ejus jussu damnata, gravissimis contentionibus inter Episcopos enatis initium dederunt, de quibus in sequentibus Colloquiis commodius agemus. Testatur *Nicephorus* lib. 17. Hist. Eccl. cap. 29. Imperatorem Justinianum in ultima ætate lapsum esse in Hæresim *Incorruptibilem*, sive *Aphthodocetarum*, qui Domini nostri Jesu Christi Corpus ex ipsa Divinitatis conjunctione incorruptum evasisse asserabant. Ex qua tamen Hæresi, paulò antequàm moreretur, resipuisse probat Card. Baronius. Immò in Menæis Græcorum ad diem 11. mensis Aug. legitur: *Memoria piæ recollectionis Imperatoris Justiniani in Æde Apostolorum*. Mortuus est Justinianus Imp. die xiv. mensis Novembris anni DLXV. postquàm imperasset annis xxxviii. mensibus septem, & diebus tredecim. Ei in Imperio successit *Justinus* junior, ejus nepos, qui & *Curopalates* dicitur, quod esset Prætorii Præfectus. Princeps fuit justitiæ studiosus, mansuetus, & publicæ tranquillitatis amator. Per duodecim annos imperavit, & obiit anno DLXXVIII. Sub eo cœpit in Italia Græcorum Exarchatus, Sede Ravennâ, duravitque ad usque circiter Carolum Magnum, ut suo clariùs loco commonstrabimus. Justino juniore successit *Tiberius Constantinus*, qui Imperium tenuit us-

usque ad annum DLXXXII. quo placidè Constantino poli vitâ functus est. Denique Tiberio Constantino successit *Mauritius* è Cappadocia ortum ducens, qui tùm belli, tùm pacis artibus instructus strenuum Imperatorem se gessit. Persas vicit per Duces suos *Philippum*, & *Germanum*. Cum *Chagano* Rege *Avarum*, qui Thraciam, Mæsiam, aliasque Orientalis Imperii regiones devastabat, sæpiùs, variisque eventibus pugnavit. Verùm à militibus, quòd stipendia non acciperent, tumultuantibus Chalcedone trucidatus est cum tota sua familia anno DCII. Imperii sui anno ineunte vigesimo primo. Hi sunt Imperatores, qui in sexto Ecclesiæ sæculo Imperii Orientalis gubernacula tenuerunt, quorum seriem, ac gesta breviter hìc descripsi, ut status Ecclesiæ in sexto sæculo sub illis Orientis Imperatoribus faciliùs innotescere posset.

D. Cùm Occidentis Imperium in quinto sæculo fuerit, ut jam vidimus, omninò extinctum, ac permultæ factæ sint Regnorum mutationes, & exordia, Francorum videlicèt & Burgundionum in Galliis, Visigóthorum in Hispania, Ostrogothorum in Italia, Anglorum in Britannica Insula, Vandalorum in Africa, vellem modo ut ostenderes, quisnam in illis regnis sexto sæculo fuerit status Ecclesiæ?

M. Ut votis tuis faciam satis, incipiam à Galliarum Regno, cujus Rex *Clodoveus*, post insignem de Alemannis reportatam victoriam à S. Antistite *Remigio* apud Remos sacros fonte ablatus est anno cccxcvi. & in Catholica Fide, quàm semel suscepit, suoque regno intulit, tam constanter permansit, ut unus solus tùm temporis in universa ter-

ra

ra Princeps Catholicus esset. Nam Imperator *Anastasius*, ut jam observavimus, Eutychianâ Hæresi erat fœdatus, *Theodoricus* Rex Ostrogothorum in Italia, Rex etiam Visigothorum *Alaricus*, qui Hispaniæ & parti Galliæ dominabatur, Rex quoque Burgundionum *Gundabodus*, & Rex Vandalorum *Trafamundus* in Africa Arianam omnes impietatem sectabantur; reliquarum verò gentium Reges Idolorum cultui erant addicti. *Clodovæus* Francorum Rex propagandæ Catholicæ Religionis, simulque Gallorum dominationis amplificandæ studio incensus, bello appetiit anno DVII. *Alaricum* Visigothorum Regem, qui tùm Gallicanis Provinciis, quæ à fluvio Ligeri ad usque Pirenzos montes protenduntur, dominabatur. Illius copiis penitus deletis, eundem etiam singulari certamine adortus est *Clodovæus*, eumque manu interemit in Campo Vocladensi, qui decimo ab Urbe Pictaviensi milliari distat. Sic desuit Gothorum Imperium Tolosanum; nam *Amalaricus* Theodorici Regis Italiæ ex filia nepos, relictis Gallicanis Provinciis, quibus dominabatur, transiit in Hispaniam ut eam sibi retineret, fassus, se Francis, & *Clodovæo* eorum Regi minimè parem. Hujus tam celebris victoriæ à *Clodovæo* reportatæ famâ commotus *Anastasius* Imperator Orientis, ejus amicitiam expetivit, ei que per Legationem honorificam gratulatus est, & misso ad eum paludamento, regioque diademate, jura Consulatus, ac Patriciam dignitatem eidem contulit.

Sub idem tempus Catholica Fides alterum in Galliis suscepit incrementum, Burgundionum videlicet ab Ariana perfidia conversione. At enim

San-

Sanctus Avitus Viennensis Episcopus, qui multum, frustra tamen, adlaboraverat ut *Gundabodum* Burgundionum Regem Arianum ad Fidem Catholicam adduceret, id quod non potuit in patre, feliciter peregit in filio *Sigismundo*, quem, patre adhuc superstite, Arianam Sectam reliquisse, & Fidem Catholicam amplexum esse liquet ex variis Epistolis Sancti Aviti, quarum vigesima nona ejus zelum, in coërcendis Hæreticis, & præservandis ab eorum fraudibus recens ad Fidem Catholicam conversis subditis laudibus extollit. Hic est ille *Sigismundus*, qui, ut in superiori Colloquio dicebamus, diu pœnitentiam egit ob necem, quam instigante posteriore uxore sua, intulit proprio filio innocenti *Sigerico*, quem ex priori uxore susceperat, & Psalmodiam in celeberrimo olim *Aganensi* Monasterio instituit, cuique *Sanctus Avitus* author fuit, ut Synodum Epaunensem, seu Epaonensem anno dxxvii. convocaret ad resarciendam collapsam Ecclesiæ Sanctæ fidem, & disciplinam. Multis, iisque gravissimis calamitatibus Deus *Sigismundum* hac in vita afflixit, ut crimen, quod in filium suum innocentem perpetraverat, cumulatiùs expiaret. *Clodomirus* enim *Clodovæi* Francorum Regis filius *Sigismundum* acie superatum, cum uxore & liberis captivum abduxit, & Burgundiæ Regno privavit, dumque illum cum universâ prole in custodia detineret, *Gundemarus* frater *Sigismundi* occupatum à Francis Burgundicum Regnum, quâ vi, quâ insidiis invasit. Quamobrem in furorem actus *Clodomirus* *Sigismundum* cum uxore & liberis in altum puteum projici jussit, frustra tam grande scelus dissuadente *Avito* Abbate sanctissimo. Relatus est Si-

gismundus in Sanctorum numerum, ejusque nomen inscribitur Martyrologiis *Rabani*, *Ussardi*, *Adonis*, & aliorum ad primum diem mensis Maii, quo in Actis Bollandianis vita ejus ex antiquis Codicibus descripta illustratur. Sigismundi ad Fidem Catholicam conversi exemplum secuti sunt liberi *Sigericus*, & filia Theodorico Regi Francorum Austrasiorum postmodum nupta. Mortuo Lutetiae Parisiorum Clodovæo Francorum Rege anno dxi. quatuor superstites ejus liberi, teste Sancto Gregorio Turo-nensi lib. 3. Hist. Francorum cap. 1. Patris Regnum sibi æquâ lance diviserunt. Qui natus major erat *Theodoricus*, etsi ex concubina susceptus Regni sui Sedem apud Metas habuit. Reliqui tres legitimi, quos à Clodovæo *Clotildis* peperit, *Clodomirus* quidem apud Aurelianos, *Clotarius* in sueffionibus, *Childebertus* Parisiis Regni sui Sedem fixerunt. Denique, anno dxxxiv. Burgundiæ Regnum, quod per quinque Galliarum Provincias dilatabatur, & in quo quatuordecim erant Episcopatus, fuit à Francis subactum, extinctum, & Franciæ adjectum, sicque duo ista regna in unum Galliarum regnum coa-luerunt, in quo semper Catholica floruit Religio.

D. Catholica Fides in sexto sæculo fecitne alios in barbaris Nationibus progressus?

M. Magnum in sexto sæculo apud barbaras Nationes incrementum suscepit Catholica Religio. In primis, *Alamandarus* Saracenicarum Tribuum Princeps, abjecto Idolorum cultu, Christianam Religionem amplexus ab Orthodoxis Synodo Chalcedonenfi benè affectis baptizatus est anno dxiii. & Hæreticos Severianos Episcopos à vero fidei sensu eum abducere machinantes mirâ arte coarguit. Quâ
de

de re fusè ad hunc annum loquitur Baronius ex Theodoro Lectore lib. 2. Præterea, refert *Theophanes*, Tzatham, qui à *Cabade* Persarum Rege creatus fuerat *Lazorum* Rex, ad Justinum Imperatorem anno DXXII. Bizantium venisse, & ut fieret Christianus postulasse; quod ubi accepisset *Cabades* Persarum Rex, vehementer questus est, quod Justinus homines sibi subditos reciperet, & pacem inter utrumque sancitam frangeret; cui respondit Justinus, nullum regno ejus subditum sibi vendicasse, sed *Lazorum* Regem tantum rogasse, ut Christianus fieret. Sunt autem *Lazi* populi, quos ad Orientale maris Euxini littus antiquitas *Colchos* dixerat, nostrâ verò ætate *Mengrelios*, suntque Iberis, qui nunc *Georgiani* & *Circassi* vocantur, finitimi. Insuper, anno DLXXXIX. *Recaredus* Hispaniarum Rex Suevos & Gothos, qui per annos CCXIII. Ariano dogmate erant infecti, ad Catholicam Fidem adduxit, Synodumque Toletanam tertiam haberi jussit, cui, ut scribit *Joannes Biclariensis* Abbas interfuit ipsemet *Recaredus* Rex, qui ordinem conversionis suæ, & omnium Sacerdotum, Gentisque Gothicæ professionem Fidei scriptam, manu suâ Episcopis porrexit, & omnia, quæ ad Fidem Orthodoxam pertinent, exposuit.

Sub finem sexti sæculi, hoc est, anno DXCVI. Sanctus Gregorius M. Papa gentis Anglorum conversionem aggressus est, *Augustino* Monasterii Sancti Andree in Urbe à se præfecto cum sociis in Angliam misso, cujus primi Anglorum Apostoli, postea Cantuariensis Episcopi, *Gotselinus*, Bertinianus Monachus undecimo vertente sæculo vitam diligenter scripsit. *Augustinus* itaque cum sociis è Francia in Angliam anno DXCVI. transfretavit, pleros-

que Gallos professionis comites habuisse Augustinum docet *Beda* lib. 1. cap. 25. ita ut in *Cantium* cum sociis ferme quadraginta pervenerit Augustinus. Erat tunc Anglorum Rex in *Cantio* *Edilbertus*, vel *Ethelbertus*, qui jam multa audierat de Christiana Religione, quippe qui *Adilbergam*, seu *Bertham* Chariberti Francorum Regis filiam in conjugem acceperat: *Anteà fama*, inquit *Beda*, *ad eum Christianæ Religionis pervenerat*, utpotè qui & uxorem habebat Christianam de gente Francorum Regia, nomine *Bertham*, quam ea conditione à parentibus acceperat, ut ritum fidei, & religionis suæ cum Episcopo, quem ei adiutorem fidei dederant. Nomine *Luidhardo*, seu *Lethardo*, inviolatam servare licentiam haberet. Adventantem Augustinum cum sociis *Edilbertus* Anglorum Rex in *Cantio*, & in Metropoli *Doroverna*, quæ postea *Cantuaria* dicta est, benignè excepit, & ad eorum prædicationem & miracula non solum, ipse Rex conversus ad Fidem Catholicam & baptizatus est, sed etiam decem Anglorum millia in die Natali Christi Domini sacris aquis eluit Augustinus, ut testatur Sanctus Gregorius M. Papa in Epistola ad *Eulogium* Patriarcham Alexandrinum. Animadvertens itaque Augustinus, omnia sibi feliciter in Anglia successisse, rediit in Gallias, ut ab Episcopis Galliarum Episcopus ordinaretur; in Anglia enim necdum erant Episcopi, quorum ministerio posset consecrari. A *Virgilio* autem *Arelatensi* Episcopo inauguratus Episcopus in Angliam reversus est Augustinus, ibique post adimpleta omnia boni Pastoris munia sanctè obiit anno DCVII. sicut multis conjecturis probat doctissimus *Mabilonius* in sæculo primo Benedictino, ubi vitam Sancti

Æti Augustini primi Anglorum Apostoli à Gotselino descriptam inseruit.

Præter istas Nationes, quæ in sexto Ecclesiæ sæculo Catholicâ Fide fuerunt illustratæ, nonnulli sunt, qui asserunt Christianam Fidem eidem sæculo in Æthyopiam fuisse invec̃tam, & *Axumitarum* Regem ad Imperatorem Justinianum misisse Legatos, à quibus ipse, sui que Christianam Religionem edocerentur. Sed hoc à veritate Historiæ penitus alienum est. *Axumita* siquidem, qui Æthyopiam incolebant, quique ab antiquis vulgò *Indi* appellantur, jam Christiani erant à tempore Constantini Magni Imperatoris, & fidem à Sancto Frumentio Episcopo acceperunt, ut ostendimus in Colloquiis in Historiam quarti Ecclesiæ sæculi. Hi autem Populi Æthyopes dicebantur *Axumita* ab Urbe *Axuma*, quæ erat Regia *Habessinorum* Urbs, totiusque Regni Metropolis, quamque pulcherrimis structuris, Basilicâ, Obeliscis, Epitaphiis, aliisque ædificiis Regiis ornatam olim fuisse, argumento sunt aliqua litteris ignotis inscripta monumenta, quæ adhuc visuntur, bellis tamen dejecta vel vetustate exesa. Urbs ipsa *Axuma* diruta, pago similior est, & teste *Ludolfo* in Historia Æthyopica lib. 2. cap. 11. ita Turcarum incursione vastata fuit, ut hodiè vix centum Colonis habitetur, & ex ruderibus tantum, atque ex campis circumfertilibus, iisque amœnis, conjici possit, eam olim magnam, & Regiam Urbem fuisse.

Sed quoniam de populis *Axumitis* jam verba facere cœpimus, non pigebit paucis hic describere rem singulari sanè observatione dignam, quæ refertur in Actis Sancti *Arethæ* Martyris. Testantur lau-

data illa Acta, *Dunaanum* Homeritarum Regem, Religione Judæum, tam ut Christianorum genus, quod averfabatur, penitus everteret, quam ut *Eleesbaano* Æthyopum Axumitarum Regi Christiano molestiam crearet; graviter afflixisse cives Urbis *Nagran*, seu *Negra*, in Homeritide sitæ, cui præfectus erat *S. Aretha*; cumque impius ille Judæus Rex *Dunaan* hanc Urbem anno DXXI. obsidione cingeret, eamque vi expugnare haud posset, statuuisse eam dolo capere, ideoque juramento interposito Civibus promississe, sese illos non amplius coacturum ut Patriam Religionem ejurarent. Sed verba tantum dedit; nam in Urbem perfidus ille Rex Judæus postea ingressus, Nobiles, Sacerdotes, & Monachos vinculis arctavit, Virgines combussit, & promiscuè in omnes Christianos ferro grassatus est. Duos dies duravit persecutio, & secundâ die trecenti & quadraginta Christiani, inter quos *Aretha*, morti traditi sunt. Hanc diram persecutionem adversus Christianos in Homeritide à *Dunaan* Rege Judæo factam cum accepisset *Eleesbaan* Æthyopum, seu Axumitarum Rex Christianus, collecto ingenti exercitu, trajectoque angustissimo freto, quod est, inter Æthyopes & Homeritas, & pugna terrâ marique commissa, Judæos, qui terga verterant, jure belli omnes trucidavit. Tum rectâ perrexit ad Civitatem *Phare*, in qua erat Regia *Dunaan*i tyranni Hebræi, & cœpit omnes divitias, quæ erant in Regia, & ipsam etiam Reginam. Postea, relicto in Civitate præsidio, aggressus est *Dunaanum* Regem Judæum, eumque, & omnes ejus cognatos occidit. His peractis, *Eleesbaanus* Axumitarum Rex omnia, quæ gesta fuerant, significavit Patriarchæ Alexandriæ,

driæ, & per illum Jústino Imperatori. Portò Patriarcha Alexandrinus ordinatum a se Episcopum misit ad Homeritas, qui, postquam illis Templum, quod fuerat ædificatum, consecrasset, baptizavit omnes, qui erant in Civitatibus, & Pagis Homeritarum in nomine Sanctæ Trinitatis. Ex eis etiam ordinavit Diaconos, & Presbyteros, & Ecclesiis, quæ erant in Homeritidis regione reddidit statum suum solitum. Postremò, *Eelesbaan* Axumitarum Rex venit *Nagram* Martyrum Civitatem, eique ducem præposuit *S. Arethæ* Martyris filium; indeque rediit in Homeritarum Regiam Urbem *Phare*, ubi *Abraamium* quemdam virum pium & Christianum Regem Homeritarum instituit ac præfecit, iisque omnibus non minus gloriôsè, quàm feliciter gestis, *Eelesbaan* de Christiana Religione optimè meritis ad Regiam suam Urbem *Axumam* se contulit, ubi tam insignem relatam victoriam non suis armis, sed Cruci Christi acceptam referens, relicto regno, Diadema deposuit, & regulam suscepit Monasticam, sicut fusiùs refertur, in Actis *S. Arethæ* Martyris. Sic *Eelesbaanus* Æthyopum, seu Axumitarum Rex divinâ ope adiutus Catholicam Fidem à *Dunaano* Homeritarum Rege Judæo impetitam, egregiè vindicavit, eamque in Homeritidis regione, quæ sita est in Arabia felice, sexto Ecclesiæ sæculo latè propagavit.

D. Præter istam persecutionem, quam à *Dunaano* Homeritarum Rege Judæo passi sunt Christiani, fuitne Ecclesia in sexto sæculo aliis persecutionibus exagitata?

M. Infinitus essem, si omnes clades ac persecutiones, quas in sexto sæculo, à Saracenis, Go-

this, Vandalis, Hunnis, Ostrogothis, Visigothis & Longobardis lacerato Occidentis Imperio, tulit Ecclesia, vellem in præsentia recensere. Brevis hic tantum referam clades ac persecutiones, quas in sexto sæculo passa est Catholica fides ab Ariana impietate, quæ tum temporis recrudescens, Hispaniam sub *Leovigildo* Rege, Africam sub *Trasamundo*, Italiam sub *Theodorico*, & *Totila* Regibus Arianis, omnino devastasset, ni Deus Optimus Maximus sævam illam Arianæ impietatis obortam procellam cohibuisset, & in optatam Ecclesiæ tranquillitatem divinâ suâ omnipotentia convertisset.

Regnabat in Hispania *Leovigildus* virtute bellicâ insignis, sed Arianismi errore imbutus, qui de successionem Regni in familia sua cogitans, *Hermenegildum*, & *Recaredum* filios suos Regni consortes dixit. *Hermenegildus* primogenitus filius *Ingundem* Sigiberti Francorum Regis filiam accepit uxorem, quam in Hispaniam magno apparatu deductam, *Gosvinda* ejus avia amicissimè complexa est, in eam spem erecta, fore ut illam facilè ad Hæresim Arianam pertraheret. *Gosvinda* primum blanditiis, deindè, convitiis, contumeliis & verberibus *Ingundem* aggressa est, ut Catholicâ Religione desertâ Arianam Hæresim profiteretur. Sed ad nihilum planè reciderunt ejus conatus, & nullo modo *Ingundis* constantia emolliiri, aut labefactari potuit, Quin immò, Catholicæ Religionis tenax puella *Hermenegildum* conjugem suum ad Catholicam fidem traduxit. Quæ Religionis mutatio causa fuit gravis ac diuturni belli patrem *Leovigildum* inter & *Hermenegildum* filium, & occasionem dedit persecutioni, quam *Leovigildus* movit in Ca-

tho-

tholicos . Hermenegildus captus & in vincula conjectus Episcopum Arianum ad se intra carcerem in die Paschatis à patre missum , ut sacram communionem de ipsius manu sumeret, verbis , prout merebatur , castigatum cum intrepidè repulisset , jussu patris eo facto exasperati, impactâ ab immisso Apparitore in cerebrum securi , martyrii palmam fidei constantiâ promeritus gloriosè occubuit . Occiso filio *Leovigildus* in rabiem actus crudeliter sævit in Catholicos . In exilium expulit Episcopos , Arianis in eorum locum suffectis , bona Ecclesiarum fisco suo addixit , Clericorum antiquavit privilegia , multos Procures , afflictis criminibus , de medio sustulit , totque calamitatibus omnes indiscriminatin Christianos oppressit , ut plerique tot malis fracti , aut deterriti ad Arianam Hæresim defecerint . Testatur tamen S. Gregorius M. Papa lib. 3. Dialog. cap. 31. *Leovigildum* sub finem vitæ suæ , cum corporis desperatâ salute Toleti decumberet , *Leandro* sanctissimo Hispalensium Episcopo Recaredum filium suum enixè commendasse , optaque se vehementer significasse , ut ejus præceptis Hermenegildo fratri similis evaderet . His dictis, obiit *Leovigildus* , qui ut ibidem ait S. Gregorius, pœnitentiâ commotus , necem filio suo Hermenegildo se intulisse doluit , *sed usque ad obtinendam salutem non pœnituit* , quia Arianam Hæresim palam non abdicavit . *Leovigildo* in Hispaniæ Regno successit *Recaredus* filius , qui fratris sui Hermenegildi pietatem imitatus , & *Leandri* Hispalensium Episcopi saluberrimis consiliis usus , Catholicam fidem in Regno suo latè diffudit , & Arianam Hæresim penitus profligavit . Sub hoc religioso Hispania-

niarum Rege universi Gothi, ut mox dicebamus, ejurato Arianismo, in Ecclesiæ Catholicæ castra commigrarunt, & susceptæ Religionis status in Synodo Toletana tertia ab ipsomet Rege Recaredo convocata publico totius gentis consensu, & solemni Ecclesiæ judicio firmatus est. Accuratè etiam in eadem Synodo provisum est & fidei propagationi, & sacræ Ecclesiæ Disciplinæ, sicut in tertio Colloquio in Historiam hujus sæculi commodius expendemus.

Sed veniamus modò ad Africam, in qua novæ persecutionis turbo Ecclesiam perculit. *Trasamundus* quippè Vandalorum Rex circa annum DIV. in Catholicæ Religionis exterminium totus incumbens, fatale Edictum in Africa promulgavit, quo districtè prohibuit, ne defuncto Catholicæ fidei Episcopo alius sufficeretur Catholicus, hoc pacto existimans, fore ut Ecclesiæ orthodoxis semel Episcopis orbatæ brevi desolarentur, & Arianorum insultibus paterent. Verùm, huic tam injusto Edicto non obtemperarunt Catholici Episcopi, sed Pastore suo viduatæ Ecclesiæ Ruspensi *Fulgentium* eductum è Monasterio, in quo hætenùs sanctissimè vixerat, elegerunt & consecrarunt Episcopum. Quam rem ubi rescivit *Trasamundus* Rex, furore percitus *Fulgentium* unà cum aliis Provinciæ Bizacenzæ Episcopis plusquam sexaginta Sardiniam in exilium relegari jussit. Præter quos eandem in Insulam alii Africanarum Provinciarum Antistites deportati fuerunt, qui, ut scribit *Paulus* Diaconus in Historia Miscell. cap. 15. cum præcedentibus Antistitibus numerum ducentorum viginti quinque Episcoporum compleverunt, & summâ licèt rerum omni-

omnium penuriâ laborarent, durum tamen illud exilium constanter pertulerunt. Interea, *Trasamundus*, cum accepisset, Fulgentium inter Episcopos exules doctrinâ & pietatē conspicuum esse, cum Carthaginem accersivit, ea spe fretus, fore ut eo superato & ad Arianam Hæresim pertracto, alii Episcopi ejus exemplum sequerentur. Sed contra spem accidit. Fulgentius quippè Africam reversus, sibi semper constans & avitæ fidei tenax, quâ scripto, quâ disputationibus cum Hæreticis strenuè congressus, de illorum erroribus gloriosè triumphavit, nutantes orthodoxos confirmavit, & lapsos ad gremium Ecclesiæ revocavit. Quod ægrè admodum ferens *Trasamundus Rex*, Fulgentium, cujus constantiam flectere haud potuit, in Sardiniam remisit, ubi sanctissimus ille juxta ac doctissimus Antistes unâ cum aliis Episcopis Africanis permansit in exilio ad annum DXXII. vel ut alii volunt, DXXIII: quo anno mortuus est *Trasamundus Rex*, eique successit *Hildericus*, Princeps, ut docet *Procopius lib. 1. de Bello Vandalico, subditis affabilis, & totus ad mansuetudinem natus*. *Hildericus* itaque erga fidem Catholicam optimè affectus, Fulgentium, aliosque Africanos Episcopos à *Trasamundo* in exilium missos acutū revocavit, in Sedes restituit, & omnibus, Regni sui Catholicis plenam exercendæ suæ Religionis libertatem indulxit. Verum, *Hilderico Vandalorum Rege* anno DXXX. è Regno dejecto à *Gelimere*, *Justinianus Imperator*, qui *Hilderici* amicissimus erat, ad ultionis cupiditatem exarsit, & adversus *Gelimerem* bellum movit, misso *Belisario* duce, qui anno DXXXIII. Carthaginem, & præcipuas Africæ civitates, arcesque
expu-

expugnavit, & anno sequenti Gelimerem in suam potestatem redegit, totam Africam Imperio Romano subegit, Arianos ab ea expulit, Catholicis Ecclesias, & Orthodoxis Episcopis suas Sedes restituit, ac victor Constantinopolim ingressus est equo Phalerato insidens, captivis ante se traductis, ipsoque *Gelimere* identidem ista verba inclamante : *vanitas vanitatum & omnia vanitas*.

Supereſt tandem, ut pauca dicam de Italia, quæ in ſexto Eccleſiæ ſæculo gemebat ſub Oſtrogothorum Regibus, quos inter duo præ cæteris inſignes extiterunt, *Theodoricus* videlicet & *Totila*. Prior, ſeu *Theodoricus* occiſo *Odoacro* Italiæ Rege anno cccxciii. Regnum Oſtrogothorum in Italia inchoavit, & quamvis Arianus eſſet, nullam tamen in Catholicos perſecutionem movit, ſed potiùs Schiſma ſubortum in electione Pontificis inter *Symmachum*, & *Laurentium* ſua auctoritate extinxit, & Pontificatum *Symmacho* legitimè electo adjudicavit. At jure merito culpatur *Theodoricus*, primò, quod *Joannem* Papam Constantinopolim ad *Justinum* Imperatorem proficiſci coegerit, eumque à ſua Legatione revertentem malè ac crudelitèr exceperit; ſicut jam obſervavimus. Secundò, quod poſt mortem *Joannis* Papæ jus eligendi Pontificis Romani ſibi attribuerit, & *Felicem IV.* Clero, Senatu, Populoque Romano propoſuerit. Diù quidem Clerus, Senatus, Populusque Romanus illi reſtitere, ſed eâ lege res compoſita eſt, ut more, priſtino Pontifex à Clero eligeretur, Regis tamen aſſenſu confirmaretur, certâ pecuniæ ſummâ pro confirmatione imperatâ non tantùm Romano Pontifici, ſed etiam omnibus Episcopis, qui ſub Go-

tho-

thorum Ditione in Italia degebant, quæ in pauperes erogaretur, sicut innuit *Athalaricus* in Regno Italiæ Theodorici successor in suo Edicto adversus Simoniacos. Ea creandi Pontificis ratio obtinuit, quamdiu Ostrogothorum in Italia perstitit Regnum. Alter Ostrogothorum Rex præcipuâ militiæ laude celebris fuit *Totila* anno DXLI. creatus Italiæ Rex, qui rem Gothicam propemodum in Italia deploratam mirabili fortitudine & singulari prudentiâ erexit. Jam quippè *Belisarius*, missus in Italiam anno DXXXV. à Justiniano Imperatore, universam Siciliam subegerat, Romam expugnaverat, Ravennam, & Gothorum Regem *Vitigem* cum ejus conjuge ceperat, itaut de Gothis in Italia omnino actum ac conclamatum esse crederetur; cum ecce subito *Totila* Gothorum Rex, animadvertens, *Belisarium* ab Italia fuisse amotum, ut novo bello contra Persas à Justiniano Imperatore indicto præesset, Romanos acie victos in fugam compulit, Romam, Neapolim, Samnium, Campaniam & quascunque urbes & regiones à *Belisario* antehac captas recuperavit, & Ostrogothorum in Italia Regnum penè collapsum restaurare visus est. Sed citò evanuit ille *Totilæ* triumphus. *Narses* siquidem fortissimus dux cum ingenti Romanorum exercitu ab Imperatore Justiniano missus, Ravennam adveniens occurrentem sibi cum valido itidem exercitu *Totilam* collatis signis, insigni ex utraque parte editâ strage, superavit, fortiterque dimicantem occidit. Tum Gothi, qui ex prælio evaserant, trajecto *Pado*, urbem *Ticinum*, circumjectaque loca occuparunt, ac sibi Regem crearunt *Tejam*, qui tamen eodem anno, cum Romanis com-

mis-

missio prælio, post aliqua heroicæ fortitudinis argumenta occubuit, & cum eo extinctum est Ostrogothorum in Italia Regnum, quod ultra annos LX. prorogatum non est. Cæperat enim anno cccxciii. quo Odoacer à Theodorico primo in Italia Ostrogothorum Rege occisus est, & finem habuit in Teja ultimo in Italia Ostrogothorum Rege, qui victus à Romanis interiit anno dlx. vel, ut alii volunt, dlxii. Habes nunc statum Ecclesiæ in sexto sæculo sub Principibus Christianis, & Persecutiones, quas id temporis passa est Ecclesia. Consultò autem prætermisi persecutionem, quam Cabades Persarum Rex, imperante Justino, excitavit in Christianos, quorum plurimi, linguis, ipsius jussu, præcis, locuti sunt. Hæc enim persecutio brevis admodum fuit, & Christianis postmodum impensè favit ille Persarum Rex, ut videre est apud Nicephorum lib. 16. Hist. Eccles. cap. 36.

COLLOQUIUM II.

De Controversiis, Hæresibus, & de causâ trium Capitulorum, quæ in sexto sæculo afflixit Ecclesiam.

D. **F**uitne tandem in sexto sæculo ab omnibus Orientalis Ecclesiæ Episcopis excepta & approbata Oecumenica Chalcedonenfis Synodus?

M. *Flavianus* Patriarcha Antiochenus, & *Macedonius* Patriarcha Constantinopolitanus ad sanio-
riorem doctrinam reducti, Concilii Chalcedonen-
sis

sis defensionem susceperant, jamque spes affulgebat, fore ut, sublati omnibus dissidiis, Ecclesiæ Orientalis Episcopi in eandem sententiam descenderent, & tandem aliquandò Chalcedonense Concilium suo calculo approbarent. At *Severus* Ægypti Monachus, Sectæ *Severianorum* Auctor, & Concilii Chalcedonensis acerrimus insectator, hanc spem vanam omninò reddidit, novasque in Oriente turbas adversùs Concilii Chalcedonensis defensores concitavit. E Monasterio quippè anno dxi. *Severus* unà cum illis, qui ejus opinioni adhærebant, ejectus; mox ad Urbem Regiam perrexerat, tam pro se, quàm pro illis, qui cum ipso expulsi fuerant, legationem obiturus, sicut refert *Evagrius* lib. 3. cap. 33. Eà in legatione ad notitiam & familiaritatem *Anastasio* Imperatoris pervenit *Severus*, illiusque animum contra Concilii Chalcedonensis defensores adeò malis artibus exasperavit, ut, *Flaviano*, & *Macedonio* suis Sedibus Patriarchalibus jussu Imperatoris dejectis, & in exilium missis, ipse in Sedem Antiochenam temerè ac violenter sese intruserit, & confestim Epistolam Synodicam, in qua Concilium Chalcedonense anathemate damnavat, miserit ad Orientis Episcopos, quam multi Episcopi recipere, eumque ceu legitimum Episcopum agnoscere cùm nollent, non mediocriter ad iram accendit Imperatorem. Ast suam non diu sacrilegam temeritatem *Severus* impunè tulit. Mortuo siquidem *Anastasio* Imperatore anno dxviii. *Iustinus*, qui ei successit, primo sui Imperii anno *Severum* comprehendere jussit, & linguæ abscissione plecti. Quo nuncio accepto, *Severus* fugit in Ægyptum, eoque Sede Antiochenâ, quam invaserat, de-

dejecto, ad Thronum Patriarchicum Antiochenum erectus est *Paulus* egregius Concilii Chalcedonenſis defenſor. *Timotheus* quoque, quem *Severus* Sedi Constantinopolitane injuſte præfecerat, juſſu Juſtini Imperatoris, expulſus eſt, & in ejus locum ſubſtitutus *Joannes II.* qui ſtatim congregatâ Constantinopoli Synodo XLIII. Episcoporum, *Severum* Hæreticum & Antiochenæ Sedis invaſorem condemnavit, eundem omni honore, nomine, dignitate & operatione privavit, & geſta in hac Synodo Constantinopolitana ad Metropolitam Tyri *Epiphanium* & ad *Joannem* Patriarcham Hieroſolymitanum, atque ad alios de more tranſmiſit. *Epiphanius* acceptas Synodicas *Joannis* Patriarchæ Constantinopolitani Epistoſas; publicè in Eccleſia coràm Episcopis Provinciæ recitavit, tumque univerſus populus in feſtivas acclamationes erumpens, hæc ſæpiùs ingeminabat: *Ejecit Severum Dei Genitrix, qui turbavit Eccleſias.* Item: *Imperator juſſit, ut dixit Synodus. Imperator juſſit, & tota Synodus.* Rurſus: *Trinitas vicit, reſeſſit Acephalus &c. Depositus eſt Acephalus.* Poſt illas ſæpiùs repetitas populi acclamationes, Episcopi anathema pronunciarunt contra omnes Hæreticos, præcipuè contra impium, & Dei impugnatorem *Severum Acephalum & Manichæum.*

Venio nunc ad alteram Controverſiam eodem tempore etiam ventilatam. *Juſtinus* Imperator anno DXX. ad Hormiſdam Papam ſcripſit, ab eoque petiit, ut, damnato *Acacio* quondam Episcopo Constantinopolitano, & aliis erroris anathematizatis Auctoſibus, cæterorum nomina in Dyptichis retinerentur. Hæc quaſtio potiffimùm movebatur propter *Euphemium*, & *Macedonium*, qui ſumma

cuni

cum laude Ecclesiam Constantinopolitanam rexe-
rant, & quorum opinio apud populum maximè
florebat. *Hormisdas* in priori sententia perstitit, &
quamvis in Epistola, quam scripsit ad *Justinum*,
Imperatorem, ejus pietatem, & in pace Ecclesiæ
procuranda studium pluribus commendet, conce-
dere tamen noluit, ut *Euphemii*, & *Macedonii* no-
mina in Diptychis Ecclesiarum Orientalium in-
scripta remanerent. Verùm, cùm tot Ecclesiis,
videlicet Constantinopolitanæ, Ponti, Asiæ, Palæ-
stinæ, ac totius præsertim Dioceseos Orientalis
seu Antiocheni Patriarchatus, quæ *Euphemii*, &
Macedonii nomina è Diptychis expungere detre-
ctabant, *Justinus* Imperator vim inferre nollet; id
consilii cepit *Hormisdas* Pontifex, ut istud nego-
rium *Epiphanii*, qui post mortem *Joannis II.* con-
secratus fuerat Episcopus Constantinopolitanus,
prudentiæ permitteret, cui ideo Vicariam Sedis
Apostolicæ Præfecturam delegavit. Hac igitur sibi
demandatâ Vicariâ Sedis Apostolicæ Præfecturâ
Epiphanius summâ cum prudentiâ usus est, ejusque
operâ omnibus Orientis Episcopis in Sedis Apo-
stolicæ communionem admissis, pax inter utram-
que Ecclesiam Orientalem scilicet & Occidentalem
anno DXX. omninò confecta est.

D. Nulla ne alia circâ Doctrinam in sexto
Ecclesiæ sæculo excitata est controversia?

M. Gravissima in sexto Ecclesiæ sæculo circâ
hanc propositionem: *unus de Trinitate passus est*,
mota est controversia. Hanc quippè propositio-
nem, quam *S. Proclus* Episcopus Constantinopo-
litanus docuerat in sua Epistola ad Armenios cita-
ta in Concilio Chalcedonensi, de industria *Petrus*

Fullo Hæreticus Eutychianus sacro Trisagio addiderat. Imperator quoque *Zeno* Eutychianorum, fautor eam inseruerat in suo Edicto, quod *Henoticon* appellavit, & *Anastasius* ejus in Imperio successor, aliique, qui Chalcedonensem Synodum reiiciebant, eamdem propositionem crebrâ usurpatione consecraverant. Quò factum est, ut hæc propositio: *unus è Trinitate passus est*, quasi Eutychianorum redolens Hæresim, apud Catholicos malè audiret. Contigit autem circa annum *DXIX.* ut Monachi Scythæ, quos inter eruditione eminebat *Joannes* cognomento *Maxentius* hanc propositionem: *unus è Trinitate in carne crucifixus est*, omnibus & credendam & defendendam passim inculcarent. Sed cùm prædicti Monachi à *Victore* Diacono, & à quibusdam aliis Catholicis tanquam Eutychiani per contemptum sese traduci viderent, fidei libellum Legatis *Hormisdæ* Papæ Constantinopoli exhibuerunt, in quo suam de Christo Domino fidem pluribus exposuerunt. Legati, sæpius illis auditis, quò ejusmodi hominum sese molestiâ liberarent, tale denum dedere responsum: *quod non est scriptum à Leone Papa, non suscipimus*. Hac repulsâ Monachi Scythæ in indignationem acti, Romam, ad *Hormisdæ* Legationem mittere decreverunt. Electi *Achilles*, *Joannes*, *Leontius* & *Mauritius*, qui hac Legatione fungerentur. His Romam ap-
 pulsis, *Hormisdæ* integram Scytharum causam pendere jussit usque ad reditum Legatorum. At cùm Romæ jugem annum & ampliùs morati fuissent Scytharum Monachorum Legati, & aliundè *Dioscorum* *Hormisdæ* Legatum, quem hostem insensissimum semper experti fuerant, propediem
 Ro-

Romæ adfuturum intelligerent, ne illius, & Hormisdæ, qui ad eorum sententiam accedere volebat, auctoritate opprimerentur, diuturniorem Romæ moram se facere haud posse dictitantes, ex urbe egressi sunt. Ea agendi ratione offensus Hormisdas Papa, Epistolam scripsit ad *Possefforem*, in qua Monachos Scythas ut contentiosos, superbos, pertinaces, & ad seditionem proclives coarguit, nec Justiniani nepotis Justinii Imperatoris, qui Monachis Scythis impensè favebat, flecti unquam potuit, ut sua auctoritate probaret hanc à Monachis Scythis assertam propositionem: *unus è Trinitate in carne passus est*, tum quia, inquiebat Summus ille Pontifex, nonnulli sibi persuadere poterant, hanc propositionem: *unus è Trinitate in carne passus est*, aliquam affinitatem habere cum *Petri Fullo-*
nis recens proscripto dogmate: tum quia etiam Synodus Chalcedonensis absque ope illius propositionis Hæreses Eutychetis, & Nestorii confixerat. His permotus rationibus *Hormisdas* Papa approbare noluit hanc Scytharum Monachorum propositionem, quam ad fidem in Concilio Chalcedonensi stabiliendam minimè necessariam, sed potius intempestivam, & turbandæ potius Ecclesiæ, quàm ædificandæ opportunam esse judicabat:

D. Monachi Scythæ, qui hanc propositionem: *unus è Trinitate in carne passus est*, tam acriter defenderunt, Eutychianâ Hæresi fueruntne infecti?

M. Eminentissimus Annalium parens Card. *Baronius* Eutychianæ Hæreseos notam Monachis Scythis inussit, à qua tamen doctissimus Cardinalis *sius* lib. 2. Hist. Pelag. cap. 18. & seq. illos egre-

giè vindicat, demonstratque, Monachos Scythas non solum eâ culpâ vacasse, sed etiam Eutychiez Hærescos strenuos oppugnatores fuisse, quamvis tamen fateatur, obstinatum eorum studium, quo præconceptæ sententiæ ad cæterorum usque contemptum adhærere, culpâ non caruisse. Certè, ut obiter dicam, Monachos Scythas ab Eutychiâna Hæresi prorsus alienos fuisse variis momentis evinci potest. Primò, quia duas in Christo naturas post incarnationem inconfusas professi sunt, ut videre est in libello fidei, quem prædicti Monachi Legatis Hormisdæ Papæ Constantinopoli exhibuerunt. Secundò, *Eutychem, Dioscorum*, & eorum Sectatores atque fautores palam damnaverunt, & Synodum Chalcedonensem magna cum veneratione susceperunt, ut liquet ex eorum fidei confessione, quæ extat tomo iv. Biblioth. Patrum Parisiensis. Tertiò, Monachi Scythæ suam fidei professionem per *Joannem* Diaconum miserunt ad Episcopos Africanos, qui à *Trafamundo* Vandalorum Rege Ariano in Sardiniam exules fuerunt deportati, quos inter doctrinæ & sanctitatis famâ eminebant Episcopi Provinciæ Bizacenæ, quorum *Dacianus* antiquitate, & *Fulgentius* Ruspensis Episcopus scientiâ primas tenebant. Perlecto igitur illo fidei libello à Joanne Diacono delato, Episcopi Africani non solum fidem Monachorum Scytharum ex integro commendarunt, verum etiam datâ operâ librum scripserunt, cui titulus *de Incarnatione & Gratia*, in quo omnes Scytharum de Christo, & de Gratia sententias approbarunt, multisque solidis argumentis muniverunt. Porro, tot nobiles doctrinæ suæ adstipulatores nancisci non potuissent

Mo-

Monachi Scythæ, si reverà in luto Eutychianæ Hæreseos hæssissent, sicut asserit Baronius. Quartò, hanc propositionem: *unus è Trinitate passus est carne*, pro cuius defensione tot peregrinationum incommoda, totque labores Monachi Scythæ devorare coacti sunt, approbavit, & Catholicam declaravit anno dxxxiv. Joannes II. Summus Pontifex in Epistola ad Justinianum Imperatorem, in qua etiam *Acemetas* Monachos, qui acerrimè Scythis Monachis resistentes in hunc errorem proruperant, quod negarent *unum de Trinitate passum*, & *Beatam Mariam* verè & propriè esse Dei *Genitricem*, communione privavit laudatus Pontifex, nisi resipiscerent, & ad sanam mentem redirent. Eandem propositionem: *unus è Trinitate passus est carne*, pro cuius veritate tanto conatu certarunt Monachi Scythæ, sub anathemate credendam proposuerunt quinta Synodus generalis Canone x. & Concilium Lateranense sub Martino I. Can. 11. His itaque momentis manifestò patet, Monachos Scythas Eutychianâ Hæresi non fuisse infectos, & hanc propositionem: *unus è Trinitate passus est carne* in sensu Catholico intellectam defendisse.

Non me fugit, *Trifolium* Presbyterum in Epistola ad *Faustum* Senatorem, quæ extat tomo iv. Conciliorum Editionis Labbeanæ pag. 1390. Hanc propositionem à Monachis Scythis assertam: *unus è Trinitate passus est*, sinistro prorsus interpretamento excepisse, dum sic ait: *ista doctrina de fonte Arii prodiit, & est conveniens cum omnibus Hæresibus &c.* Verùm, hac in re *Trifolius* excusatione dignus est. Quippe, qui à *Fausto* Senatore de hac propositione per Epistolam interrogatus, nec de fide & doctrina

Scytharum Monachorum certior factus, sed de tur-
bis dumtaxat ab ipsis Constantinopoli, & Romæ
excitatis, facile sibi persuasit, illos Monachos in-
sensu hæretico hanc propositionem asseruisse, cum
Legatos Hormisdæ Romani Pontificis adversarios
haberent, immò & ipsummet Summum Pontifi-
cem. Cum igitur *Trifolius* nec professionem fidei,
nec libros à Monachis Scythis editos, dum hanc
ad *Faustum* scripsit Epistolam, adhuc legisset, mi-
rum non est, si in hac quæstione facti erraverit, &
Hæreticum illius propositionis sensum Monachis
Scythis affinxerit, à quo tamen illi vehementer
abhorrebant. Sed hæc obiter in gratiam Scytha-
rum Monachorum dicta sufficiant. Si autem plura
super hac re scire aveas, legis Cardinalem *Nori-
sium* loco mox laudato, & *Natalem Alexandrum*,
Dissertatione I. in Historiam Ecclesiasticam sexti
 sæculi.

D. Hæretici Eutychiani dicti *Accephali*, qui
Concilium Chalcedonense rejiciebant, fueruntne
in varias Sectas divisi?

M. Quatuor inter Hæreticos Eutychianos
dictos *Accephalos* natæ sunt Sectæ, quarum una erāt
Corrupticolarum; altera, *Incorrupticolarum*; tertia,
Agnoëtarum; quarta *Tritheitarum*. Hi, qui *Corrup-
ticole* dicebantur, *Severum* Monachum Hæreti-
cum & Sedis Antiochenæ invasorem, cujus supe-
rius memini, sectabantur. Ille quippè Hæreticus
interrogatus, an Christi Domini Corpus ante re-
surrectionem fuisset corruptibile? an corruptionis
expers? Respondit corruptibile fuisse, & perindè
ac corpus nostrum detrimenta passum fuisse, pro-
pter quæ reparanda, esuriret; sitiret; defatigare-
tur,

tur, opusque haberet cibo, potu, & requie ad reficiendas vires. Quo audito *Severi* responso, quidam Alexandrinorum à *Juliano* Halicarnassensi Episcopo sciscitatus est, quid eâ de questione ipse sentiret? Tùm ille Hæreticus Eutychianus ex adverso dixit, Corpus Christi ante resurrectionem incorruptibile fuisse, & specie tenus dumtaxat, solâque œconomiâ, famem, sitim, aliasque id genus affectiones, quemadmodum post resurrectionem passum esse in terris. Ex hoc *Juliano* Halicarnassensi Episcopo pullulavit Secta Incorrupticolarum, seu Phantasiastarum, vel Aphthardocetarum, quos hoc potissimum argumentum movebat: si corruptibilem Christi carnem dixeris, jam hoc ipso duas in Christo naturas fatearis necesse est, unam incorruptam, alteram corruptionis capacem. Eo argumento usos fuisse Incorrupticolas testatur *Leontius* lib. de Sectis Actione v. at *Severus*, aliique Corrupticolæ è contrario asserabant, posse in Christo naturæ singularitatem adstrui, licet ejus caro corruptioni esset obnoxia. Hæresim Incorrupticolarum refellunt omnia Scripturæ sacræ testimonia, quæ Christum esuriisse, defatigatum & mortuum probant. Eam itidem refellunt Sancti Patres *Iustinus* Martyr Oratione contra Gentes, *S. Athanasius* lib. de Incarnatione, *Basilii* Oratione de Gratiarum actione, *Gregorius* Nissenus lib. contra Eunomium, *S. Joannes Chrysostomus* Hom. 86. in Joannem, *S. Gregorius Nazianzenus* Oratione in sancta lumina, *S. Ambrosius* lib. de Fide ad Gratianum, & *S. Cyrillus Alexandrinus* in Epistola ad Successum, quorum testimonia *Leontius* Bizantinus lib. 2. contra Nestorium, & Eutychem refert. Eam-

dem Aphthardocetarum, seu Incompactularum Hæresim accuratè refellit doctissimus noster *Natalis Alexander* Dissertatione sextâ in Panoplia adversus Hæreses sexti Ecclesiæ sæculi.

Dum hæc Alexandria de *Corruptibili & Incompactibili* inter Eutychianos feruëret disceptatio, *Themistius* Diaconus (non vero *Themistius* gentilis ille Philosophus, qui sæculo quarto vixit, sicut Nicephorus lib. 18. Hist. Eccl. cap. 49. oscitanter scripsit) *Timotheum Asterium* Episcopum Alexandrinum & Hæreticum Acephalum interrogavit, an Christus ignoraret aliqua, cum fuerit corruptioni obnoxius? Id Timotheus negavit; à cujus proinde communione deficiens Themistius, Christo ignorantiam adscripsit, & *Agnoëtarum* Sectam conflavit, qui etiam *Themistiani* ab illo dicti sunt. Hi Hæretici asserabant, Christum ignorasse diem *Consummationis* atque *Judicii*, sicut testatur *S. Sophronius* Patriarcha Hierosolymitanus in litteris ad Sergium Patriarcham Constantinopolitanum, quæ lectæ sunt in Actione xi. sexti Concilii generalis. Affirmabant etiam, Christum ignorasse, ubinam esset sepulchrum Lazari, de quo apud Evangelistam Joannem sanctas sorores interrogavit his verbis: *ubi posuistis eum?* Hunc Agnoëtarum errorem cum Monachi Palæstini ad Gregorium M. Papam detulissent, munus illum confutandi *Eulogio* Patriarchæ Alexandrino creditum est. Is autem, sicut refert *Photius* Codice 230. probavit primò, nihil prorsus Christo Domino, etiam ut homo erat, latuisse, hocque in dubium vocare periculosa temeritatis esse. Secundò, ostendit, eorum, quæ de Christo in sacris litteris dicuntur, quædam illi se-

cun-

cundum *veritatem* convenire, putà famem, sitim, &c. quædam per *relationem*, ut ad ipsum propriè non pertineant, sed ad eos, quorum ipse caput est, ut exempli gratià, cum *peccatum & maledictio* nostri causà factus dicitur, hujusque generis esse ignorationem, quam Psalmus 78. exprimit his verbis: *tu scis insipientiam meam*. Tertiò, observat, per sciscitationem non continuò indicari nescientiam; cum ipsemet Deus ab Adamo quæfierit, *ubi es?* Denique, addit *Enlogius*, quosdam censere, Christum propter nonnullas rationes negasse se scire diem judicii, maximè ut à curiosis id genus quæstionibus discipulos avocaret, vel eum inscientiam professum fuisse propter naturam quam gerebat, non quod sibi quidquam ignotum, abstrusumve fuerit. Hæc *Enlogius*, cujus librum contra Agnoëtis editum utriusque Ecclesiæ traditioni consentaneum esse S. Gregorius M. Papa declaravit lib. 10. Epist. 35. Hunc Agnoëtarum errorem solidè quoque refellunt *Christianus Lupus* in Dissertatione de quinta Synodo generali cap. 7. & *Natalis Alexander* in Dissertatione septima contra Agnoëtas in Panoplia adversus Hæreses sexti Ecclesiæ sæculi.

Postremò, Auctor *Tritheitarum* Sæctæ fuit *Joannes Grammaticus*, cognomento *Philoponus*, Eutychianus, qui quasi sutor ultra crepidam procedere, & falcem in messem alienam mittere volens, in graves impegit errores. Hic siquidem, *Naturam* ab *Hypostasi*, seu Persona, cum non distingueret, sic inscitè ratiocinabatur: Natura non distinguitur ab Hypostasi, seu Persona, sed in Christo est unica Hypostasis, seu Persona, ergo in
Chri-

Christo est unica natura seu divina. Qui error est Eutychianorum. Rursum eodem falso nixus principio sic arguebat: Natura non distinguitur ab Hypostasi, seu Persona, sed in Trinitate sunt tres Hypostases, seu tres Personæ, igitur & tres naturæ. Qui error est Arianorum, & Tritheitarum. Negavit etiam *Philoponus* resurrectionem Corporum, & adversus illam librum conscripsit, quem *Theodosius, Conon, Eugenius & Themistius* Eutychianæ pariter Sectæ homines acerrimè confutarunt, ut videre est apud Photium in Biblioth. Cod. xxi. xxii. & xxiii. Hæ sunt quatuor Sectæ, quæ ex Acephalorum Hæresi, quasi totidem belluæ ex monstro sine capite eruperunt.

D. Circà Hæresim Agnoëtarum, qui Christo ignorantiam tribuebant, hoc unum scire velim, an scilicet Agnoëtis accensendus esset ille, qui assereret, Christum, ut hominem, aliquid ignorasse eorum, quorum scientiam quovis modo homo habere potest?

M. Qui assereret, Christum, ut hominem, aliquid ignorasse, Hæreticus Agnoëta non foret, quia illi Hæretici dicti *Agnoëta* ignorantiam Christo non solum secundum naturam humanam, sed absolutè secundum naturam omnem affingebant. At enim illi Hæretici, utpotè Eutychiani, unam dumtaxat naturam, seu divinam, in Christo post Incarnationem agnoscentes, nullam in eo admittebant naturam, per quam sciret illa, quæ antiqui Patres dicunt Christum secundum naturam humanam nescivisse, sed secundum naturam divinam, perfectissimè cognovisse. Quando igitur Hæretici Agnoëtæ dicebant, Christum, ut hominem, ignorare

rare diem iudicii , intelligebant Christum penitus ignorare diem illum , adeò ut secundum nullam naturam ipsum cognoverit . Cæterum , quamvis ille , qui assereret , Christum secundum naturam humanam aliquid ignorasse , Hæreticus Agnoëta non esset , incideret tamen in errorem alienum à doctrina Sanctorum Patrum , qui constanter docent , Christum , etiam secundum naturam humanam , nec extremi iudicii diem , nec sepulchrum Lazari , nec aliquid aliud ignorasse . Legi potest super hac re *Natalis Alexander* Dissertatione 39. in Responsione ad tertiam objectionem in *Panoplia* adversus Hæreses quarti Ecclesiæ sæculi .

D. Præter illas quatuor , quas mox recensuisti , Acephalorum Hæreticorum Sæctas , fueruntne in sexto Ecclesiæ sæculo alii Hæretici , qui in aliquorum Sæctam coaluerint ?

M. Aczmetæ Monachi fervidiùs impugnantes Scythas Monachos , de quibus jam sermonem habuimus , lapsi sunt in Hæresim , quæ potissimum in hoc versabatur , quod negarent , *unum de Trinitate Incarnatum & carne passum esse , atque Beatam Mariam Virginem verè & propriè Dei Genitricem esse* . Imperator Justinianus anno dxxxiv. adversus Aczmetas Monachos Romam ad Joannem II. Summum Pontificem misit *Hypatium* Ephesiorum Episcopum , & *Demetrium à Philippis* , ut hanc Hæresim Sedi Apostolicæ denunciarent . Acceptis Imperatoris litteris , auditæque Legatione , Joannes II. ad Justinianum Imp. scripsit Epistolam , in qua Aczmetas Monachos obstinato animo in errore perseverantes ab Ecclesiæ communione præcidit , nisi ab errore quamprimum resilirent . Eodem anno , eadem-

demque de causâ Joannes II. litteras ad Senatores *Avienum*, *Liberium*, aliosque dedit, quæ extant apud *Baronium*, in quibus tres sibi ab Imperatore propositas quæstiones affirmat, quæ subortis diffidiis occasionem dederant. I. *Utrum unus è Trinitate Christus Deus noster dici possit?* II. *An Deus Christus carne pertulerit impassibili Deitate?* III. *An propriè & veraciter Mater Domini nostri Jesu Christi Maria semper Virgo debeat appellari.* Quas propositiones tamquam fidei Catholicæ consentaneas se approbasse scribit Summus Pontifex, easdemque subjectis Scripturæ sacræ & Sanctorum Patrum testimoniis confirmat, ac denique illos Senatores monet, ut *Acæmetarum Colloquia* vitent, nihilque cum illis sibi existiment esse commune. Hujus *Acæmetarum Monachorum Ordinis* in Ecclesiâ Orientali olim celeberrimi fundator in quinto Ecclesiæ sæculo extitit *S. Alexander* cujus Vitam ab Auctore *Acæmeta* Monacho ejus discipulo scriptam edidit *Bollandus* ad diem xv. Januarii. Appellabantur autem illi Monachi *Acæmeta*, idest, *Insomnes*, non quod prorsus insomnes, & jugiter conniventes oculis, perpetuis sese vigiliis exercerent, ut quidam de illis perperam scripsere, sed quod divina in eorum Ecclesiis Hymnologia, seu Psalmodia diu noctuque nunquam cessaret, nulla-que hora vacaret à divinis laudibus. Quæ perpetua Psalmodia, ut jam observavimus in ultimo Colloquio in Historiam quinti Ecclesiæ sæculi, in Monasterium Agaunense, & in quædam alia Galliarum Cœnobita fuit etiam introducta.

D. Expone nunc, quæso te, sed breviter, ortum; progressum; & finem famosæ, ac sæpius decan-

cantatæ trium Capitulorum Causæ, quæ, uti sæpius audiui, Ecclesiam in sexto sæculo diù multùmque exagitavit.

M. Celeberrimæ trium Capitulorum Causæ originem dedit damnatio doctrinæ *Origenis*, quam *Pelagius* *Vigilii* Papæ Constantinopoli Apocrisarius procuravit, eo pacto sperans, se *Theodori* Cæsareæ Cappadocum Metropolitæ, Origenistarum magni Patroni, potentiam atque exultationem, quâ apud Imperatorem plurimùm pollebat, depressurum. *Pelagius* itaque à Monachis Palæstinæ acerrimis doctrinæ *Origenis* insectatoribus rogatus, & continuis sollicitationibus impulsus flagitavit à *Justiniano* Imperatore, ut *Origenes* damnaretur. Annuit facillimè Imperator, & in *Origenem* circa annum DCLIII. lata est damnationis sententia, quæ, teste *Liberato*, non solum à *Menna* Constantinopolitano Episcopo, verùm etiam à *Vigilio* Romano Pontifice, *Zoilo* Alexandrino, *Ephremio* Antiocheno, & *Petro* Hierosolymitano subscripta Doctrinæ *Origenianæ* grave vulnus intulit. At, proh dolor! hæc doctrinæ *Origenis* damnatio ingentium turbarum & calamitatum origo ac seminarium fuit. Ejus enim defensione desperatâ, Origenistæ ad ultionem animum dolosè verterunt. *Theodorus* siquidem mox citatus Cæsareæ Cappadocum Metropoli, insignis Origenista, & fautor Sectæ Acephalorum, qui Concilium Chalcedonense rejiciebant, fraudulenter persuasit *Justiniano* Imperatori, omnes Acephalos Concilio Chalcedonensi haud difficulter subscripturos, si tria tantùm in prædicto Concilio facta, quæ ad fidem minimè attinebant, corrigerentur. Nempe, si damnaretur *Theodorus* Mopsuestiæ Epi-

Episcopus, ejusque scripta diris devoverentur. Deinde, si proscriberentur libri Theodoreti Cyri Episcopi contra XII. Capitula Sancti Cyrilli Episcopi Alexandrini in Ephesina generali Synodo consecrata. Denique, si Anathemati subjiceretur Epistola Iba Edesseni Episcopi ad *Marim* Persam. His tribus damnatis Capitulis, subitam omnium Acephalorum unionem Justiniano Imperatori promisit. Hæc audiens Imperator, qui Acephalorum unionem frustra hætenus tentaverat, pacem hac trium Capitulorum damnatione se toti orbi Christiano donaturum sperans, abjectâ omni cunctatione Edictum anno *DXLIV.* contra tria hæc Capitula promulgavit, cui *Stephanus* Diaconus Constantinopoli Sedis Apostolicæ Apocrisarius, qui Pelagio successerat, subscribere noluit. Ei tamen tres Patriarchæ, licet inviti, subscripserunt, *Mennas* Patriarcha Constantinopolitanus, *Petrus* Hierosolymitanus, & *Ephremius* Antiochenus. *Stephani* Apocrisarii sui denegatam subscriptionem approbavit, ratamque habuit *Vigilius* Papa, nec ullo pacto adduci potuit, ut hoc Edictum contra tria Capitula ab Imperatore promulgatum sua subscriptione firmaret. *Vigilii* Papæ exemplum secuti sunt omnes Occidentis Episcopi, arbitrari hoc Imperatoris Edictum, absque gravi in Synodum Chalcedonensem injuriâ approbari, aut aliquâ subscriptione muniri ullo modo posse. His difficultatibus præpeditus Imperator, consultius esse duxit, ut hæc quæstio discuteretur Constantinopoli in plena Synodo, ad quam ut facilius Patriarchas pertrahere posset, Acephalorum Sectæ ad Orthodoxam societatem reducendæ studium prætexuit. Ad hanc Synodum *Vigilius* Ro-

ma-

manus Pontifex ab Imperatore vocatus, Româ sub finem anni DCLIV. discessit, non rectâ tamen Constantinopolim perrexit, sed in Siciliam profectus est eo consilio, ut ibidem Synodus cogeretur. Constantinopolim tandem pervenit *Vigilius* die xxv. Januarii anni DCLVII. & summo honore à Justiniano exceptus est, ibique præclara Pontificiæ suæ auctoritatis exhibuit argumenta. Decretum enim contra Acephalos, quibus plus justò favebat *Theodora* Augusta, publicavit, & *Mennam* Patriarcham Constantinopolitanum à communione suspendit, quod pravis suis suggestionibus plurimos Episcopos ad subscribendum Justiniani Imperatoris Edicto compulset; sed, rogante postea *Theodora* Imperatrice, quinque post menses *Menna* communionem *Vigilius* restituit. Obtinuit etiam idem Pontifex à Justiniano Imperatore, ut Constantinopoli anno DCLVIII. haberetur Synodus Lxx. Episcoporum, in qua causa trium Capitulorum diligenti & maturo examine ventilari posset. Huic Synodo præfuit *Vigilius*, sed cum secus ac sibi persuaferat, rem succedere, nec inter Episcopos convenire animadverteret, interrupit Synodum, & statuit per semetipsum proferre sententiam; ac tandem diuturnioris moræ in Urbe Regia impatiens, & Justiniani violentiis fractus, *judicatum* ad *Mennam* Patriarcham Constantinopolitanum dedit, in quo, præter omnium expectationem, propugnata huc usque tria Capitula, mutata de repente sententiâ, damnavit; adjectâ tamen hac clausulâ: *Salva in omnibus reverentia Synodi Chalcedonensis*. Hac appositâ clausulâ autumavit *Vigilius*, se utriquo parti fecisse satis, *Græcis*, quod tria Capitula damnaasset; *Latinis*, quod salvâ Syno-

Synodo Chalcedonenſi id ſe feciſſe ſignificaffet. Sed vanâ ſpe deluſus eſt. Nam ubi primum Vigili *Judicatum*, quo tria Capitula damnabantur, & nova Juſtiniani Imperatoris Ediſta in Occidente innotuerunt, conqueri ſimul ſinguli, ac deplorare cœperunt Synodi Chalcedonenſis authoritatem à Vigilio depreſſam, proditam ab illo fidem, & Eccleſiam pravo dogmate imbutam. Africani, & Illyrici Epiſcopi *Judicatum* Vigili improbarunt, quin, *Ruſticus* & *Sebaſtianus* doctiſſimi Eccleſiæ Romanæ Diaconi, qui antehac *Judicatum* Vigili approbaverant, ſeſe poſteâ à communione illius quali Concilii Chalcedonenſis prævaricatoris ſegregarunt, & *Aurelianus* Arelatenſem Epiſcopum, necnon aliquot Galliarum Epiſcopos in ſuas partes pertraxerunt. Uno verbo, fremebat, & tumultuabatur univerſus Occidens, palàmque & Vigili Papæ *Judicato*, & Juſtiniani Imperatoris Ediſtis non modò Epiſcopi, ſed integræ plebes refragabantur. Quare, cùm in dies novæ turbæ ob illam de tribus Capitulis Quæſtionem in Eccleſia exorirentur, Œcumenicâ Synodo ad illas conſopandas opus eſſe non tantùm *Vigilius*, ſed *Juſtinianus* quoque intelligebant. *Vigilius* priori inhærens ſententiæ in Italia, aut in Sicilia Synodum cogi peroptabat, nec ſemel id à Juſtiniano Imperatore ſe obnixè petiſſe teſtatur in ſuo *Conſtituto* anno DLIII. ad eundem Imperatorem dato. At *Juſtinianus* in Urbe Regia Synodum celebrari voluit. Conſenſit tandem *Vigilius*, ſed interim *Judicatum*, quod emiſerat, ex manibus *Mennæ* Patriarchæ Conſtantinopolitani recepit, & omnem deinceps de tribus Capitulis quæſtionem uſque ad indiſtam Conſtantinopoli Synodum ſub Anathematis pœna inter-

interdixit. Pauci Episcopi ex Occidente cum ad Synodum accederent, & aliundè *Vigilius* sine Occidentalibus Episcopis quidquam decerni nolle, *Justinianus* Imperator tam longam moram ægrè ferens, incentore sæpè laudato *Theodoro* Cæsare Episcopo, Edictum contra tria Capitula publicavit, illudque palàm in Ecclesia Regiæ Urbis & alibi affigi jussit. Hoc Imperatoris contra tria Capitula Edictum statim ac publicatum & affixum intellexit *Vigilius*, in placidianam domum accitis tum Latinis, tum Græcis Episcopis excommunicationem comminatus est, si Edicto Imperatoris obtemperarent. Sed *Theodorus* Auctor Edicti, minis Summi Pontificis insuper habitis, Græcorum Antistitum catervam secum trahens, ad Ecclesiam, in qua suspensum erat Edictum, se contulit, ibique Sacro-Sancta Mysteria celebravit. Videns Imperator *Justinianus*, quòd *Vigilius* non modo Edictis Imperatoris adversaretur, verum etiam & eisdem obtemperantes Ecclesiasticâ communione privaret; irâ accensus est, eumque custodiæ tradi jussit. Quocirca *Vigilius* sibi timens confugit unà cum *Datio* Mediolanensi Episcopo in Ecclesiam Sancti Petri in Hormisda, ibique eum commorantem *Belisarius*, *Cethegus*, & *Petrus* Exconsules, ipse *Justinus* Imperatoris Justiniani nepos, cum *Marcellino* Quæstore adierunt, ut accepto juramento, & datâ Imperatoris fide, in Placidianas Aedes rediret. Rediit quidem Summus Pontifex, sed sanctâ post habitâ fide, cum in dies sæviùs se tractari animadverteret, biduo ante Natalem diem Christi Domini fugam meditatus, nocte intempestâ ex Placidiano Palatio cæcis vestigiis discedens Chalcedonem se recepit, atque apud S. Eu-

phemiz Templum latuit, quem *Datus* Mediolanensis Antistes, alique Latini Episcopi secuti sunt. *Vigilii* fugam ubi compertam habuisset Justinianus, Legatos ad ipsum Chalcedone agentem misit, qui cum rogarent, ut, acceptâ iterum publicâ fide, Constantinopolim rediret. Sed nihil isti Legati promoverunt, immò *Vigilius* Encyclicam Epistolam de suis calamitatibus scripsit. Noluit tamen, ne Imperatoris animum exasperaret, latam in *Theodorum* Cæsareæ Cappadocum Metropolitam depositionis sententiam, & communionis suspensionem adversus *Mennam* Patriarcham Constantinopolitanum promulgare, sicut ipsemet testatur in sua Epistola Encyclicâ. Hac *Vigilii* Papæ constantiâ victus Imperator Justinianus, Edictum, quo tria Capitula damnaverant, sustulit, eoque sublato, *Theodorus*, *Mennas*, & alii ejusdem factionis Episcopi fidei & pœnitentiæ libellos supplices *Vigilio* Papæ obtulerunt, ac de injuriis ipsi factis veniam sunt deprecati. His peractis, Constantinopolim reverso Summo Pontifici *Eutychius* Patriarcha Constantinopolitanus, qui in locum *Mennæ* demortui successus fuerat, suæ fidei professionem exhibuit, eumque rogavit Epistolâ à se, & ab *Apollinari* Alexandrino, *Domno* Antiocheno, & *Elia* Thessalonicensi Patriarchis subscripta, ut trium Capitulorum causam terminandam inchoaret. Consensit quidem *Vigilius*, eâ tamen lege, ut in hac dijudicanda ac dirimenda trium Capitulorum Causa tot essent Episcopi Latini, quot Græci.

D. Hæc à *Vigilio* Papa apposita conditio fuitne observata?

M. Non fuit observata. Græci siquidem Episcopo-

scopi hac intellectâ Vigiliî Papæ voluntate tumultuari cœperunt, asserentes, se ex longinquis Provinciis Synodi Oecumenicæ causâ venisse, hujus auctoritatem ac nomen deprimi si à paucissimis celebretur; plurimos sapientissimos excludendos, si parum cum Latinis numero coeundum sit. Synodos frequentissimas à solis Græcis fuisse celebratas; in Chalcedonensi sexcentorum & triginta Patrum Conventu Legatos tantum *Leonis* Papæ ex Latinis interfuisse; Nicænam omnibus venerabilem Synodum ex Græcis tantum constatam; notam esse Episcoporum Occidentalium in trium Capitulorum defensione obstinationem, cum quibus, si, exæquato numero, Orientales Episcopi disputationem inire deberent, paribus hinc inde suffragiis, re infectâ Concilium dimissum iri dictitabant. His Episcoporum Orientalium auditis rationibus, Justinianus Synodum celebrari jussit anno DLIII. At *Vigilius*, videns conditionem, quam ad Concilii celebrationem postulaverat, ab Orientalibus Episcopis & à Justiniano Imperatore fuisse rejectam, noluit, illustri licet legatione invitatus, huic Concilio interesse. Immo, publicavit suum *Constitutum*, in quo primò queritur, quod Synodus contra pactas condiciones fuerit cōacta. Secundò, aggreditur disputationem *de tribus Capitulis*, & LX. sententias, quæ Theodori Mopsuesteni esse dicebantur, per *Benignum* Episcopum Heracleæ Macedoniæ ad se ab Imperatore transmissas, damnat. Tertiò, Theodori Mopsuesteni nomen ac personam damnari non posse multis argumentis probat. Quartò, decernit, *Theodoretum* Cyri Episcopum, ejusque scripta speciatim proscribi non debere, cum in Synodo

Chalcedonenſi Neſtorio Anathema dixerit . Deum, nec Epistolam *Ibæ* Edeſſeni Episcopi ſub ejus nomine damnandam cenſet, tùm quia relectâ illâ Epistolâ in Synodo Oecumenica Chalcedonenſi Orthodoxus *Ibas* judicatus eſt ; tùm quia etiam decretis ejusdem ſanctiſſimæ Synodi *Ibas* ſubſcripſit . Huic *Vigilii* Papæ *Conſtituto* ſubſcripſerunt ſexdecim Episcopi, ſed eo non obſtante *Vigilii Conſtituto*, quod ne quidem in Synodo lectum eſt, Episcopi congregati tria Capitula, hoc eſt, *Theodori Mopſueſteni* libros, ejusque perſonam ; *Theodoret*i Cyri Episcopi ſcripta contra S. Cyrillum Alexandrinum, & Epistolam *Ibæ* Episcopi Edeſſeni ad *Marim* Perſam damnarunt . *Baronius*, alique *Anaſtaſium* Bibliothecarium ſecuti memorię prodiderunt, hanc ſententiam in tria Capitula prolatam in quinta Synodo generali non ſtatim approbaſſe *Vigilium*, & ob id in exilium pulſum ; ſed tandem ad ſubſcriptionem inflexum tria Capitula damnaſſe, quintam generalem Synodum ſua auctoritate approbaſſe, & omnia, quæ ad trium Capitulorum deſenſionem à ſe, vel ab aliis antehac dicta aut geſta fuerant, nulla & irrita declaraffe, ut videre eſt in Epistola Summi illius Pontificis ad *Euty-chium* Patriarcham Conſtantinopolitanum . Sed de hac quintæ Synodi generalis approbatione facta à *Vigilio* Papa, opportuniùs in ſequenti Colloquio diſceremus .

D. Hac quintæ Synodi generalis definitione fuitne tandem finita trium Capitulorum Cauſa ?

M. Non omninò finita fuit, ſed Venetiarum, & Iſtriæ Episcopi Schiſma fecerunt, & incentore *Paulino* Aquilejenſi Metropolita, Synodum anno DLVII. cele-

celebrarunt, in qua tria Capitula, citra Concilii Chalcedonensis injuriam damnari posse negarunt. Pro hujus Schismatis extinctione strenuè adlaborarunt Summi Pontifices Pelagius II. & Gregorius Magnus. Duravit tamen usque ad *Sergium I.* qui anno DCLXXXVII. Summum Pontificatum adeptus est. Verùm, quamvis absolutâ quintâ Synodo generali pax confestim non fuerit reddita Ecclesiis, inde tamen elevari, & deprimi non debet illius auctoritas. Quis enim nescit, post Nicœnam Oecumenicam Synodum ingentes tumultus ab Eusebianis, & Meletianis fuisse excitatos, & itidem post generale Chalcedonense Concilium multas ab Hæreticis *Acephalis* turbas ac tragedias motas esse? quid igitur mirum, si post quintam generalem Synodum pax Ecclesiæ, maximè Occidentali, quæ tria Capitula damnare nolebat, statim reddita non sit? Huic itaque quintæ generali Synodo, quæ tria Capitula jure optimo proscripsit, prava dogmata confodit, & viam, quæ tenenda est, docuit; adscribi minimè debet malitia, seu obstinatio quorundam, qui postea rebelles lumini fuerunt, & in præconceptis suis opinionibus, seu in defensione trium Capitulorum pervicaces Schisma conflagrant, quo ab Ecclesia divulsi sunt.

D. Quam rationem potissimum prætexebant hi, qui post quintam Synodum Generalem tria confixa Capitula defendebant?

M. His, qui post quintam Synodum Generalem pertinaciter illa Capitula defendebant, tria præcipuè suppetebant argumenta. Primum petebatur ex anteriori Ecclesiæ more neminem in Orthodoxæ pacis communione defunctum damnandi

post mortem . Alterum , erat auctoritas *Theodori* Mopsuestiæ Episcopi , celeberrimi olim Diœceseos Orientalis Magistri , qui à pluribus credi haud poterat prava sensisse, etsi multas effutiisset locutiones, quæ Nestorii Hæresim sapere videbantur . Tertium , ac principale fundamentum erat autoritas Concilii Chalcedonensis , in quo Theodoreti Cyri Episcopi fides laudata fuerat , & *Iba* Edesseni Episcopi Epistola ad *Marim* Persam perlecta , & approbata erat . Hanc igitur Concilii Chalcedonensis auctoritatem per proscriptionem trium Capitulorum labefactari, ac penitus everti autumabant . His fundamentis nitebantur quotquot post quintam Synodum generalem trium Capitulorum defensionem, suscipiebant . Sed frivola, nulliusque momenti erant adducta illa fundamenta . Ad primum siquidem respondebant Catholici , Ecclesiam jus habere eos etiam post mortem anathemate confodiendi , qui , dum viverent, meruerant ab ejus sinu segregari propter Hæresim, Schisma, aut atrocissima crimina, in quibus certum erat illos ad mortem usque perseverasse . Porro , *Theodorus* Mopsuestenus Episcopus , quem post mortem anathematizavit quinta Synodus generalis , errores in *Paulo Samosateno* jam proscriptos docuit, ac palam, dum viveret, editis libris tuitus est, Capitalia fidei dogmata omnium Sanctorum Patrum, fidelium consensione ante ipsum probata impugnavit, videlicet Christi Divinitatem , & Dei-patræ nomen ac dignitatem in Beata Virgine, Maria . Merito igitur *Theodorus Mopsuestenus* fuit etiam post mortem in quinta Synodo generali anathemate percussus . Alterum fundamentum peti-
tum ex auctoritate *Theodori Mopsuesteni* , quem
etiam


etiam multi Sancti Patres antè quintam Synodum generalem laudibus celebrarunt; elumbe omninò erat, quia Sancti Patres laudarunt Theodorum Mopsuestenum, antequàm ejus errores fuissent propalati. At semel detectis & in lucem productis ejus erroribus circa Incarnationem Filii Dei, circa Peccatum Originale, & alia præcipua Catholicæ Fidei capita, tunc Theodorus Mopsuestenus apud omnes Catholicos malè audire cœpit, non secus ac *Origenes*, qui, ob egregiam Ecclesiæ in confutandis Hæresibus navatam operam, à multis Patribus & Scriptoribus Ecclesiasticis encomiis fuit celebratus; sed patefactis ejus erroribus, damnatus & anathematizatus est etiam post mortem in quinta Synodo generali. Deniquè, authoritati Synodi Chalcedonensis, cui præcipuè adhærebant trium Capitulorum defensores, nullum omninò intulit præjudicium. damnatio trium Capitulorum in quinta Synodo generali facta; tùm quia *Theodoretus* Cyri Episcopus non fuit in Concilio Chalcedonensi susceptus, nisi postquam *Nestorio* palàm anathema dixisset, quo à se dicto anathemate, sua subindè scripta contra Sanctum Cyrillum Alexandrinum damnavit *Theodoretus*; tùm quia etiam judicia de scriptis *Theodoreti* & de Epistola *Iba* in Concilio Chalcedonensi lata, non fuerunt approbata à Sancto Leone Papa. Conscripta siquidem definitione fidei in Synodo Chalcedonensi *Actione sexta*, & conditis Canonibus eidem Actioni subnexus, de singularibus postea & privatis Episcoporum causis actum est, quarum judicium non fuit confirmatum à Sancto Leone, qui auctoritatem Synodi Chalcedonensis in sola fidei definitione constrinxit. Mirum igitur nemini videri debet,

quòd hæc de privatis Episcoporum Causis in Concilio Chalcedonenſi lata judicia , & à *Sancto Leone* Papa non confirmata , denuò in quinta Synodo generali examinata , & ad Crifim revocata fuerint , atque poſt maturam & accuratam diſcuſſionem damnata ſint hæc tria Capitula , ſeu perſona & ſcripta *Theodori Mopſueſteni* , libri *Theodoreti* Cyri Epſcopi contra Sanctum Cyrillum Alexandrinum , & Epſtola *Ibæ* Epſcopi Edeffeni ad *Marim* Perſam . Quæ de re ſi plura ſcire deſideres , leges diſſertationem quartam noſtri *Natalis Alexandri* in Hiſtoriam Eccleſiaſticam ſexti ſæculi .

D. Quam cenſuram inureres his , qui modò tria Capitula damnare nollent , & pro illorum deſenſione Apologias adornarent ?

M. Eos appellarem temerarios , ſuperbos & inobedientes . *Temerarios* quidem , quia ſolemni Eccleſiæ iudicio in Concilio Oecumenico lato , à Romanis Pontificibus confirmato , & omnium deinde Eccleſiarum conſenſu recepto reſragarentur . *Superbos* dicerem , quia in huiusmodi Factorum Doctrinalium cognitione , ſeſe perſpicaciores univerſâ Eccleſiâ iudicaret , ſuæque privata iudicia , ut plurimum errori obnoxia , totius Eccleſiæ iudicio maturâ cum deliberatione factò antepone-
rent . Demùm , eos cèù *inobedientes* damnarem , quippè qui in Doctrinalibus Factis , cujuſmodi ſunt tria Capitula , iudicio Eccleſiæ Catholicæ , quæ omnium Mater ac Magiſtra eſt , quæque in cenſura , ſeu in damnatione librorum Spiritus Sancti lumine ad eorum pravum ſenſum , erroresque cognoscendos illustratur & regitur , pervicaciter morem gerere detrectarent . Quocircà , jure optimo caſtigari de-

deberet audacia quorundam, qui pro *Origene*, pro *Theodoreto*, pro Abbate *Joachimo*, pro *Cassiano* & *Fausto*, & pro *Jansenio* Apologias temerè in vulgus sparserunt, & libros ab illis editos ab erroribus, quos Ecclesia in his damnavit, vindicare voluerunt. Sanè, ut obiter dicam, si à judicio Factorum Doctrinalium ab universali Ecclesia lato semel impunè resilere liceat, poterit quilibet pro omnibus Hæreticis ab Ecclesia confixis Apologias pro suo nutu & arbitrio concinnare. Periclitabitur infallibilis traditionis autoritas, quæ pendet è sensu librorum Sanctorum Patrum ab Ecclesia Catholica præfixo. Non poterit Ecclesia comprimere tumultus & contentiones, quæ sæpiùs suboriuntur occasione sensus librorum, nec sanam doctrinam à falsa & noxia, quæ in libris Authorum continetur, certò valebit discernere. Quæ omnia quàm oppidò falsa sint, & Ecclesiæ auctoritati contraria, nemo est qui statim non videat. Ecclesiæ itaque judicio in his Doctrinalibus Factis, tamquam sacræ anchoræ indivulsè adhærere debemus, nec unquam procaces illos imitari filios, qui reverentiam atque observantiam matri debitam exhibere renuentes, incertas cogitationes suas, ut inquit Scriptura sacra, judicio universalis Ecclesiæ elato supercilio anteponunt.



COLLOQUIUM III.

De Conciliis in sexto Ecclesiæ sæculo celebratis, & de rebus quæ in his gestæ sunt.

D. **P**RIUSQUAM de Conciliis Nationalibus & Provincialibus, in quibus sexto sæculo subortis contentionibus finis impositus est, vel sancita & instaurata fuit Ecclesiæ Disciplina, sermonem instituamus; quasdam quæstiones circa quintam Synodum generalem, quæ, sicut in superiori Colloquio dicebas, tria Capitula damnavit, breviter cum tua bona venia proponam, quarum dilucidatio haud parùm juvabit ad pleniorẽ hujusce quintæ Synodi generalis notitiã assequendam. In primis igitur à te quæro, quis convocaverit quintam Synodum generalem, quisve ei præfuerit?

M. Quintam Synodum generalem, quæ est secunda Constantinopolitana Oecumenica, convocavit *Justinianus* Imperator, consentiente tamen *Vigilio* Romano Pontifice. Aduere tres Patriarchæ, & cixv. Episcopi, eique præfuit *Eutychius* Patriarcha Constantinopolitanus, præesse tamen jure suo poterat *Vigilius* Summus Pontifex, si jure suo uti voluisset, quo tamen usus non est, quia Synodo interesse noluit. Octo Collationibus absoluta est hæc Synodus. In prima Collatione lecta est Justiniani ad Synodum sacra jussio, quã Imperator significabat, se istam Synodum generalem convocasse, ut, eliminatis Hæresibus, optatam Ecclesiæ quietem post tot ab Acephalis excitatos tumultus, dare

dare posset . Sed ab hac Synodo cùm Papa *Vigilius* abesset , sine cujus præsentia vel per se , vel per suos Legatos Concilium Oecumenicum esse non posse , probè intelligerent Episcopi Orientales , nobilissimâ ad eundem destinatâ trium Patriarcharum , aliorumque Antistitum Legatione , Vigilium etiam atque etiam rogarunt , ut Synodum præsentia suâ dignaretur , & secum de tribus Capitulis disputare haud gravaretur . His Legatis reposuit *Vigilius* , se propter corporis infirmitatem non posse ad hanc petitionem respondere . In postero autem die pollicitus est manifestare , quid ei de tali conventu placuerit . In secunda Collatione , Legati Præsules suæ Legationis rationem Synodo reddentes , retulerunt , *Vigilium* dixisse se non posse venire ad Concilium , quòd Occidentales Episcopi sibi adherentes in minori numero essent quàm Orientales , eumque subindè inducias postulasse , ut sententiam suam circa trium Capitulorum quæstionem ad Imperatorem mittere posset . In tertia Collatione Episcopi Fidem Catholicam ab Apostolis & Sanctis quatuor Oecumenicis Synodis expositam professi sunt , & Hæreticos ab iisdem Synodis damnatos confixerunt . In quarta Collatione Patres causam trium Capitulorum discutere cœperunt , lectæ sunt plures sententiæ excerptæ ex libris Theodori Mopsuesteni , ac recensitum impium ejus Symbolum , quo audito , exclamavit universa Synodus : *Hoc Symbolum Satanæ composuit* . In quinta Collatione recitata sunt ea quæ à Sanctis Patribus contra Theodorum Mopsuestenum scripta fuerant , & insuper disceptatum est , nùm liceret defunctos anathemate confodere ? probatumque multis exemplis id licitum esse , &

quan-

quandòque necessarium. Lecti sunt in eadem Collatione libri, quos *Theodoretus* Cyri Episcopus scripsit contra XII. Sancti Cyrilli Alexandrini Anathematismos, quibus damnatis, laudatum est sanctum Concilium Chalcedonense, quod non priùs Theodoretum ad communionem suscepisset, quàm is Nestorio anathema palàm dixisset. In sexta Collatione lecta est Epistola *Ibæ* Edeseni Episcopi ad *Mariam* Persam, & è vestigio in hanc vocem eruperunt Episcopi: *Epistola Hæretica est*. In septima Collatione, *Constantinus* Sacri Palatii Quæstor cum instrumentis probantibus *Vigilius* Papam tria Capitula semper damnaſſe ad Synodum ab Imperatore missus est. Unde in hac Collatione recitatum est Anathema quod tulit *Vigilius* contra Romanos Diaconos *Rusticum*, & *Sebastianum*, qui illius *Judicatum* impugnauerant, & trium Capitulorum erant acerrimi defensores. Lectæ sunt etiam Epistolæ ejusdem *Vigilii* Papæ ad *Valentinianum* Episcopum Tomitanum, & ad *Aurelium* Episcopum Arelatensem, ex quibus certò liquebat, *Vigilium* sæpiùs tria Capitula damnaſſe. Denique, in octava Collatione, definitivam adversus tria Capitula sententiam protulit Synodus, eique quatuordecim subjecit anathematismos, quorum duodecim non solum impia Theodori Mopsuesteni scripta, sed etiam ejus nomen ac personam, defensoresque configit. Decimus verò tertius & decimus quartus Theodoretum quidem libros adversus S. Cyrillum Alexandrinum scriptos, & *Ibæ* Epistolam, eorumque defensores proscribunt, *Theodoretum* tamen, & *Ibam* Orthodoxos Antistites in pace Ecclesiæ defunctos nullâ censurâ perstringunt.

D. Una

D. Una è præcipuis Synodi Oecumenicæ conditionibus, sicut me olim docuisti, est ut Summus Pontifex ei vel per se, vel per suos Legatos præsit, cum igitur huic quintæ Synodo *Vigilius* Romanus Pontifex nec per se, nec per suos Legatos præfuerit, non video qua ratione hæc Synodus dici possit Oecumenica?

M. Hæc quinta Synodus inter Oecumenicas meritò numeratur, quia licet *Vigilius* Romanus Pontifex ei non præfuerit, ab illo tamen, & ejus successoribus approbata, atque universalis Ecclesiæ consensu fuit postmodum recepta. At enim *Vigilius* in Epistola ad Eutychium Patriarcham Constantinopolitanum quintam Synodum auctoritate sua comprobavit, & *Constitutum*, & alia, quæ proprium Capitulorum defensione antehac scripserat, vel gesserat, omninò rescidit. Dein, *Pelagius* primus *Vigilii* successor quintam Synodum, antequam eligeretur Pontifex, approbavit, teste Victore Tunonensi in Chronico. Insuper, *Pelagius* secundus Pontifex Maximus Synodum quintam, itidem confirmavit, ut constat ex ejus Epistola ad *Eliam Aquilejensem*, & *Istriae Episcopos*, qui tum temporis ab Ecclesia Romana, ob trium Capitulorum defensionem, erant divulsi. Postremò, *S. Gregorius Magnus* eandem quintam Synodum approbavit, ut apertè colligitur ex ipsius Epistola ad *Joannem* Episcopum Constantinopolitanum, cui adhærentes aliæ Synodi Oecumenicæ, quæ post ipsius Pontificatum in Ecclesia fuere celebratæ, hanc quintam Synodum pro Oecumenica, seu generali agnoverunt, & approbarunt. Jure itaque optimo quinta Synodus generalis à Vigilio Papa, & ejus succes-

foribus, atque totius Ecclesiæ consensu recepta & confirmata accenseri debet Synodis Oecumenicis, quamvis *Vigilius* Romanus Pontifex ei nec per se, nec per suos Legatos præesse voluerit.

D. In hac quinta Synodo generali fueruntne dumtaxat damnata tria famosa Capitula?

M. Præter tria Capitula in quinta Synodo generali damnata, proscriptus est etiam error *Origenis*, ut videre est in Canone xi. illius Synodi, ubi inter alios Hæreticos, anathemate nominatim percellitur *Origenes*. Idque etiam apertè colligitur ex libro *Diurno* Romanorum Pontificum in secunda fidei professione, quæ hæc habet: *in hoc*, idest, in quinto Concilio generali apud Constantinopolim celebrato, *Origenes cum impiis discipulis & sequacibus Didymo & Evagrio, & qui Creatorem omnium Deum, & omnem rationalem ejus creaturam Gentilibus fabulis persecuti sunt, æternæ sunt condemnationi submissi*. Justâ igitur de causâ Illustrissimus *Huetius* Abrincensis Præsul lib. 2. *Origenianorum* cap. 4. sect. 3. num. 14. & Cardinalis *Norisius* in sua de quinta Synodo Dissertatione solidè refellunt *Halloixium*, qui in Apologia *Origenis* quæstione x. negat, *Origenem* ab Ecclesia fuisse damnatum, quod certè nemo ante illum dicere ausus fuerat, ac nemini ipse potuit persuadere. Legi etiam potest Dissertatio xvi. *Natalis Alexandri* in Historiam tertii sæculi, in qua Clarissimus ille auctor egregiè confutat *Halloixium*, qui perperam negat, *Origenem* in quinta Synodo generali fuisse damnatum.

Cæterum, an *Origenes* damnatus fuerit in principio quintæ Synodi, vel sub illius finem, idest, post cognitionem trium Capitulorum? controver-

sia

sia est inter viros eruditos. *Petrus de Marca* in Dissertatione de quinta Synodo, num. xxiii. censet cognitionem de Origene successisse trium Capitulorum damnationi. At *Cardinalis Norisus* in Dissertatione mox laudatâ, & doctissimus *Pagius* ad annum dlii. num. xxvi. asserunt, damnationem Originis in quinta Synodo generali anteveruisse damnationem trium Capitulorum. Sed hanc Controversiam, ut potè non magni momenti, in medio relinquimus, cum utrique opinioni sua constet probabilitas.

D. Age nunc, juxtâ seriem Chronologicam omnia recensere Concilia Nationalia, seu Provincialia, quæ in sexto sæculo fuerunt celebrata.

M. Sexto ineunte sæculo, seu anno dlii. habita est Romæ Synodus dicta *Palmaris* à loco ubi celebrata est. Tres jam Romæ annis præcedentibus coactæ fuerant Synodi ad extinguendum Schisma, quod in electione *Symmachi* legitimi Pontificis excitaverat *Laurentius* Archipresbyter S. Prædix, quem *Festus* Senator Romanus profusis pecuniis Pseudo-Pontificem eligendum curaverat. In his Synodis Romanis approbata est jussu *Theodorici* Italiæ Regis electio *Symmachi*, & rejecta electio *Laurentii*, qui tamen, ne novas moveret turbas, Episcopus Nucerinus constitutus est. Hoc pacto ad tempus sopitum, sed non sublatum fuit Schisma. Nam paulò post, sicut scribit *Anastasius*, zelo ducti aliqui ex Clero, & alii ex Senatu, maxime *Festus* & *Probinus* incriminarunt *Symmachum*, & subornarunt testes falsos, quos miserunt *Ravennam* ad Regem *Theodoricum*, accusantes *Beatum Symmachum*, & occultè revocaverunt *Laurentium*, post libellum Romæ factum, & se.

& fecerunt Schisma, & divisus est iterum Clerus, & alii communicabant Symmacho, alii Laurentio. Ut igitur huic recrudescenti Schismati tandem aliquando finis imponeretur, Theodoricus Rex, licet Arianus, iussit Romæ convocari Synodum, quæ est quarta Romana dicta *Palmaris*, ad quam cum spontè & volens Pontifex Symmachus causam dicturus accederet, ab irruentibus turbis æmulatorum suorum malè exceptus est, multique vulnerati Presbyteri, qui ipsum comitabantur. Rebus sic variâ confusione perturbatis, scripsit Synodus ad Regem, eique significavit, Symmachum, qui tantum non fuerat oppressus, à statutis Canonibus non posse compelli. Respondit Rex: *In Synodali esse arbitrio in tanto negotio sequenda præscribere, nec aliquid ad se præter reverentiam de rebus Ecclesiasticis negotiis pertinere, seque tantum velle, ut provisione Concilii pax in Civitate Romana Christianis omnibus redderetur.* Quibus acceptis, Laurentius Antipapa damnatus est, & Symmachus Papa innocens declaratus, Clericique, qui ab ipso desciverant, officio suo fuerunt restituti, dummodò eidem satisfacerent. Denique illius Synodi *Palmaris* Episcopi mandaverunt Ennodio Ticinensi Episcopo, ut libellum Apologeticum pro hac quarta Romana Synodo, & Symmacho Papa concinnaret, quem libellum ab Ennodio elucubratum quinta Synodus Romana habita anno *div.* auctoritate Synodali comprobavit.

D. Potuitne hæc quarta Synodus Romana, quæ *Palmaris* appellatur, Symmachum Romanum Pontificem, sic summo jure judicare?

M. Non potuisset hæc Synodus Romana Symmachum Pontificem Romanum judicare, nisi illius judi-

judicio sese spontè Symmachus subjecisset. Id ultro agnoverunt hujus Synodi Episcopi, qui statim ac congregati fuere contestati sunt, primò, quod hæc Synodus non fuisset legitima, nisi ejus convocationi assensum præbuisset ipse Symmachus, sic enim legitur in Actis hujus Synodi: *Memorati Pontifices, quibus allegandi imminebat occasio, suggererunt, ipsum, seu Symmachum, qui dicebatur impetitus, debuisse Synodum convocare Sed Potentissimus Princeps, seu Theodoricus Rex Italiæ, ipsum quoque Papam in colligenda Synodo voluntatem suam litteris demonstrasse significavit. Unde à mansuetudine ejus pagina postulata sunt, quas ab eo directas constabat. Secundò, ejusdem Synodi Episcopi palàm professi sunt, se esse inferiores seu minores judices, quorum judicio subjacere minimè poterat Romanus Pontifex, utpotè Vicarius Christi, & universalis Ecclesiæ Caput: Scientes quia ejus Sedi primùm Petri Apostoli meritum, vel Principatus; deindè secuta jussionem Domini Conciliorum venerandorum auctoritas, ei singularem in Ecclesiis tradidit potestatem: nec antedictæ Sedis Antistitem minorum subjacuisse judicio; in propositione simili forma aliqua testaretur: Demùm, constanter affirmarunt ejusdem Synodi Episcopi, se non judicasse, nisi consentiente & volente Symmacho Summo Pontifice, immò, & ipsis judicandi auctoritatem deferente: Et dùm in venerabili collectione sermo de incipiendo haberetur negotio, S. Papa Symmachus Basilicam Julii, in qua Pontificum erat Congregatio, ingressus est; & de evocatione Synodali Clementissimo Regi gratias retulit, & rem desiderii sui evenisse testatus est. Causa ergò de Sacerdotum animis (quæ de Concilio nondùm firmato tristitiam ministrabat)*

abscissa est: Auctoritatem ordinis corrigendi sicut poscebant Ecclesiastica Statuta, in omnium, qui ibidem convenerant, Episcoporum presentia, se dare professus est. Ex quibus verbis, quæ leguntur in Actis hujus Synodi quartæ Romanæ dictæ Palmaris, perspicuum est, prædictam Synodum non potuisse summo jure Symmachum Papam judicare, nisi illius judicio Romanus hic Pontifex sese ultrò subjecisset, & Episcopis, qui erant minores seu inferiores judices, auctoritatem dedisset judicium in ipsum proferendi.

D. Fueruntne in sexto Ecclesiæ sæculo celebrata multa Concilia Nationalia, & Provincialia ad sancendam, vel instaurandam Ecclesiæ Disciplinam?

M. Multa tam in Oriente, quàm in Occidente celebrata sunt. Sed Conciliorum Nationalium, seu Provincialium, quæ ad refarciendam Ecclesiæ Disciplinam sexto Ecclesiæ sæculo in Oriente habita sunt, nulla modò supersunt monumenta, quippè quæ temporis rerum omnium edacis injuriâ interciderunt. Verùm, integræ & incorrupta nobis etiamnum suppetunt Acta Conciliorum Nationalium & Provincialium, quæ in Galliis, & in Hispaniis ad sartam rectam conservandam Ecclesiæ Disciplinam sexto sæculo cōacta sunt, quarum meminit Historia Ecclesiastica, & superstites adhuc Canones habemus. Hæc itaque Concilia ordine Chronologico hic subnectam.

Primum Concilium Provinciale in Galliis sexto sæculo celebratum, fuit *Agathense*, indictum anno DVI. ad quod Episcopi triginta quinque ex variis Galliarum Provinciis convenerunt, *Alarico* Wisigothorum Rege, cui tùm temporis multæ Galliarum Provinciæ parebant permittente: Huic Concilio præfuit *Sanctus* *Casarius* Episcopus Arelaten-

tenfis , & in eo plures editi sunt Canones . Doctiffimus tamen *Sirmondus* , qui iftud Concilium cum, vetuiffimis MSS. Codicibus contulit , teftatur , fe in iis reperiffe tantum Canones octo & quadraginta , ac subindè dubium non effe , quin reliqui viginti quinque , qui fupra hunc numerum excurrunt , aliundè poftèa , fed potiffimum ex Synodo *Epaonenfi* , deprompti fint , & Synodi cujuspiam alterius auctoritate in Agathenfem inferri . Multa in his Canonibus in rem Ecclefiafticæ Difciplinæ fanxit hæc Synodus , quæ hic fummam perstringam . In primis , Bigamos à facris Minifteriis in perpetuum arcet , contumaces Clericos ab Epifcopis corrigi jubet , eosque inobedientes ad peregrinam communionem ablegat ; Clericis prohibet , ne cum extraneis mulieribus commorentur , ne comam nutrant , ne ad fæcularis Tribunal Judicis quemquam vocent , aut in criminali negotio fint Aëtores ; ne fine commendatitiis Epiftolis hæc illac vagentur , ne conviviis nuptiarum adfint , aut cætibus , ubi amatoria cantantur , aut obfcæni motus corporum choreis & faltationibus efferuntur . Diaconos ante annum ætatis vigefimum quintum ordinari , & Presbyterum , vel Epifcopum ante trigefimum ætatis annum consecrari vetat . Sanctimoniales ante annum ætatis quadragefimum velari inhibet . Epifcopis , ut feniores Clericos junioribus præponant præcipit . Divini Officii diebus Dominicis decantandi ordinem præfcribit , ficut & ritum imponendæ pœnitentiæ , renovatque antiquos Canones circa Pœnitentium irregularitatem , quos ordinari prohibet , & ordinatos à facris Minifteriis fuspendit . Monafteria puellarum procùl à Monachorum Cœnobiis

construi jubet, novumque Monasterium, nisi Episcopo permittente aut probante, fundari non debere decernit. Monachos absque Abbaris testimonio & consensu ordinari vetat, quibus insuper prohibet, ne ad solitarias cellas à Congregatione discedant, *nisi fortè probatis post emeritos labores, aut propter infirmitatis necessitatem, asperior ab Abbate regula remittatur.* Nobilibus, qui Oratoria in agris habent, permittit ut in illis Missas celebrari curent, exceptis Paschate, Natali Domini, Epiphaniâ, Ascensione Domini, Pentecostes, Natali S. Joannis Baptistæ, & aliis præcipuis festivitibus, in quibus par est, ut omnes Fideles in Civitates, aut in Parochias ad Missam, & ad Officia sacra conveniant. Sæcularibus in Natali Domini, Paschate, & Pentecoste, Communionem imperat, & à Communionem removet eos, qui suas dimittunt uxores, antequàm Episcoporum judicio fuerint convictæ atque damnatæ. Denique, Missas die Dominica à sæcularibus integras audiri præcipit, ita ut antè Benedictionem Sacerdotis egredi non præsumant, quod si fecerint, *ab Episcopo publicè confundantur.*

Anno Dxi. alterum in Galliis celebratum est Concilium Provinciale, nimirum *Aurelianense primum*, cui interfuere Episcopi sanctitate celebres, *Aventinus* Carnotensis Episcopus, cujus vita legitur apud Bollandum in Actis Sanctorum ad diem iv. mensis Febr. *Principius*, Episcopus Cenomanensis, qui colitur xvi. Kalen. Octob. *Camillianus* Episcopus Trecentis, qui colitur v. Kal. Aug. *Livanius* Episcopus Sylvanectensis, qui colitur vii. Idus Octob. *Quintianus* Episcopus Rutenensis, qui postea Arvernorum Episcopus fuit, coliturque à Rutenis xvii. Kalend. Julii,

Julii, & ab Arvernīs Idibus Novembris; *Eufraſius* Episcopus Arvernensis, quem Gregorius Turonensis *Sanctum* appellat; denique, *Sanctus Melanius* Episcopus Rhedonensis in minori Britannia, cujus vitam ab antiquissimo auctore scriptam recitat *Bollandus* ad diem vi. mensis Januarii. Hi Episcopi sanctitate inclyti Concilio Aurelianensi primo sub Clodovæo Christianissimo Galliarum Rege interfuerunt.

D. Ediditne aliquos Canones Concilium Aurelianense primum?

M. Concilium Aurelianense primum condidit Canones xxxi. quos ferme omnes in suo Decreto inseruit *Gratianus*. In his præcipue consulitur rerum ad Ecclesiam confugientium securitati. Statuitur, quomodò facultates Ecclesiæ expendi debeant, scilicet in reparationibus Ecclesiarum, in alimoniis Sacerdotum & Pauperum, vel in redemptionibus captivorum. Decernitur, ut Abbates in Episcoporum potestate consistant, & si quid extra regulam fecerint, ab ipso corrigantur. Rogationes, idest, Litanias, & Triduanum jejunium antè Ascensionem Domini celebrari præcipitur. Præcedentium Conciliorum Canones circa statum Monasticum, circa familiaritatem extranearum mulierum Clericis prohibitam confirmantur. Demùm prohibetur populo, ne antè completa Missæ solemnia, & acceptam Episcopi Benedictionem, si adesse contigerit, ex Ecclesia egrediatur.

D. Percurramus alia Concilia Provincialia, quæ sexto sæculo ad restaurandam Ecclesiæ Disciplinam in Galliis, & in Hispaniis fuerunt celebrata.

M. Anno dxxvi. *Tarracone*, quæ Cataloniæ Metropolitana Civitas est, sub Hormisdæ Pontificatu,

& anno sexto Theodorici Regis, tùm temporis Hispaniis dominantis, habita est Synodus Provincialis *Tarraconensis*, cui interfuere decem Episcopi, & in ea conditi sunt Canones XIII. in quibus multa, decernuntur circà Clericorum, & Monachorum vitam, circà Episcoporum ordinationes, & illorum officium Ecclesias, quæ ipsorum curæ concreditæ sunt, visitandi. Canonæ autem septimo statuitur, ut observatio diei Dominicæ incipiat à Sabbato. *Atque hinc fortassis emanavit consuetudo in totam ferè Hispaniam cessandi die Sabbati ab omni opere sub vesperthinam*, inquit *Vasæus* in Chronico. Qui mos à Judæis ad Christianos translatus est.

Anno DXXVII. *Gerundæ*, quæ Urbs est Cataloniae Tarraconensi Metropoli subdita congregata est Synodus *Gerundensis*, ad quam convenère septem Episcopi, qui decem Canones ediderunt, in quibus præter alia multa, quæ Disciplinam Ecclesiasticam spectant, decernitur primò, ut idem Missæ & Psalmodiæ ordo in tota Provincia Tarraconensi servetur, quæ in Metropolitana Ecclesia observatur. Secundò, tempus conferendi Baptismi Cathecumenis præfigitur ad dies Paschatis & Pentecostes; infirmis quocumque tempore, infantibus, eadem etiam die, quâ in lucem editi sunt, si in mortis periculo versentur. Tertiò, statuitur, ut, juxta morem à Galliis advectum, duæ Litanie, sive Rogationes, aut publicæ supplicationes quot annis celebrentur, Priores, hebdomadâ post Pentecostem à quinta feria usque ad Sabbatum; secundæ, Kalendis Novembris recitentur, nisi dies Dominica fuerit, tunc enim in sequentem hebdomadam transferebantur, & eodem ritu peragebantur, quo priores. In utrisque indi-
cta

Et erat triduana à carnibus & vino abſtinentia. Denique, diſtriſtè præcipitur Clericis, ut juxta antiquos Canones cœlibatum ſervent, & ab omni extranearum mulierum contubernio caveant.

Eodem anno DXXVII. habita eſt in Regno Burgundico Synodus *Epaonenſis*, cui præfuit *S. Avitus* Vienneniſis Episcopus, in eaque conditi ſunt XL. Canones. In his multa præſcribuntur circa diſciplinam, quam Episcopi, Presbyteri, & Clerici obſervare debent. Secundò, permittitur Presbyteris, ut Hæreticos, quorum deſperata valetudo eſt, ſi ſubitò ad Fidem Catholicam convertantur, Chriſmate conſignent, quò in Eccleſiæ gremium admittantur. Tertiò, abrogatur Diaconiſſarum conſecratio. Quartò, prohibetur, ne Altaria, niſi lapidea, Chriſmatis unctione conſecrentur. Quintò, impedimenta in gradu conſanguinitatis dirimentia Matrimonium reſtringuntur ad conſobrinos & conſobrinas. Sextò, antiqui Canones de tempore agendæ pœnitentiæ præfixo renovantur & confirman-
tur, pœnitentibus tamen in mortis diſcrimine poſitis conſtituta pœnitentiæ tempora relaxantur; ſed ſi convaleſcant, ſtatutum per Canones pœnitentiæ tempus ſervandum decernitur. Deniquè, ad ſtabiliendam diſciplinam monaſticam tam pro puellis, quàm pro viris, aliquot ſanctiones præſcribuntur. Legi poſſunt XL. illi Canones Synodi *Epaonenſis* in tomo IV. Conciliorum. Quantum autem attinet ad locum, in quo Synodus *Epaonenſis*, vel *Epauneniſis* congregata eſt, variz ſunt de eo conjecturæ ſcriptorum, qui ingenioſis quidem, ſed vanis conjecturis indulgentes, locum in quo olim habita eſt hæc Synodus detegere conati ſunt, irritò tamen labore, cum non

amplius extet illa *Epaonensis* Civitas, immò nullum ipsius modò supersit monumentum, aut vestigium. Quocircà, ne in re tam incomperta ariolari videamur, abundè sufficiat tibi scire, hanc *Epaonensem* Synodum in Regno Burgundico sub *Sigismundo* Rege fuisse celebratam.

Paulò post hanc *Epaonensem* Synodum, *Viventius* Episcopus Lugdunensis aliam coëgit Synodum, quæ dicitur *Lugdunensis prima*, in qua, decem assidentibus Episcopis, sex conditi sunt Canones, quorum primus spectat causam *Stephani* cujusdam incestuosi, quem cum *Placidia* cognatâ suâ, cui nefariè sese conjunxerat, Synodus ab Ecclesiæ liminibus expulit, quam tamen sententiam, rogante *Sigismundo* Burgundiæ Rege sic temperarunt Episcopi Canone sexto, ut ei in Ecclesia orare permitterent usque ad orationem plebis, quæ post Evangelium legitur. Alii Canones pertinent ad disciplinam Ecclesiasticam.

Anno DXXIV. *Sanctus* *Cæsarius* Arelatensis Episcopus convocavit Concilium Arelatense IV. Eo tempore, quo Arelatensis Civitas *Theodorico* Italiæ Regi parebat. Sexdecim huic Concilio interfuerunt Episcopi, qui quatuor Canones disciplinam Ecclesiasticam spectantes condiderunt.

Ad eundem annum DXXIV. multi Historici Ecclesiastici referunt Epocham Conciliorum *Ilerdensis*, & *Valentini*, quæ in Hispania fuerunt celebrata. At Cardinalis *de Aguirre* tom. 2. Conciliorum Hispaniæ, & *Nicolaus Antonius* anno MDCLXXXIV. demortuus, tom. 1. Biblioth. Hisp. Veteris, accuratè juxta omnes antiquos Codices MSS. utrumque Concilium ad annum usque DXLVI. distulère, quem admo-

admodum etiam *Hieronymus Pujades* in *Historia*, *Cataloniæ* lingua *Hispanica* scriptâ lib. 6. cap. 46. dum de *Ilerdensi* Concilio verba facit. Quapropter de duobus illis Conciliis *Ilerdensi*, & *Valentino* nihil in præsentia dicam, sed ea juxta ordinem Chronologicum, cui restitui debent, infra opportunius recenserebo.

D. Nullam hætenus mentionem fecisti de Conciliis, quæ sexto Ecclesiæ sæculo contra Semipelagianos fuisse celebrata, in nostris præcedentibus Colloquiis memini te jam observasse.

M. Rectè & appositè mones. Nam de Conciliis sexto Ecclesiæ sæculo contra Semipelagianos celebratis hic breviter differere, ordo Chronologiæ postulat. Doctrina itaque Semipelagianorum, quæ in quinto Ecclesiæ sæculo propter multos eruditione & pietate viros, qui ei adhærebant, damnata non fuerat, ac subindè citrà fidei crimen licitè ac liberè fuerat defensa, tandem anno DXXIX. in Synodo Arauficana II. quam Sedis Apostolicæ auctoritas, approbavit, penitus explosa ac rejecta est. Hæc autem Synodus cōacta est à Cæsario Arelatenſi Episcopo occasione Basilicæ à *Liberio* Patricio constructæ, & in ea conditi sunt Canones viginti quinque, quibus Semipelagianorum sententiæ condemnatæ sunt, ita ut absque Hæreseos nota à quovis deinceps propugnari haud potuerint. *Cassiani* & *Fausti* sententiæ proscriptæ sunt. Fidei initium esse donum Dei, decernitur Canone quinto. Gratiā non dari petentibus, quærentibus, pulsantibus, sed dari potiùs ut velimus, & petamus, & quæramus, & pulsemus, definitur Canone sexto. Adiutorium Dei Sanctis semper implorandum, quò possint in bono perdurare

rare, ac subindè perseverantiam esse Dei donum, sancitur Canone decimo. Demùm, humani arbitrii adversùs Divinam gratiam tumor eliditur Canone xxii. his verbis; *nemo habet de suo nisi mendacium & peccatum*. Hi Canones ex Divi Augustini verbis ac sententiis conflati, à Bonifacio II. Summo Pontifice fuerunt approbati. Quibus tamen cum Semipelagiani acquiescere nollent, *Sanctus Cæsarius* Valentinam in Galliis Synodum eodem anno indixit, ut frequentioribus suffragiis Catholica de Gratia Christi doctrina approbaretur. Huic Synodo Valentinæ *Sanctus Cæsarius* adversâ valetudine præpeditus adesse non potuit, ejus tamen vices pro divinæ gratiæ defensione strenuè sustinuit *Cyprianus* Episcopus Tolonenſis, qui, ut legitur in vita Sancti Cæsarii: *Omnia, quæ dicebat, de divinis utique Scripturis firmans, & de antiquissimis Patrum Constitutionibus probans, nihil per se in divinis profectibus quemquam arripere posse, nisi fuerit primitus Dei gratia præveniente vocatus*. Hujus Synodi Valentinæ Acta perierunt. Tandem Sanctus Cæsarius eodem anno dxxix. *Vasensem*, seu *Vasionensem* II. Synodum celebravit, in qua decem confederunt Episcopi, & quinque Canones Ecclesiasticam disciplinam spectantes conditi sunt.

D. Perge, si placet, alia juxta ordinem Chronologicum recensere Concilia Nationalia & Provincialia, quæ sexto Ecclesiæ sæculo fuerunt convocata.

M. Anno dxxxi. habitum est in Hispania Concilium *Toletanum II.* regnante in Hispaniis *Amalarico* Wisigothorum Rege non verò *Theude*, ut quibusdam Scriptoribus per errorem obrepit. Legitur

tur quippè Canone quinto illius Concilii: *Gratias agimus Omnipotenti Deo, deinde Domino nostro glorioso Amalarico Regi*. In hoc Concilio quinque Canones editi sunt, quorum *tertius* Clericis cœlibatum districte præcipit, & *quartus* Consanguineorum matrimonia vetat. Inter Episcopos adfuit huic Concilio *Sanctus Justus* Episcopus Urgellitanus, cujus superest Tractatus in Cantica Salomonis, qui in Bibliothecis veterum Patrum fuit insertus.

Anno DXXXIII. Concilium *Aurelianense II.* præcepto trium Regum Francorum, ut in illius Præfatione legitur, convocatum est: *Cum ex præceptione gloriosissimorum Regum in Aurelianensem Urbem convenissemus*. Ex omnibus tamen Franciæ Provinciis non fuit coactum istud Concilium, sed tantum ex quatuor Provinciis Lugdunensibus, & è tribus Aquitanis, sicut subscriptiones demonstrant, Interfuerunt Episcopi xxvi. & Presbyteri v. à totidem Episcopis missi, Canonesque xxi. conditi, in quibus multa circa ordinationem Episcoporum, & Presbyterorum, circa ordinationem Diaconissarum, quæ omnino prohibetur, circa honestam Clericorum vitam, & Abbatum ergà Episcopos obedientiam, necnon circa alia Ecclesiasticæ disciplinæ capita decernuntur.

Anno DXXXV. Concilium *Arvernense* habitum est, ad quod ex solis *Theodeberti* Francorum Regis ditionibus convenerunt Episcopi quindecim, ex quibus quatuor Martyrologio Romano coluntur, videlicet *Gallus* Episcopus Arvernensis, *Gregorius* Episcopus Lingonensis, *Hilarius* Episcopus Gabalitanus, & *Nicetius* Episcopus Trevirensis. Sexdecim in Concilio in rem disciplinæ Ecclesiasticæ conditi sunt

sunt Canones, quorum septimus vetat, corpus Sacerdotis, cum ad tumulum effertur, *opertorio Domini Corporis obvolvi, ne, dum honorantur Corpora, Altaria polluantur.*

Anno DXXXVIII. Concilium *Aurelianense III.* juxta Consulatus notam, quam ex probis monumentis restituit doctissimus *Sirmondus* in Conciliis Gallicanis, congregatum est. Ei interfuere Episcopi undeviginti cum Presbyteris septem ex diversis partibus Franciæ, cui tunc temporis tres Reges *Childebertus, Clotarius, & Theodebertus* dominabantur. Triginta tres Canones in hoc Concilio editi sunt, de quibus legendi *Cl. Coctius* Congregationis Oratorii Presbyter in Annalibus Ecclesiæ Francorum ad annum DXXXVIII. num. IX. & sequentibus, & *Natalis Alexander* in sexto Ecclesiæ sæculo.

Anno DXL. cōactum est Concilium *Barcinonense*, in quo decem editi sunt Canones, qui publicè penitentes spectant. Hos inter Octavus obligat eos, qui in infirmitate poscunt pœnitentiam, & à Sacerdote accipiunt, ad eam peragendam si postea convalescerint, ita ut à communione abstineant, donec integram & sceleris puram vitam illorum Sacerdos probaverit.

Anno DXLI. Celebratum est Concilium *Aurelianense IV.* cui ex tripartito Franciæ Regno, *Childeberti* nimirum *Clotarii*, & *Theodeberti* interfuerunt Episcopi xxxvi. cum Presbyteris xi. & Abbate uno, qui totidem Episcoporum nomine interfuerunt. Condicti sunt in eo Canones xxxvi. quibus præcedentium Synodorum Decreta fuerunt confirmata, & aliquot alia addita.

Anno

Anno DCLVI. Concilia *Ilerdense*, & *Valentinum* in Hispaniis habita fuerunt, sicut supra ex Cardinali de *Aguirre* jam observavi. In utroque Concilio egregia Decreta ad instaurandam Ecclesię disciplinam condita sunt. In Concilio *Ilerdensi* sexdecim Canones à novem Episcopis, & in Concilio *Valentino* Canones tantum sex à totidem Episcopis conditi sunt.

Anno DCLIX. Synodus *Aurelianensis V.* ex tripartito Franciæ Regno, sicut Episcoporum, qui ei interfuerunt, subscriptiones demonstrant, indicta est; licet in præfatione illius Concilii unus tantum *Childebertus* Rex à Patribus laudetur, quia *Aurelianensis* Civitas in ditione *Childeberti* sita erat. Condidit hæc Synodus Canones viginti quatuor, qui præcedentium Conciliorum Canones confirmant, vel illis quædam addunt, aut explicant. Ex his **xxiv.** Canonibus Concilii *Aurelianensis* quinti fuerunt sexdecim approbati in Synodo *Arvernensi II.* quæ paulò post *Aurelianensem* quintam fuit in Regno *Theodebaldi* etiam Francorum Regis celebrata. Hujus Synodi *Arvernensis II.* non meminit quidem *Baronius*, sed post illius mortem *Sirmondus* eam inter Concilia Gallicana publicavit. Synodo *Aurelianensi V.* subscripserunt Episcopi **L.** & **xxi.** vel Presbyteri, vel Archidiaconi, vel Diaconi, vel Abbates à suis Episcopis directi. Decem Episcopos ex his, qui isti Concilio interfuerunt, Sanctorum fastis adscribunt Ecclesiasticæ tabulæ, videlicet *Albinum* Episcopum *Andegavensem*, *Agricolam* Episcopum *Cabilonensem*, *Aurelianum* Episcopum *Arclatenensem*, *Gallum* *Arvernensem*, *Eleutherium* *Altisiodorensem*, *Sacerdotem* *Lugdunensem*, *Leobinum* *Carno-*
no-

notensem, *Lautonem* Constantinum, *Firminum* Uticensensem, *Nicetium* Trevirensensem. Præterea, Trajectenses colunt *Domitianum*, Bituricenses *Desideratum*, Lingonenses *Tetricum*, Burdigalenses *Leontium*, Æduenses *Nestarium*, Viennenses *Eutychium*, Nivernenses *Aregium*, Ebredunenses *Gallicanum*, Lugdunenses *Genebandum*.

D. Maximâ profectò commendatione digni sunt Galliarum, Hispaniarumve Antistites, qui, doctrinâ, & sanctitate insignes; nihil secundum Deum antiquius habuerunt, quàm ut Synodos ad conservandam Ecclesiæ disciplinam frequenter colligerent. Nec dubito, quia alia Concilia Provincialia, præter ea, quæ hætenus enumerasti, sexto Ecclesiæ sæculo celebrarint.

M. Ita est: multa alia, præter ea, quæ huc usque recensui, Galliarum, & Hispaniarum Antistites sexto Ecclesiæ sæculo Concilia Provincialia celebrarunt, quæ hic breviter, ne tibi fastidium ingeram, ordine Chronologico indigitare pergam.

Anno DLI. Concilium secundum Parisiense; ut optimè observat *Carolus Cointius* in Annalibus Ecclesiæ Francorum fuit convocatum, non verò anno DLV. sicut novissimi Conciliorum Collectores notant. Constat enim *Firminum* Uticensem Episcopum, qui huic Synodo subscripsit, obiisse anno DLIII. habitum est istud Concilium in causa *Saffaraci* Episcopi Parisiensis, qui de gravissimo crimine accusatus, propriâque confessione convictus, meritò secundum sacros Canones Episcopatu amotus in Monasterium detrusus fuerat, denuò itaque in hoc secundo Parisiensi Concilio discussâ & dijudicata *Saffaraci* causâ, viginti sex Episcopi, ex quibus complu-

plures in Sanctorum numerum fuerunt relati, illius exauctorationem approbarunt, & in ejus locum *Eusebium* subrogarunt.

Anno DLIV. Concilium *Arelatense V.* à *Sapaudo* illius Urbis Episcopo indictum, & ex Codice MS. Lugdunensi primò in lucem ab erudito *Sirmondo* datum est. Ex Provincia Viennensi, & ex duabus Provinciis finitimis, scilicet *Narbonensi II.* & *Alpium Maritimarum* convocatum est istud Concilium, & in eo septem conditi sunt Canones, quibus disciplinæ tum Ecclesiasticæ, tum Monasticæ optimè consultum est.

Anno DLVII. habita est, regnante in Galliis *Childeberto*, Synodus *Parisiensis tertia*, quæ decem condidit Canones, eique interfuerunt quindecim Episcopi, ex quibus *Martyrologio Romano* inscripti sunt *Prætextatus Rotomagensis*, *Euphronius Turonensis*, *Germanus Parisienlis*, *Samson Dolensis* in *Armorica*, cujus vitam ab auctore anonymo ipsi cœvo scriptam doctissimus *Mabillonius* sæculo i. *Benedictino* publicavit. Præterea, *Burdigalenses Leontium*, *Nannetenses Felicem*, & *Carnotenses Caleticum* venerantur,

Anno DLX. Concilium *Bracarense primum*, in Hispaniis regnante *Theodemiro Suevorum Rege*, habitum est; in quo confidentes Episcopi omnia Capitula, quæ contra *Priscillianum Hæresiarcham*, ejusque Hæresim in præcedentibus Conciliis jam Constituta fuerant, relecta, & approbata sunt. In eo etiam Ecclesiastica disciplina viginti duobus Canonibus sancita est. Inter Episcoporum subscriptiones legitur, *Martinus Episcopus subscripsi*, qui alius non est, quàm *S. Martinus Episcopus Damiensis*,
qui

qui postea creatus est Metropolita Bracarenfis , eo-
que nomine Concilio Bracarenfi II. subscripsit an-
no DLXXII.

Anno DLXVI I. seu anno sexto *Guntramni* Gal-
liarum Regis, coactum est Concilium *Lugdunense* II.
ex solis ditionibus *Guntramni* Regis , sub *Nicetio*
Lugdunensi Episcopo, in quo conditi sunt Canones
sex , eique subscripsere sua , vel etiam Vicariorum
manu Episcopi quatuordecim , quos inter tabulis
Ecclesiasticis inscripti sunt *Nicetius* *Lugdunensis* ,
Agricola *Cabilonensis* , *Syagrius* *Augustodunensis* .
Colitur etiam *Æoladius* à suis *Nivernensibus* . Eo-
dem anno peractum est Concilium *Turonense* II.
ex solis ditionibus *Chariberti* *Galliarum* Regis, sicut
ex præfatione istius Concilii colligitur . In eo edi-
ti sunt viginti septem Canones , quos perdoctè ex-
plicant *Carolus Cointius* in *Annalibus Ecclesiæ Fran-*
corum , & *Natalis Alexander* in sexto *Historiæ sæcu-*
lo . Subscripserunt huic sæculo Episcopi novem ex
tribus Provinciis *Lugdunensibus* , secundâ , tertiâ ,
& quartâ . Aliquot ex illis Episcopis , qui huic se-
cundo Concilio *Turonensi* subscripserunt , in San-
ctorum numerum fuerunt relati , vel in suis Eccle-
siis coluntur ut Sancti .

Anno DLXIX. celebratum est in *Hispania* Con-
cilium *Lucense* , in quo lecta est Epistola *Theodemiri*
Regis *Hispaniarum* , hortantis ut plures in *Gallæ-*
cia instituerentur Diœceses , ac præterea , ut præter
unam Metropolitanam Sedem, *Bracensem* scilicet ,
alia designaretur . Quod & factum est . Sedes enim
Lucensis erecta in Metropolim . Nunc tamen *Luco* ,
seu *Lucus* , hodiè *Lugo* tantum est Episcopalis Sedes
Metropolitæ Compostellano subdita .

An-

Anno DLXXII. ex utraque Gallæciæ Metropoli, *Bracarenſi* nimirum & *Lucenſi*, congregatum eſt Concilium *Bracarenſe II.* in eo decem editi ſunt Canones, quibus Episcoporum officia in ſacra Viſitatione præſcribuntur, iſiſque prohibetur, ne munera pro ordinationibus ſacris, pro Chriſmate, pro conſecratione Eccleſiarum, & pro Baptiſmo quidquam exigant. Decernitur quoque, quosdam Sacerdotes deſiſitione plectendos eſſe, qui antiquo Priſcillianæ Hæreſeos foetore afflati oblationem in Miſſis pro Defunctis non jejuni conſecrabant.

Anno ſequenti, ſeu DLXXIII. indiſta eſt Synodus *Parieſiſ quarta*, de qua agit S. Gregorius Turoſiſ lib. 4. cap. 42. ad hanc convenère xxii. Epiſcopi cum uno Presbytero ab Epiſcopo Aurelianenſi miſſo. Rurſus anno DLXXVII. Pariſiſ habita eſt Synodus, quæ eſt *Parieſiſ quinta*, in qua, accuſante Rege *Chilperico*, Sancti *Pratextati* Epiſcopi Rotomagenſis falſo accuſati, quod *Meroveo* filio rebelli ejusdem Regis faviſſet, cauſa diſcuſſa eſt, *Pratextatus* ab Eccleſia pulſus cuſtodix traditus, è qua cum fugeret nocte, graviſſimè caſus in Inſulam propè Conſtantiam eſt relegatus, ſubrogato in ejus locum *Melanio*, cujus meminit S. Gregorius Turoſiſ lib. 7. Hiſt. Francorum cap. 19. Martyrio tandem anno DLXXXVI. coronatus eſt *Pratextatus*, agente *Fredegunde* Regina, altera *Zezabele*, quam S. ille Martyr ad meliorem frugem reducere fruſtrà tentaverat, ſicut ex S. Gregorio citato *Baronius* narrat.

Anno DLXXXIII. celebratum eſt Concilium *Lugdunenſe tertium*, in quo conditi ſunt ſex Canones, quibus ea, quæ de mulieribus extraneis à
Tom. II. S Cle-

Clericorum societate repellendis, de Puellis Deo consecratis, quæ à Monasterio recedunt, & de incestis matrimoniis prisca Canones sanxerunt, renovantur & approbantur. Eodem anno coactum est Concilium *Matifconense primum* è ditionibus *Gunttrami* Galliarum Regis, & in eo undeviginti conditi sunt Canones, quibus priorum Conciliorum decreta de continentia & modestia Clericorum, de illorum causis, de pœnis infligendis Judæis, qui Christianis insultarent, renovantur & confirmantur. Alterum etiam Concilium *Matifconense* convocatum est anno DLXXXV. in quo conditi sunt viginti Canones, quos doctissimus *Carolus Cointius* in *Annalibus Eccl. Francorum* ad annum DLXXXV. & *Natalis Alexander* in sexto Ecclesiæ sæculo summarie explicant. Paulò post duo illa Concilia *Matifconensia*, *Aunacharius* *Altifiodorensis* Episcopus cum Abbatibus & Presbyteris suæ Diœceseos celebravit Synodum *Altifiodorensē*, in qua editi sunt Canones quadraginta quinque, quorum plerique Synodorum præcedentium, præcipuè *Matifconensium* decreta renovant. Invehitur etiam hæc Synodus Canone 1. in eos, qui Gentilium more Kalendas Januariæ prophanis ritibus, epularum luxu, spectaculorum insanâ, & aliis id genus abominandis superstitionibus contaminabant.

D. Hæc sunt igitur omnia Concilia Nationalia & Provincialia, quæ sexto Ecclesiæ sæculo in Galliis & in Hispaniis fuerunt celebrata?

M. Hactenus quidem recensui omnia Concilia Nationalia & Provincialia, quæ sexto sæculo in Ecclesia Gallicana fuerunt celebrata. At supersunt septem alia Concilia Provincialia, quæ in Hispaniis,

niis, five in ditionibus *Reccaredi* religiosissimi Hispaniarum Regis habita sunt, à quibus hic breviter me expediam. Anno DLXXXIX. *Reccaredus* Leovigildi filius Rex Gothorum & Hispaniæ, ejurata cum suis Gothis Ariana Hæresi ad fidem Catholicam conversus *Toletanam tertiam* Synodum congregavit, eique, teste *Joanne Biclarienti*, interfuit, ut ea quæ ad abolendam penitus in suo Regno Arianam Hæresim, quæ in eo diù grassata fuerat, & ad Catholicam fidem propagandam necessaria erant, sanctis Canonibus optimisque decretis sancirentur. In hac itaque *Toletana tertia* Synodo scripti sunt Anathematismi XXIII. quibus omuinò profligatur Ariana Hæresis, & totidem Canones ad restaurandam Disciplinam Ecclesiasticam conditi sunt, quibus subiicitur Edictum ejusdem Regis *Reccaredi* de confirmatione Synodi, quæ omnia concluduntur Homiliâ *S. Leandri* Episcopi Hispalensis in laudem Ecclesiæ ob Gentis Gothorum ad fidem Catholicam conversionem. Eodem anno DLXXXIX. sub *Reccaredo* Hispaniarum Rege, cui tùm Provinciæ Narbonensis ora parebat, habitum est Concilium Provinciale *Narbonense*, cui octo adfuerunt Episcopi, & quindecim in eo editi sunt Canones, quibus Disciplinæ Ecclesiasticæ optimè consultum est. Hoc autem Concilium *Narbonense* ideò sub *Reccaredo* Hispaniarum Rege, & non sub Francorum Regibus fuit celebratum, quia Gothi à *Clodoveo* Rege à Gallia ejecti, & in Hispaniam compulsi, Provinciæ *Narbonensis* oram maritimam suam in potestate retinuerunt usque ad tempora *Caroli Martelli* Galliarum Regis, qui, devictis Gothis, Provinciam *Narbonensem* Francorum Regno armis adscivit.

Anno dxc. regnante in Hispaniis *Reccaredo* celebratum est à S. Leandro Hispalensi Episcopo cum Antistitibus Provincialibus Concilium Hispalense I. in quo tres conditi sunt Canones, qui missi sunt ad *Pegasum* Astigitanæ Ecclesiæ Episcopum, & Gaudentii successorem. Sub eodem *Reccaredo* Hispaniarum Rege anno dxcii. convocatum est Concilium *Cæsaraugustanum*, in quo tres conditi sunt Canones, qui modum, quo Episcopi, vel Presbyteri ab Ariana Hæresi ad Catholicam fidem revertentes recipi debent, præscribunt. Sub eodem Rege *Reccaredo*, & Gregorii Magni Pontificatu actum est anno dxcvii. Concilium *Toletanum quartum*, in quo duo conditi sunt Canones, & anno sequenti, seu dxcviii. habitum est Concilium *Oscense*, in quo duo iterum editi sunt Canones. Erat autem *Osta* in Tarraconensi Provincia Tarraconæ Metropoli subdita, quæ nunc habet Episcopum Cæsaraugustano suffraganeum, ut scribit *Garfias Loaisia* in Notis ad Concilium *Lucense* sub Theodmiro Hispaniarum Rege congregatum. Denique, anno dxcix. habitum est sub sæpiùs laudato *Reccaredo* Hispaniarum Rege Concilium *Barcinonense*, in quo contra Simoniacos quatuor editi sunt Canones. Sed de Conciliis Nationalibus, seu Provincialibus, quæ sexto Ecclesiæ sæculo in Occidente, præsertim in Galliis, & in Hispaniis celebrata sunt, sat superque hætenùs dictum sit.

D. Ex tot Conciliis Nationalibus, seu Provincialibus, quæ sexto sæculo in Galliis, & in Hispaniis habita sunt, facilè intelligo, Galliarum, & Hispaniarum Antistites de Disciplina Ecclesiastica optimè meritos esse, cum ad illam conservandam, vel

vel restaurandam tam ardenti zelo flagraverint. Nunc quales eodem sæculo fuerint præcipuarum Ecclesiæ Sedium Antistites, vehementer scire peropto.

M. Hoc de argumento opportuniùs differemus in proximo, quod crastinâ luce habebimus, Colloquio; in quo continuam seriem Episcoporum, qui præcipuas Ecclesiæ Sedes, videlicet Romanam, Alexandrinam, Antiochenam, Hierosolymitanam & Constantinopolitanam sexto sæculo occuparunt, exhibebimus.

COLLOQUIUM IV.

De successione Episcoporum, qui sexto sæculo præcipuas Ecclesiæ Sedes Romanam videlicet, Alexandrinam, Antiochenam, Hierosolymitanam & Constantinopolitanam occuparunt.

D. **S**eriem Episcoporum, qui quinto Ecclesiæ sæculo Sedem Romanam tenuerunt, terminasti jam, si benè memini, in Symmacho, qui, sicut observasti in Colloquio tertio in Historiam quinti Ecclesiæ sæculi, ordinatus fuit Pontifex Romanus die vigesimâ secundâ mensis Novembris anni cccxcviii. De Schismate, quod Laurentius Archiepresbyter Ecclesiæ S. Prædix in electione Symmachi excitavit, & de Conciliis, quæ ad extinguendum illud Schisma sub Symmacho Papa fuerunt Romæ celebrata, plura in præcedentibus nostris Colloquiis dixisti, quæ hic repetere supervacaneum

S 3

omni-

omninò esset . Quapropter his , ne actum agamus , prætermisiss ; ostende primò , quo pacto Symmachus sese in Pontificatu gesserit , & quot annis Sedem Romanam tenuerit ?

M. Sanctissimè in suo Pontificatu sese gessit Symmachus , multisque virtutibus emicuit . Manichæos Apostolico zelo infectatus est , eosque Româ expulit . Captivos Christianos per Liguriam , Mediolanum , & per diversas Provincias dispersos pecuniis redemit . Episcopis Africanis in Sardinia exulibus vestes , aliaque id genus ad victum necessaria singulis annis suppeditavit . Basilicas Sanctorum complures Romæ à fundamentis crexit , instauravit , amplificavit , exornavit . *Anastasium Imperatorem Acacii Episcopi olim Constantinopolitani memorie , & Hæreticis Concilii Chalcedonensis hostibus communicantem atque apertè faventem excommunicavit . Antiqua Sedis Apostolicæ decreta , præsertim S. Leonis Papæ ; circa jura Ecclesiarum Arelatensis , & Viennensis , ad petitionem S. Cæsarii Episcopi Arelatensis , qui Romam ad SS. Apostolorum Petri & Pauli limina venerat , observari jussit . Varia denique Ecclesiasticæ Disciplinæ fancivit Capita , quæ legi possunt in ejus Epistola ad Cæsarium Arelatensem Episcopum . Sedit Symmachus annos quindecim , menses septem , dies viginti septem , ut testantur Ordericus , Luitprandus , Regino , Catalogus Vaticano-Palatinus , & varii Codices MSS. obiit die decimâ nonâ mensis Julii anni DCLIV. ejusque nomen sacris Ecclesiæ Fastis adscriptum est XIV. Kalend. mensis Augusti .*

D. Quem in Sede Romana successorem habuit Symmachus ?

M. Mor-

M. Mortuo Symmacho, cessavit Pontificatus dies septem, sicut scribit *Anastasius* Bibliothecarius, & die xxvii. mensis Julii anni dxiv. Symmacho successus est *Hormisdas*, qui anno sexto Pontificatus sui, seu anno dxix. Ecclesiam Orientalem, propter damnationem *Acacii* Episcopi Constantinopolitani, ab Ecclesia Romana jam diu dissidentem, redintegratâ pace, ad communionem & unitatem tandem aliquandò revocavit. Anno etiam nono sui Pontificatus, seu anno dxxii. ingenti gaudio perfusus est *Hormisdas* quòd Africani Episcopi, quos *Trafamundus* Vandalorum Rex in Sardiniam relegaverat, ab *Hilderico* Trafamundi successore ad natale solum post annos exilii viginti septem fuerint revocati, & ab ipsis in integrum restitutus Ecclesiæ Africanæ status. Tumultuantes in Oriente Monachos Scythas, tamquàm superbos, perveraces, & contentiosis seditionibus pacem Ecclesiæ perturbantes coarguit & compescuit idem Summus Pontifex, sed tamen nunquam ex Cathedra damnavit hanc propositionem, quam prædicti Monachi acriter propugnabant: *unus è Trinitate crucifixus est*, immò hanc propositionem ne quidem examinare, nedùm damnare voluit *Hormisdas*, utpotè hanc disceptationem intempestivam judicans, & turbandæ potius Ecclesiæ, quàm ædificandæ opportunam. Collapsam in Hispaniis Ecclesiasticam Disciplinam, scriptâ ad illius Ecclesiæ Episcopos Epistolâ, reformavit. Ab Episcopo *Possessore* consultus de Doctrina *Fausi* Episcopi Rejenensis circa Gratiam, respondit Romanus ille Pontifex avitæ doctrinæ tenax, doctrinam *Fausi* de Gratia non recipi ab Ecclesia, sed standum esse doctrinæ S. Au-

gustini, & ex ejus libris hauriendam esse veram de Gratia Christi doctrinam. Sedit *Hormisdas* annos novem, & dies undecim, ut legitur in multis Catalogis, præsertim in duobus Pontificum Romanorum Catalogis, quos edidit doctissimus *Mabillo-nius* tom. III. veter. Analect. obiit die sextâ mensis Augusti anni DXXIII.

Post mortem *Hormisdæ* vacavit Sedes septem dies, ut scribit *Ordericus* lib. 2. & die decimâ ter-tia mensis Augusti anni DXXIII. Joannes I. natione Etruscus ejus successor Pontifex Romanus ordina-tus est. Is est, qui, sicut in præcedentibus Collo-quiis jam observavimus, jussu *Theodorici* Italiæ Re-gis Sectâ Ariani, Constantinopolim ire, & Lega-tionem apud *Justinum* Imperatorem obire coactus est, ut cum à vexandis in Oriente Arianis deterre-ret. A Justino Imp. perhonorificè quidem exceptus est *Joannes*, sed Constantinopoli redux, inhumani-tè à Theodorico Rege habitus est, & in carcerem con-jectus, ubi ærumnis confectus Martyr occubuit die XXVIII. Maii anni DXXVI. Sedit igitur Joannes I. annos duos, menses novem, & dies sex, ut tam dies ordinationis, quàm dies mortis ejus demonstrant. Dux Epistolæ Joanni I. tribuuntur, quas tamen pe-riti Critici supposititias esse arbitrantur. Prima est ad omnes Italiæ Episcopos. scripta. Sed illam ge-nuinam non esse, ex eo maximè probatur, quod hæc Epistola data fingitur III. Idus Junii, ad quem tamen diem Joannes Papa non pervenit, quippè qui mortuus est die XXVIII. Maii. Dicitur etiam hæc Epistola data *Maximo* & *Olybrio* Coss. qui ta-men diversis annis consulatum gesserunt. Altera Epistola, quæ Joanni Papæ tribuitur, directæ est
ad

ad *Zachariam* Archiepiscopum . At illa , non secus ac prior , cœu supposititia exploditur ; tum quia data dicitur xv. Kalend. Novemb. *Maximo & Olybrio Coss.* qui tamen , ut mox diximus , non simul , sed diversis annis consulatum gesserunt ; tum quia etiam hæc Epistola confarcinata est ex variis locis Epistolarum Innocentii , Zosimi , Symmachi Summorum Pontificum , & Ennodii Episcopi Ticinensis , ut jam à viris doctis fuit observatum .

Theodoricus Italiz Rex post mortem Joannis I. Papæ jus eligendi Pontificis Romani sibi attribuit . Unde interjecto ab obitu Joannis Papæ Interpontificio lv. dierum , *Felicem IV.* Clero , Senatui , Populoque Romano proposuit . Diù quidem illi restitit Clerus , sed tandem , vitandi Schismatis causâ , consensit , ut liquet ex *Athalarici* Italiz Regis , qui Theodorico successit , Epistolâ ad Senatum scriptâ , quam recitat Baronius descriptam ex Cassiodoro lib. vi i i . Epist. xv. *Felix* itaque hujus nominis IV. Pontifex Romanus die x i i . mensis Julii anni dxxvi . ordinatus est , & præclaris virtutibus exornatus , atque sanctitate insignis Ecclesiam sapientissimè rexit . Sedit , juxta accuratiorem doctissimi *Pagii* Chronologiam , annos quatuor , & menses sex , obiitque xiv. Kalend. Octobris , seu die x i i i . mensis Septembris anni dxxx . Circumferuntur due *Felicis IV.* Epistolæ , quarum prima dicitur data Kalend. Martii *Lampadio & Oreste Coss.* Altera x i i . Kalend. Novembris *Lampadio & Oreste Coss.* Verùm utramque Epistolam , ut supposititiam rejiciunt viri eruditi . Primò , quia ambæ continent phrascs posteriorum sæculorum , & sententias ex Epistolis Sancti Gregorii Magni excerptas , vel aliundè emendi-

ca-

catas. Secundò, quia *Felix IV.* in vivis non erat
 xi i. Kalend. Novemb. quâ tamen temporali notâ
 inscribitur una ex illis Epistolis. Denique, si quis
 duas illas Epistolas contulerit cum genuina illâ
 Epistola, quam *Felix IV.* ad Cæsarium Arelatensem
 Episcopum scripsit, de *Laicis ad Sacerdotium ante*
probationem non promovendis, compertum ac explo-
 ratum habebit ex styli dissimilitudine hæc duas
 priores Epistolas *Felici IV.* perperam vindicari.

Post mortem *Felici IV.* vacavit Sedes dies tres,
 & *Bonifacius II.* patriâ Romanus consecratus est die
 vicesimâ primâ mensis Septembris anni dxxx. de
Dioscori Schismate adversus *Bonifacium II.* quod
 statim *Dioscori* morte extinctum est, legendus est
Baronius, sicuti & de *Bonifacii II.* Epistola ad *Eu-*
laliū Alexandrinum Episcopum de reconciliatio-
 ne *Carthaginensis Ecclesiæ*, quam supposititiam,
 & adulterinam esse ostendit Eminentissimus ille *An-*
nalium parens, non solum quia contexta est ex ver-
 bis Romanorum Pontificum *S. Leonis*, *Horinisdæ*
 & *S. Gregorii Magni*, sed etiam quia illius Epistolæ
 confarcinator ineptissimè fingit, *Aurelium* *Cartha-*
ginensem Episcopum, & cæteros *Ecclesiæ Africa-*
næ Antistites, adeoque & *S. Augustinum*, *Bonifa-*
cii I. & *Cælestini I.* temporibus, instigante Diabo-
 lo, contra *Ecclesiam Romanam* insurrexisse, & eo
 ab hinc tempore *Africanam Ecclesiam* à *Romanæ*
communione fuisse divulsam usque ad Pontificatum
Bonifacii II. quod sanè putidum mendacium esse,
 nemo est tantisper in *Historia Ecclesiastica* versa-
 tus, qui statim non videat. Quare, jure merito
 prædictam *Bonifacii II.* Epistolam non solum *Card.*
Baronius, sed omnes, quotquot sunt hujus ætatis
 viri

vtri eruditi, tamquam spuriam reiciunt. Synodum Arausicanam II. in qua Semipelagiani fuerunt damnati, confirmavit Bonifacius II. & sub illius Pontificatu tres Romæ habitæ sunt Synodi, quarum duas ex Anastasio Bibliothecario explicat Baronius, post cujus mortem *Holstenius* Bibliothecæ Vaticanæ Præfectus in Collectione Romana tertiam Synodum eruit, quæ celebrata est anno DXXXI. demum, Bonifacius II. sedit annos duos, & dies viginti sex, obiitque die XVI. mensis Octobris anni DXXXII.

Vacavit Sedes post mortem Bonifacii II. dies LXXVI. sicut ex multis vetustis Catalogis ostendit doctissimus *Pagius* ad annum Christi DXXXI. quapropter *Joannes* hujus nominis II. cognomento *Mercurius*, patriâ Romanus, anno DXXXI. ordinatus fuit Pontifex die XXI. mensis Decembris, quæ *S. Silvestro* Romæ sacra erat. Simoniz labem, quæ in electionibus Episcoporum, & Romanorum Pontificum grassabatur, omninò tollendam, ac radicitus extirpandam curavit *Joannes* II. Hanc propositionem, quam Monachi Scythæ mordicè tuebantur: unus è *Trinitate* passus est carne, sua auctoritate approbavit, & *Acametas* Monachos, qui eam, ceu Hæreticam, acrius insectabantur, habitâ Romæ Synodo damnavit, atque de illorum damnatione litteras ad Justinianum Imperatorem, & ad Senatores dedit. Pontificatum tenuit *Joannes* II. annos duos, menses quatuor, dies viginti sex, & mortuus est VI. Kalend. Junii, seu die vicesimâ sextâ Maii anni DXXXV. Epistolam Joannis II. ad *Valerium* Episcopum supposititiam esse manifestò probant Ithacii, & *S. Leonis* sententiæ in illam intrusæ, sty-

stylus ab eo , quo aliæ genuinæ ejusdem Pontificis Epistolæ exaratae sunt , planè diversus , mendax Consulatum nota , & summus omnium virorum eruditorum consensus .

Post mortem Joannis II. vacavit Sedes dies sex , undè die tertiâ mensis Junii anni DXXXV. *Agapetus* , patriâ Romanus , electus & ordinatus est Pontifex Maximus , qui coactus est à *Theodato Gothorum Rege* Legationem suscipere ad *Justinianum Imperatorem* , cum rogaturus ut ex Italia exercitum suum summovertet . Nullâ affulgente spe conciliandæ pacis , quam *Justinianus* barbaro Principi concedere noluit ; supremæ suæ Ecclesiasticæ potestatis argumentum dedit *Agapetus* , dum *Constantinopoli* degeret . *Anthimum* quippè Hæreticum , Eutychianum , quem , post *Epiphani* Patriarchæ Constantinopolitani obitum , *Theodora Augusta* Eutychianis partibus addicta transferri curaverat , è Sede Constantinopolitana auctoritate Apostolicâ dejecit , & in ejus locum *Mennam* virum maximè orthodoxum subrogavit , sicut narrat *Liberatus* in Breviario cap. 21. Sedit *Agapetus* menses novem , dies undeviginti , obiitque Constantinopoli , dum ad reditum in Italiam sese accingeret , die XXI. Aprilis anni DXXXVI. Sanctorum Fastis adscriptus est *Agapetus* , & colitur ad diem XXI. Aprilis in Martyrologiis MSS. Vaticano S. Petri , Barbarino , aliisque , & in Appendice ad Martyrologium Adonis .

Agapeto ad meliorem vitam translato , cessavit Sedes Pontificia dies quadraginta septem , ut ostendit *Cl. Pagius* ad annum DXXXVI. num. XVI. Quare *Silvius* die octavâ Junii anni DXXXVI. Pontificatus .

rifex Romanus consecratus est. Degebat adhuc Constantinopoli *Vigilius* Agapeti recens defuncti Diaconus & Apocrisarius. Is ambitionis æstu abreptus, pollicitus est *Theodora* Augustæ, se, si crearetur Pontifex, damnaturum Synodum Chalcedonensem, & *Anthimum*, atque *Severum* restitutum. Hujus spe facinoris hamum devoravit *Theodora*, & *Vigilium* in Sedem Apostolicam intrudere molita est, scripsitque ad *Belisarium* Romani exercitus ducem, qui tum Romæ aderat, ut *Vigilium* Pontificem eligendum curaret. At jam *Silverio* sedente nihil factum, quàm ut *Vigilius* ambitionior videretur. Effrænata ambitionis suæ consilia non deposuit *Vigilius*, sed *Belisario* duo auri centenaria pactus, & ab Imperatrice *Theodora* commendatus, obtinuit tandem ut *Silverius* Patram in exilium mitteretur, & ipse in ejus locum intruderetur. Verùm, hanc injustam depositionem cum non approbasset *Justinianus* Imperator, sed *Silverio* legitimo Pontifici Romam redire jussisset, non permisit *Belisarius*, ut *Silverius* suam Sedem recuperaret, sed Sanctissimum illum Pontificem, *Vigilio* ipsius æmulo, ejusque Sedis invasori inhumanitè tradidit, à quo in *Palmariam*, vel *Ponticum* Insulam deportatus est, ibique inedia confectus Martyr obiit die xii. Kalend. Julii, seu die xx. mensis Junii anni dxxxvi. Epistola *Silverii* Papæ *Vigilio* inscripta, cujus initium: *multis te transgressionibus irretitum*, &c. supposititia est, ut facile colligitur ex styli barbarie, ex falsa nota consulari, & ex sententiis emendicatis ex Epistola *Felici* II. ad *Acacium* Episcopum Constantinopolitanum, Supposititia itidem est Epistola *Amatoris* Episcopi

Au.

Augustodanensis ad Silverium Epistola, ut demonstrant mendax consularis nota, styli barbaries, phrascs & sententiæ ex legibus Honorii, & Arcadii Imperatorum, ex Leone, & Gregorio Magno Romanis Pontificibus, & ex Bonifacio Episcopo Mogunrino depròptæ, quæ tamquàm lacinie huic Epistolæ sunt assutæ. Denique, Epistola Silverii Papæ ad *Amatorem* pariter suppositicia est, ut fatetur ipsemet Baronius, qui eandem censuram duabus præcedentibus *Silverii* Epistolis inurere debuisset.

D. Quis potuit *Vigilius* Pontificatum tenere, quem tot malis artibus adeptus fuerat?

M. Mortuo *Silverio* vero & legitimo Papa, Clerus *Vigilii* Pontificatui consensit, & illum, quem antehac, seu Antipapam, execrabatur, legitimis habitis Comitibus verum Ecclesiæ Pastorem declaravit, tam *Belisarii* potentiâ coactus, quàm Ecclesiasticæ pacis & unitatis studio permotus. Porro, quod mirum est, statim ac *Vigilius* Pontifex Romanus renunciatus est, in alterum virum mutatus est, Spiritus Sancti gratiâ, quæ tarda molimina nescit, intus in ipso operante. Quapropter omnia, quæ aliàs contra Synodi Chalcedonensis fidem ad *Theodoram* Augustam sacrilegè scripserat, solemni professione delevit, ut videre est in ejus Epistola ad Justinianum Imperatorem scriptâ, in qua quatuor Synodos Oecumenicas, & S. Leonis Epistolas se recipere, & secundum eas credere professus est. Hac fidei professione *Vigilius* Papa *Theodora* Augustæ, quæ se delusam vidit, odium sibi confluxit, & occasione trium Capitulorum, quæ in quinta Synodo generali fuerunt proscripta, gravissima incommoda passus est, quæ in præcedentibus nostris Col-

iniquis jam à nobis. sat. superque descripta denuò hic attingere superfluum omninò esset. Mortuus est Vigilius Papa in Sicilia, dum Romam rediret, oppressus dolore calculi anno DLIV. ut colligitur ex *Marcellini* continuatore, qui mortem *Vigilii* Papæ illigat anno post *Basilii* Consulatum decimo tertio, qui concurret cum prædicto anno DLIV.

Vigilium Papam excepit *Pelagius* hujus nominis I. die undecimâ mensis Aprilis anni DLV. sedit annos quatuor, menses decem, dies decem & octo, obiitque die 1. mensis Martii anni DLX. Rectè observat Card. Baronius, Epistolam *Pelagii* ad *Vigilium* Episcopum suspectam esse, tum quia ex *Ithacii*, Sanctique Leonis verbis contexta est; tum quia etiam falsa est consularis nota.

Post *Pelagii* Papæ mortem cessavit Sedes menses quatuor, dies XVII. & *Joannes* hujus nominis III. Pontificatum iniit die XVI. mensis Julii anni DLX. Ecclesiam Romanam gubernavit annos XII. menses XI. & dies XXVI. obiitque die XII. mensis Julii anni DLXXI. Epistolam *Episcopis per Germaniam, & Gallia Provincias constitutis*, quæ dicitur à Joanne Papa III. scripta, commentitiam esse post *Baronium* omnis eruditorum natio profitetur.

Joanne III. è vivis sublato, fuit Interpontificium mensium decem, viginti & unius dierum, ac die tertia mensis Junii anni DLXXIV. *Benedictus* hujus nominis I. à Græcis *Bonofus* nuncupatus, natione Romanus, ordinatus est Pontifex. Tam diuturni Interpontificii causa in tumultus à Longobardis Italiam tum temporis turbantibus excitatos referenda videtur. Sedit *Benedictus* annos IV. mensem I. dies XVI. & è vivis excessit die XXX. mensis Julii
an.

anni DLXXVII. Existimavit Card. Baronius, Epistolam, quæ tribuitur *Benedicto I.* & directæ est ad *Davidem* Episcopum, genuinam esse; quam tamen adulterinam & Pseudepigrapham esse, utpotè falsâ consulatus notâ obsignatam, fatentur periti hujus temporis Critici.

Post mortem *Benedicti I.* vacavit Sedes menses quatuor, & die tricesimâ mensis Novembris anni DLXXVIII. Divo Andree Apostolo sacrâ *Pelagius II.* Pontifex Romanus fuit ordinatus. Sedit annos XI. menses II. dies X. & migravit è vita die octavâ mensis Februarii anni DXC. Epistola Pelagii II. ad Episcopos per *Campania*, & *Italiae* Provincias scripta, supposititia est, & conflata ex variis sententiis *Prosperi*, *Hilarii*, *Acacii*, *Ennodii*, Conciliorumque *Romani* sub *Symmacho*, *Toletani VIII.* & *Lateranensis* sub *Martino I.* ejusdem farinae esse fragmentum Epistolæ ejusdem Pelagii ad *Benignum* Archiepiscopum, Epistolam ad *Joannem* Constantinopolitanum, & Epistolam ad Episcopos *Germaniæ*, & *Galliæ* de novem *Præfationibus* inter *Missarum* solemnia decantandis, censent viri eruditi.

Denique, post Pelagii II. obitum, cessavit Pontificatus menses VI. dies XXV. & die tertiâ mensis Septembris anni DXC. *Gregorius Magnus* hujus nominis I. consecratus est Pontifex Romanus. Is est, qui *Donatistas* in *Africa* compressit, *Schisma* in *Ecclesia* occasione damnationis trium *Capitulorum* exortum abolere pro viribus studuit, *Joannis* Constantinopolitani Episcopi, se *Oecumenicum*, seu *universalem* Episcopum inscribentis, fastum coercuit; nec voluit ipse Episcopus *universalis* appellari. Salutis animarum sitientissimus, *Augustino*
vi-

viro sanctissimo, aliisque Monachis in Angliam, missis, Gentis hujus conversionem adgressus est, & ad optatum exitum feliciter perduxit. Disciplina Ecclesiastica instaurandæ cupidissimus, sedulo curavit ut digniores ad Episcopatus & Beneficia, promoverentur, Simonia labes, quæ instar canceri longè latequè serpebat, in electionibus penitus extirparetur, Beneficiorum pluralitas tolleretur, Viduæ, Pauperes, & Pupilli non opprimerentur; Episcoporum jura illæsa fervarentur, & Disciplina Monastica in omnibus Cœnobiis perfectè vigeret. Is denique fuit, qui totus germanæ pietati alendæ, & avitæ fidei tuendæ deditus, Officia Ecclesiastica, cantum, & Missæ ordinem in meliorem formam, redegit, stationes per Basilicas & Cæmeteria Martyrum sollicitus ordinavit; in admonendis de officio Principibus, eorumque legibus temperandis Apostolicam prodidit libertatem; *Serenum* Massiliensem Episcopum, ob contrafactas Imagines, redarguit, dumque Constantinopoli, antequàm Pontifex eligeretur, munere Nuncii Apostolici sub Pelagio II. fungeretur, cum *Entychio* illius urbis Episcopo, qui corporum resurrectionem negabat, congressus est, eumque egregiè confutavit, ac palàm erroris convicit. Uno verbo, S. Gregorius sanctimonix & doctrinæ famâ adeò claruit, ut *Magni* cognomento decoratus, Ecclesiæ Sanctissimus Doctor habeatur. Eum fuisse Monachum in confesso est apud omnes, sed an *S. Equitii*, vel *S. Benedicti* Regulam fuerit professus? lis adhuc sub judice est. *Baronius* in Annalibus, *Henschenius* & *Papebrochius* Soc. Jesu in Prolegomenis ad Vitam S. Gregorii in Actis Sanctorum mensis Martii ad

Tom. II. T diem

diem xii. negant S. Gregorium fuisse professum Regulam S. Benedicti; affirmat verò doctissimus P. *Joannes Mabillonius* tom. 1. sæculi Benedictini, tom. 2. veterum Analect. in Dissertatione de *Vita Monastica Gregorii Papæ I.* & in Appendice secunda in calce tom. 1. Annalium Benedictinorum. Tot inter viros eruditos, quos impensè veneror, nolo meum interponere iudicium. Nec certè is sum, qui tantam velim, aut possim componere litem. Sedit S. Gregorius annos tredecim, menses sex, dies decem, & ad Deum migravit die xii. mensis Martii anni dclv. quâ die à fidelibus colitur. Plura legis in Vita S. Gregorii Magni quam accuratè & eleganter descriptam doctissimi Patres Benedictini Congregationis S. Mauri præfixerunt quarto tomo recentis illius Operum Editionis, quam secundis curis adornarunt. Nos verò de Operibus, quæ edidit S. Gregorius Magnus Papa, datâ operâ in proximo Colloquio differemus.

D. In hac serie Pontificum, qui sexto sæculo Sedem Romanam tenuerunt, nihil obscurum & implexum apparet, sed potius anni Ordinationum, & obitus singulorum Pontificum suis locis accurato ordine digeruntur ac disponuntur. Exhibe nunc seriem Episcoporum, qui sexto sæculo præfuerunt Ecclesiæ Alexandrinæ, quorum successionem in Colloquio tertio in Historiam quinti Ecclesiæ sæculi terminasti in *Joanne Mela*, seu *Hemula* Episcopo Alexandrino Hæretico Eutychiano, qui vitâ functus est anno circiter quingentesimo sexto.

M. In texenda serie Episcoporum, qui sexto sæculo præfuerunt Ecclesiæ Alexandrinæ, sequar Chronotaxim doctissimi *Pagii*, quæ mihi præ cæteris

ris aliis magis probatur. *Joannem* itaque *Melam*, seu *Hemulam* Episcopum Alexandrinum Hæreticum Eutychianum circa annum DVI. defunctum excepit *Joannes Nicæota* Hæreticus etiam Eutychianus, qui præfuit Ecclesiæ Alexandrinæ annis x i. & obiit anno DXVI. Joanne Nicæota demortuo, *Dioscorus junior* Hæreticus quoque Eutychianus Episcopus Alexandrinus renunciatus est, qui, postquam sedisset duos annos, menses duos, & dies viginti, discessit è vivis die octavâ mensis Octobris anni DXIX. *Dioscoro juniori* in Sede Alexandrina successus est *Timotheus* Hæreticus itidem Eutychianus, qui Ecclesiæ Alexandrinæ præfuit annos XVII. menses duos, & dies XIV. obiitque die septimâ Februarii anni DXXXVI.

Post *Timothei* Alexandrini Episcopi obitum, *Theodosius*, & *Gajanus* Hæretici Eutychiani de Sede Alexandrina altercati sunt. *Gajanus* stabat ab iis, qui Corpus Christi Domini ante resurrectionem incorruptibile fuisse pertendebant. *Theodosius* verò Chalcedonensem Synodum Oecumenicam, non recipiebat; indeque Alexandrina civitas duas in Sectas divisa est, *Gajanitarum* videlicet, & *Theodosianorum*, seu *Incorrupticolarum*, & *Corrupticolarum*, sicut testatur *Liberatus* in *Breviario* cap. 20. ubi hoc Schisma egregiè describit. Verùm, *Gajanus* per annum dumtaxat tenuit Episcopatum, & *Theodosius* post annum & quatuor menses Sede Alexandrina ab Imperatore Justiniano dejectus est, & in exilium relegatus mense Novembri an. DXXXVIII. *Theodosio* in Sede Alexandrina successit *Paulus*, qui anno circiter quingentesimo quadrigesimo primo homicidii convictus è Sede pulsus est, & suc-

cessorem habuit *Zoilum*, qui anno DLI. Sede quoque depositus est, & in ejus locum substitutus *S. Apollinaris*, qui annis xix. Ecclesiam Alexandrinam rexit, & ad Deum migravit anno DLXIX. *S. Apollinari* successit *Joannes*, qui, postquam sedisset annos novem, abiit è vivis anno DLXXX. habuitque successorem *S. Eulogium*, qui xxvii. annis præsuit Ecclesiae Alexandrinae, ac diem extremum clausit anno DCVII. Colitur *S. ille Patriarcha* die xii. mensis Septembris. Non minus doctrinā, quā sanctitate claruit, ut videre est in Bibliotheca Photii Cod. ccviii. ccxxv. ccxxvi. ccxxvii. ccxxx. & cclxx. ubi multa ejus Operum fragmenta recitantur. Doctissimus etiam noster *Combesius* tom. i. *Auctuarii Bibliothecae Graeco-Latinae* pag. 651. publicavit Sermonem *S. Eulogii Patriarchae Alexandrini in diem Festum Palmarum, & in pullum Asini*. Hæc est series Episcoporum, qui sexto nominis Christiani sæculo Alexandrinam Sedem tenuerunt.

Advertere tamen debes, Cardinalem Baronium Catalogo Episcoporum, qui sexto sæculo Ecclesiam Alexandrinam rexerunt, accensere quemdam *Asterium Catholicum*, quem anno DXXI. Ecclesiae Alexandrinae præsuisse affirmat. Verum, doctissimus *Pagius* ad annum DXXI. num. xviii. probat, *Asterium* non fuisse Episcopum Alexandrinum, quia nec in Chronico Nicephori, nec in Tabulis Theophanis, nec in Historia Patriarcharum Coptitarum, nec in Chronico Victoris Tununensis, nec in Breviario *Liberati*, nec in libro *Leontii de Sectis Aët. v.* qui Episcoporum Alexandrinorum seriem, accuratè digesserunt, nulla omnino *Asterii* Episcopi Alexandrini mentio fit. Præterea, ex serie Episcoporum

porum Alexandrinorum , quam mox texui , constat *Timotheum* Eutychianum Hæreticum præfuisse Ecclesiæ Alexandrinæ ab anno *DXIX.* usque ad annum *DXXXVII.* non potuit ergo *Asterius* Sedem Alexandrinam occupare anno *DXXI.* ut sibi persuasit Baronius . Non improbabilis tamen est conjectura eruditi *Garnerii* Soc. Jesu , qui in *Notis in Liberatum* cap. 19. autumat , *Timotheum* Episcopum Alexandrinum Hæreticum Eutychianum cognominatum fuisse *Asterium* , eò quod Alexandrini post *S. Cyrilli* obitum cognomines Episcopos agnominibus discernere soliti essent ; sicque *Timotheum* unum *Ælurum* , & alterum *Salofaciolum* nominasse , à quibus , ut tertium ejusdem nominis distinguerent , *Asterium* appellarunt .

D. In Colloquio tertio , quod habuimus in Historiam quinti Ecclesiæ sæculi , exhibuisti seriem Episcoporum , qui Ecclesiam Antiochenam in quinto sæculo gubernarunt usque ad annum *DXII.* quo *Flavianus* Episcopus orthodoxus ab *Anastasio* Imperatore Sede Antiochenâ dejectus in exilium missus est , atque in ejus locum intrusus *Severus* Hæreticus Eutychianus , nunc producere debes seriem Episcoporum , qui ab anno *DXII.* usque ad finem sexti sæculi eidem Ecclesiæ Antiochenæ præfuerunt .

M. Flaviano orthodoxo Episcopo anno *DXII.* ab *Anastasio* Imperatore Sede Antiochenâ dejecto , *Severus* Hæreticus Eutychianus die sextâ Novembris ejusdem anni Sedem Antiochenam occupavit , & ipso ordinationis suæ die conscenso pulpito Concilium Chalcedonense damnavit . Verum , iste Hæreticus Antiochiæ Antistes damnatus in Synodo Constantinopolitana anno *DXVIII.* congregatâ ,

Sedem Antiochenam deserere coactus est mense Septembri anni **DXVI**. postquam illam occupasset annos quinque, ac menses decem; indeque venit in Ægyptum, & postea Alexandriam adiit. *Severo* Sede Antiochenâ, quam invaserat, abdicato, in ejus locum *Paulus* mense Junio anni **DXIX**. substitutus est, qui, postquam tribus annis incompletis sedisset, Episcopatu Antiocheno cessit anno **DXXI**. ei que successit *Euphrasius*, de quo *Theophanes* hæc habet: *Euphrasius Antiochenus Chalcedonensis Synodi Patrum, & ipsius Papæ Romani nomina Dyptichis expunxit. Postmodum metu pœnitens redditus, quatuor Synodos publicè promulgavit. Justinus quippè Imperator initio Imperii sui lege latâ sanxerat, ut Episcopi, qui Synodum Chalcedonensem suscipere detrectarent, Sedibus suis pellerentur. Hujus legis Imperialis meminit Liberatus in Breviario c. 19. Euphrasius rexit Ecclesiam Antiochenam annis quinque, & obiit anno **DXXVI**. successorem habuit *Euphremium*, qui Episcopus Antiochenus ordinatus est anno **DXXVII**. & præfuit Ecclesiæ Antiochenæ septemdecim annis, hoc est, usque ad annum quingentesimum quadragesimum quintum. Euphremio eodem anno **DXLV**. successit in Sede Antiochena *Domnus*, seu *Dominus*, qui quatuordecim annos sedit, & vitâ functus est anno quingentesimo quinquagesimo nono. *Domnum*, seu *Domnum* excepit *Anastasius I.* qui, ut mox ostendam, diversus fuit ab *Anastasio Sinaita*, cum quo tamen Baronius perperam illum confudit. Hic *Anastasius I.* Sedem Antiochenam rexit annos undecim, hoc est, usque ad annum **DLXX**. quo anno à Justino juniore Imperatore Antiochenâ Sede dejectus est, & in*

& in ejus locum provectus est *Gregorius* Monachus, & Byzantiorum Monasterii Apocrisarius. At mortuo Gregorio anno dxcii. postquam annos xxiii. Antiochiæ sedisset, rursus Anastasius I. à *Mauricio* Imperatore in Sedem Antiochenam restitutus est die xxv. mensis Martii anni dxciii. seditque post restitutionem suam sex annis incompletis, hoc est, usque ad finem anni quingentesimi nonagesimi octavi, quo anno mortuus est, eique successit *Anastasius II.* Martyr nuncupatus, eò quod in Judæorum conversionem ardentissimo zelo incumbens, ab illis per summam crudelitatem fuerit excarnificatus anno ineunte duodecimo Episcopatus sui Antiocheni, idest, anno dcix. sub *Phoca* Imperatore. Hæc est series Episcoporum, qui sexto sæculo Ecclesiæ Antiochenæ præfuerunt.

Verùm, quia nonnulli post Card. Baronium confundere solent *Anastasiū* Patriarcham Antiochenum hujus nominis primum cum *Anastasio Sinaita*; ad istum præcavendum errorem non abs re erit, quatuor hic distinguere *Anastasios*, qui pietatis laude in Ecclesia celeberrimi fuerunt, quorum primus est *S. Anastasius* Presbyter Monachus Sinaita in Arabia, qui vixit in monte Sinai, & Monachorum Asceteriis circumquaque oblitus fuit. Ejus memoria celebratur à Græcis die xx. mensis Aprilis, & in quibusdam Menologiis die xxi. ejusdem mensis. Quantum pro Ecclesia Dei usque ad senectutem S. ille Monachus Anastasius Sinaita laboraverit, ostendunt varia ejus scripta, quæ, ut in proximo Colloquio videbimus, immeritò Baronius, alique viri doctissimi tribuunt Anastasio Patriarchæ Antiocheno hujus nominis primo, quem

malè *Sinaitam* appellant, cùm tamen Anastasius Patriarcha Antiochenus hujus nominis primus fuerit planè diversus ab Anastasio Sinaita, ut docent *Leo Allatus* in *Diatriba de Simeonum scriptis*, *Henschenius* ad diem xxi. mensis Aprilis in vita Sancti Anastasii Sinaitæ, & Sancti Anastasii Patriarchæ Antiocheni hujus nominis primi, alique recentiores doctissimi. Tertius Anastasius pietatis laude insignis, fuit *Sanctus Anastasius* Patriarcha Antiochenus, hujus nominis secundus, qui, ut mox observatum est, à Judæis per summam immanitatem excarnificatus est. Postremus Anastasius, qui sanctitatis famâ commendatur, est *Sanctus Anastasius* Persa, qui anno dcxxvi. ad *Chosroen* Persarum Regem, quod Fidem Christianam negare noller, perductus; illius jussu variis modis cruciatus, martyrio tandem coronatus est, multisque miraculis claruit. Ex hac itaque quatuor Anastasiorum distinctione, liquidò patet, errasse illos Scriptores, qui Anastasium Patriarcham Antiochenum hujus nominis primum, cum Anastasio Sinaita confuderunt, & unum eundemque fecerunt.

D. Brevitèr, sed accuratè descripsisti seriem Episcoporum, qui sexto sæculo Antiochenæ Ecclesiæ præuerunt. Veniamus nunc ad Episcopos, qui eodem sæculo Ecclesiam Hierosolymitanam gubernarunt.

M. Seriem Episcoporum, qui Ecclesiam Hierosolymitanam quinto sæculo gubernarunt, perduxi usque ad *Eliam* Orthodoxum Episcopum, qui, sicut jam commostravi in Colloquio III. in Historiam quinti Ecclesiæ sæculi, jussu Anastasii Imperatoris, instigante *Severo* Episcopo Antiocheno Hæretico

cico Eutychiâno, Sede Hierosolymitana anno DXIII. dejectus est, & in ejus locum subrogatus *Joannes* Marciani filius, quod spondêret, se in suam communionem admissurum *Severum* Hæreticum. Sed promissis tamen non stetit. Ordinatus quippè Hierosolymorum Episcopus *Joannes*, & à *S. Saba* Abbate à *Severi* communione ad Synodi Chalcedonenfis professionem adductus, coëgit anno DXVIII. imperante Justino, Synodum Hierosolymitanum, in qua *Severus* cum impiis ejus dogmatibus damnatus est. Hic *Joannes* hujus nominis III. rexit Ecclesiam Hierosolymitanam annis undecim, hoc est, ab anno DXIII. quo *Elias* depositus est, usque ad annum DXXIV. Joanni in Sede Hierosolymitana successit eodem anno DXXIV. *Petrus Eleutheropolita*, qui, ut videre est tam in tabulis Theophanis, quam in Chronico Nicephori, sedit annos viginti, ac subinde mortuus est anno DXLIV. demortuo Petro Eleutheropolitæ successit *Macarius* hujus nominis II. qui anno DLII. accusatus tanquàm errorum Origenis assertor ac defensor, Sede privatus est, & in ejus locum substitutus fuit *Eustochius*, qui annis XI. præfuit Ecclesiæ Hierosolymitanæ, superstitè adhuc Macario. Verùm anno DLXIII. Eustochio è Sede Hierosolymitana pulso, iterùm *Macarius*, postquàm Origenem, Didymum, atque Evagrium damnasset, ac Fidei Catholicæ professionem exhibuisset, in pristinam Sedem restitutus est, eamque tenuit usque ad annum DLXXII. ex quo rectè doctissimus *Pagius* duos corrigit errores, in quos circa *Macarium* Episcopum Hierosolymitanum impegit Card. Baronius. Primus error in hoc consistit, quod Eminentissimus Annalium parens affirmet, *Macarium* in-

in Sedem Hierosolymitanam restitutum fuisse antè quintam Synodum generalem, quæ celebrata est anno DLIII. Alter error in hoc versatur, quod velit idem Annalium Scriptor, *Joannem* hujus nominis IV. Episcopum Hierosolymitanum successisse Eustochio anno DLXI. Utrumque Baronii errorem refellit *Pagius* testimonio Evagrii auctoris cœvi, qui lib.4. Hist. Eccles. cap.39. disertè asserit, Macario in Sedem Hierosolymitanam restituto, Imperatorem Justinianum publicasse Edictum de incorruptibilitate Corporis Christi. Porro, certum est, istud Edictum ab Imperatore Justiniano promulgatum dumtaxat fuisse initio anni DLXV. Undè sequitur primò, Macarium in Sedem Hierosolymitanam fuisse tantummodò restitutum circà annum DLXII. ac subindè post quintam Synodum generalem. Secundò, sequitur, Joannem hujus nominis IV. Episcopum Hierosolymitanum non successisse Eustochio anno DLXI. ut putat Baronius, quia Eustochius fuit dumtaxat Sede Hierosolymitana dejectus anno DLXIII. quo anno Macarius in Sedem Hierosolymitanam restitutus est, eamque, ut mox dixi, tenuit usque ad annum CLXXI. Quapropter, juxta accuratorem Chronologiam dicendum est, Macario Episcopo Hierosolymitano an. DLXXI. defuncto successisse Joannem hujus nominis IV. qui, teste Nicephoro in Chronico, sedit annos viginti duos, & ex hac vita migravit anno DXCIV. Denique, Joanni successus est *Amos*, qui, juxta Nicephorum in Chronico, & tabulas Theophani insertas, Ecclesiam Hierosolymitanam rexit annos octo, & ex hac vita migravit an. DCI. Habes hic breviter descriptam seriem Episcoporum, qui sexto sæculo Hierosolymitanæ Ecclesiæ præfuerunt.

D. Hic

D. Hic tantummodò desideratur series Episcoporum , qui sexto sæculo Sedem Constantinopolitanam occuparunt, quam semel cùm descripseris, perspectam habebō seriem Episcoporum , qui sexto nominis Christiani sæculo præcipuas Ecclesiæ Sedes, Romanam videlicet, Alexandrinam, Antiochenam, Hierosolymitanam, & Constantinopolitanam tenuerunt.

M. *Macedonius* hujus nominis II. qui , sicut jam observavimus in Colloquio III. in Historiam quinti Ecclesiæ sæculi , Sedem Constantinopolitanam inierat anno quadringentesimo nonagesimo sexto , rexit Constantinopolitanam Ecclesiam annos quindecim , ut habet Baronius, idest, usque ad annum quingentesimum undecimum , quo anno ab Imperatore Anastasio Sede expulsus in exilium missus est, eo quod istud additamentum: *Unus è Trinitate crucifixus est* , Trisagio ab eodem Imperatore factum approbare renueret . Hunc Macedonium Zenonis Imperatoris Henotico subscripsisse negat Baronius , & *Theodorum* Lectorem lib.2. qui illud disertè asserit, non esse audiendum contendit . At id non tantum Theodorus , sed & *Theophanes* & *Liberratus* in Breviario litteris consignarunt . Quò fit ut negari haud possit , Macedonium Episcopum Constantinopolitanum Zenonis Henotico subscripsisse . Cæterum, nec Schismaticus, nec Hæreticus ob id dici potest *Macedonius* . Chalcedonensem siquidem Synodum generalem summâ veneratione excepit , & ab illius decretis , quæ fidem spectant, nunquam recessit ; quamvis ad majora vitanda incommoda *Diodorum* Tarsensem , *Theodorum* Mopsuestenum , *Theodoretum* Cyrensem , & quosdam alios Episcopos ,

pos, qui in Concilio Chalcedonenſi tanquàm Catholicici habiti fuerant, anathematizari. Qua in re culpâ vacaſſe Macedonium ſatis oſtendit quinta Synodus generalis, quæ tria Capitula damnavit. Macedonio demortuo in exilio anno dxxv. multisque calamitatibus pro Fide Catholica oppreſſo ſacrum cultum à Græcis exhibitum indicant MS. Synaxarium, quod in Collegio Claromontano Soc. Jeſu Pariſiis aſſervatur, varia Menſæ Græca MSS. & excuſa, quæ habentur apud *Maximum Cytherorum* Episcopum pro Eccleſiis Orthodoxis. Ablatum quidem fuit ad tempus Macedonii nomen è ſacris Diptychis, ſed in ea poſteà fuit reſtitutum. Plura de Sancto Macedonio Episcopo Conſtantinopolitano legi poſſunt in ejus vita, quam *Henschenius* in Actis Sanctorum ſcripſit ad diem xxv. menſis Aprilis.

Sede Conſtantinopolitana ab Imperatore Anaſtaſio deſecto Macedonio, & in exilium miſſo anno quingentefimo undecimo ſucceſſus eſt *Timotheus* Hæreticus Eutychianus, qui, ut ſcribit *Theophanes*, *primùm Eccleſias ingreſſus Macedonii depoſuit imagines, atque ità demùm ſacris operam dedit: Joannemque Nicaotam Alexandrinum Episcopum* (Hæreticum pariter Eutychianum) *in Eccleſiæ tabulas recensuit, Synodicasque literas ad eum ſcripſit: Præfuit hic Hæreticus Timotheus Eccleſiæ Conſtantinopolitanæ annos ſex, hoc eſt, à fine anni dxi. quo depoſitus, & in exilium miſſus eſt Macedonius, uſque ad an. dxxvii. ut videre eſt in Chronico Nicephori, & in tabulis Theophanis. Poſt mortem Timothei Joannes Capadox die xvi. Aprilis anni dxxviii. ordinatus eſt Episcopus Conſtantinopolitanus, & ab eo populus conſeſtim petiit, ut excommunicatis Eutychianis,*

eorumque defensoribus, Chalcedonense Concilium cum Sancti Leonis Papæ, & *Euphrasii*, ac *Macedonii* Episcoporum Constantinopolitanorum nominibus sacris Diptychis restitueretur; quod cum importunis populi clamoribus convictus *Joannes* præstitisset, collecta est Constantinopoli Synodus, in cujus principio oblatus est libellus à Monachis Orthodoxis quinque petitiones continens, quarum prima, erat, ut *Euphemius*, & *Macedonius* in exilio mortui sacris Diptychis inscriberentur. II. ut qui propter eorum causam relegati fuerant, propriis gradibus restituerentur. III. ut Synodi Constantinopolitana, Nicæna, & Ephesina Diptychis prædicarentur. IV. ut Sanctus Leo Papa in iisdem enumeraretur. V. ut attentata contra Chalcedonensem Synodum removerentur, & blasphema verba contra ipsam per *Severum* Hæreticum prolata anathemati subjicerentur. Cognitis itaque & examinatis quinque hujus libelli petitionibus, Episcopi in hac Synodo congregati *Severum* anathemate percule- runt, & quinque decreta ediderunt, quorum exemplaria ad omnes Orientis Episcopos misit *Joannes* Patriarcha Constantinopolitanus. Rectè autem observat *Cl. Pagius* ad annum DXX. hunc Joannem Episcopum Constantinopolitanum primum fuisse, qui Patriarchæ *Oecumenici*, seu *universalis* nomen ausus est usurpare. Sedem Constantinopolitanam unum dumtaxat tenuit annum, menses decem, & aliquot dies, obiitque die xxv. mensis Februarii anni DXX. Joanni Episcopo Constantinopolitano è vivis erepto successit *Epiphanius*, qui sedit annos quindecim, & menses tres, mortemque oppetiit die quintâ mensis Junii anni DXXXV. Defuncto *Epiphani-*
nio,

nio, *Anthimus* Episcopus Trapezuntinus Hæreticus Eutychianus, agente *Theodora* Augusta Eutychianis partibus vehementer addictâ, ad Sedem Constantinopolitanam translatus est. Sed *Anthimum*, postquam hanc Sedem mensibus decem tenuisset, *Agapetus* Summus Pontifex tùm temporis Constantinopoli degens tanquàm Hæreticum & injustum invasorem exauctoravit, & in ejus locum *Mennam* subrogavit. Rem gestam narrat *Liberatus* in Breviario cap. 21. his verbis, quæ ad stabiliendum Romani Pontificis Primatum maximè sunt observanda: *Potentibus*, inquit, *Principibus*, ut *Anthimum* Papa, scilicet *Agapetus*, in salutatione & communione susceperet, illa fieri inquit posse, si se libello probaret Orthodoxum, & ad Cathedram suam reverteretur. Impossibile esse ajebat translatitium hominem in illa Sede permanere: *Augusta* verò clàm promittente munera multa, in hoc Papa perstitit ne ejus audiret petitionem. *Anthimus* verò videns se Sede pulsum, quod habuit, Imperatoribus reddidit, & discessit, ubi eum *Augusta* patrocínio suo tueretur. Tunc Papa Principis favore *Mennam* pro eo ordinavit Antistitem, consecrans eum manu sua in Basilica Sanctæ Mariæ. *Mennas* itaque à Summo Pontifice *Agapeto* die XIII. mensis Martii anni DXXXVI. fuit consecratus Episcopus Constantinopolitanus, seditque annos XVI. menses sex, ut testatur *Nicephorus* in Chronico, & mortuus est incunte mense Augusto anni DLII. Colitur *Mennas* in Martyrologio Romano die XXV. mensis Augusti, quemadmodum in Menologio Græcorum. Mortuo *Menna*, confestim *Eutychius* electus est Episcopus Constantinopolitanus, qui anno sequenti, seu DLIII. Vigilio Papæ fidei suæ professionem exhibi-

hibuit, eumque Epistolâ à se & ab *Apollinari Alexandrino*, *Domno Antiocheno*, & *Elia Thessalonicensi Patriarchis* subscriptâ, rogavit ut Concilium ad trium Capitulorum causam terminandam tandem inchoaret. Eutychius Ecclesiam Constantinopolitanam rexit annos xii. & menses circiter quinque, idest, usque ad annum dLxv. quo anno Sede sua ab Imperatore Justiniano depositus est, & in exilium missus, eo quod subscribere nollet Edicto, quod eodem anno publicavit ad stabiliendam cum Eutychianis incorruptibilitatem Corporis Christi antè Resurrectionem. Amoto à Sede Constantinopolitana Eutychio, *Joannes Scholasticus* die xii. mensis Aprilis ejusdem anni dLxv. ordinatus est Episcopus Constantinopolitanus, qui annos xii. & menses quinque utrinque incompletos præfuit Ecclesiæ Constantinopolitanæ, & obiit anno dLxxvii. Mortuo *Joanne Scholastico*, Eutychius, post annos duodecim exilii, ab Imperatore Tiberio revocatus est & in Sedem Constantinopolitanam die iii. Octobris ejusdem anni dLxxvii. restitutus, quam tenuit usque ad annum dLxxxii. quo vitâ functus est die vi. mensis Aprilis, quatuor scilicet mensibus antè mortem Tiberii Imperatoris, quam ipse prænunciavit, teste *Eustathio Presbytero* in vita Sancti illius Præsulis, cujus fuit familiaris domesticus, & ab ejus latere nunquam discessit. Hæc vita extat apud *Henschenium* in Actis Sanctorum ad diem vi. Aprilis. Eutychium in Sede Constantinopolitana excepit *Joannes* dictus *Jejunator* die xii. Aprilis ejusdem anni dLxxxiii. Synodum Constantinopoli indixit anno dLxxxvi. ut titulum Episcopi *Oecumenici*, seu *universalis*, quem immeritò usurpaverat, sibi Syno-

nodali decreto adscisceret ac confirmaret; sed ei strenuè obstitit S. Gregorius M. Papa, ut videre est in pluribus ejus Epistolis, in quarum principio superbos titulos rarâ modestia repudians, se *Servum Servorum Dei* appellat. Græci hunc Joannem dictum *Jejunatorem* magnis exornant encomiis. *Theophylactus* lib. 7. cap. 6. pluribus eum laudat à voluptatum contemptu, à domitis animi perturbationibus, à jejuniis, à misericordia in egenos, à studio pauperatis, ostenditque, *Mauricium* Imperatorem ejus lecto ligneo, stragulo, & penulæ maximum honorem detulisse. *Sophronius* Patriarcha Hierosolymitanus apud Photium in Bibliotheca Cod. ccxxx1. appellat Joannem Jejunatorem, *virtutis domicilium*. Colitur etiam à Græcis *Joannes Jejunator* die 11. mensis Septembris, ut videre est in eorum Menologiis, & Synaxariis. At paulò durius à Latinis idem *Joannes Jejunator* habitus est, eo solo nomine, quod à Sancto Gregorio Summo Pontifice, ob usurpatum Episcopi *universalis* titulum, reprehensus sit. Verum, id sanctitati *Joannis*, dicti *Jejunatoris*, officere non debere, agnovit ipsemet Sanctus Gregorius Papa, quippè qui prædictum Joannem jam defunctum appellat *Sanctissimum* in Epistola LXIV. lib. 5. doctissimus etiam P. *Thomassinus* lib. 1. de *Vetere, & nova Ecclesiæ Disciplina* ostendit, quâ ratione possit ex Sanctorum Patrum Regulis Joannis Jejunatoris fama conciliari cum iis, quæ aculeatissimè in eum à Sancto Gregorio Papa dicta sunt. De doctrina *Joannis Jejunatoris*, & de libris ab ipso editis, in proximo nostro Colloquio, quod erit de *Viris Illustribus*, opportuniùs disceremus. Sufficiat hic observare, Joannem Jejunatorem sedisse annos undecim,

men-

menes quinque , & ad Deum migrasse anno dxcv. eique successisse *Cyriacum* Presbyterum & Ecclesiæ Constantinopolitanæ Æconomum , cui Nicephorus in Chronico attribuit annos undecim . Quare *Cyriacus* Episcopus Constantinopolitanus , & Joannis Jejunatoris successor rexit Ecclesiam Constantinopolitanam ab anno dxcv. usque ad annum dcvi. quo mortuus est . Sed de Episcopis , qui sexto sæculo præcipuas Ecclesiæ Sedes , Romanam videlicet , Alexandrinam , Antiochenam , Hierosolymitanam , & Constantinopolitanam tenuerunt , sat superque dictum sit .

COLLOQUIUM V.

*De Viris Illustribus , qui sexto Ecclesiæ
sæculo doctrina , & pietate
claruerunt .*

D. **L**Egi nuperrimè in aureo , omnibusque numeris absoluto libro, quem edidit doctissimus *Melchior Canus* de locis Theologicis, neminem posse esse Thelogum omni laude cumulatum, nisi in Sanctorum Patrum, Scriptorumve Ecclesiasticorum Operibus diù fuerit exercitatus , atque ex jugi eorum lectione promptum & expeditum sibi paraverit argumentandi usum . Quapropter, te etiam atque etiam rogo, ut sicut Sanctorum Patrum , Scriptorumve Ecclesiasticorum , qui in præcedentibus sæculis floruerunt, genuina jam indicasti Opera, eaque à spuriis, vel dubiis accuratè secrevesti, ita nunc Opera Sanctorum Patrum, & Scriptorum Ecclesia-

Tom. II. V. si.

sticorum, qui sextum Ecclesiæ sæculum sanctitate, & eruditione illustrarunt, perconsere ne graveris, ut postea ingenium meum in eorum lectione acueret, excolere, atque pro meo modulo exercere possim.

M. Quamvis Scriptores, qui sexto Ecclesiæ sæculo tam in Occidente, quam in Oriente claruerunt, eâ nominis celebritate contendere haud possint cum illis, qui in præcedentibus sæculis floruerunt; negari tamen non potest, eorum doctrinâ & pietate Ecclesiam plurimum fuisse illustratam. In primis, ut auspicemur ab his Scriptoribus, qui in Occidente floruerunt, quatuor potissimum insignes Galliarum Episcopi sanctitatis palmam litteris excultæ sexto Ecclesiæ sæculo tulerunt, *Avitus* Viennensis, *Remigius* Remensis, *Gregorius* Turonensis, & *Casarius* Arelatensis, de quorum vita & scriptis breviter hic differemus.

Sanctus Avitus ex illustrissima Prosapia ortus, utpotè *Aviti* Imperatoris nepos, & *Isicii* Senatoris, ac postea Viennensis Episcopi filius, & *Apollinaris* Valentini Episcopi frater, electus est post mortem patris sui *Isicii* Ecclesiæ Viennensis Episcopus, quam sanctissimè rexit, totamque Galliam ab infestatione Arianæ Hæreseos defendit. *Gundabodum* Burgundionum Regem Arianum ut ab Hæresi ad fidem Catholicam adduceret, Collationem in Burgundia habuit cum Arianis anno quingentesimo primo, in qua convicti fuere Ariani, & ex illis plures ad veram fidem conversi; *Gundabodus* tamen Rex pervicax in errore perstitit, sed *Sigismundus* ejus filius Catholicam Fidem amplexus est. Hæc Collatio *Aviti* Episcopi Viennensis coram Rege *Gundabodo*
ad-

adversus Arianos habita legitur tomo iv. Conciliorum pag. 1318. Colitur S. Avitus die v. mensis Februarii, ut videre est in Martyrologio Romano, ad quam diem *Henschenius* Vitam S. Aviti recitat, quæ tamen, teste Cl. *Pagio* ad annum dxxvi. num. v. cum tardiùs scripta fuerit, non magna ei fides adhiberi potest. Sancti Aviti Epistolas, Homiliarum, & Opusculorum fragmenta, atque poemata luce publicâ donavit, & eruditis notis illustravit *Sirmondus*, quæ inserta sunt tomo ix. Bibliothecæ maximæ Patrum Lugdunensis.

Sanctus Remigius Episcopus Remensis, & Galliciarum Apostolus nonnullas scripsit Epistolas. De initio illius Episcopatus, & de anno ejus obitus constans non est Scriptorum opinio. Probabiliùs tamen *Henschenius* ad diem vi. Februarii in Vita Sancti *Vedasti* Episcopi Atrebatensis, qui eodem, quo Remigius, floruit tempore, initium Episcopatus Remigii illigat anno cccclvi. illius verò mortem consignat anno dxxx. ex quo sequitur, Remigium septuaginta tres annos in Episcopatu explevisse, quod innuere videtur Gregorius Turonensis, qui in lib. de Gloria Confessorum cap. 79. ait, Remigium septuaginta, aut eo ampliùs in Episcopatu annos transigisse. Remigius non est auctor *Explanationum*, seu *Commentariorum in Epistolas Pauli*, quia in his citatur Beatus *Benedictus*, Sanctus Gregorius Papa, & vita Sancti *Casarii* Episcopi Arelatensis à Sancto Cypriano Tolonensi Episcopo post annum quingentesimum quadragesimum quartum elucubrata, quam Vitam Remigius Remensis Episcopus citare non potuit, quippè qui, ut mox observatum est, è vivis excessit anno quingentesimo tricesimo. Hinc *Lab-*

beus in Dissertatione de Scriptoribus Ecclesiasticis hanc explanationem, seu Commentarium in Epistolas Pauli factum esse suspicatur *Haymonis* Albertatensis Episcopi. *Usserius* verò in Historia Gottescalchi, & quidam alii, hunc Commentarium Remigio Lugdunensi Episcopo tribuunt. *Albertinus* tandem lib. de Sacram. Eucharistiæ pag. 886. & seq. illius Commentarii auctorem putat esse *Remigium* in Abbatia Sancti Germani Antisiodorensis Monachum, qui sub finem sæculi noni floruit, quique ad scholas instaurandas Remose evocatus est, ut scribit *Flodoardus* lib. 4. Hist. Ecclesiæ Remensis cap. 9. Hæc *Albertini* conjectura pluribus viris doctis probata est, de qua, sicut & de auctore illius Commentarii in Epistolas Sancti Pauli legendus est doctissimus *Carolus Cointius* in Annalibus Francorum ad annum DXXXII. num. XLIX. Testamenti Sancti Remigii Episcopi Remensis meminit *Baronius* & ex eo aliqua loca recitat. Verùm, Baronii ætate istud Sancti Remigii Testamentum extabat tantùm in Historia Flodoardi cap. 18. variis auctum interpolationibus, quæ, cùm à temporibus, & genio Sancti Remigii abhorreant, multis eruditissimis viris supposititium jure merito visum est. Tandem genuinum hujus Testamenti exemplar prodit in nova disquisitione de *Ampulla Remensi* in tom. I. Bibliothecæ Labbeanæ, & in Annalibus *Cointii* ad annum DXXXIII. num. I. & seq. apparuitque verè, hoc Testamentum à Sancto Remigio conditum, eoque Ecclesiam Remensem, *Lupum* Episcopum Sueffionensem fratris sui filium, & *Agricolam* Presbyterum nepotem suum à Sancto Remigio Hæredes fuisse institutos. Vitam Sancti Remigii Episcopi Re-

men-

mensis legis apud Hincmarum, & Flodoardum, lib. 1. Hist. Ecclesiæ Remensis.

Sanctus Gregorius Patria Arvernus, & nobili genere oriundus, Episcopus Turonensis consecratus est anno DLXXI. & ad Deum migravit anno DXCIV. Scripsit decem libros Historiæ, sive Annalium Francorum, in quibus Historiam ab initio Mundi ad conditam usque Francorum Monarchiam brevissimè perduxit. Dein, lato calamo Historiam ad annum usque quingentesimum nonagesimum primum profecutus est. Vulgata tamen hujus Operis exemplaria insigniter esse depravata, non modo conqueritur, sed infinitis exemplis probat sæpè laudatus Carolus Cointius tom. 1. Annalium Francorum. Extant adhuc alii libri editi à Sancto Gregorio Turonensi Episcopo, videlicet Epitome de rebus gestis Francorum. Liber de Vitis Patrum. Libri Miraculorum VII. hoc est, IV. Libri de Virtutibus & Miraculis Sancti Martini. De Gloria Martyrum libri duo. De Gloria Confessorum liber unus. Præterea, duos libros composuit Gregorius Turonensis, qui injuriâ temporum perierunt, scilicet librum de Cursibus Ecclesiasticis, & Commentarium in Psalmos, cujus bina fragmenta exhibet doctissimus Mabillonius tom. 1. Anal. pag. 7. Denique, observant periti Critici, hallucinari nonnullos, qui Librum de Septem Dormientibus in Monasterio propè Turonos quiescentibus Gregorio Turonensi adscribunt, eo quod Gregorius Turonensis prædictum librum Sulpicio Bituricensi Episcopo dedicarit, & sub Gregorii Turonensis nomine editores hunc librum publicarint. At dubium non est, quin in hoc fallantur. Nam præterquamquod hujus libri de Septem Dormientibus

bus nullatenus meminit Sanctus Gregorius Turonensis in Epilogo Historiæ suæ, ubi omnes libros à se editos recenset, affirmat insuper idem S. Pater in Præfatione, se hunc librum *de Septem Dormientibus* repertum in Archivo Majoris Monasterii prope Turonos dignum judicasse, qui publicam in lucem ederetur. Hic igitur liber *de Septem Dormientibus* non est genuinus Sancti Gregorii Turonensis factus.

Sanctus Cæsarius Arelatenfis Episcopus ordinatus fuit anno quingentesimo secundo, & postquam per 40. annos Arelatenfi Ecclesiæ sanctissimè præfuisset, mortuus est anno DCLI I. Cœnobium sanctimonialium Arelate pro sorore sua *Cæsaria* ædificavit, quod etiamnum vetustate venerandum, & Monialium, quæ in eo Virginitatem suam Deo vovent, nobilitate illustratum subsistit. Sanctus Cæsarius doctrinæ Sancti Augustini invictissimus assertor Semipelagianorum errores strenuè oppugnavit, varique Opuscula & Homilias composuit cum duabus Regulis, quarum unam, quæ spectat ad Moniales ipse scripsit, alteram, quæ pertinet ad Monachos, *Teridius* Presbyter ipsius Cæsarii nepos ab eo dictatam & per diversa Monasteria fuisse transmissam affirmat. Vitam Sancti Cæsarii duobus libris descriptam sæculo L. Benedictino inseruit doctissimus Pater Mabillonius. *Prioris* auctor est S. Cyprianus Episcopus Tolonenfis, *Posterioris*, Messianus Presbyter, & Stephanus Diaconus. Dedicata est Sancti Cæsarii Vita *Cæsariæ* non quidem seniori, quæ Sancti Cæsarii soror erat, eoque adhuc superstite decessit; sed *Cæsariæ juniori*, quæ alteri in Abbatiam Monasterii Arelatenfis successit.

His

His quatuor Galliarum Episcopis doctrinâ & pietate inclytis meritò adungere possum *S. Sulpicium* Bituricensem Episcopum, qui *virtutibus & eruditione* conspicuus, ut legitur in Martyrologio Romano ad iv. Kalend. Februarias, excessit è vivis anno quingentesimo nonagesimo primo; *Ruricium* senioresem Episcopum Lemovicensem, cujus Epistolarum ad varios scriptarum libros duos publici juris fecit *Henricus Canisius* tom. v. antiq. lect. qui etiam inserti sunt tomo viii. Bibliothecæ maximæ Patrum Lugdunensis; *Evantium* Viennensem Episcopum, qui interfuit Concilio Maticonensi I. Lugdunensi III. Valentino II. & Matisconensi II. ediditque Epistolam contra eos, qui sanguinem animalium immundum esse judicant, & carnem mundam esse dicunt, apud *Canisium* antiq. lect. tom. 5. par. 2. *Venantium Fortunatum*, qui relictâ Italiâ, undè oriundus erat, Galliam profectus est, ut Reliquias Sancti Martini Turonensis Episcopi, cujus ope gravissimis oculorum doloribus fuerat liberatus, in Urbe Turonensi depositas inviseret. Indè in Urbem Pictaviensem se contulit, ubi Presbyteratus honorem meruit, ac tandem ejusdem Urbis Episcopus ordinatus est. Scripsit Poëmatum libros xi. quos Sancto Gregorio Turonensi nuncupavit. Edidit etiam libros quatuor de Vita Sancti Martini, & Vitas aliquot Sanctorum Galliarum Episcoporum. Vitam *Venantii Fortunati* scripsit *P. Browverus* Soc. Jesu, quam illius Operibus præfixit. Demùm, inter Scriptores, qui sexto Ecclesiæ sæculo doctrinâ & pietate in Galliis claruerunt, recensetur *Sanctus Gildas* Abbas Monasterii Ruyensis, in Diocesi Venetenſi, cognomento *Sapiens*, cujus extant Opera tom. viii. Bi-

bliothecæ maximæ Patrum Editionis Lugdunensis. Sunt qui distinguunt eundem Gildam in duos, quorum unus *Badonicus*, alter *Albanus* dictus fuerit, sed eos, qui ita sentiunt, à vero abludere ostendunt *Bollandus* ad diem xxix. mensis Januarii, & *Mabilonius* sæculo I. Benedictino, ubi Sancti Gildæ vitam refert. Natus erat S. Gildas in magna Britannia, sed in Armoricam, seu in minorem Britanniam postea secessit, ubi Cœnobium Ruyenſe extruxit, quod nunc gallicè nuncupatur: *Saint Gildas de Ruye*.

D. Cedo, si placet, alios Scriptores Ecclesiasticos, qui sexto nominis Christiani sæculo, in aliis Orbis partibus floruerunt?

M. Plurimi Scriptores sexto Ecclesiæ sæculo celebres fuerunt in Africa, Hispania, & Italia. Inter Scriptores Africanos primas tenet *Sanctus Fulgentius* Ruspensis Episcopus in Scriptura Sacra, & in doctrina SS. Patrum, præcipuè S. Augustini, versatissimus. Decem libros pro defensione Gratiæ Christi lucubravit, quorum septem adversus libros à *Fausto* Rejenſi Episcopo Semipelagiano editos composuit, & universa, quæ hic Semipelagianorum Coriphæus contra doctrinam S. Augustini scripturierat, omni argumentorum genere funditus subvertit. Reliquos tres libros ad *Fausti* Sectatores expugnandos Monachis Scythis acerrimis gratiæ defensoribus inscripsit. Libri septem, quos Fulgentius edidit contra *Faustum*, perierunt; eos tamen se legisse testatur S. *Isidorus* Archiepiscopus Hispalensis in lib. de Illustribus Scriptoribus. Tres alios libros de veritate prædestinationis & gratiæ inscriptos edidit Fulgentius, sicut testatur auctor vitæ ejus cap. 29. Præterea, à *Monimo* viro laico, sibi que amicissimo, ad scribendum de
divi-

divina prædestinatione iterum compulsus, tres libros procudit Fulgentius, in quibus eum in scopum collimat, ut ostendat, Deum prædestinare homines ad bona, non ad mala perpetranda; Sanctumque Augustinum intellexisse Dei prædestinationem ad malum pœnæ, non ad malum culpæ. Hos tres libros ad *Eugippum* Abbatem Augustinianæ doctrinæ per Italiam propagatorem transmisit Fulgentius. Præter illos recensitos libros, quos pro defensione gratiæ Christi juxta mentem Sancti Augustini exaravit Sanctus ille Doctor, alii adhuc extant ab illo concinnati, videlicet *adversus Arianos liber*. *Ad Donatum liber de Fide Orthodoxa ex diversis erroribus Hæreticorum*. *Ad Petrum Diaconum de Fide liber*. *Adversus Trasamundum Regem libri tres*. *Pro Fide Catholica adversus Pintam Arianum liber*, à Chiffletio primum editus. *De quinque Quæstionibus ad Ferrandum liber*. *Variæ Epistolæ Morales & Dogmaticæ*. Plura de Sancti Fulgentii libris legi possunt apud *Labbeum* in Dissertatione de Scriptoribus Ecclesiasticis. Sanctum Fulgentium omnia Latinorum Martyrologia memorant, ejusque vitam gravi stylo quidam ejus Discipulus scripsit, quam exhibet *Bollandus* ad diem primam mensis Januarii. Inter Sancti Fulgentii Discipulos eminuit *Fulgentius Ferrandus* Carthaginensis Ecclesiæ Diaconus, qui vixit usque ad annum *DXLVI* II. de quo plura habet *Facundus* Hermianensis in Africa Episcopus lib. 4. cap. 3. pro defensione trium Capitulorum. Hujus *Ferrandi* omnia Opera *Petrus Franciscus Chiffletius* publicavit *Divione* in Galliis anno *MDCXLIX*. *Facundus*, mox à me laudatus, Hermianensis in Africa Episcopus, doctissimus quidem fuit, sed in defensione trium

trium Capitulorum adeò pertinax, ut in Schismate occubuerit, sicut facilè colligitur ex illius *Epistola Fidei Catholica in defensione trium Capitulorum*, quam publicâ luce primus donavit *Lucas Dacherius* Benedictinus Cong. Sancti Mauri tomo III. *Spicilegii*. Duodecim etiam libros scripsit idem *Facundus* pro defensione trium Capitulorum, quodque gravius est, in ipsummet Vigilium Papam, qui tria Capitula damnavit, adeò acriter invecus est, ut illum proditionis, collusionis cum Acephalis, ambitionis & venalitatis arguerit, ut videre est præsertim in libro, quem edidit contra *Mocianum*, qui Africanos Antistites meritò redarguebat, quod sese à Vigilio Papa, & ab Ecclesia, trium Capitulorum causâ, segregarent. In eadem trium Capitulorum defensione perstitit *Liberatus* Ecclesiæ Carthaginensis Diaconus, qui libellum scripsit de *Heresi Nestoriana*, cui *Breviarii* titulum indidit, quod emendatissimum edidit, notisque elegantissimis illustravit eruditus *P. Garnierius* Soc. Jesu. Pro defensione itidem trium Capitulorum *Victor* Tununensis in Africa Episcopus plurimas ac gravissimas ærumnas pertulit, & ab Imperatore Justiniano variis exiliis afflictus est. Scripsit hic *Victor* Chronicon rerum gestarum ab orbe condito usque ad an. DLXVI. quo *Justinus Junior* Imperium aspiciatus est. Sed hujus Chronici prima pars interiit, superest tantum posterior, quæ ab an. CCCXLIV. quo desinit Prosper, orditur; & ad an. DLXVI. progreditur. Denique inter Afros Episcopos, qui sexto sæculo flourerunt, numerantur *Vigilius* Tapsensis in Bizacena Africæ Provincia Episcopus, qui libros quinque contra Nestorianam, & Eutychianam Hæresim edidit, insuper, *Disputationem cum Sabellio, Photino, & Ario*,
sub

sub nomine Sancti Athanasii , & undecim libros de *Trinitate*, eidem Sancto Athanasio perperam adscriptos . Multi eruditi viri existimant , hunc Vigilium Tapsensem esse auctorem Symboli , quod sic incipit : *Quicumque vult salvus esse &c.* quod vulgò attribuitur Sancto Athanasio ; *Primasius* Aduemetinæ Ecclesiæ in Bizacena Africæ Provincia Episcopus , qui libros quinque Expositionum in Apocalypsim , commentarios in Epistolas Sancti Pauli scripsit , & librum unum sic inscriptum : *Quid faciat hæreticum ?* Primasio cœvus fuit *Junilius* Africanus Episcopus, qui libros duos per modum *Quæstionum & Responsionum de partibus divinæ Legis* ad ipsum Primasium scripsit . Hic *Junilius* non est auctor Commentarioli in tria priora Capita *Geneleos* , sed potius Venerabilis *Beda*, ut modò convenit inter viros eruditos . *Engippus* Abbas Africanus thesaurum sententiarû ex diversis S. Augustini Operibus defloratarum collegit, cumque duos in libros distributum nuncupavit *Probe* Virgini Sacre. Hi sunt celebriores Scriptores , qui in Africa præfulserunt .

D. Quinam sunt illustriores Scriptores , qui sexto Ecclesiæ sæculo in Hispania floruerunt ?

M. Multos in Hispania egregios Scriptores recenset S. *Isidorus* Hispalensis Episcopus in lib. de Scriptoribus Ecclesiasticis , quos hic breviter indicabo . Agmen illorum ducet *Orentius* gente Hispanus , patriâ Tarraconensis , Episcopus Eliberitanus , qui Synodo Tarraconensi anno DXXVI. adfuit , scripsitque *Commonitorum Fidelium* metro heroico , cujus mentionem facit *Sigebertus* in Catalogo cap. 34. *Justinianus* Ecclesiæ Valentiniæ Episcopus librum edidit *Responsionum ad quemdam Rusticum de inter-*

interrogatis Questionibus quinque, ut videre est apud Isidorum cap. 20. lib. de Scriptoribus Ecclesiasticis. *Justus* Justiniani frater, Urgellensis, sive Orgellitanus in Catalaunia Episcopus interfuit Concilio Toletano secundo celebrato anno DXXXI. scripsit expositionem mysticam in Cantica Canticorum, cujus meminit Isidorus cap. 21. lib. de Scriptoribus Ecclesiasticis. Duas præterea ejusdem *Justi* Epistolæ evulgavit *Lucas Dacherius* tom. 3. Spicilegii. *Aprigius* Ecclesiæ Pacensis in Hispania Episcopus, vir fuit linguâ disertus, & scientiâ eruditus. Scripsit *Explicationem Apocalypseos B. Joannis*, sed illud Opus interiit. Alia quædam Opera, teste Isidoro cap. 17. lib. de Script. Eccl. edidit idem *Aprigius*, quorum nec nomina quidem supersunt. *Leander*, post diuturnam vitæ Monasticæ professionem Hispalensis Ecclesiæ Archiepiscopus factus, vir fuit, teste Isidoro ejus fratre cap. 28. lib. de Script. Eccl. suavis eloquio, ingenio præstantissimus, & vitâ non minus quàm doctrina clarissimus. Scripsit ad *Florentiam* sororem suam *Regulam de Institutione Virginum & contemptu Mundi*, quam primus in lucem edidit *Lucas Holstenius* in Collectione Regularum Parisiis anno MDCLXIII. Extat ejusdem *Leandri* Homilia, quam ipse in laudem Ecclesiæ, ob conversionem Gothorum, habuit post finitam Synodum Toletanam III. cujus magna pars ipse fuit, & orthodoxam fidem, extinctâ in Hispaniis Arianâ Hæresi, totius Gentis Gothicæ consensione confirmari fecit, adeò ut Gothorum Apostolus jure merito audiat. Tanti *Leandrum* Hispalensem Episcopum fecit *S. Gregorius Magnus* Papa, ut ipsi libros suos *Moralium* in Job nuncupaverit. Alia *Leandri* ad-

adversus Arianam Hæresim Opuscula , plures Homilias, multaque ad Officii Ecclesiastici incrementum & decorem spectantia refert S. Isidorus cap. 28. lib. de Script. Eccl. Zelum S. Leandri in profliganda Ariana Hæresi in Hispania imitati sunt *Licinianus* , *Severus* & *Joannes* dictus *Biclarie*nsis . Prior , seu *Licinianus* Carthaginensis Spartariæ in Hispania Episcopus , cujus meminit S. Isidorus cap. 29. lib. de Script. Eccl. ob Fidei Catholicæ studium à Leovigildo Hispaniæ Rege in exilium missus obiit Constantinopoli , scripsitque nonnullas Epistolas , quarum unica dumtaxat extat ad Gregorium Magnum Papam data . Alter , seu *Severus* Malacitanus in Hispania Episcopus , de quo agit Isidorus cap. 30. lib. de Script. Eccl. ob fidem itidem Catholicam à Leovigildo Rege exilio mulctatus est , scripsitque librum adversus Vincentium Casaragustanum Episcopum , qui à Catholicis ad Arianorum castra transierat ; composuit etiam alium librum *de Virginitate* , cui *Annuli* nomen dedit . Utrumque Opus periit , vel in Bibliothecarum angulis delitescit . Tertius , seu *Joannes* dictus *Biclarie*nsis , cum Ariana Hæresi , quæ in Hispania id ætatis latissimè grassabatur , nullo pacto consentire vellet , à Leovigildo Rege Ariano Barcinonem relegatus est , ubi integro decennio multas ab Arianis insidias & persecutiones invictâ animi constantiâ passus est . Postea , Monasterium *Biclarie*nsis ad Pirenei montis radices extruxit , ex quo eductus est , ut Episcopus Gerundensis consecraretur . Scripsit Joannes Biclarieⁿsis *Chronicon* ab anno DLXVI. quo Victor Tununensis desiit usque ad annum DXC. Composuit etiam Joannes Biclarieⁿsis *Regulam* in
sui

fui Monasterii usum, atque nonnulla alia Opera, ut refert Isidorus cap. 21. lib. de Script. Eccl. ubi Joannis Biclariensis cum laude meminit. Sed de Scriptoribus, qui sexto Ecclesiæ sæculo doctrinâ & pietate conspicui in Hispania floruerunt, satis dictum sit.

D. Habuitne Italia in sexto Ecclesiæ sæculo Scriptores, qui sanctitâte & eruditione conferri possint cum illis Viris illustribus, quos jam in medium protulisti?

M. Habuit Italia in sexto Ecclesiæ sæculo præclarissimos Scriptores, qui doctrinæ & pietatis famâ illis Auctoribus, quos jam memoravi, aut æquales, aut superiores fuerunt, quos inter hi celebriores fuerunt: *Ennodius* Episcopus Ticinensis, *Boetius*, *Cassiodorus*, *Victor* Capuanus Episcopus, *Rusticus*, *Dacius* Mediolanensis Episcopus, *Agnellus* Ravennatensis Episcopus, *Arator*, *Paschasius*, *Dionysius exiguus* & *S. Gregorius Magnus* Pontifex Maximus quorum Opera hic breviter assignabo.

Ennodius Episcopus Ticinensis, quem ut Sanctum Confessorem laudant Summi Pontifices *Nicolaus I.* in Epistola ad *Michaelem* Imperatorem, *Joannes VIII.* in Epistola ad *Bercharium* Abbatem, & *Gregorius VII.* in *Dictatu*, si tamen hujus Dictatus ille sit Auctor; genuina Legatione ad *Anastasium* Augustum functus est, & Symmachi decessoris Hormisdæ causam egregiè peroravit, ac propugnavit. Mortuus est anno dxxi. ejusque variarum Epistolarum libros novem, necnon Opuscula in lucem edidit, atque eruditis Notis illustravit *Sirmondus*, suntque inserta tom. ix. Bibliothecæ maximæ Patrum Editionis Lugdunensis.

Bor-

Boetius ex illustrissima Romæ familia ortus, vir fuit doctissimus, juxta ac religiosissimus. Tempore Anastasii Imperatoris, & Theodorici Gothorum Regis, qui tum temporis Italiæ dominabatur, claruit. Verum, illius Regis Ariani inimicitias expertus, Ticinum in exilium abductus est, ubi inter diuturni carceris tædia & squallores, præter aliquot Opuscula Philosophica, libros quinque edidit *de Consolatione Philosophiæ*, & librum *de Trinitate*, quem Doctor Angelicus S. Thomas Commentariis illustravit. Crescentibus postea cum tyrannide Theodorici Regis suspicionibus, immisso carnifice, Boëtius fuit in carcere decollatus anno DXXIV. Indicem Operum Boëtii exhibent *Possevinus* in Apparatu sacro, *Bellarminus*, & *Labbeus* in Dissertatione de Scriptoribus Ecclesiasticis. Observant etiam periti Critici, librum, cui titulus est: *de Disciplina Scholarium*, falsò adscriptum esse Boëtio, quippè qui pluribus ineptiis scatet, sicut eum legenti confestim patebit.

Cassiodorus Senator & Patricius Romanus Theodorico Italiæ Regi carissimus fuit, & ad varias ac primarias dignitates ab ipso evehctus. Plurima scripsit Opera, inter quæ primum obtinent locum *Commentarii in Psalmos*. *Epistolarum libri xii*. *Institutionum Divinarum libri duo*. *De Orthographiæ ex veteribus Grammaticis excerpta*. *Chronicon à conditu Mundi incipiens & delinens in annum Christi DXXIX*. *Historia Ecclesiastica*, quæ *Tripartita* dicitur, quam ex Græcis Auctoribus *Socrate*, *Sozomeno* ac *Theodoreto* per amicum suum *Epiphanium Scholasticum* latinè redditis concinnavit. *Liber de Anima*. *Libri xii*. de rebus gestis Gothorum, qui am-

ampliùs non extant, sed illos *Jornandes* Ravennæ Episcopus in Epitomen redegit, quam nunc habemus. Alia Opera edidit *Cassiodorus*, quæ mox perditæ sunt. At Commentarium in Cantica Canticorum non esse genuinum Cassiodori fœtum luculenter ostendit eruditus P. *Joannes Garetius* Monachus Benedictinus Congreg. S. Mauri in Præfatione in Cassiodorum, cujus Opera in duos Tomos distributa in lucem emisit, unâ cum vita ejusdem Cassiodori, quem Clarissimis parentibus natum *Scillacii*, quæ urbs Brutiorum tum erat primaria, eumque anno ætatis suo 60. vel 70. sæculo nuncium remisisse, & Sancti Benedicti Regulam in Cœnobio propè Scyllacium à se constructo professum fuisse, perdoctâ dissertatione evincit mox laudatus *Gareti*.

Victor Capuanus Episcopus anno DL. Cyclum Paschalem condidit adversus Victorem Aquitanum. De quo Cyclo egregiè edisserit *Bucherius* in Opere de Doctrina Temporum cap. XI.

Rusticus S. R. E. Diaconus *Judicatum* Vigilii Papæ, quo tria Capitula erant proscripta, maximis laudibus primùm extulit, at, mutatâ postmodum sententia, scripsit adversus Vigilium. Quapropter à Summo illo Pontifice damnatus, & propter Schisma exauctoratus fuit. Scripsit etiam *Rusticus* librum contra *Acephalos*.

Sunt nonnulli, qui *Dacium* Mediolanensem Episcopum inter Scriptores, qui sexto sæculo in Italia floruerunt, reponunt; quia existimant illum esse Auctorem *Chronici rerum Mediolanensium*, quod hætenus ineditum asservatur in Bibliotheca Mediolanensi. Verùm, doctissimus *Mabillonius* tom. I.

vet. Analect. pag. 3. rectè observat, *Dacium*, qui sexto Ecclesiæ sæculo Mediolanensi præfuit Ecclesiæ, non posse esse Auctorem illius Chronici, quia in eo narrantur res Mediolanensis Ecclesiæ ab octavo sæculo ad tempus Alexandri II. Papæ, definitque prædictum Chronicon in anno MLXVII. ex quo luculenter constat, illud non fuisse editum à *Dacio*, qui sexto sæculo Ecclesiam Mediolanensem regibat. Cæterum, quamvis *Dacius* non sit Auctor istius Chronici, inter viros tamen, qui sexto sæculo in Italia celebres fuerunt, sedem habere debet, quia Cassiodorus, vir hujus sæculi, ut mox ostendi, insignis, ad ipsum scripsit Epistolam, quæ libro duodecimo ejus Epistolarum ordine est vicesima septima.

Agnellus Ravennæ Episcopus Templa ab Ariani extructa purgavit, & ad verum Dei cultum traduxit, scripsitque Epistolam ad *Arminium* de ratione Fidei, quæ extat tom. VIII. Bibliothecæ Patrum.

Arator natione Ligur à Vigilio Papa, cui apprime charus fuit, inter Subdiaconos Ecclesiæ Romanæ sublectus, scripsit carmine heroico Historiam Actuum Apostolorum à S. Luca Evangelista descriptam, & duobus libris comprehensam, quæ habetur tomo x. Biblioth. Patrum.

Paschasius S. R. E. Diaconus libros edidit duos de *Spiritu Sancto*, qui inserti sunt tom. VIII. Biblioth. Patrum. *Laurentio* Antipapæ ex ignorantia favit Paschasius contra Symmachum legitimum Pontificem, & ob id ejus animam piacularibus Purgatorii pœnis addictam vidit *S. Germanus* Capuanus Episcopus.

Dionysius exiguus natione quidem Scythia, sed Monasterii Romani Abbas, ut multi post Venerabilem Bedam asserunt, Auctor est *Æræ Christianæ*, quâ in putandis annis à Natali Christi Domini etiamnum utitur Ecclesia Romana. At Dionysius in consignando initio illius *Æræ* anno quadragesimo quinto Imperii Augusti, quadriennio integro à vero Natali Christi aberravit. Christus enim, ut latè ostendi in *Traçtatu de Misteriis & Annis Christi*, natus est anno quadragesimo Imperii Augusti. Alia Opera lucubravit Dionysius, sed præsertim novam Canonum Collectionem adornavit, quæ statim ab Ecclesia Romana obviis ulnis excepta est, de qua legendus est doctissimus *Petrus de Marca* Archiepiscopus Parisiensis cap. 4. lib. 3. de concordia Sacerdotii & Imperii.

Postremò, *S. Gregorius Magnus*, de quo in superiori Colloquio multa jam diximus, patriâ Romanus, *Gordiani* Senatoris, & *Sylvia* filius, splendidissimum fuit Italiæ ac totius Ecclesiæ lumen. Ad supremum Pontificatum, invitus quidem anno dxc. evectus, omnes suas vires & cognitiones ad Ecclesiæ ornamentum, ad Religionis propagationem, & ad omnium Christianarum virtutum contulit incrementum. Malâ licet & adversâ valetudine diu afflictus, necnon gravi, atque diuturnâ vexatus podagrâ, edendis tamen ad Christianorum institutionem libris, qui sanctitatem ac eruditionem ubique spirant, jugiter incubuit. Opera genuina *S. Gregorii Magni* Papæ sunt ista: *Expositio Moralis in Job* in triginta quinque libros distincta, *Liber Pastoralis*, seu de Cura Pastoralis quatuor in partes distributus, *Homiliæ super Pro-*
phe-

phetam Ezechielem viginti duæ. Homiliæ quadraginta in Evangelia. Epistolarum libri duodecim. Antiphonarum. Sacramentarium, quod ex venerandæ antiquitatis Codice MS. edidit Hugo Menardus Benedictinus Congreg. S. Mauri. Quatuor libri Dialogorum, quos Hæretici, & nonnulli Catholici intemperantioris Critices viri Gregorio Magno abjudicant, dicentes, quatuor illos libros Dialogorum ineptis fabulis, & innumeris miraculis, quæ ab omni veri specie abhorrent, esse infartos. Sed istos Aristarchos meritò doctissimus noster Melchior Canus lib. XI. de locis cap. 6. castigat his verbis: Magnis, præclarisque virtutibus viri sanctissimi atque optimi id consequi meruerunt, ut in rebus ejusmodi, quas vel spectasse, vel ab aliis fide dignis, qui spectarint, se vidisse testati sunt, fides omnino illis habeatur. Qua in re Erasmus Roterdamus, aliique juniores quidam sæpè ac licentè errarunt. Addo etiam, quod licet hæc miracula, quæ S. Gregorius in his quatuor Dialogorum libris narrat, si ad debilis rationis humanæ trutinam expendantur, incredibilia videri possint, nihilominus spectata omnipotentia Dei, cui omnia parent, creditu facilia erunt. Sed hac de re plura leges apud Mabilonium tom. 2. Annalium, & sæculo 1. Benedictino. Inter Opera dubia S. Gregorii Magni collocant periti Critici Commentarium in libros Regum, & Commentarium in septem Psalmos Pœnitentiales. Reicitur autem à viris eruditis tamquam spurius & supposititius Commentarius in Cantica Canticorum, qui sub nomine S. Gregorii Magni circumfertur, tum quia non extat in MSS. Codicibus melioris notæ, tum quia etiam Paterio S. Gregorii Magni discipu-

lo, ejusque Operum studiosissimo, fuit omnino incognitus. Novam & accuratissimam omnium S. Gregorii Operum Editionem adornarunt eruditissimi Monachi Benedictini Congreg. S. Mauri, quam doctissimis Præfationibus, & Notis, atque Sanctissimi illius Pontificis Vitâ elegantissime descriptâ illustrarunt, & S. Gregorii Magni Opera in quatuor Tomos distribuerunt. Priori Tomo continentur Exegetica in sacram Scripturam, scilicet Moralium in Job libri triginta quinque, Homiliarum in Ezechielem Prophetam libri duo, & totidem Homiliarum in Evangelia. . . .

Secundus Tomus continet cætera S. Gregorii indubitata & germana Opera; sive ad Historiam, sive ad Ecclesiasticam spectent Disciplinam; scilicet librum Regulæ Pastoralis, quatuor Dialogorum libros, & Registrum Epistolarum.

Tertius Tomus bipartitus est. Prior pars exhibet librum Sacramentorum, Antiphonarium, & cætera liturgica cum eruditissimis Notis *Hugonis Menardi* Congreg. S. Mauri Benedictini. Altera ejusdem Tomi pars complectitur Commentarium in lib. i. Regum, Expositionem in Cantica Cantico- rum magna ex parte auctam, aliam in septem Psalmos expositionem, & concordiam quorundam sac- ræ Scripturæ testimoniorum.

Quartus Tomus duas etiam in partes divisus est. Prior pars continet S. Gregorii Vitam, tum à *Paulo Warnefridi*, tum à *Joanne Diacono* scriptam, & aliam recentem, quam ex Gregorianis præsertim scriptis adornarunt doctissimi Patres Benedictini Congreg. S. Mauri. Secunda pars ejusdem Tomi exhibet genuinum *Paterium* S. Gregorii Ma-
gni

gni discipulum, qualis habetur in quam plurimis optimæ Notæ MSS. & *Alusi* Tornacensis Monachi Expositionem in Novum Testamentum ex Gregorianis sententiis, quæ *Paterii* nomen in superioribus Editionibus immeritò præferebat.

D. Nihil hætenùs dixisti de Scriptoribus Græcis, qui sexto Ecclesiæ sæculo magnam eruditionis famam sibi in Oriente compararunt, quorum nomina, patriam, & Opera scire percipio.

M. Sæculum sextum singulari eruditione in Oriente nobilitarunt *Basilus* gente Cilix, & Presbyter Ecclesiæ Antiochenæ, qui scripsit tres libros *Historiæ Ecclesiasticæ*, quorum primus incipit ab anno CCCCL. & desinit in *Simplicii* Papæ morte anno CCCCLXXXIII. Secundus initium inde sumens, *Historiæ* filum perduxit usque ad annum DXVII. Tertius res gestas ab Imperatore *Justino* completitur. Alia ejusdem *Basilii* Opera refert *Photius* in Bibliotheca Cod. 95. & 107. *Theodorus* Ecclesiæ Constantinopolitanæ Lector collegit ex *Socrate*, *Sozomeno* & *Theodoreto* *Historiam* tripartitam duobus libris comprehensam à vicesimo *Constantini Magni* Imp. anno usque ad Imperium *Juliani* pertinentem. Huic Operi postea *Theodorus* duos alios *Historiæ Ecclesiasticæ* libros addidit, proprio Marte conscriptos, à tempore videlicet, quo *Socrates* *Historiæ* finem imposuit, ad principium usque Imperii *Justini* senioris, idest, usque ad ann. DXVII. *Jobius* Monachus Orientalis scripsit librum adversus *Severum* Hæreticum, cujus nulla supersunt hodiè vestigia, & libros novem de *Incarnatione Domini*, quorum fragmenta legi possunt in Bibliotheca *Photii* Cod. CCXXII. *Joannes Scythopolitanus* scri-

psit contra Eutychianos, & Acephalos. *Cyrillus Scythopolitanus* scripsit *Vitam S. Joannis Silentarii*, *Vitam S. Euthymii Abbatis*, & *Vitam S. Saba*. His Scriptoribus Græcis addi possunt *Procopius Gazæus* qui in plurimos Scripturæ sacræ libros edidit Commentarios, ut videre est in Bibliotheca Photii Cod. 160. 206. & 207. *Aretas Cæsareæ* in Cappadocia Episcopus, qui scripsit explanationem in Apocalypsim; *Zacharias Mytilenus* Episcopus, qui calamum strinxit in Manichæos; *Ephremius*, seu *Euphremius* Episcopus Antiochenus, multos composuit Tractatus pro defensione Concilii Chalcedonensis; *Joannes* natione Cappadox, Episcopus Constantinopolitanus, ob singularem vitæ abtinentiam dictus *Jejunator* scripsit librum *de Baptismo*, quem S. Leandro Hispalensi Episcopo dicavit, ut testatur S. Isidorus Hispalensis in lib. de Scriptori Ecclesiasticis, aliosque *de Pœnitentia* composuit libros, de quibus videndus est doctissimus *Joannes Morinus* Congreg. Oratorii Presbyter in fine libri, quem edidit *de Pœnitentia*. Inter libros, quos *Joannes* dictus *Jejunator* de Pœnitentia scripsit, præcipuus est *liber Pœnitentialis*, ex quo Græci multa in suis scriptis testimonia excerpserunt; *Eulogius* Patriarcha Alexandrinus libros quinque scripsit contra Novatianos apud Photium in Bibliotheca Cod. ccxxv. item librum contra *Theodosium*, & *Severum*, de quo idem Photius Cod. ccxxvi. item *Investivam Orationem contra unitatem subito exortam inter Theodosianos, & Gajanitas Acephalos*, de qua idem Photius Cod. ccxxvii. Præterea, Orationes xi. quarum argumenta perstringit Photius Cod. ccxxx. ejusdem Eulogii Patriarchæ Alexan-

xandrini Sermonem in diem Festum Palmarum, publicavit doctissimus *Combesius* tom. I. Au&uaril Bibliothecæ Græco-latinae, sicut jam observavimus in superiori Colloquio. Inter nobiles Scriptores Græcos jure censetur *Evagrius Scholasticus*, qui Epiphaniâ Syriæ urbe oriundus, post Eusebium, Socratem, Sozomenum & Theodoretum, libros sex Historiæ Ecclesiasticæ concinnavit, ab anno scilicet ccccxxxi. quo Nestoriana impietas in Concilio Ephesino confixa est, usque ad duodecimum annum Mauricii Imperatoris, idest, usque ad annum dxciii. Omnia, quæ ad suum argumentum dignè tractandum conducere poterant, summâ diligentia ex optimis Scriptoribus collegit, putâ ex Prisco, Joanne, Zacharia, Eustachio & Procopio Rhetoribus. Evagrii Historiam Ecclesiasticam doctissimus *Valesius* è Græco in Latinum sermonem vertit, & egregiis Notis illustravit. Versio quippè Christophorsoni, quâ usus est Baronius, variis in locis non satis viris eruditis accurata videtur. Scripsit etiam idem Evagrius volumen Epistolarum, Orationum & Relationum, imperante *Tiberio Constantino*, à quo *Quæstoris* dignitate donatus est; nec multò post, cum Orationem composuisset de laudibus *Mauricii* Augusti ob Natalem Theodosii nobilissimi pueri, codicillos præfecturæ ab eodem *Mauricio* accepit, ut ipsemet testatur in Epilogo Historiæ suæ.

D. Percensuistine omnes Scriptores Græcos, qui sexto sæculo floruerunt?

M. Supersunt adhuc nonnulli, quos hic breviter subiiciam. *Dorotheus* Archimandrita, & *Sane&tus Joannes Climacus* de moribus præclare scripserunt.

runt. Dorothei virtutes gravissimis testimoniis Theodori studitz, & Tarasii Patriarchæ Constantinopolitani celebratz sunt, ut liquet ex Prologo ad ipsius Dorothei *Asceticas Institutiones*, quæ extant in Biblioth. Patrum. Joannes verò dictus est Climacus ob librum quem edidit, *Scala Cæli* inscriptum, & in triginta Capita distinctum, quibus tamquàm totidem gradibus, seu scalis, ad perfectionis religiosæ culmen ascenditur. Vitæ S. Joannis Climaci aliquod Compendium à Daniele Monacho Raythuno elucubratum libro ipsius, *Scala Cæli*, inscripto præfixum est, quod etiam recitat Bollandus ad diem xxx. mensis Martii, quâ colitur S. Joannes Climacus. Scripsit etiam idem Sanctus librum ad Pastorem. Leontius Bizantinus Monachus in Laura S. Sabæ propè Hierosolymam scripsit librum de *Sectis Hæreticorum*, ac de Synodo Chalcedonensi in x. Actiones distinctum. Tres libros adversus Eutychianos & Nestorianos: Libros duos contra fraudes Apollinaristarum: item *Solutiones Argumentorum Severi*, & alia Opera, quæ sive edita, sive inedita versione latinâ donata & accuratissimè repurgata in lucem propediem emissurus est doctissimus noster Michael le Quien. Denique, in sexto Ecclesiæ sæculo duo Anastasii celebres fuerunt in Oriente, quos, sicut jam in superiori Colloquio observavimus, nonnulli inscitè confundunt. Alius quippè fuit Anastasius senior Ecclesiæ Antiochenæ Patriarcha, qui composuit tres Orationes, quas noster Combefissius inseruit tom. 2. Bibliothecæ Græco-latinae Sanctorum Patrum. Prima Oratio est de *Annuntiatione Beatissimæ Virginis*, sicuti & secunda; Tertia verò est de *Transfiguratione Domini*

ni nostri *Jesu Christi*. Extant etiam sub nomine Anastasii Patriarchæ Antiocheni quinque Orationes Dogmaticæ manuscriptæ in Bibliotheca Cæsarea, ut refert *Lambecius* tom. 7. Commentariorum de eadem Bibliotheca pag. 167. Alter *Anastasius* fuit Monachus, qui vixit in Monte Sinai, & ideo *Sinaita* appellatus. Hic Auctor est librorum xi. *Anagogicarum contemplationum in Hexameron*, quos tamen *Baronius* putavit esse factus Anastasii Patriarchæ Antiocheni. citantur enim hi libri in *Analibus Michaelis Glia* viginti circiter vicibus, ibique nunquam eorum Auctor Episcopus, aut Patriarcha Antiochenus appellatur, sed sæpius *Anastasius Sinaita*, ex quo colligitur, Anastasium Monachum Sinaitam legitimum esse horumce librorum parentem, non verò Anastasium Patriarcham Antiochenum. Liber, cui titulus: *Responsio Anastasii Episcopi ad Orthodoxorum aliquorum Christianorum interrogationes de diversis Capitibus Ecclesiasticis*, quem *Baronius* tribuit Anastasio Sinaitæ, neque ab hoc, neque ab Anastasio Patriarcha Antiocheno editus est; tum quia plures errores Græcorum inserti sunt in his *Quæstionibus & Responsionibus*; tum quia etiam in illis citantur *Olympiodorus*, qui decimo sæculo floruit, & alii juniores Scriptores. Liber inscriptus *Dux via adversus Acephalos* editus est ab Anastasio Monacho Sinaitæ, non verò ab Anastasio Patriarcha Antiocheno, ut visum est *Baronio*. Titulus enim in MS. Codice sic habet: *Exordium libri S. Anastasii Monachi Sinaitæ*. Similiter, *Oratio de sacra Synaxi*, & *Expositio in Psalmum sextum*, quæ à *Baronio* adscribuntur Anastasio Episcopo Antiocheno, sunt Anastasii Monachi Sinaitæ.

naitæ, & Notis à nostro *Combesio* illustrantur tom. 2. Bibliothecæ Græco-latine Sanctorum Patrum. Ausus est *Albertinus* Sectæ Calvinianæ Pseudo-Minister asserere in libro, quem edidit, de Sacramento Eucharistiæ, *Anastasium* Monachum *Sinaitam* credidisse, Eucharistiam esse meram figuram Corporis Christi virtutis ejus & efficaciam plenam. At *Anastasium* Monachum ab hoc errore, vindicant *Petrus de Marca* Archiepiscopus Parisiensis in Epistola ad *Lucam Dacherium*, *Arnaldus* Doctor Sorbonicus lib. 7. tom. 1. de perpetuitate fidei Catholica Ecclesiæ circa Eucharistiam cap. 2. & *Natalis Alexander* in sexto Ecclesiæ sæculo cap. 13. ubi doctissimi illi Scriptores pluribus probant, *Anastasium Sinaitam* Monachum realem Corporis Christi in augustissimo Eucharistiæ Sacramento constanter docuisse, quamvis errore sibi proprio, & in explicandis hujus Mysterii circumstantiis lapsus, opinatus sit, Corpus Christi in Eucharistia esse corruptibile, & affectiones, quæ conveniunt accidentibus, putà, frangi, dividi, dentibus conteri, stomacho digeri, alterari & corrumpi, Corpori Domini convenire. Quà in re licet erraverit *Anastasius Sinaita* Monachus, nunquam tamen deflexit à fide, quæ semper, ubique, & ab omnibus creditum est, Corpus Christi esse realiter præsens in Eucharistiæ Sacramento. Sed de Scriptoribus Ecclesiasticis, qui sextum sæculum doctrinâ & pietate illustrarunt, hæc prælibasse sufficiat.

COLLOQUIUM VI.

*De Doctrina, Disciplina, & Morali
Christiana sexti Ecclesie
seculi.*

D. **C**UM Ecclesie Catholice veritas in Doctrina, Disciplina, & Morali potissimum splendescat, hoc unum dumtaxat ad rerum, quæ ad Historiam sexti Ecclesie seculi spectant, plenam notitiam desiderari videtur, ut de Doctrina, Disciplina, & Morali hujus seculi breviter in isto Colloquio disseramus. Agedum, & ostende primò, quænam fuerit Doctrina sexti Ecclesie seculi?

M. Doctrina sexti seculi eadem planè fuit, quæ nunc obtinet in Ecclesia Catholica, & quæ ab Apostolis profecta invariabili seculorum serie ad nos usque constanti perpetuâque traditione propagata est. Profitebantur omnes fideles sexti Ecclesie seculi unam divinam Essentiam & tres Personas contra Arianos, & Sabellianos; duas in Christo naturas, divinam scilicet & humanam, contra Euty-chianos; unam personam, seu divinam, contra Nestorianos. Circà hæc duo præcipua fidei Orthodoxæ dogmata nulla prorsus Catholicos inter sexti Ecclesie seculi fuit controversia. Quapropter, jure meritò observat doctissimus Cardinalis Norisius in Dissertatione Historica *de uno ex Trinitate carne passo*, contentionem illam, quæ seculo sexto inter Catholicos exorta est, circà hanc propositionem: *Unus è Trinitate, carne passus est*, fuisse puram putam-

tamque inter Catholicos Logomachiam, qualis olim fuerat de hac voce *Hypostasis* quæstio tantâ opinionum discrepantiâ Latinam inter & Græcam Ecclesiam agitata. Latini siquidem, ut jam observavimus in sexto Colloquio in Historiam quarti Ecclesiæ sæculi, tres personas, & unam Hypostasim in Sancta Trinitate esse affirmabant; ipsis enim Hypostasis idem erat ac substantia, natura, & essentia. Ex adverso Græci tres Hypostasies in sanctissima Triade admittendas esse pertendebant, quia Hypostasis apud illos idem erat ac persona. Magno certè animorum æstu Latinos inter & Græcos diù multùmque disceptatum fuit, priusquàm Latini, re maturo examine ponderatâ, nomen Hypostasis in eadem, cum Græcis significatione reciperent, quamvis utrique, idest, tam Latini, quàm Græci, essent in re significata planè concordēs, nempe unam Essentiam esse divinam, tresque Personas, atque pro Catholico isto dogmate contra Hæreticos se strenuè depugnare utrique palàm gloriarentur. Huic igitur de significatione vocis *Hypostasis* contentioni in quarto sæculo accerrimè ventilatæ per similes fuit ista controversia Catholicos inter sexti sæculi enata circa hanc propositionem: *Unus è Trinitate carne passus est*, hanc quippè Monachi Scythæ cum quibusdam aliis Catholicis constanter propugnabant; alii verò Catholici eam Eutychianæ Hæreseos infimulabant, hincque tot clamoræ disputationes, & tot contra se facitæ hinc indè accusationes. Hæc tamen pura erat quæstio de nomine, quia utraque litigantium pars in fidei dogmate sentiebat, duas in Christo naturas indivisè adversus Eutychianos admittens, & unam in eodem Personam contra

Ne-

Nestorianos adstruens. Crediderim ipse, huic controversiæ inter Catholicos sexti sæculi obortæ locum dedisse errorem facti in hoc positum, quod multi Catholici hanc Scytharum Monachorum propositionem: *Unus è Trinitate carne passus est*, à blasphemia Petri Fullonis Hæretici Eutychiani non differre autumarent. Hic enim Hæreticus Trisagio addiderat hæc verba: *Qui crucifixus es pro nobis*, cum quibus ista propositio: *Unus è Trinitate crucifixus est*, sensu convenire videbatur. Verum, errore facti in hoc hallucinabantur illi Catholici; nam Petrus Fullo hæc verba: *Qui crucifixus es pro nobis* Trisagio, quo Deus ter Sanctus proclamatur, addiderat; ut innueret Filium Dei in substantia deitatis, vel Trinitatem totam passam esse. Duas siquidem in Christo naturas negabat impius ille Eutychianus. At Scythæ Monachi duas in Christo naturas inconfusas conceptis verbis profitebantur, & *unum è Trinitate*, scilicet Filium Dei, non in substantia Deitatis, sed carne passum ac crucifixum propugnabant. Suam, sociorumque suorum Scytharum Monachorum super hac re sententiam dilucidè exponit Maxentius in Professione Fidei de Christo, eamque Sancti Procli Constantinopolitani Episcopi, cujus doctrinam recepit Synodus Chalcedonensis, auctoritate confirmat in Tomo ad Armenios, ut legere est apud Natalem Alexandrum in selectis Historiæ Ecclesiasticæ Capitibus sæculo VI. Dissertatione secunda. Mirum igitur non est, si Joannes II. Summus Pontifex, postquam accuratè examinasset, hanc propositionem: *Unus è Trinitate carne passus est*, & Schytharum Monachorum doctrinam de duabus in Christo naturis perspectam exploratam

que

que habuisset; tanquam Catholicam approbaverit, & Aczmetas Monachos, qui prædictam propositionem, ceu Hæreticam, reprobabant, damnaverit; ut jam à nobis observatum est in superioribus Colloquiis. Nulla igitur in sexto sæculo dissensio aut controversia fuit inter Catholicos circa dogmata Sanctissimæ Trinitatis, & Incarnationis Verbi Divini, sed potius concors omnium doctrina, animorumque consensus.

D. Quænam fuit doctrina sexti sæculi circa alia fidei dogmata, quæ credenda proponit Ecclesia Catholica, & ab Hæreticis nostri temporis reprobantur?

M. Circà alia fidei dogmata, quæ credenda proponit Ecclesia Catholica, eadem prorsus fuit sæculi sexti doctrina ac nostra. Hæretici quippè velint nolint, fateri coguntur, Christianos sexti Ecclesiæ sæculi cultum detulisse Sanctis, eosque invocasse; Martyrum sepulchra, & Reliquias in maximo honore habuisse; Cœlibatum observatum, & Monasticum Institutum latè in eo fuisse propagatum; Primatum Romani Pontificis micuisse præsertim in persona Agapeti Papæ, qui, ut in superiori Colloquio diximus, Constantinopoli degens *Anthimium* Patriarcham Constantinopolitanum, cui impensius favebat *Theodora* Augusta, Sede Patriarchali propriâ suâ authoritate, nulloque cœcto Concilio, dejecit, & in ejus locum *Mennam* substituit. Præterea, Ecclesiam in Conciliis generalibus congregatam in defininiendis rebus fidei infallibili polere auctoritate Christiani sexti Ecclesiæ sæculi firmitè crediderunt cum Sancto Gregorio Magno, qui eodem sæculo Pontificatum gessit, & in Epistola

la Synodica ad Patriarchas, quæ est xxv. lib. 1. testatur, se quatuor Concilia Oecumenica suscipere, & venerari, sicut Sancti Evangelii quatuor libros. Quintum pariter Concilium generale, in quo tria damnata sunt Capitula, se pariter venerari profiteatur idem Summus Pontifex, eique, qui aliter sapit, anathema dicit, his verbis: *Quisquis ergò aliud sapit, anathema sit, quisquis verò prædictarum Synodorum fidem tenet, pax ei sit, à Deo Patre &c.* Quapropter, quando Sanctus ille Pontifex mitius egit cum Theodelinda Longobardorum Regina, & cum nonnullis, qui Concilii quinti generalis auctoritati in damnatione trium Capitulorum damnatione obtemperare detrectabant, nec eos pro Schismaticis habuit, usus est Sanctissimus ille Pontifex prudenti quadam Oeconomiâ, fortè quod eos ignorantia laborare potius, quàm pravâ voluntate noverat, cùmque doceri non refugerent, sperabat futurum ut tandem aliquandò relipiscerent, maxime postquam illis fuisset ostensum, Synodo Chalcedonensi nullum à quinta Synodo vulnus esse illatum, ut perperam sibi persuadebant. Sed prudentis Oeconomiæ elapso tempore, cùm pauci superessent trium Capitulorum defensores, summo jure cum illis egit Sanctus Gregorius, nec prius ipsos ad communionem recepit, quàm professi fuissent, se quintam Synodum pari cum aliis quatuor Oecumenicis veneratione suscipere. Hanc supremam Ecclesiæ auctoritatem in Conciliis Oecumenicis adstruens S. Gregorius Magnus, omnes contra Catholicam Fidem, aut jam exortos errores, aut in posterum orituros simul oppressit.

Sacrificia, Orationes, Vigilias, Eleemosynas, alia-

aliaque id genus pietatis officia Defunctis admodum prodesse, eosque subsidiis istis vel levari, vel ex toto liberari constans erat in vi. sæculo utriusque Ecclesiæ tam Orientalis, quam Occidentalis doctrina, sicut perspicuis, invictisque omnium sæculorum testimoniis confirmata testatur *Eustratius* Scriptor sexti Ecclesiæ sæculi, Magnæ Ecclesiæ Constantinopolitanæ Presbyter, in libro, cui titulus est: *Refutatio eorum, qui dicunt, animas Corporibus suis solutas non operari, nec precibus sacrificiisque, quæ pro iis offeruntur, adjuvari.* Quem librum *Leo Alaius* græcè latinèque edidit. Sanctus etiam Gregorius M. qui sexto sæculo universalem regebat Ecclesiam, pluribus in locis eandem doctrinam tradit, sed præcipuè lib. 4. Dialogorum cap. 39. ubi interroganti discipulo: *An post mortem Purgatorius ignis sit?* respondet Sanctus Doctor: *pro quibusdam levibus culpis tergendis esse antè Judicium purgatorium ignem.* Quod infra disertè probat. Et cap. 55. sic scribit: *Multorum solet animas etiam post mortem sacra oblatio hostiæ adjuvare; ita ut hanc nonnunquam ipsæ defunctorum animæ expetere videantur.*

Confessionis & Absolutionis Sacerdotalis necessitatem pluribus in locis probat idem Gregorius, maxime lib. 22. *Moralium* in Job. num. 31. & Homiliâ 26. in Evangelia, ubi sub Schemate Lazari ex mortuis à Christo revocati, & ab ejus Apostolis soluti, explicat peccatoris per Confessionem peccatorum è sepulchro prodeuntis resurrectionem & solutionem. Sic enim habet: *Lazaro ergò dicitur: Veni foras: ac si apertè cuilibet mortuo in culpa diceretur: Cur reatum tuum intra conscientiam abscon-*

scondis ? foras jam per Confessionem egredere, qui apud te per negationem lates. Veniat itaque foras mortuus, idest, culpam confiteatur peccator. Venientem verò foras solvant discipuli, ut Pastores Ecclesiæ ei pœnam debeant amovere, quam meruit, qui non erubuit confiteri quod fecit. Hæc de solutionis ordine breviter dixerim, ut sub magno moderamine Pastores Ecclesiæ vel solvere studeant, vel ligare.

Missarum solemnia in sexto sæculo fuisse celebrata, passim legimus in Operibus S. Gregorii Magni præsertim in Homiliis in Evangelia, ex quibus facile colligitur, fideles hujus sæculi constantè credidisse, Missam esse verum & propriè dictum Sacrificium, & in augustissimo Eucharistiæ Sacramento verè & realiter contineri Corpus, & Sanguinem Christi Domini. Quod etiam Sanctus Gregorius Magnus cap. 58. lib. 4. Dialog. his perspicuis verbis confirmat: *Ejus quippè ibi corpus sumitur, ejus caro in populi salutem partitur, ejus sanguis non jam in manus infidelium, sed in ora fidelium funditur. Refert quoque Joannes Diaconus in Vita ejusdem S. Gregorii Papæ lib. 2. cap. 4. quod Matrona quædam Beato Gregorio per stationes publicas Missarum solemnia celebranti solitas oblationes obtulerat. Cui post Mystèria traditurus cùm diceret: Corpus Domini Nostri Jesu Christi conservet animam tuam, lasciva subrisit. Ille continuò dexteram ab ejus ore convertens, partem illam Domini Corporis super Altare reposuit. Expletis verò Missarum solemnibus, Matronam coram populo inquisivit, quamobrem Corpus Dominicum sumptura ridere præsumperit? At illa diù mussitans tandem prorupit: quia panem, quem propriis manibus me fecisse cognoveram, tu Corpus Dominicum perhibebas. Tum*

Gregorius pro incredulitate mulieris cum tota plebe se in orationem prostravit, & post paululum surgens, particulam panis, quam super Altare posuerat, carnem factam reperit; quam coram cunctis incredula Matrona demonstrans, ad credulitatis gratiam tam illam revocare potuit, quam totum populum confirmare curavit. Rursus itaque in orationem cum eisdem prostratus, carnis frustum in panis primordia reformavit. Hoc longiusculum licet Joannis Diaconi testimonium producere operæ pretium duxi, ut manifestò constet, Christianos sexti Ecclesiæ sæculi firmâ fide credidisse realem præsentiam Corporis, & Sanguinis Christi Domini in Eucharistiæ Sacramento, sicque retundatur effrænis audacia *Albertini* Sectæ Calvinianæ Pseudo-Ministri, qui in libro, quem addidit, de Sacramento Eucharistiæ, duos adducit Scriptores sexti sæculi, videlicet *Anastasium Sinaitam* Monachum in lib. qui inscribitur, *Dux Via*, & *Facundum Hermianensem* Episcopum lib. 9. cap. 19. à quibus negatam esse ait realem præsentiam Corporis Christi in Eucharistiæ Sacramento. At *Anastasium Sinaitam*, sicut in superiori Colloquio vidimus, ab hoc errore viri doctissimi vindicant, sicut & *Facundum Hermianensem* Episcopum, ut videre est apud *Natalem Alexandrum* cap. 4. art. 6. §. 2. Hist. Eccles. sexti sæculi. Præterquamquod nulla omninò est *Facundi Hermianensis* Episcopi in Ecclesia autoritas, utpotè qui Schismaticus fuit, in Schismate scripsit & obiit. Sed quæ, amabo, major vesania esse potest, quam obscura quadam testimonia in horum duorum sexti sæculi Scriptorum libris expiscari velle, & luculentissima nolle recipere testimonia deprompta ex Operibus S. Gre-

go-

gorii Magni, qui eodem sæculo universæ Ecclesiæ clavum regebat, ex quibus Sole clariùs colligitur, omnes sæculi sexti Christianos præsentis realis Corporis & Sanguinis Christi Fidem constantissimè tenuisse? leges *Confessionem Gregorianam* typis Coloniæ editam apud *Arnoldum Quentelium* anno MDIV. Auctore *Theodoro Petrejo* Campensi Colonensis Carthusiæ alumno, qui invictè demonstrat, omnes fidei articulos, de quibus nobis impræsentiarum, cum Lutheranis, & Calvinistis, aliisque novis Hæreticis controversia est, à Sancto Gregorio Magno probatos & assertos esse, eorumque errores in antecessum à S. illo Doctore fuisse præfocatos.

D. Sine, quæso, ut te paululum interpellem, & à te perconter, an vera sit illa Historia, quæ circumfertur de anima *Trajani* Imperatoris in infidelitate defuncti ab inferis precibus Sancti Gregorii Magni liberata? Si enim hæc narratio vera sit, sequitur planè, Christianos sexti Ecclesiæ sæculi non consensisse nobiscum in hoc dogmate fidei, quo credimus, licitum non esse orare pro his, qui in sua impietate & in infidelitate demortui æternis sunt cruciatibus addicti, quia, ut inquit Scriptura Sacra, *in Inferno nulla est redemptio*.

M. Hæc narratiuncula, quam audisti, de liberatione *Trajani* ab Inferis, & de fufis ad eam impetrandam à Sancto Gregorio Magno precibus, jure meritò à viris eruditis fabulæ loco habetur. Enim verò, ut benè multa prætermittam momenta à peritis Criticis adducta, quæ rem planè conficiunt; quí credibile est, Sanctum Gregorium orare voluisse pro liberatione *Trajani*, quem sciebat in infidelitate mortuum, adeoque æternis flammis ad-

dictum, cum ipsemet lib. 4. Dialogorum cap. 44. & lib. 34. Moralium cap. 16. cum universa Ecclesia doceat, penas Inferni esse eternas, nullamque in Inferno redemptionem; ex quo infert S. ille Ecclesie Doctor, justos orare nec debere, nec posse pro hominibus in infidelitate, vel impietate defunctis, aut si pro illis oraverint, irritas planè esse eorum orationes. Legi potest super hac re caput decimum libri tertii de Vita Sancti Gregorii Magni quam tomo quarto recentis illius Operum editionis inseruerunt doctissimi Patres Benedictini Congregationis Sancti Mauri, ubi hanc, quæ vulgò jactatur, narratiunculam solidis momentis exsufflant. Habetur quidem illius narratiunculæ de liberatione animæ Trajani ab Inferis precibus Sancti Gregorii Magni aliqua mentio in oratione, quæ adscribitur Sancto Joanni Damasceno, *de iis qui in fide obdormierunt*; sed hanc orationem genuinum non esse Sancti Joannis Damasceni foetum apertè demonstrant periti Critici Bellarminus, Leo Allatius, & noster doctissimus P. Michael le Quien in Dissertatione quinta inter Damascenicæ, quas præfixit tomo 1. recentis Editionis Operum Sancti Damasceni, quam eruditis ac pulcherrimis Notis illustratam nuperrimè publicavit. Addo etiam cum Sancto Thoma in supplemento quæst. 73. art. 5. ad 5. quod, positâ veritate illius Historiæ de liberatione Trajani ab Inferis obtentâ precibus Sancti Gregorii, dici tantum posset, *Trajanum non fuisse in Inferno finaliter deputatum, sicut, inquit Angelicus ille Doctor, apparet ex omnibus illis, qui fuerunt miraculosè à mortuis suscitati, quorum plures constat Idololatrias & damnatos fuisse. De omnibus enim talibus similiter dici oportet, quod non*

non erant in Inferno finalitèr deputati, sed secundum præsentem propriorum meritorum justitiam; secundum autem superiores causas, quibus prævidebantur ad vitam revocandi, erat alitèr de eis disponendum &c. Patet itaque, sive hæc narratio de liberatione Trajani ab Inferis precibus Sancti Gregorii impetratâ vera, vel falsa sit, Christianos sexti sæculi credidisse, sicut & nos in præsentia credimus, nefas omninò esse preces fundere pro his, qui in impietate vel infidelitate mortui, decretorio Dei judicio in Inferno sunt finalitèr deputati, quod perpetuò ab ipsis Ecclesiæ primordiis fuit Christianæ Fidei dogma.

D. Maximo sanè rubore Hæretici, nisi omnè frontem exuissent, suffundi deberent, dùm ea tanto ardore oppugnant fidei Dogmata, quæ tamen, omni Ecclesiæ ævo unanimi Catholicorum consensione firmata & approbata fuerunt. Sed expendamus modò ea, quæ spectant Disciplinam tam Ecclesiasticam, quàm Monasticam, quæ viguit sexto sæculo.

M. Disciplinam Ecclesiasticam sexti sæculi expressam habemus in Canonibus Conciliorum, quæ eodem sæculo celebrata sunt, de quibus jam superius disseruimus. Nihilofeciùs pauca, quæ ad Disciplinam ergà Episcopos & Clericos in sexto sæculo observatam attinent, hic subnectere non erit à proposito nostro alienum. In primis, Episcopatus in Regionibus recens ad Christianam Fidem conversis Romanorum Pontificum autoritate instituebantur. Sic S. Gregorius Magnus, misso ad Sanctum Augustinum Anglorum Apostolum Pallio, præcepit ei, ut Metropoles duas institueret, Londini unam, alteram, Eboraci; & sub una-

quaque duodecim Episcopos consecraret, ut videre est in ejus Epistola xv. lib. viii. At in Regnis Christianis novi non instituebantur Episcopatus absque Metropolitanorum consensu. Occasione Schismatis Episcoporum Istriæ, qui trium Capitulorum, damnationi subscribere noluerunt, Aquilejensis Metropoli ab Episcopis Schismaticis, qui quatuor Patriarchalium Sedium jurisdictioni parere renuebant, Patriarcha fuit institutus. Sed extincto Schismate, nudum Patriarchæ nomen retinuit Aquilejensis Episcopus. Progressu tamen temporis Patriarchatus honorem, & primum locum supra omnes Italiæ Metropolitanos ei concesserunt Leo VIII. Clemens II. & Alexander II. De Patriarchatu Aquilejensi legendus est doctissimus Card. Norisus cap. 10. Dissert. de quinta Synodo, ubi fuse ac doctè de eo agit. Electiones Episcoporum fiebant à Coepiscopis, à Clero, & populo, non tamen eodem jure, nec eodem semper modo; summa autem eligendi potestas erat penès Clerum, Episcopos & Metropolitanum. In his Episcoporum electionibus, quæ sexto Ecclesiæ sæculo fiebant, cœpit Ecclesia multùm Imperatoribus & Regibus indulgere, ut eorum patrocinium promeretur ad comprimendos Hæreticos, ad executionem Canonum, ad Ecclesiæ bona facta testata conservanda maximè necessarium. Translationes Episcoporum, nisi postulante Ecclesiæ utilitate, non permittebantur. Coadjutores cum futura successione sibi designabant Episcopi, si id necessitas, aut Ecclesiæ commodum exigent. Sic S. Augustinus Anglorum Apostolus sibi successorem ordinavit Laurentium; & S. Sacerdos Lugdunensis Episcopus

S.Ni-

S. Nicetium nepotem suum à Childeberto Galliarum Rege obtinuit. Cessiones Episcoporum, nisi gravissimas ob causas, non admittebantur. Episcopos tamen, qui propter continuam ægritudinem obeundo muneri impares erant, cedere posse Episcopatu, & ad cessionem consiliis inducendos esse, non tamen compellendos docet *S. Gregorius Magnus*, ut videre est in pluribus ejus Epistolis, præsertim, juxta veterem editionem, 50. 51. 52. lib. 7. Quin & viri sanctissimi ducti solitudinis amore Episcopatum quandòque abdicarunt. Sic in Occidente *S. Sulpitius* Bituricensem, *Bonitus* Arvernensem, & *Leodegarius* Augustodunensem Ecclesias dimiserunt; alii verò Episcopatus honorem totis viribus fugiendum, & solo charitatis & obedientiæ motu suscipiendum esse, exemplo & scriptis docuerunt, quos inter potissimum censentur *S. Cæsarius*, *Fulgentius* & *Gregorius Magnus*, quos sacram dignitatem coactos suscepisse, testantur hi, qui Vitas illorum scripserunt *Cyprianus*, videlicet, *Ferrandus Diaconus*, & *Joannes Diaconus*. Episcopi ad residentiam in suis Ecclesiis tam juxta statuta Ecclesiæ, quam juxta leges ab Imperatore Justiniano promulgatas obstringebantur. A residentia tamen lege censebantur legitime dispensati, qui à suis Ecclesiis ideò aberant, ut Synodis interessent, vel ut nomine Principum Legationes maximi momenti ad alios Principes obirent, ut multis exemplis constat, potissimum *S. Leandri* Episcopi Hispalensis, qui Wisigothorum Hispaniæ Regum nomine Legationem obiit Constantinopoli; & *Joannis* atque *Agapeti* Summorum Pontificum, qui Gothorum in Italia regnantium Legatione apud Im-

peratorem Orientis functi sunt. Episcoporum jurisdictionis sæculo sexto erat amplissima, ipsosque de omnibus Monachorum, & Monialium causis judicare voluit Imperator Justinianus, earum cognitione Judicibus civilibus interdicta, ut videre est in ejus Novella 79. cap. 1. & 2. Bonorum Ecclesiasticorum suprema administratio penes Episcopos erat, qui tamen Oeconomos instituebant, qui bona Ecclesiæ diligenter curarent, & deinde Episcopis administrationis suæ curam redderent. Ecclesiæ bona quatuor in partes erant distributa, quarum una Episcopo; altera Clericis; tertia Pauperibus; quarta Fabricæ Ecclesiæ erat destinata. Non licebat Episcopis post consecrationem bona acquisita transmittre ad hæredes, sed solum bona, quæ ante Episcopatum possederant, vel quæ ipsis postea ex consanguineorum usque ad quartum gradum hæreditate obvenerant. Poterant tamen Episcopi bonorum, quæ propriâ comparaverant industriâ, non verò ex oblationibus fidelium, vel ex redditibus Ecclesiasticis congregaverant, quem vellent scribere hæredem. Demùm, sexto Ecclesiæ sæculo Episcoporum judicia & depositiones fiebant in Synodis Provincialibus, ita tamen ut possent Episcopi his in Synodis damnati vel depositi provocare ad Romanum Pontificem, ad quem de jure spectabat delegare Judices, qui ejusdem negotii examen in Provincia instaurarent, vel, si mallet, sententiam definitivam pronunciare; quod jus Romano Pontifici ratione Primatus, quem in universa obtinet Ecclesia, assertum est, & in Concilio Sardicensi vindicatum. Sed de his plura legis apud Clarissimum Patrem *Thomassinum* in sua *veteri &*

nova Ecclesiæ Disciplina, ex qua hæc pauca excerpisse sufficiat.

Venio nunc ad Disciplinam, quæ sexto Ecclesiæ sæculo circa Clericos fuit observata. Et primo, ætas ad suscipiendum Clericatum necdum hoc sæculo erat præfixa, sed parentes offerebant Deo pueros suos, Cleroque devovebant, sicut patet exemplo S. Cæsarii Episcopi Arelatensis, qui inter ipsa infantia rudimenta Clericus factus est, teste Cypriano in ejus Vita. At Episcopi, & Presbyteri ante annum ætatis trigessimum, Diaconi verò ante vigesimum quintum non ordinabantur ex illius sæculi disciplina, ut colligitur ex Concilio Agathensi Can. 16. & 17. Arelatensi IV. Can. 1. Aurelianensi III. Can. 6. In Seminariis instituebantur juniores Clerici, Majores etiam plerisque in Ecclesiis sub Episcopi disciplina in iisdem ædibus degebant & communibus stipendiis alebantur. Hæc sanctissima disciplina ad benè informandos Clericorum mores maximè necessaria in Galliis & in Hispaniis præsertim viguit. Clerici non solum vestibus à Laicorum habitu distinctis utebantur, sed etiam tonsurâ & coronâ, quam palam gestabant, ab illis omninò secernebantur. Non licebat Clericis ab Ecclesiis, quibus per ordinationem Episcopi erant addicti, ad alias migrare Ecclesias, & qui hanc legem violabant, tamquam desertores, vagi & instabiles puniebantur. Non poterant etiam Episcopi Clericos à suis beneficiis ad nutum amovere. Lex Cœlibatus sexto dumtaxat sæculo Subdiaconis in Ecclesia Latina imposita est, & ut Clericorum vita omni ex parte, sicut decet, irreprehensibilis esset, antiquis Canonibus, quibus Clericis districtè vetitum est

ne

ne in ædibus suis extraneas mulieres contubernales habeant, novum robur additum est. Rectæ etiam consultum est distributioni & administrationi bonorum Ecclesiasticorum, quorum Clerici Proprietarii, seu Domini non erant, sed tantum Oeconomi & dispensatores, itaut, detractis his, quæ ad honestam vitæ sustentationem necessaria erant, omne superfluum Pauperibus erogare tenerentur. Clerici multis immunitatibus sexto sæculo fruebantur, erantque liberi à fori sæcularis judicio, & quoties de fide, vel turpi vita, vel ob aliud crimen contrà sacros Canones admissum accusabantur, non ad Laici Judicis Tribunal vocabantur, sed coram Episcopo, vel alio Judice Ecclesiastico tota lis dirimi debebat. Quam Clericorum immunitatem strenuè tuitus est S. Gregorius Magnus, monens *Januarium* Calaritanum Episcopum Epist. 24. lib. 3. ne Sacerdotes à Laicis Judicibus in Sardinia opprimi pateretur, prohibuitque Clericis, & Monachis Diocesanos Neapolitanæ, ne ad aliud quàm Episcopi tribunal convenirent. Ad eandem Clericorum propugnandam immunitatem multa in Galliis, & in Hispaniis celebrata Concilia sub pœnis gravissimis inhibuerunt, ne Clerici quemquam apud sæculares Judices, Episcopo non permittente, pulsarent; & ne Laici, inconsulto Episcopo, Clericum ad sæculare tribunal vocarent. Hæc est, in summa, Ecclesiæ Disciplina, quæ sexto sæculo ergà Episcopos & Clericos fuit observata.

D. Viguitne in sexto Ecclesiæ sæculo, præcipuè in Occidente Monasticum Institutum, quod tantoperè Hæretici execrantur?

M. Monasticum Institutum sexto Ecclesiæ

ſæculo floruiſſe , & in Occidente præſertim longè latèque fuiſſe propagatum , liquidò colligitur ex benè multis Monafteriis , quæ eodem ſæculo in Italia , Gallia , & Hiſpania condita ſunt, de quibus legendus eſt doctiſſimus *Joannes Mabillonius* tom. 1. Annalium Benedictinorum , ubi datâ operâ de tempore , quo iſthæc Monafteria fundata ſunt , & de Diſciplina Monafterica , quæ in illis adamuſſim observabatur, accuratè juxta ac eleganter ediſſerit.

D. Quinam potiſſimum in VI. Eccleſiæ ſæculo Monaftericum Inſtitutum in Occidente propagarunt?

M. Monaftericum Inſtitutum ſexto Eccleſiæ ſæculo propagarunt in Occidente viri ſanctiſſimi , *Cæſarius* Arelatenſis Episcopus, *Aurelianus* ejusdem urbis Episcopus , *Columbanus* , *Ferreolus* Uccienſis Episcopus , *Benedictus* , *Donatus* , *Iſidorus* & *Fruetuoſus* , de quibus ſingillatim pauca hic dicemus .

S. *Cæſarius* duplicem , ut jam obſervavimus , Regulam ſcripſit : Unam Sanctimonialibus , in gratiam Cæſariæ ſororis ſuz & Monialium , quibus præerat in Monafterio Arelatenſi ejus ſumptibus extructo & fundato . Hæc S. Cæſarii Regula , quam doctiſſimus *Mabillonius* aſſerit primam fuiſſe Regulam pro Monialibus ſcriptam , legi poteſt in Codice Regularum *Holſtenii* , & apud eruditum *Cointium* in Annalibus Eccleſiæ Francorum , ubi deſcribitur , & prolixis atque eruditis Notis illuſtratur . Alteram S. Cæſarius pro Monachis ſcripſit Regulam , quæ in plerisque Monafteriis vigeat , præſertim in Gallia Narbonenſi . Hanc etiam *Holſtenius* in Codice Regularum edidit, illamque deſcripſit *Cointius* in Annalibus Francorum ad annum DXXXVI. & eruditis Commentariis expoſuit . Præter has duas

Re-

Regulas, S. Cæsarius etiam exhortationes Sanctimonialibus scripto direxit, in quibus superbiam, invidiam, virorum colloquia, & familiaritatem, vestium elegantiam, splendidumve colorem, opera manuum vana & superflua præ cæteris cavenda, monet, aitque, non sufficere vestem mutasse & religionis habitum suscepisse, nisi & mores mutantur, & contra malè dulces voluptates dimicetur. Præclara sunt quoque S. Cæsarii monita ad *Oratoriam* Abbatissam, quibus eam adhortatur, ut prior in Ecclesia inveniat, postrema exeat; prima itidem suscipiat laborem, posterior solvat; communibus cibis utatur in communi mensa; non sit vestibus ornatior cæteris, sed moribus; Sorores omnes diligat, ac parem eis caritatem impertiat; nomen ejus complures noverint, beneficia plurimi sentiant, vultum rari cognoscant; omnis denique actio sit propter Deum, sermo de Deo, cogitatio in Deum. Hos mores in Abbatissis Beatus ille Pontifex exigebat.

Sanctus Aurelianus duplicem itidem scripsit Regulam, unam Monachis, alteram sacris Virginibus inscriptam. Utramque publicavit *Holstenius* in Codice Regularum, & utramque pariter descripsit *Cointius*, notisque illustravit in Annalibus Ecclesiæ Francorum ad annum DCLVIII. Regula Sancti Aureliani in multis concordat cum Regula Sancti Cæsarii, in multis cum Regula Sancti Benedicti, quam uti Cæsarianam præ oculis videtur habuisse *Aurelianus*, sicut ostendit *Mabillonius* tom. I. Annal. Benedictinorum.

Sanctus Columbanus, cujus operâ tam in Gallia, quam in Italia Monasticum Institutum propaga-

gatum est, reliâ Hiberniæ Insula in Galliam venit anno DLXXXV. ut luculentè evincit Mabillonius in Vita Waldeberti Abbatis Luxoviensis, quæ extat parte II. sæculi III. Benedictini. Regulam, quam Monachi sequerentur, condidit, quæ etiamnum extat apud Holstenium in *Codice veterum Regularum*. Multa Monasteria extruxit Sanctus Columbanus, quorum præcipua fuere *Luxoviense*, *Angratense*, & *Fontanense* in Gallia; & in Italia *Bobienſe*, ubi & sepultus fuit, & reliquæ ejus multis pollent virtutibus, sicut narrat *Jonas* in ejus vita. Clariore Sancti Columbani Discipuli fuerunt *Gallus*, *Eustasius*, *Walaricus*, *Attala*, Sancti Columbani in Bobienſis Monasterii regiminis successor, itemque *Deicolus*, *Leobardus*, *Sigisbertus* Abbates. Monachos enim omnes, qui sub Sancti Columbani Regula militantes Deo servierunt, commemorare non licet.

Sanctus Ferreolus Ansberti filius Sancto Firmino Episcopo Ucetix patruo suo successit anno DLIII. ut ex ejus Vita à se ex veteri MS. publicata colligit *Marcus Antonius Dominicius*. In hac Urbe Monasterium excitavit, quod de suo nomine *Ferriolacense* nuncupavit. Extat ejus Regula, quam pro Monachis scripsit apud Holstenium, cujus Capitula pleraque conformia sunt Statutis S. Cæsarii Episcopi Arelatensis, sicut ostendit sæpè laudatus *Cointius* in Annalibus Ecclesiæ Francorum ad annum DLVIII. num. IX. & sequentibus.

Sanctus Benedictus Monachorum in Occidente parens, Nursiæ in Diocesi Spoletana natus, & Romæ liberalibus disciplinis excultus, ad eum locum, qui *Sublacus* dicitur, in altissimam speluncam secessit, ubi per triennium nemini notus delituit, sed spar-

sparsâ illius Sanctitatis famâ , benè multi Monachi se illi instituendos tradiderunt, quorum mores cum probare non posset , ab illis, non sine periculo vitæ suæ discessit , & in solitudinem se recepit, ubi , ob innumeram multitudinem discipulorum , qui ad ipsum quotidie confluebant , duodecim Monasteria ædificavit ; Dein, Montem Cassinum petiit, quem ex Dæmonum , & Idololatriæ receptaculo illustre sanctitatis sacrarium fecit, ibique clarissimi sui Ordinis fundamenta jecit , condendo Regulam , quæ Vitam Monasticam in Italia informavit ac propagavit , & postea in Galliam à Sancto Mauro ejus Discipulo allata est . Adeo posteris probata est hæc Sancti Benedicti Regula , ut Sancto Gregorio Magno lib. 2. Dialog. cap. 36. *Discretione præcipua, sermone luculenta* , Patribus verò & Conciliis Sancta , atque eodem spiritu, quo sacri Canones condita haberetur . Nullo discrimine quosvis admittit hæc Regula , pueros , adolescentes , adultos , pauperes æque ac divites ; nobiles & ignobiles ; servos & ingenuos , doctos pariter ac literarum expertes , Laicos & Clericos . Pueri oblati Monasteriis à parentibus , Vitæ Monasticæ jugum , ubi ætatem adultam attigissent , excutere non poterant . Sed de præstantia & propagatione Regulæ Sancti Benedicti in sexto Ecclesiæ sæculo , & de Monastica disciplina , quæ in ea præscribitur , legendus est doctissimus Mabillonius tom. i. Annalium Benedictinorum .

Sanctus Donatus Vesontiensis Episcopus , cum ex ordine Monachorum Sancti Columbani ad Episcopatum fuisset proventus , Monasterium sub ejus Regula construxit , quod *Palatium* vocabatur , & Monasterio puellarum , quod mater ejus fundaverat ,

rat, Regulam scripsit ex SS. Augustini, Cæsarii, Columbani, & Benedicti Regulis maximam partem defloratam, quam edidit, *Holstenius* in Codice Regularum.

Quandònam in Hispanias inuenta fuerit Monastica disciplina, non est omninò certum. Multi asserunt, *Donatum* Monachum coævum S. Gregorio Turonensi, qui adjunctis lxx. sociis ex Africa venit in Hispaniam, primùm in hanc Regionem intulisse Monasticam disciplinam. Sed doctissimus sæpè citatus *Mabillonius* probat Monasticam disciplinam antè hunc *Donatum*, qui sexto sæculo vixit, in Hispaniis jam viguisse. Ut ut sit, certum est, Sanctum *Isidorum* Hispalensem Episcopum Regulam Hispaniensibus Monasteriis ex priorum Patrum Regulis concinnatam tradidisse. S. *Leander* Episcopus itidem Hispalensis, frater Sancti *Isidori*, librum ad *Florentinam* sororem suam de *Institutione Virginis* scripsit, qui sacrarum Virginum Regula meritò nuncupatur, & ab *Holstenio* descriptus est in *Codice Regularum*. Denique S. *Fructuosus* Complutensis Abbas, Dumienfis deindè Episcopus, & ad Bracarensem Episcopatum postea translatus, Monasticum Institutum in Hispaniis maxime propagavit, ac duplicem pro Monachis condidit Regulam. Prior xxiii. altera xx. dumtaxat constat capitibus. Utraque S. *Fructuosi* Regula edita est ab *Holstenio* in *Codice Regularum*. Hi sunt Sanctissimi Viri, qui sæculo sexto Monasticum Institutum in Occidente latè propagarunt, & Regulas pro Monachis & Monialibus mirificâ Spiritus Sancti unctione perfusas condiderunt.

Obiter tamen cum doctissimo *Mabillonio* Præ-
fa-

fatione in primum Tomum Annalium Benedictinorum hic advertere debes, Monachos sexti sæculi, sicut & in aliis præcedentibus, non uni peculiari Regulæ fuisse addictos, sed aliquandò plures insimul Regulas uno in Monasterio fuisse observatas. Nam cum istæ Monasticæ Regulæ in unum scopum collimarent, ut scilicet, abdicatâ rerum omnium proprietate, Monachi vitam communem, laboriosam, abstinentem, & à sæculi tumultu alienam in summo silentio sub præpositi obedientia transigerent, statisque horis ad divina Officia, ad lectionem, ad curandum corpus convenirent; in promptu erat, quæ moralia sunt in omnibus Regulis proponere Monasteriis: Quæ verò ad Officia divina, juniorum, ac laboris pensum, aliaque in genus pertinent, pro nutu & arbitrio Abbatis, seu Præpositi, ex illis Regulis desumerentur. Quapropter in tanta Regularum diversitate maxima erat Monachos inter omnes animorum consensus, una societas, unumque corpus nullâ vestis quantâvis diversitate discretum. Facilis etiam erat ac promiscuus ex uno in aliud Monasterium transitus, mutuusque com meatus, non modò Latinorum inter sese, sed etiam Latinos inter ac Græcos, quibus sat erat stabilitatem in novo Monasterio firmasse. Ratio hujus est, quia in sexto sæculo, sicut & in aliis præcedentibus, unus tantum erat Monasticus Ordo necdum in varias Classes divisus, sicut in præsentia divisus est in Religiosis, exempli gratiâ, Mendicantibus, quorum universæ, quamvis latè sparsæ familiæ sub uno peculiari capite, certis, & cuique propriis Officiis ac legibus Deo militant. At sæculo sexto unus erat in commune omnium ubique Monachorum

rum tam Græcorum, quàm Latinorum modus & usus religionis profitendæ; nec isti Monastici Ordinis unitati officiebant diversæ illæ Regulæ, quæ aliquandò in eodem Monasterio observabantur, quia, ut inquit *Lucas Holstenius* in Præfatione ad *Codicem Regularum* cap.3. diversæ illæ Regulæ in commune proponebantur, ut ex his Monachi pro locorum & nationum differentia, vitam uniformi, quoad præcipua, disciplinâ temperarent. Primaria quipè & quasi fundamentalis Monachorum Regula Evangelium erat; illa scilicet Christi consilia, quæ castrare se ipsum propter Regnum Cælorum, quæ abnegare se & crucem tollere, quæ patrem, & matrem, uxorem & agros propter Christum relinquere; quæ vendere patrimonia & dare pauperibus; sicque nudos Christum sequi suadebant. Regulæ autem particulares nihil nisi ejus primæ ac universalis Regulæ applicationes, aut declarationes locis aut personis plerùmque aptatæ habebantur. Hinc optimè infert *Mabillonius*, mirum non esse, si Regula Sancti Benedicti non solum in novis, quæ sæculo condabantur, Monasteriis fuerit admissa, sed etiam in antiquioribus Cœnobiis, quæ jam suam habebant Regulam, fuerit adoptata, cum familiare effet illis temporibus, ut plures simul Regulæ in unoquoque Monasterio receptæ essent, & unitati Ordinis Monastici, qui tùm ubique unus erat, diversitas, varietasvè Regularum non obstaret. Leges etiam super hac re *Ludovicum Thomassinum* Oratorii Gallicani eruditum p̄sbyterum 1. parte lib.1. cap.24. de *veteri & nova Ecclesiæ Disciplina*.

D. Præscribitur in his Regulis, quas superius memorasti, severa Monastica disciplina?

M. Severa in istis Regulis indicitur Monachis disciplina, quæ ad ista Capita revocari potest. Tenebantur Monachi Abbatibus promptè obtemperare, Christum per arctam viam sequi, abdicationem omnium bonorum temporalium perpetuò profiteri; jugem à carnibus abstinenciam, interioris vestitus asperitatem, silentium quocumque tempore, sed præsertim horis nocturnis observare, longa jejunia protrahere, vilibus cibis vesci, lamentis peccata sua plangere, corpus abstinentiis atterere, lectioni & meditationi Sacrarum Scripturarum vacare, brevem somnum carpere, noctu diùque divinas laudes in Ecclesia celebrare, vitam solitariam ducere, & quotidie operari manibus suis, ut non solum vitæ necessaria sibi procurarent, sed etiam indigentia aliorum propriis laboribus consulerent. His sanctissimis legibus adstricti Monachi soli Deo intenti serviebant, & angelicam vitam in terris agentes cupiebant cum Apostolo dissolvi & esse cum Christo, ut cœlestibus delitiis, ad quas continuò anhelabant, æternum potirentur. Sed de Monastica sexti sæculi disciplina satis, pro suscepti operis nostri brevitate, dictum sit, de qua, si plura scire aveas, leges *Holstenium*, *Cointium*, & *Mabillo-nium* locis suprà citatis, ubi sitim tuam ad satietatem usque explere poteris.

D. Explanatis his, quæ ad fidei doctrinam, & disciplinam tam Ecclesiasticam, quam Monasticam sexti Ecclesiæ sæculi spectant, hoc unum tantum impræsentiarum superest, ut doctrinam Moralem ejusdem sæculi exponas, atque summarim perstringas præcepta benè vivendi, quæ SS. Patres fidelibus tradiderunt.

M. Pa-

M. Patres sexti Ecclesiæ sæculi aliorum, qui ipsos præcesserant, vestigiis insistentes, doctrinam Moralem tum in Operibus Asceticis, tum in Homiliis, quas ad populum habebant, diligentèr juxta ac eruditè exposuerunt. In hoc tamen genere duo præcipuè excelluerunt, videlicèt *Sanctus Joannes Climacus* apud Græcos, & *Sanctus Gregorius Magnus* Papa apud Látinos. In libris Moralibus Sancti Gregorii Magni, qui habentur Tomo 1. recentis ejus Operum Editionis adornatæ à Patribus Benedictinis Congregationis Sancti Mauri, extant optima morum præcepta omni ætati, sexui, & conditioni consentanea, ex quibus, velut è totius Evangelicæ Moralis promptuariis, Verbi Divini Præcones, & animarum Curatores tutissimam & saluberrimam haurire possunt moralem doctrinam ad dirigendas animas suæ curæ concreditas in viam salutis. Tot inter præcepta moralia non pigebit aliqua ex Sanctissimi illius Pontificis Operibus excerpta seligere, hicque subnectere, ut specimen aliquod moralis doctrinæ sexti sæculi habere possis.

In primis, lib. xix. in Caput xxix. in Job n. 30. docet S. Gregorius Magnus, in Ecclesiæ Reſtoribus, quod de Confessariis præsertim intelligendum est, nec vigorem debere esse rigidum, nec mansuetudinem dissolutam. *Sunt namque, inquit Sanctus ille Doctor, nonnulli ita districti, ut omnem mansuetudinem benignitatis amittant: & sunt nonnulli ita mansueti, ut perdant districti jura regiminis. Unde cunctis Reſtoribus utraque summopere sunt tenenda, ut nec in disciplina vigore benignitatem mansuetudinis, nec rursus in mansuetudine districtiorem deserant disciplinæ; quatenus nec à compassione pietatis obdure-*
Z 2
ſcant,

scant, cum contumaces corrigunt, nec disciplinae vi-
gorem molliant, cum infirmorum animos consolantur.
Regat ergo vigor mansuetudinem, & mansuetudo or-
net vigorem, & sic alterum commendetur ex altero,
ut nec vigor sit rigidus, nec mansuetudo dissoluta.
 Juxta hanc sapientissimam S. Gregorii Magni Re-
 gulam debent Pastores & Rectores animarum à ri-
 gidiori, sicut & à molliori morum disciplina ex
 æquo abhorreere, & in medio consistere, ne ad
 extrema impingentes, auctores sint ruinæ & damna-
 tionis multorum. Sunt enim nonnulli, ut obiter
 dicam, qui in regimine animarum, quod S. Gre-
 gorius Magnus *Artem artium* appellat, sese ingenio-
 sos præbent in evellendis spinis pœnitentiæ, in
 dissipanda lege Christi, in excutiendis conscientiarum
 scrupulis; solertes in excogitandis lenociniis, &
 flexibilibus quibusdam regulis, quò peccatores
 farcinâ licet criminum gravati commodiorem vi-
 tam agere, & in utramvis, ut ajunt, aurem dor-
 mire possint; sagaces in præscribendis vivendi for-
 mulis, quæ in malis bona, in ambiguis certa, in
 laboribus otium, in dubiis securitatem, in peri-
 culis promittunt tranquillitatem, quin, stupendâ
 rerum mutatione efficiunt, ut dulcescat quod ama-
 rum est, blandiatur quod horrendum est, formo-
 sum fiat & suave, quod deforme & foetidum est.
 Sunt verò ex adversò alii nonnulli, qui nimiam mo-
 rum asperitatem peccatores adeò terrent, ut in cau-
 sa sint, cur in desperationem suæ salutis adducti
 prorumpant ad præcipitium, & cum infelice Juda
 ad funestum laqueum confugiant. Ab utroque
 itaque extremo saluti animarum perindè noxio, ut
 sibi caveant Rectores animarum, debent, juxta
 hanc

hanc Regulam à S. Gregorio Magno prudentissimè statutam, esse erga peccatores mansueti æque ac severi, ut possint infirmos lacte nutrire ne periclitentur, robustis solidiorem cibum porrigere ut in virtute adolecant, alios mansuetudine allicere, alios rigidioris disciplinae virgâ à vitiis deterrere, sicque omnibus omnia facti omnes peccatores Christo lucrifaciant.


Præterea, S. Gregorius Magnus Homiliâ xxv, in Evangelia docet Pastores, & eos, quibus incumbit cura animarum, quo pacto ligandi atque solvendi potestate uti debeant: *videndum est*, inquit, *quæ culpa præcessit, aut quæ sit pœnitentia secuta post culpam; ut quos omnipotens Deus per compunctionis gratiam visitat, illos Pastoris sententia absolvat. Tunc enim vera est absolutio præsentis, cum interni arbitrium sequitur iudicis. Quâ alterâ Sanctissimi Pontificis Regulâ damnantur laxi illi animarum Rectores, qui consuetudinariis & inveteratis peccatoribus toties impendunt absolutionis beneficium, quoties ipsi, quasi canes ad vomitum revertentes, peccata sua confitentur, etiamsi nulla in illis veræ pœnitentiæ, ac sinceræ conversionis signa appareant.*

Tertiò, S. Gregorius Magnus Homilia xx. in Evangelia peccatoribus jam ad meliorem frugem conversis modum constantem ac veram pœnitentiam agendi præscribit his verbis: *Aliud namque est pœnitentiæ fructum facere, aliud dignum pœnitentiæ fructum facere. Ut enim secundum dignos pœnitentiæ fructus loquamur; sciendum est, quia quisquis illicita nulla commisit, huic jure conceditur ut licitis utatur, sicque pietatis opera faciat, ut tamen, si noluerit, ea,*

ea, qua mundi sunt, non relinquat. At si quis in for-
 nicationis culpam, vel fortasse, quod gravius est, in
 adulterium lapsus est, tantò a se licita debet abscinde-
 re, quanto se meminit & illicita perpetrasse. Item,
 S. Doctor Homilià xxiv. in Evangelia, ait, Artes,
 quæ vix absque peccato exerceri possunt, omninò
 post conversionem esse relinquendas: Sunt enim,
 inquit, pleraque negotia, quæ sine peccatis exhibere
 aut vix aut nullatenus possunt. Quæ ergò ad peccatum
 implicant, ad hac necesse est ut post conversionem ani-
 mus non recurrat: Et Homilia xxxiv. in Evangelia,
 docet idem S. Pontifex in quo sita sit vera pœniten-
 tia: Pœnitentiam quippè agere, est & perpetrata
 mala plangere, & plagenda non perpetrare. Nam qui
 sic alia deplorat, ut tamen alia committat, adhuc pœ-
 nitentiam agere aut dissimulat, aut ignorat. Ad hanc
 S. Gregorii moralem Doctrinam, quæ sexto Ec-
 clesiæ sæculo obtinebat, si peccatorum conversio-
 nes, quæ nostris temporibus fiunt, exigantur,
 quàm paucæ, proh dolor! invenientur veræ, since-
 ræ ac diuturnæ. Mitto, brevitatis ergò, alia quàm
 plurima utilissima morum præcepta, quæ S. Gre-
 gorius passim tradit in suis libris Moraliibus, vide-
 licet in libris xxxv. Moralium in Job, in duobus
 libris in Ezechielem, & in duobus libris in Evan-
 gelia, in quibus totus est Sanctissimus Pontifex, ut
 Christianos adhortetur ad amorem Dei super
 omnia, ejusque mandatorum observationem, ad
 dilectionem proximi, ad timorem judiciorum Dei,
 ad dignam celebrationem Festorum, & Sacramen-
 torum susceptionem, ad tolerantiam malorum in
 adversis, ad odium omnium vitiorum, ad exerci-
 tium & incrementum Christianarum virtutum.

Hos itaque S. Gregorii Magni libros Morales mirificâ Spiritus Sancti unctiōe perfusos, auctor tibi sum, charissime Discipule, ut assidue pervolvās, puram & integerrimam Moralem Christianam ex illis haurias, ad cujus normam tuos mores jugiter componas. *Hoc enim faciens, & te ipsum saluum facies, & eos qui te audiunt, verba sunt Apostoli Pauli* 1. à limotheum cap. iv.

Finis Tomi secundi.



MEN-

M E N D A,

Quæ irrepperunt in Editionem
hujusce Tomi secundi.
Hist. Ecclesiasticæ.

		<i>Errata.</i>	<i>Corrige.</i>
Pag.	lin.		
35	23	ementiam	ementitam.
78	21	Chakedonense	Chakedonensem.
80	22	Est	Ast.
135	9	quum	quem.
201	27	quarti	quinti:
270	13	quia	quin.
297	9	Hierosolymitanum	Hierosolymitanam
302	33	tfeu	feu.

Aliorum erratorum, quæ irrepperunt, & hic notata non sunt, veniam indulgeat benignus Lector, atque medicam manum admoveere non dedignetur; maxime cum ipse ob eam, qua laboro, agritudinem oculorum, relegendi, corrigendive errata molestiam penè intolerabilem vix ac ne vix quidem suslinere possim, nec ullum omnino Amanuensem habeam, cui hanc curam incredibilis patientiæ, laboris, tædii, atque fastidii certissimè plenam committere valeam.







